

॥ श्रीहरिः ॥

श्रीरामचरितमानसकी संक्षिप्त

विषय-सूची

विषय	पृष्ठ	विषय	पृष्ठ
भगवान् श्रीजानकीनाथ	१०	पुष्पवाटिका-निरीक्षण	१६०
पारायण-विधि	११	धनुष-भंग	१७८
नवाह्नपारायणके विश्राम-स्थान	१६	श्रीसीता-राम-विवाह	२०४
मासपारायणके विश्राम-स्थान	१६	अयोध्याकाण्ड	
श्रीरामायणजीकी आरती	१७	मंगलाचरण	२३५
श्रीरामशलाका-प्रश्नावली ...	१८	राम-राज्याभिषेककी तैयारी	२३६
जो पै तुलसी न गावतो	२४	श्रीसीता-राम-संवाद	२६६
श्रीगोस्वामी तुलसीदासजीकी		श्रीलक्ष्मण-सुमित्रा-संवाद ..	२७२
संक्षिप्त जीवनी	२५	वन-गमन	२७५
बालकाण्ड		केवटका प्रेम	२८६
मंगलाचरण	३३	श्रीराम-भरद्वाज-संवाद	२८९
श्रीनाम-वन्दना	४७	श्रीराम-वाल्मीकि-संवाद ...	२९८
याज्ञवल्क्य-भरद्वाज-संवाद ..	६२	चित्रकूट-निवास	३०३
सतीका मोह	६५	दशरथ-मरण	३१४
शिव-पार्वती-संवाद	९७	भरत-कौसल्या-संवाद	३१९
नारदका अभिमान	१०६	भरतका चित्रकूटके लिये	
मनु-शतरूपाका तप	११४	प्रस्थान	३३०
प्रतापभानुकी कथा	१२०	भरत-भरद्वाज-संवाद	३४०
राम-जन्म	१४१	राम-भरत-मिलन	३५७
विश्वामित्रकी यज्ञरक्षा	१५१	जनकजीका आगमन	३७५

विषय	पृष्ठ-संख्या
श्रीराम-भरत-संवाद	३८६
भरतजीकी विदाई	३९७
नन्दिग्राममें निवास	४००

अरण्यकाण्ड

मंगलाचरण	४०३
जयन्तकी कुटिलता	४०४
श्रीसीता-अनसूया-मिलन ..	४०७
सुतीक्ष्णजीका प्रेम	४१०
पञ्चवटी-निवास	४१५
खर-दूषण-वध	४२१
मारीच-प्रसंग	४२३
सीताहरण	४२६
शबरीपर कृपा	४३१

किष्किन्धाकाण्ड

मंगलाचरण	४४१
श्रीराम-हनुमान्-भेंट	४४२
बालि-वध	४४७

सीताजीकी खोजके लिये	
बंदरोंका प्रस्थान	४५५
हनुमान्-जाम्बवन्त-संवाद ..	४५८

सुन्दरकाण्ड

मंगलाचरण	४६१
लङ्कामें प्रवेश	४६४
सीता-हनुमान्-संवाद	४६९
लङ्का-दहन	४७६


विषय	पृष्ठ-संख्या
श्रीराम-हनुमान्-संवाद	४७९
लङ्काके लिये प्रस्थान	४८१
विभीषणकी शरणागति	४८६
समुद्रपर कोप	४९३

लङ्काकाण्ड

मंगलाचरण	४९७
सेतुबन्ध	४९८
अंगद-रावण-संवाद	५०९
लक्ष्मण-मेघनाद-युद्ध	५३०
श्रीरामकी प्रलाप-लीला ..	५३४
कुम्भकर्ण-वध	५४०
मेघनाद-वध	५४४
राम-रावण-युद्ध	५५४
रावण-वध	५६५
सीताजीकी अग्नि-परीक्षा ..	५७०
अवधके लिये प्रस्थान	५७८

उत्तरकाण्ड

मंगलाचरण	५८३
भरत-हनुमान्-मिलन	५८४
भरत-मिलाप	५८७
रामराज्याभिषेक	५९२
श्रीरामजीका प्रजाको उपदेश ..	६११
गरुड़-भुशुण्डि-संवाद	६२३
काकभुशुण्डि-लोमश-संवाद ..	६५४
ज्ञान-भक्ति-निरूपण	६५८



ध्यान

रक्ताम्भोजदलाभिरामनयनं पीताम्बरालङ्कृतं
 श्यामाङ्गं द्विभुजं प्रसन्नवदनं श्रीसीतया शोभितम् ।
 कारुण्यामृतसागरं प्रियगणैर्भ्रात्रादिभिर्भावितं
 वन्दे विष्णुशिवादिसेव्यमनिशं भक्तेष्टसिद्धिप्रदम् ॥

‘जो भक्तोंकी अभिलाषा पूर्ण करनेवाले हैं; ब्रह्मा, विष्णु, शिव आदि निरन्तर जिनकी सेवा किया करते हैं; हनुमान्, सुग्रीव एवं भरत आदि भाई बड़े प्रेमसे जिनकी आराधनामें लगे रहते हैं; जो अहैतुक और अनन्त करुणारूपी अमृतके सागर हैं; जिनके साथ श्रीसीताजी शोभायमान हो रही हैं; उन श्यामसुन्दर, द्विभुज, पीताम्बरधारी, प्रसन्नमुख, लाल कमलके दलके समान सुन्दर नेत्रवाले भगवान् श्रीरामकी मैं वन्दना करता हूँ।’



भगवान् श्रीजानकीनाथ

जय जानकिनाथा, जय श्रीरघुनाथा ।
दोउ कर जोरें बिनवौं प्रभु ! सुनिये बाता ॥ टेक ॥
तुम रघुनाथ हमारे प्रान, पिता-माता ।
तुम ही सज्जन-संगी भक्ति-मुक्ति-दाता ॥ जय० ॥
लख चौरासी काटो मेटो यम-त्रासा ।
निसिदिन प्रभु मोहि राखिये अपने ही पासा ॥ जय० ॥
राम भरत लछिमन सँग शत्रुहन भैया ।
जगमग ज्योति विराजै, सोभा अति लहिया ॥ जय० ॥
हनुमत नाद बजावत; नेवर झमकाता ।
स्वर्णथाल कर आरती कौसल्या माता ॥ जय० ॥
सुभग मुकुट सिर, धनु सर कर सोभा भारी ।
मनीराम दर्शन करि पल-पल बलिहारी ॥ जय० ॥



॥ श्रीहरिः ॥

पारायण-विधि

श्रीरामचरितमानसका विधिपूर्वक पाठ करनेवाले महानुभावोंको पाठारम्भके पूर्व श्रीतुलसीदासजी, श्रीवाल्मीकिजी, श्रीशिवजी तथा श्रीहनुमान्जीका आवाहन, पूजन करनेके पश्चात् तीनों भाइयोंसहित श्रीसीतारामजीका आवाहन, षोडशोपचार पूजन और ध्यान करना चाहिये। तदनन्तर पाठका आरम्भ करना चाहिये। सबके आवाहन, पूजन और ध्यानके मन्त्र क्रमशः नीचे लिखे जाते हैं—

अथ आवाहनमन्त्रः

तुलसीक	नमस्तुभ्यमिहागच्छ	शुचिव्रत।
नैर्ऋत्य	उपविश्येदं पूजनं	प्रतिगृह्यताम् ॥ १ ॥

ॐ तुलसीदासाय नमः।

श्रीवाल्मीक	नमस्तुभ्यमिहागच्छ	शुभप्रद।
उत्तरपूर्वयोर्मध्ये	तिष्ठ गृह्णीष्व	मेऽर्चनम् ॥ २ ॥

ॐ वाल्मीकाय नमः।

गौरीपते	नमस्तुभ्यमिहागच्छ	महेश्वर।
पूर्वदक्षिणयोर्मध्ये	तिष्ठ पूजां गृहाण	मे ॥ ३ ॥

ॐ गौरीपतये नमः।

श्रीलक्ष्मण	नमस्तुभ्यमिहागच्छ	सहप्रियः।
धाम्यभागे	समातिष्ठ पूजनं संगृहाण	मे ॥ ४ ॥

ॐ श्रीसपत्नीकाय लक्ष्मणाय नमः।

श्रीशत्रुघ्न नमस्तुभ्यमिहागच्छ सहप्रियः ।
पीठस्य पश्चिमे भागे पूजनं स्वीकुरुष्व मे ॥ ५ ॥

ॐ श्रीसपत्नीकाय शत्रुघ्नाय नमः ।

श्रीभरत नमस्तुभ्यमिहागच्छ सहप्रियः ।
पीठकस्योत्तरे भागे तिष्ठ पूजां गृहाण मे ॥ ६ ॥

ॐ श्रीसपत्नीकाय भरताय नमः ।

श्रीहनुमन्नमस्तुभ्यमिहागच्छ कृपानिधे ।
पूर्वभागे समातिष्ठ पूजनं स्वीकुरु प्रभो ॥ ७ ॥
ॐ हनुमते नमः ।

अथ प्रधानपूजा च कर्तव्या विधिपूर्वकम् ।
पुष्पाञ्जलिं गृहीत्वा तु ध्यानं कुर्यात्परस्य च ॥ ८ ॥

रक्ताम्भोजदलाभिरामनयनं पीताम्बरालङ्कृतं
श्यामाङ्गं द्विभुजं प्रसन्नवदनं श्रीसीतया शोभितम् ।
कारुण्यामृतसागरं प्रियगणैर्भ्रात्रादिभिर्भावितं
वन्दे विष्णुशिवादिसेव्यमनिशं भक्तेष्टसिद्धिप्रदम् ॥ ९ ॥

आगच्छ जानकीनाथ जानक्या सह राघव ।
गृहाण मम पूजां च वायुपुत्रादिभिर्युतः ॥ १० ॥
इत्यावाहनम् ।

सुवर्णरचितं राम दिव्यास्तरणशोभितम् ।
आसनं हि मया दत्तं गृहाण मणिचित्रितम् ॥ ११ ॥
इति षोडशोपचारैः पूजयेत् ।

ॐ अस्य श्रीमन्मानसरामायणश्रीरामचरितस्य श्रीशिवकाक-
भुशुण्डियाज्ञवल्क्यगोस्वामितुलसीदासा ऋषयः श्रीसीतारामो देवता
श्रीरामनाम बीजं भवरोगहरी भक्तिः शक्तिः मम नियन्त्रिताशेषविघ्नतया
श्रीसीतारामप्रीतिपूर्वकसकलमनोरथसिद्धयर्थं पाठे विनियोगः ।

अथ आचमनम्

श्रीसीतारामाभ्यां नमः । श्रीरामचन्द्राय नमः । श्रीरामभद्राय नमः ।
इति मन्त्रत्रितयेन आचमनं कुर्यात् । श्रीयुगलबीजमन्त्रेण प्राणायामं कुर्यात् ॥

अथ करन्यासः

जग मंगल गुन ग्राम राम के । दानि मुकुति धन धरम धाम के ॥

अङ्गुष्ठाभ्यां नमः ।

राम राम कहि जे जमुहाहीं । तिन्हहि न पापपुंज समुहाहीं ॥

तर्जनीभ्यां नमः ।

राम सकल नामन्ह ते अधिका । होउ नाथ अघ खग गन बधिका ॥

मध्यमाभ्यां नमः ।

उमा दास जोषित की नाई । सबहि नचावत रामु गोसाई ॥

अनामिकाभ्यां नमः ।

सनमुख होइ जीव मोहि जबहीं । जन्म कोटि अघ नासहिं तबहीं ॥

कनिष्ठिकाभ्यां नमः ।

मामभिरक्षय रघुकुलनायक । धृत बर चाप रुचिर कर सायक ॥
करतलकरपृष्ठाभ्यां नमः ।

इति करन्यासः



अथ हृदयादिन्यासः

जग मंगल गुन ग्राम राम के । दानि मुक्ति धन धरम धाम के ॥
हृदयाय नमः ।

राम राम कहि जे जमुहाहीं । तिन्हहि न पापपुंज समुहाहीं ॥
शिरसे स्वाहा ।

राम सकल नामन्ह ते अधिका । होउ नाथ अघ खग गन बधिका ॥
शिखायै वषट् ।

उमा दारु जोषित की नाई । सबहि नचावत रामु गोसाई ॥
कवचाय हुम् ।

सनमुख होइ जीव मोहि जबहीं । जन्म कोटि अघ नासहि तबहीं ॥
नेत्राभ्यां वौषट् ।

मामभिरक्षय रघुकुलनायक । धृत बर चाप रुचिर कर सायक ॥
अस्त्राय फट् ।

इति हृदयादिन्यासः



अथ ध्यानम्

मामवलोकय पंकजलोचन ।
 कृष्ण बिलोकनि सोच विमोचन ॥
 नील तामरस स्याम काम अरि ।
 हृदय कंज मकरंद मधुष हरि ॥
 जातुधान ब्रह्म बल भंजन ।
 मुनि सज्जन रंजन अघ गंजन ॥
 भूसुर ससि नव खंड बलाहक ।
 असरन सरन दीन जन गाहक ॥
 भुजबल बिपुल भार महि खंडित ।
 खर दूषन बिग्राध बध पंडित ॥
 रावनादि सुखरूप भूपवर ।
 जय दसरथ कुल कुमुद सुधाकर ॥
 गुजस पुरान बिदित निगमागम ।
 गावत सुर मुनि संत समागम ॥
 कारुणीक ब्यलीक मद खंडन ।
 सब विधि कुसल कोसला मंडन ॥
 कलि मल मथन नाम ममताहन ।
 तुलसिदास प्रभु पाहि प्रनत जन ॥

इति ध्यानम्

नवाह्नपारायणके विश्राम-स्थान

पृष्ठ-संख्या		पृष्ठ संख्या	
पहला विश्राम १०३	छठा विश्राम ४२८
दूसरा " १६७	सातवाँ " ५०५
तीसरा " २३१	आठवाँ " ५९१
चौथा " २९४	नवाँ " ६७२
पाँचवाँ " ३५५		

मासपारायणके विश्राम-स्थान

पहला विश्राम ५०	सोलहवाँ विश्राम २९४
दूसरा " ६८	सत्रहवाँ " ३०३
तीसरा " ८६	अठारहवाँ " ३२५
चौथा " १०३	उन्नीसवाँ " ३४५
पाँचवाँ " १२०	बीसवाँ " ३५५
छठा " १३६	इक्कीसवाँ " ४०१
सातवाँ " १५२	बाईसवाँ " ४३९
आठवाँ " १६७	तेईसवाँ " ४५९
नवाँ " १८२	चौबीसवाँ " ४९५
दसवाँ " १९९	पचीसवाँ " ५२७
ग्यारहवाँ " २१४	छब्बीसवाँ " ५६१
बारहवाँ " २३३	सत्ताईसवाँ " ५८१
तेरहवाँ " २५०	अट्ठाईसवाँ " ६२२
चौदहवाँ " २६६	उनतीसवाँ " ६५८
पंद्रहवाँ " २८३	तीसवाँ " ६७२

श्रीरामायणजीकी आरती

आरति श्रीरामायनजी की।
कीरति कलित ललित सिय पी की॥
गावत ब्रह्मादिक मुनि नारद।
बालमीक बिग्यान बिसारद॥
सुक सनकादि सेष अरु सारद।
बरनि पवनसुत कीरति नौकी॥
गावत वेद पुराण अष्टदस।
छओ सास्त्र सब ग्रंथन को रस॥
मुनि जन धन संतन को सरबस।
सार अंस संमत सबही की॥
गावत संतत संभु भवानी।
अरु घटसंभव मुनि बिग्यानी॥
व्यास आदि कबिबर्ज बखानी।
कागभुसुंडि गरुड के ही की॥
कलिमल हरनि बिषय रस फीकी।
सुभग सिंगार मुक्ति जुबती की॥
दलन रोग भव मूरि अमी की।
तात मात सब विधि तुलसी की॥

रामजी पालनेमें



एक बार जननीं अन्हवाए। करि सिंगार पलनाँ पौढ़ाए ॥

श्रीरामशलाका-प्रश्नावली

मानसानुरागी महानुभावोंको श्रीरामशलाका प्रश्नावलीका विशेष परिचय देनेकी कोई आवश्यकता नहीं प्रतीत होती उसकी महत्ता एवं उपयोगितासे प्रायः सभी मानसप्रेमी परिचित होंगे। अतः नीचे उसका स्वरूपमात्र अङ्कित करके उससे प्रश्नोत्तर निकालनेकी विधि तथा उसके उत्तर-फलोंका उल्लेख कर दिया जाता है। श्रीरामशलाका प्रश्नावलीका स्वरूप इस प्रकार है—

सु	प्र	उ	बि	हो	मु	ग	ब	सु	नु	बि	घ	धि	इ	द
र	रु	फ	सि	सि	रहिं	बस	हि	म	ल	न	ल	प	न	अ
सुज	सा	ग	सु	कु	म	स	ग	त	न	इ	ल	था	बे	नो
त्य	र	न	कु	जो	म	रि	र	र	अ	की	हो	भं	रा	य
पु	सु	थ	सी	जे	इ	ग	म*	सं	क	रे	हो	म	स	नि
त	र	त	र	स	हुँ	ह	ब	ब	प	चि	स	हिं	स	तु
म	का	।	र	र	प	मि	मी	म्हा	।	जा	हू	ही	।	।
ना	रा	रे	री	ह	का	फ	खा	जू	ई	र	रा	पू	द	ल
नि	को	जो	गो	न	मु	जि	यं	ने	मान	क	ज	प	स	ल
हि	रा	मि	स	रि	ग	द	नु	ख	म	खि	जि	म	त	ज
सिं	ख	नु	न	को	मि	निज	कं	ग	धु	ध	सु	का	स	र
गु	ब	म	अ	रि	नि	म	ल	।	न	इ	ती	न	क	भ
ना	पु	व	अ	।	र	ल	।	ए	तु	र	न	नु	वै	थ
सि	हुँ	सु	म्ह	रा	र	स	स	र	त	न	ख	।	ज	।
र	।	।	ला	धी	।	री	।	हू	ही	खा	जू	ई	रा	रे

इस रामशलाका-प्रश्नावलीके द्वारा जिस किसीको जब कभी अपने अभीष्ट प्रश्नका उत्तर प्राप्त करनेकी इच्छा हो तो सर्वप्रथम उस व्यक्तिको भगवान् श्रीरामचन्द्रजीका ध्यान करना चाहिये। तदनन्तर श्रद्धा-विश्वासपूर्वक मनसे अभीष्ट प्रश्नका चिन्तन करते हुए प्रश्नावलीके मनचाहे कोष्ठकमें अँगुली या कोई शलाका रख देना चाहिये और उस कोष्ठकमें जो अक्षर हो उसे अलग किसी कोरे कागज या स्लेटपर लिख लेना चाहिये। प्रश्नावलीके कोष्ठकपर भी ऐसा कोई निशान लगा देना चाहिये जिससे न तो प्रश्नावली गन्दी हो और न प्रश्नोत्तर प्राप्त होनेतक वह कोष्ठक भूल जाय। अब जिस कोष्ठकका अक्षर लिख लिया गया है उससे आगे बढ़ना चाहिये तथा उसके नवें कोष्ठकमें जो अक्षर पड़े उसे भी लिख लेना चाहिये। इस प्रकार प्रति नवें अक्षरके नवें अक्षरको क्रमसे लिखते जाना चाहिये और तबतक लिखते जाना चाहिये, जबतक उसी पहले कोष्ठकके अक्षरतक अँगुली अथवा शलाका न पहुँच जाय। पहले कोष्ठकका अक्षर जिस कोष्ठकके अक्षरसे नवाँ पड़ेगा, वहाँतक पहुँचते-पहुँचते एक चौपाई पूरी हो जायगी, जो प्रश्नकर्ताके अभीष्ट प्रश्नका उत्तर होगी। यहाँ इस बातका ध्यान रखना चाहिये कि किसी-किसी कोष्ठकमें केवल 'आ' की मात्रा (१) और किसी-किसी कोष्ठकमें दो-दो अक्षर हैं। अतः गिनते समय न तो मात्रावाले कोष्ठकको छोड़ देना चाहिये और न दो

अक्षरोंवाले कोष्ठकको दो बार गिनना चाहिये। जहाँ मात्राका कोष्ठक आवे वहाँ पूर्वलिखित अक्षरके आगे मात्रा लिख लेना चाहिये और जहाँ दो अक्षरोंवाला कोष्ठक आवे वहाँ दोनों अक्षर एक साथ लिख लेना चाहिये।

अब उदाहरणके तौरपर इस रामशलाका प्रश्नावलीसे किसी प्रश्नके उत्तरमें एक चौपाई निकाल दी जाती है। पाठक ध्यानसे देखें। किसीने भगवान् श्रीरामचन्द्रजीका ध्यान और अपने प्रश्नका चिन्तन करते हुए यदि प्रश्नावलीके* इस निहसे संयुक्त 'म' वाले कोष्ठकमें अँगुली या शलाका रखा और वह ऊपर बताये क्रमके अनुसार अक्षरोंको गिन-गिनकर लिखता गया तो उत्तरस्वरूप यह चौपाई बन जायगी—

हो इ हि सो इ जो रा म* र चि रा खा।

को क रि त र्क ब ढा वै सा खा॥

यह चौपाई बालकाण्डान्तर्गत शिव और पार्वतीके संवादमें है। प्रश्नकर्त्ताको इस उत्तरस्वरूप चौपाईसे यह आशय निकालना चाहिये कि कार्य होनेमें सन्देह है, अतः उसे भगवान्पर छोड़ देना श्रेयस्कर है।

इस चौपाईके अतिरिक्त श्रीरामशलाका प्रश्नावलीसे आठ चौपाइयाँ और बनती हैं, उन सबका स्थान और फलसहित उल्लेख नीचे किया जाता है। कुल नौ चौपाइयाँ हैं—

१-सुनु सिय सत्य असीस हमारी। पूजिहि मन कामना तुम्हारी॥

स्थान—यह चौपाई बालकाण्डमें श्रीसीताजीके गौरीपूजनके प्रसंगमें है। गौरीजीने श्रीसीताजीको आशीर्वाद दिया है।

फल—प्रश्नकर्ताका प्रश्न उत्तम है, कार्य सिद्ध होगा।

२-प्रबिसि नगर कीजे सब काजा। हृदयँ राखि कोसलपुर राजा॥

स्थान—यह चौपाई सुन्दरकाण्डमें हनुमान्जीके लङ्कामें प्रवेश करनेके समयकी है।

फल—भगवान्का स्मरण करके कार्यारम्भ करो, सफलता मिलेगी।

३ उधरहि अंत न होइ निबाहू। कालनेमि जिमि रावन राहू॥

स्थान—यह चौपाई बालकाण्डके आरम्भमें सत्संग-वर्णनके प्रसंगमें है।

फल—इस कार्यमें भलाई नहीं है। कार्यको सफलतामें सन्देह है।

४-बिधि बस सुजन कुसंगत परह्यो। फनि मनि सम निज गुन अनुसरह्यो॥

स्थान—यह चौपाई भी बालकाण्डके आरम्भमें ही सत्संग-वर्णनके प्रसंगकी है।

फल—खोटे मनुष्योंका संग छोड़ दो। कार्य पूर्ण होनेमें सन्देह है।

५-मुद मंगलमय संत समाजू। जो जग जंगम तीरथराजू॥

स्थान—यह चौपाई बालकाण्डमें संत समाजरूपी तीर्थके वर्णनमें है।

फल—प्रश्न उत्तम है। कार्य सिद्ध होगा।

६ गरल सुधा रिपु करहिं मिताई। गोपद सिंधु अनल सितलाई ॥

स्थान—यह चौपाई श्रीहनुमान्जीके लङ्कामें प्रवेश करनेके समयकी है।

फल—प्रश्न बहुत श्रेष्ठ है। कार्य सफल होगा।

७ बरुन कुबेर सुरेस समीरा। रन सन्मुख धरि काहुँ न धीरा ॥

स्थान—यह चौपाई लङ्काकाण्डमें रावणकी मृत्युके पश्चात् मन्दोदरीके विलापके प्रसंगमें है।

फल—कार्य पूर्ण होनेमें सन्देह है।

८ सुफल मनोरथ होहुँ तुम्हारे। रामु लखनु सुनि भाए सुखारे ॥

स्थान—यह चौपाई बालकाण्डमें पुष्पवाटिकासे पुष्प लानेपर विश्वामित्रजीका आशीर्वाद है।

फल—प्रश्न बहुत उत्तम है। कार्य सिद्ध होगा।

इस प्रकार रामशलाका प्रश्रावलीसे कुल नौ चौपाइयाँ बनती हैं, जिनमें सभी प्रकारके प्रश्नोंके उत्तराशय सन्निहित हैं।



‘जो पै तुलसी न गावतो’

बेदमत सोधि, सोधि सोधि कै पुरान सबै

संत औ असंतन को भेद को बतावतो ।

कपटी कुराही कूर कलिके कुचाली जीव

कौन रामनामहू की चरचा चलावतो ॥

‘बेनी’ कवि कहै मानो-मानो हो प्रतीति यह

पाहन-हिये में कौन प्रेम उपजावतो ।

भारी भवसागर उतारतो कवन पार

जो पै यह रामायन तुलसी न गावतो ॥

—बेनी कवि



॥ श्रीहरिः ॥

गोस्वामी तुलसीदासजीकी संक्षिप्त जीवनी

प्रयागके पास चित्रकूट जिलेमें राजापुर नामक एक ग्राम है, वहाँ आत्माराम दूबे नामके एक प्रतिष्ठित सरयूपारीण ब्राह्मण रहते थे। उनकी धर्मपत्नीका नाम हुलसी था। संवत् १५५४ की श्रावण शुक्ला सप्तमीके दिन अभुक्त मूल नक्षत्रमें इन्हीं भाग्यवान् दम्पतिके यहाँ बारह महीनेतक गर्भमें रहनेके पश्चात् गोस्वामी तुलसीदासजीका जन्म हुआ। जन्मते समय बालक तुलसीदास रोये नहीं, किन्तु उनके मुखसे 'राम' का शब्द निकला। उनके मुखमें बत्तीसों दाँत मौजूद थे। उनका डील-डौल पाँच वर्षके बालकका-सा था। इस प्रकारके अद्भुत बालकको देखकर पिता अमङ्गलकी शङ्कासे भयभीत हो गये और उसके सम्बन्धमें कई प्रकारकी कल्पनाएँ करने लगे। माता हुलसीको यह देखकर बड़ी चिन्ता हुई। उन्होंने बालकके अनिष्टकी आशङ्कासे दशमीकी रातको नवजात शिशुको अपनी दासीके साथ उसके ससुराल भेज दिया और दूसरे दिन स्वयं इस असार संसारसे चल बसीं। दासीने, जिसका नाम चुनियाँ था, बड़े प्रेमसे बालकका

पालन पोषण किया। जब तुलसीदास लगभग साढ़े पाँच वर्षके हुए, चुनियाँका भी देहान्त हो गया, अब तो बालक अनाथ हो गया। वह द्वार-द्वार भटकने लगा। इसपर जगज्जननी पार्वतीको उस होनहार बालकपर दया आयी। वे ब्राह्मणीका वेष धारणकर प्रतिदिन उसके पास जातीं और उसे अपने हाथों भोजन करा जातीं।

इधर भगवान् शंकरजीकी प्रेरणासे रामशैलपर रहनेवाले श्रीअनन्तानन्दजीके प्रिय शिष्य श्रीनरहर्यानन्दजीने इस बालकको ढूँढ़ निकाला और उसका नाम रामबोला रखा। उसे वे अयोध्या ले गये और वहाँ संवत् १५६१ माघ शुक्ला पञ्चमी शुक्रवारको उसका यज्ञोपवीत-संस्कार कराया। बिना सिखाये ही बालक रामबोलाने गायत्री मन्त्रका उच्चारण किया, जिसे देखकर सब लोग चकित हो गये। इसके बाद नरहरि स्वामीने वैष्णवोंके पाँच संस्कार करके रामबोलाको राममन्त्रकी दीक्षा दी और अयोध्याहीमें रहकर उन्हें विद्याध्ययन कराने लगे। बालक रामबोलाकी बुद्धि बड़ी प्रखर थी। एक बार गुरुमुखसे जो सुन लेते थे, उन्हें वह कण्ठस्थ हो जाता था। वहाँसे कुछ दिन बाद गुरु-शिष्य दोनों शूकरक्षेत्र (सोरो) पहुँचे। वहाँ श्रीनरहरिजीने तुलसीदासको रामचरित सुनाया। कुछ दिन बाद वे काशी चले आये। काशीमें शेषसनातनजीके पास रहकर तुलसीदासने

पन्द्रह वर्षतक वेद वेदाङ्गका अध्ययन किया। इधर उनकी लोकवासना कुछ जाग्रत् हो उठी और अपने विद्यागुरुसे आज्ञा लेकर वे अपनी जन्मभूमिको लौट आये। वहाँ आकर उन्होंने देखा कि उनका परिवार सब नष्ट हो चुका है। उन्होंने विधिपूर्वक अपने पिता आदिका श्राद्ध किया और वहीं रहकर लोगोंको भगवान् रामकी कथा सुनाने लगे।

संवत् १५८३ ज्येष्ठ शुक्ला १३ गुरुवारको भारद्वाजगोत्रकी एक सुन्दरी कन्याके साथ उनका विवाह हुआ और वे सुखपूर्वक अपनी नवविवाहिता वधूके साथ रहने लगे। एक बार उनकी स्त्री भाईके साथ अपने मायके चली गयी। पीछे-पीछे तुलसीदासजी भी वहाँ जा पहुँचे। उनकी पत्नीने इसपर उन्हें बहुत धिक्कारा और कहा कि 'मेरे इस हाड़ मांसके शरीरमें जितनी तुम्हारी आसक्ति है, उससे आधी भी यदि भगवान्में होती तो तुम्हारा बेड़ा पार हो गया होता।'

तुलसीदासजीको ये शब्द लग गये। वे एक क्षण भी नहीं रुके, तुरत वहाँसे चल दिये।

वहाँसे चलकर तुलसीदासजी प्रयाग आये। वहाँ उन्होंने गृहस्थवेशका परित्याग कर साधुवेश ग्रहण किया। फिर तीर्थाटन करते हुए काशी पहुँचे। मानसरोवरके पास उन्हें काकभृशुण्डजीके दर्शन हुए।

काशीमें तुलसीदासजी रामकथा कहने लगे। वहाँ उन्हें एक दिन एक प्रेत मिला, जिसने उन्हें हनुमान्जीका पता बतलाया। हनुमान्जीसे मिलकर तुलसीदासजीने उनसे श्रीरघुनाथजीका दर्शन करानेकी प्रार्थना की। हनुमान्जीने कहा, 'तुम्हें चित्रकूटमें श्रीरघुनाथजीके दर्शन होंगे।' इसपर तुलसीदासजी चित्रकूटकी ओर चल पड़े।

चित्रकूट पहुँचकर रामघाटपर उन्होंने अपना आसन जमाया। एक दिन वे प्रदक्षिणा करने निकले थे। मार्गमें उन्हें श्रीरामके दर्शन हुए। उन्होंने देखा कि दो बड़े ही सुन्दर राजकुमार घोड़ोंपर सवार होकर धनुष बाण लिये जा रहे हैं। तुलसीदासजी उन्हें देखकर मुग्ध हो गये, परंतु उन्हें पहचान न सके। पीछेसे हनुमान्जीने आकर उन्हें सारा भेद बताया तो वे बड़ा पश्चात्ताप करने लगे। हनुमान्जीने उन्हें सान्त्वना दी और कहा प्रातःकाल फिर दर्शन होंगे।

संवत् १६०७ की मौनी अमावस्या बुधवारके दिन उनके सामने भगवान् श्रीराम पुनः प्रकट हुए। उन्होंने बालकरूपमें तुलसीदासजीसे कहा—बाबा! हमें चन्दन दो। हनुमान्जीने सोचा, वे इस बार भी भोखा न खा जायँ, इसलिये उन्होंने तोतेका रूप धारण करके यह दोहा कहा—

चित्रकूट के घाट पर भड़ संतन की भीर।

तुलसिदास चंदन घिसें तिलक देत रघुबीर॥

तुलसीदासजी उस अद्भुत छबिको निहारकर शरीरकी सुधि भूल गये। भगवान् ने अपने हाथसे चन्दन लेकर अपने तथा तुलसीदासजीके मस्तकपर लगाया और अन्तर्धान हो गये।

संवत् १६२८में ये हनुमान्जीकी आज्ञासे अयोध्याकी ओर चल पड़े। उन दिनों प्रयागमें माघमेला था। वहाँ कुछ दिन वे ठहर गये। पर्वके छः दिन बाद एक वटवृक्षके नीचे उन्हें भरद्वाज और याज्ञवल्क्य मुनिके दर्शन हुए। वहाँ उस समय वही कथा हो रही थी, जो उन्होंने सूकरक्षेत्रमें अपने गुरुसे सुनी थी। वहाँसे ये काशी चले आये और वहाँ प्रह्लादघाटपर एक ब्राह्मणके घर निवास किया। वहाँ उनके अंदर कवित्वशक्तिका स्फुरण हुआ और वे संस्कृतमें पद्य रचना करने लगे। परंतु दिनमें वे जितने पद्य रचते, रात्रिमें वे सब लुप्त हो जाते यह घटना रोज घटती। आठवें दिन तुलसीदासजीको स्वप्न हुआ। भगवान् शकरीने उन्हें आदेश दिया कि तुम अपनी भाषामें काव्य-रचना करो। तुलसीदासजीकी नींद उचट गयी। वे उठकर बैठ गये। उसी समय भगवान् शिव और पार्वती उनके सामने प्रकट हुए। तुलसीदासजीने उन्हें साष्टाङ्ग प्रणाम किया। शिवजीने कहा—‘तुम अयोध्यामें जाकर रहो और हिन्दीमें काव्य-रचना करो। मेरे आशीर्वादसे तुम्हारी कविता सामवेदके समान

फलवती होगी।' इतना कहकर श्रीगौरीशंकर अन्तर्धान हो गये। तुलसीदासजी उनकी आज्ञा शिरोधार्य कर काशीसे अयोध्या चले आये।

संवत् १६३१का प्रारम्भ हुआ। उस साल रामनवमीके दिन प्रायः वैसा ही योग था जैसा त्रेतायुगमें रामजन्मके दिन था। उस दिन प्रातःकाल श्रीतुलसीदासजीने श्रीरामचरितमानसकी रचना प्रारम्भ की। दो वर्ष, सात महीने, छब्बीस दिनमें ग्रन्थकी समाप्ति हुई। संवत् १६३३के मार्गशीर्ष शुक्लपक्षमें रामविवाहके दिन सातों काण्ड पूर्ण हो गये।

इसके बाद भगवान्की आज्ञासे तुलसीदासजी काशी चले आये। वहाँ उन्होंने भगवान् विश्वनाथ और माता अन्नपूर्णाको श्रीरामचरितमानस सुनाया। रातको पुस्तक श्रीविश्वनाथजीके मन्दिरमें रख दी गयी। सबेरे जब पट खोला गया तो उसपर लिखा हुआ पाया गया—'सत्यं शिवं सुन्दरम्।' और नीचे भगवान् शंकरकी सही थी। उस समय उपस्थित लोगोंने 'सत्यं शिवं सुन्दरम्' की आवाज भी कानोंसे सुनी।

इधर पण्डितोंने जब यह बात सुनी तो उनके मनमें ईर्ष्या उत्पन्न हुई। वे दल बाँधकर तुलसीदासजीकी निन्दा करने लगे और उस पुस्तकको भी नष्ट कर देनेका प्रयत्न करने लगे।

उन्होंने पुस्तक चुरानेके लिये दो चोर भेजे। चोरोंने जाकर देखा कि तुलसीदासजीकी कुटीके आसपास दो वीर धनुषबाण लिये पहरा दे रहे हैं। वे बड़े ही सुन्दर श्याम और गौर वर्णके थे उनके दर्शनसे चोरोंकी बुद्धि शुद्ध हो गयी। उन्होंने उसी समयसे चोरी करना छोड़ दिया और भजनमें लग गये तुलसीदासजीने अपने लिये भगवान्‌को कष्ट हुआ जान कुटीका सारा सामान लुटा दिया, पुस्तक अपने मित्र टोडरमलके यहाँ रख दी। इसके बाद उन्होंने एक दूसरी प्रति लिखी। उसीके आधारपर दूसरी प्रतिलिपियाँ तैयार की जाने लगीं। पुस्तकका प्रचार दिनोंदिन बढ़ने लगा।

इधर पण्डितोंने और कोई उपाय न देख श्रीमधुसूदन सरस्वतीजीको उस पुस्तकको देखनेकी प्रेरणा की। श्रीमधुसूदन सरस्वतीजीने उसे देखकर बड़ी प्रसन्नता प्रकट की और उसपर यह सम्मति लिख दी -

आनन्दकानने

ह्यस्मिञ्जङ्गमस्तुलसीतरुः ।

कवितामञ्जरी

भाति

रामभ्रमरभूषिता ॥

‘इस काशीरूपी आनन्दवनमें तुलसीदास चलता फिरता तुलसीका पौधा है। उसकी कवितारूपी मञ्जरी बड़ी ही सुन्दर है, जिसपर श्रीरामरूपी भँवरा सदा मँडराया करता है।’

पण्डितोंको इसपर भी संतोष नहीं हुआ। तब पुस्तककी

परीक्षाका एक उपाय और सोचा गया। भगवान् विश्वनाथके सामने सबसे ऊपर वेद, उनके नीचे शास्त्र, शास्त्रोंके नीचे पुराण और सबके नीचे श्रीरामचरितमानस रख दिया गया मन्दिर बंद कर दिया गया। प्रातःकाल जब मन्दिर खोला गया तो लोगोंने देखा कि श्रीरामचरितमानस वेदोंके ऊपर रखा हुआ है। अब तो पण्डित लोग बड़े लज्जित हुए। उन्होंने तुलसीदासजीसे क्षमा माँगी और भक्तिसे उनका चरणोदक लिया।

तुलसीदासजी अब असीघाटपर रहने लगे। रातको एक दिन कलियुग मूर्तरूप धारणकर उनके पास आया और उन्हें त्रास देने लगा। गोस्वामीजीने हनुमान्जीका ध्यान किया। हनुमान्जीने उन्हें विनयके पद रचनेको कहा; इसपर गोस्वामीजीने विनय-पत्रिका लिखी और भगवान्के चरणोंमें उसे समर्पित कर दी। श्रीरामने उसपर अपने हस्ताक्षर कर दिये और तुलसीदासजीको निर्भय कर दिया।

संवत् १६८० श्रावण कृष्ण तृतीया शनिवारको असीघाटपर गोस्वामीजीने राम-राम कहते हुए अपना शरीर परित्याग किया।





श्रीगोस्वामी तुलसीदासजी महाराज



श्रीगमदग्याङ्की झाँकी

। श्रीगणेशाय नमः ।

श्रीजानकीवल्लभो विजयते

श्रीरामचरितमानस

प्रथम सोपान

बालकाण्ड

श्लोक

वर्णानामर्थसंधानां रसानां छन्दसामपि ।
मङ्गलानां च कर्त्तारौ वन्दे वाणीविनायकौ ॥ १ ॥
भवानीशङ्करौ वन्दे श्रद्धाविश्वासरूपिणौ ।
याभ्यां विना न पश्यन्ति सिद्धाः स्वान्तःस्थमीश्वरम् ॥ २ ॥
वन्दे बोधमयं नित्यं गुरुं शङ्कररूपिणम् ।
यमाश्रितो हि वक्रोऽपि चन्द्रः सर्वत्र वन्द्यते ॥ ३ ॥
सीतारामगुणग्रामपुण्यारण्यविहारिणौ ।
वन्दे विशुद्धविज्ञानीं कवीश्वरकपीश्वरौ ॥ ४ ॥

उद्धवस्थितिसंहारकारिणीं क्लेशहारिणीम् ।
 सर्वश्रेयस्करीं सीतां नतोऽहं रामवल्लभाम् ॥ ५ ॥
 यन्मायावशवर्त्ति विश्वमखिलं ब्रह्मादिदेवासुरा
 यत्सत्त्वादमृषैव भाति सकलं रज्जौ यथाहेर्ध्रमः ।
 यत्पादप्लवमेकमेव हि भवाम्भोधेस्तितीर्षावतां
 वन्देऽहं तमशेषकारणपरं रामाख्यमीशं हरिम् ॥ ६ ॥
 नानापुराणनिगमागमसम्मतं यद्
 रामायणे निगदितं क्वचिदन्यतोऽपि ।

स्वान्तःसुखाय तुलसी रघुनाथगाथा-

भाषानिबन्धमतिमज्जुलमातनोति ॥ ७ ॥

सो०—जो सुमिरत सिधि होइ गन नाथक करिबर बदन ।
 करउ अनुग्रह सोइ बुद्धि रासि सुभ गुन सदन ॥ १ ॥
 मूक होइ बाचाल पंगु चढ़इ गिरिबर गहन ।
 जासु कृपाँ सो दयाल द्रवउ सकल कलि मल दहन ॥ २ ॥
 नील सरोरुह स्याम तरुन अरुन बारिज नयन ।
 करउ सो मम उर धाम सदा छीरसागर सयन ॥ ३ ॥
 कुंद इंदु सम देह उमा रमन करुना अयन ।
 जाहि दीन पर नेह करउ कृपा मर्दन मयन ॥ ४ ॥
 बंदउँ गुरु पद कंज कृपा सिंधु नररूप हरि ।
 महामोह तम पुंज जासु बचन रवि कर निकर ॥ ५ ॥

बंदउँ गुरु पद पदुम परागा । सुरुचि सुबास सरस अनुरागा ॥
 अमिअ मूरिमय चूरन चारू । समन सकल भव रुज परिवारू ॥
 सुकृति संभु तन बिमल बिभूती । मंजुल मंगल मोद प्रसूती ॥
 जन मन मजु मुकुर मल हरनी । किऐँ तिलक गुन गन बस करनी ।
 श्रीगुर पद नख मनि गन जोती । सुमिरत दिव्य दृष्टि हियँ होती ।
 दलन मोह तम सो सप्रकासू । बड़े भाग उर आवइ जासू ।
 उधरहिं बिमल बिलोचन ही के । मिटीहिं दोष दुख भव रजनी के ।
 सूझहिं राम चरित मनि मानिक । गुपुत प्रगट जहँ जो जेहिं खानिक ।
 दो०— जथा सुअंजन अंजि दृग साधक सिद्ध सुजान ।

कौतुक देखत सैल बन भूतल भूरि निधान ॥ १ ॥
 गुरु पद रज मृदु मंजुल अंजन । नयन अमिअ दृग दोष बिभंजन ॥
 तेहिं करि बिमलबिबेक बिलोचन । बरनउँ राम चरित भव मोचन ॥
 बंदउँ प्रथम महीसुर चरना । मोह जनित संसय सब हरना ॥
 सुजन समाज सकल गुन खानी । करउँ प्रनाम सप्रेम सुबानी ॥
 साधु चरित सुभ चरित कपासू । निरस बिसद गुनमय फल जासू ॥
 जो सहि दुख परछिद्र दुरावा । बदनीय जेहिं जग जस पावा ॥
 मुद मंगलमय संत समाजू जो जग जंगम तीरथराजू ।
 राम भक्ति जहँ सुरसरि धारा । सरसइ ब्रह्म बिचार प्रचारा ॥
 बिधिनिषेधमय कालमल हरनी । करम कथा रबिनदनि बरनी ॥
 हरि हर कथा बिराजति बेनी । सुनत सकल मुद मंगल देनी ॥

बटु बिस्वास अचल निज धरमा । तीरथराज समाज सुकरमा ॥
 सबहि सुलभ सब दिन सब देसा । सेवत सादर समन कलैसा ॥
 अकथ अलौकिक तीरथराऊ । देइ सद्य फल प्रगट प्रभाऊ ॥
 दो०— सुनि समुझहिं जन मुदित मन मज्जहिं अति अनुराग ।

लहहिं चारि फल अछत तनु साधु समाज प्रयाग ॥ १ ॥
 मज्जन फल पेखिअ ततकाला । काक होहिं पिक बकउ मराला ॥
 सुनि आचरज करै जनि कोई । सतसंगति महिमा नहिं गोई ॥
 बालमीक नारद घटजोनी । निज निज मुखनि कही निज होनी ॥
 जलचर थलचर नभचर नाना । जे जड़ चेतन जीव जहाना ॥
 मति कीरति गति भूति भलाई । जब जेहिं जतन जहाँ जेहिं पाई ॥
 सो जानब सतसंग प्रभाऊ । लोकहुँ बेद न आन उपाऊ ॥
 बिनु सतसंग बिबेक न होई । राम कृपा बिनु सुलभ न सोई ॥
 सतसंगत मुद मंगल मूला । सोइ फल सिधि सब साधन फूला ॥
 सठ सुधरहिं सतसंगति पाई । पारस परस कुधात सुहाई ॥
 बिधि बस सुजन कुसंगत घरहीं । फनिमनि समनिज गुन अनुसरहीं ॥
 बिधि हरि हर कबि कोबिद बानी । कहत साधु महिमा सकुचानी ॥
 सो मो सन कहि जात न कैसैं । साक बनिक मनि गुन गन जैसैं ॥
 दो०— बंदउँ संत समान चित हित अनहित नहिं कोइ ।

अंजलि गत सुभ सुपन जिमि सप सुगंध कर दोइ ॥ ३ (क) ॥

संत सरल चित जगत हित जानि सुभाउ सनेहु ।

बालबिनय सुनि करि कृपा राम चरन रति देहु ॥ ३ (ख) ॥

बहुरि बंदि खल गन सतिभाएँ । जे बिनु काज दाहिनेहु बाएँ ॥
 पर हित हानि लाभ जिन्ह केरें । उजरें हरष बिषाद बसेरें ।
 हरि हर जस राकेस राहु से । पर अकाज भट सहसबाहु से ॥
 जे पर दोष लखाहिं सहसाखी । परहित धृत जिन्ह के मन माखी ॥
 तेज कृसानु रोष महिषेसा । अघ अवगुन धन धनी घनेसा ॥
 उदय केत सम हित सबही के । कुंभकरन सम सोवत नीके ॥
 पर अकाजु लागि तनु परिहरहीं । जिमि हिम उपल कृपी दलि गरहीं ॥
 बदउँ खल जस सेष सरोषा । सहस बदन बरनइ पर दोषा ॥
 पुनि प्रनवउँ पृथुराज समाना । पर अघ मुनइ सहस दस काना ॥
 बहुरि सक्र सम बिनवउँ तेही । संतत सुरानीक हित जेही ॥
 बचन बज्र जेहि सदा पिआरा । सहस नयन पर दोष निहारा ॥
 दो०— उदासीन अरि मीत हित सुनत जरहिं खल रीति ।

जानि पानि जुग जोरि जन बिनती करइ सप्रीति ॥ ४ ॥
 मैं अपनी दिसि कीन्ह निहोरा । तिन्ह निज ओर न लाउब भोरा ॥
 बायस पलिआहिं अति अनुरागा । होहिं निरामिष कबहुँ कि कागा ॥
 बंदउँ संत असज्जन चरना । दुखप्रद उभय बीच कछु बरना ॥
 बिछुरत एक प्राण हरि लेहों । मिलत एक दुख दारुन देहों ॥
 उपजहिं एक संग जग माहीं । जलज जोक जिमि गुन बिलगाहीं ॥
 सुधा सुरा सम साधु असाधु । जनक एक जग जलधि अगाधु ॥
 भल अनभल निज निज करतूती । लहत मुजस अपलोक बिभूती ॥

सुधा सुधाकर सुरसरि साधू । गरल अनल कलिमल सरि ब्याधू ॥
 गुन अवगुन जानत सब कोई । जो जेहि भाव नीक तेहि सोई ॥
 दो०— भलो भलाइहि पै लहइ लहइ निचाइहि नीचु ।

सुधा सराहिअ अमरताँ गरल सराहिअ मीचु ॥ ५ ॥
 खलअघ अगुन साधु गुन गाहा । उभय अपार उदधि अवगाहा ॥
 तेहि तैं कछु गुन दोष बखाने । संग्रह त्याग न बिनु पहिचाने ॥
 भलेउ पोच सब बिधि उपजाए । गनि गुन दोष बेद बिलगाए ॥
 कहहिं बेद इतिहास पुराना । बिधि प्रपंचु गुन अवगुन साना ॥
 दुख सुख पाप पुन्य दिन राती । साधु असाधु सुजाति कुजाती ॥
 दानव देव ऊँच अरु नीचू । अमिअ सुजीवनु माहुरु मीचू ॥
 माया ब्रह्म जीव जगदीसा । लच्छि अलच्छि रंक अवनीसा ।
 कासी मग सुरसरि क्रमनासा । मरु मारव महिदेव गवासा ।
 सरग नरक अनुराग बिरागा । निगमागम गुन दोष बिभागा ॥
 दो०— जड़ चेतन गुन दोषमय बिस्व कीन्ह करतार ।

संत हंस गुन गहहिं पय परिहरि बारि बिकार ॥ ६ ॥
 अस बिबेक जब देइ बिधाता । तब तजि दोष गुनहिं मनु राता ॥
 काल सुभाउ करम बरिआई । भलेउ प्रकृति बस चुकइ भलाई ॥
 सो सुधारि हरिजन जिमि लेहीं । दलि दुख दोष बिमल जसु देहीं ॥
 खलउ करहिं भल पाइ सुसंगू । मिटइ न मलिन सुभाउ अभंगू ॥
 लखि सुबेष जग बंचक जेऊ । बेष प्रताप पूजिअहिं तेऊ ॥

उघरहि अंत न होइ निबाहू । कालनेमि जिमि रावन राहू ॥
 किएहुँ कुबेषु साधु सनमानू । जिमि जग जामवंत हनुमानू ॥
 हानि कुसंग सुसंगति लाहू लोकहुँ बेद बिदित सब काहू ॥
 गगन चढ़इ रज पवन प्रसंगा । कीचहिं मिलइ नीच जल संग ॥
 साधु असाधु सदन सुक सारीं । सुमिरहिं राम देहिं गनि गारीं ।
 धूम कुसंगति कारिख होई । लिखिअ पुरान मंजु मसि सोई ॥
 सोइ जल अनल अनिल संघाता । होइ जलद जग जीवन दाता ॥
 दो०— ग्रह भेषज जल पवन पट पाइ कुजोग सुजोग ।

होहिं कुबस्तु सुबस्तु जग लखहिं सुलच्छन लोग ॥ ७ (क) ।

सम प्रकास तम पाख दुहुँ नाम भेद बिधि कीन्ह ।

ससि सोषक पोषक समुझि जग जस अपजस दीन्ह ॥ ७ (ख) ।

जड़ चेतन जग जीव जत सकल राममय जानि ।

बंदउँ सब के पद कमल सदा जोरि जुग पानि ॥ ७ (ग) ॥

देव दनुज नर नाग खग प्रेत पितर गंधर्ब ।

बंदउँ किनर रजनिचर कृपा करहु अब सर्व ॥ ७ (घ) ।

आकर चारि लाख चौरासी । जाति जीव जल थल नभ बासी ॥

सीय राममय सब जग जानी । करउँ प्रनाम जोरि जूग पानी ॥

जानि कृपाकर किंकर मोहू । सब मिलि करहु छाड़ि छल छोहू ॥

निज बुधि बल भरोस मोहि नहीं । तातैं बिनय करउँ सब पाहीं ॥

करन चहउँ रघुपति गुन गाहा । लघु मति मोरि चरित अवगाहा ॥

सूझ न एकउ अंग उपाऊ । मन मति रंक मनोरथ राऊ ॥
 मति अति नीच ऊँचि रुचि आछी । चहिअ अमिअ जग जुइ न छाछी ।
 छमिहहिं सज्जन मोरि ढिठाई । सुनिहहिं बालबचन मन लाई ॥
 जाँ बालक कह तोतरि बाता । सुनिहं मुदित मन पितु अरु माता ॥
 हँसिहहिं कूर कुटिल कुबिचारी । जे पर दूषन भूषनधारी ।
 निज कबित केहि लाग न नीका । सरस होउ अथवा अति फीका ।
 जे पर भनिति सुनत हरषाहीं । ते बर पुरुष बहुत जग नाहीं ।
 जग बहु नर सर सरि सम भाई । जे निज बाढ़ि बढहिं जल पाई ।
 सज्जन सकृत् सिंधु सम कोई । देखि पूर बिधु बाढ़इ जोई ॥
 दो०— भाग छोट अभिलाषु बड़ करउँ एक बिस्वास ।

पैहहिं सुख सुनि सुजन सब खल करिहहिं उपहास ॥ ८ ॥
 खल परिहास होइ हित मोरा । काक कहहिं कलकंठ कठोरा ।
 हँसहिं बक दादुर चातकही । हँसहिं मलिन खल बिमल बतकही ॥
 कबित रसिक न राम पद नेहू । तिन्ह कहँ सुखद हास रस एहू ॥
 भाषा भनिति भोरि मति मोरी । हँसिबे जोग हँसें नहिं खोरी ॥
 प्रभु पद प्रीति न सामुझि नीकी । तिन्हहिं कथा सुनि लागिहि फीकी ।
 हरि हर पद रति मति न कुतरकी । तिन्ह कहँ मधुर कथा रघुबर की ॥
 राम भगति भूषित जियै जानी । सुनिहहिं सुजन सराहि सुबानी ॥
 कबि न होउँ नहिं बचन प्रबीनू । सकल कला सब बिद्या हीनू ।
 आखर अरथ अलंकृति नाना । छंद प्रबंध अनेक बिधाना ।

भाव भेद रस भेद अपारा । कवित दोष गुन बिबिध प्रकार ॥
कवित बिबेक एक नहिं मोरें सत्य कहउँ लिखि कागद कोरें ॥
दो०— भनिति मोरि सब गुन रहित बिस्व बिदित गुन एक ।

सो बिचारि सुनिहैं सुमति जिन्ह के बिमल बिबेक ॥ १ ॥
एहि महँ रघुपति नाम उदार । अति पावन पुरान श्रुति सार ॥
मंगल भवन अमंगल हारी । उमा साहित जेहि जपत पुरारी ॥
भनिति बिचित्र सुकवि कृत जोऊ । राम नाम बिनु सोह न सोऊ ,
बिधुबदनी सब भाँति सँवारो सोह न बसन बिना बर नारो ॥
सब गुन रहित कुकवि कृत बानी । राम नाम जस अँकित जानी ॥
सादर कहहिं सुनिहैं बुध ताही मधुकर सरिस सत गुनग्राही ॥
जदपि कवित रस एकउ नाहीं । राम प्रताप प्रगट एहि माहीं ॥
सोइ भरोस मोरें मन आवा । केहिं न सुसंग बड़प्पनु पावा ।
धूमउ तजइ सहज करुआई अगरु प्रसंग सुगंध बसाई ॥
भनिति भदेस बस्तु भलि बरनी । राम कथा जग मंगल करनी ॥

छं०— मंगल करनि कलिमल हरनि तुलसी कथा रघुनाथ की ।
गति कूर कबिता सरित की ज्यों सरित पावन पाथ की ॥
प्रभु सुजस संगति भनिनि भलि होइहिं सुजन मन भावनी ।
भव अंग भूति मसान की सुमिरत सुहावनि पावनी ॥

दो०— प्रिय लगिहि अति सबहि मम भनिनि राम जस संग ।

दारु बिचारु कि करइ कोउ बंदिअ मलय प्रसंग ॥ १० (क) ॥

स्वाम सुरभि पय बिसद अति गुनद करहिं सब पान ।

गिरा ग्राम्य सिय राम जस गावहिं सुनहिं सुजान ॥ १० (ख) ॥

मनि मानिक मुकुता छबि जैसी । अहि गिरि गज सिर सोह न तैसी ॥
 नृप किरीट तरुनी तनु पाई । लहहिं सकल सोभा अधिकाई ॥
 तैसेहिं सुकबि कबित बुध कहहीं । उपजहिं अनत अनत छबि लहहीं ॥
 भगति हेतु बिधि भवन बिहाई । सुमिरत सारद आवति धाई ॥
 राम चरित सर बिनु अन्हवाएँ । सो श्रम जाइ न कोटि उपाएँ ॥
 कबि कोबिद अस हृदयँ बिचारी । गावहिं हरि जस कलि मल हारी ।
 कीन्हें प्राकृत जन गुन गाना । सिर धुनि गिरा लगत पछिताना ॥
 हृदय सिंधु मति सीप समाना । स्वाति सारदा कहहिं सुजाना ।
 जाँ बरषइ बर बारि बिचारू । होहिं कबित मुकुतामनि चारू ।
 दो०— जुगुति बेधि पुनि पोहिअहिं रामचरित बर ताग ।

पहिरहिं सज्जन बिमल उर सोभा अति अनुराग ॥ ११ ॥

जे जनमे कलिकाल कराला । करतब बायस बेष मराला ।
 चलत कुपंथ बेद मग छाँड़े । कपट कलेवर कलि मल भाँड़े ॥
 बंचक भगत कहाइ राम के । किकर कंचन कोह काम के ॥
 तिन्ह महँ प्रथम रेख जग मोरी । धोंग धरमध्वज धंधक धोरी ॥
 जाँ अपने अवगुन सब कहऊँ । बाढ़इ कथा पार नहिं लहऊँ ॥
 ताते मैं अति अल्प बखाने । थोरे महँ जानिहहिं सयाने ।
 समुझि बिबिधि बिधि बिनती मोरी । कोउ न कथा सुनि देइहि खोरी ।

एतेहु पर करिहहिं जे असंका मोहि ते अधिक ते जड मति रंका ॥
कबि न होउँ नहिं चतुर कहावउँ । मति अनुरूप राम गुन गावउँ ॥
कहँ रघुपति के चरित अपारा । कहँ मति मोरि निरत संसारा ॥
जेहिं मारुत गिरि मैरु उड़ाहीं । कहहु तूल केह लेखे माहीं ॥
समुझत आमत राम प्रभुताई । करत कथा मन अति कदराई ॥
दो०— सारद सेस महेस बिधि आगम निगम पुरान ।

नेति नेति कहि जासु गुन करहिं निरंतर गान ॥ १२ ॥
सब जानत प्रभु प्रभुता सोई । तदपि कहैं बिनु रहा न कोई ।
तहाँ बेद अस कारन राखा । भजन प्रभाउ भाँति बहु भाषा ॥
एक अनीह अरूप अनामा । अज सच्चिदानंद पर धामा ॥
ब्यापक बिस्वरूप भगवाना । तेहिं धरि देह चरित कृत नाना ॥
सो केवल भगतन हित लागी । परम कृपाल प्रनत अनुरागी ।
जेहि जन पर ममता अति छोहू । जेहिं करुना करि कीन्ह न कोहू ॥
गई बहोर गरीब नेवाजू । सरल सबल साहिब रघुराजू ।
बुध बरनहिं हरि जस अस जानी । करहिं पुनीत सुफल निज बानी ॥
तेहिं बल मैं रघुपति गुन गाथा । कहिहउँ नाइ राम पद माथा ॥
मुनिन्ह प्रथम हरि कीरति गाई । तेहिं मग चलत सुगम मोहि भाई ॥
दो०— अति अपार जे सरित बर जौं नृप सेतु कराहिं ।

चढ़ि पिपीलिकउ परम लघु बिनु श्रम पारहि जाहिं ॥ १३ ॥
एहि प्रकार बल मनहि देखार्इ । करिहउँ रघुपति कथा सुहाई ॥

ब्यास आदि कवि पुंगव नाना । जिन्ह सादर हरि सुजस बखाना ॥
 चरन कमल बंदउँ तिन्ह केरे । पुरवहुँ सकल मनोरथ मेरे ।
 कलि के कबिन्ह करउँ परनामा । जिन्ह बरने रघुपति गुन ग्रामा ॥
 जे प्राकृत कवि परम सयाने । भाषाँ जिन्ह हरि चरित बखाने ॥
 भए जे अहहिं जे होइहहिं आगें । प्रनवउँ सबहिं कपट सब त्यागें ॥
 होहु प्रसन्न देहु बरदानू । साधु समाज भनिति सनमानू ।
 जो प्रबंध बुध नाहिं आदरहीं । सो श्रम बादि बाल कबि करहीं ॥
 कीरति भनिति भूति भाल सोई । सुरसरि सम सब कहैं हित होई ॥
 राम सुकीरति भनिति भदेसा । असमंजस अस मोहि अँदेसा ।
 तुम्हरी कृपाँ सुलभ सोउ मोरे । सिअनि सुहावनि टाट पटोरे ॥
 दो० — सरल कबिन कीरति बिमल सोइ आदरहिं सुजान ।

सहज बयर बिसराइ रिपु जो सुनि करहिं बखान ॥ १४ (क) ॥

सो न होइ बिनु बिमल मति मोहि मति बल अति थोर ।

करहु कृपा हरि जस कहउँ पुनि पुनि करउँ निहोर ॥ १४ (ख) ॥

कबि कोबिद रघुबर चरित मानस मंजु मराल ।

बालबिनय सुनि सुरुचि लिखि मो पर होहु कृपाल ॥ १४ (ग) ॥

सो० — बंदउँ मुनि पद कंजु रामायन जेहिं निरमयउ ।

सखर सुकोमल मंजु दोष रहित दूधन सहित ॥ १४ (घ) ॥

बंदउँ चारिउ बेद भव ब्यारिधि बोहित सरिस ।

जिन्हहि न सपनेहुँ खेद बरनत रघुबर बिसद जसु ॥ १४ (ङ) ॥

बंदउँ बिधि पद रेनु भव सागर जेहि कीन्ह जहँ।

संत सुधा ससि धेनु प्रगटे खल बिष बारुनी ॥ १४ (च) ॥

दो० बिबुध बिप्र बुध ग्रह चरन बंदि कहउँ कर जोरि।

होइ प्रसन्न पुरवहु सकल मंजु मनोरथ मोरि ॥ १४ (छ) ॥

पुनि बंदउँ सारद सुरसरिता । जुगल पुनीत मनोहर चरिता ॥

मज्जन पान पाप हर एका कहत सुनत एक हर अबिवेका ॥

गुर पितु मातु महेस भवानी । प्रनवउँ दीनबंधु दिन दानी ॥

सेवक स्वामि सखा सिय पी के । हित निरुपधि सब बिधितुलसी के ।

कलि बिलोकि जग हितहर गिरिजा । साबर मंत्र जाल जिन्ह सिरिजा ॥

अनमिल आखर अरथ न जापू । प्रगट प्रभाउ महेस प्रतापू ॥

सो उमेस मोहि पर अनुकूला । करिहिं कथा मुद मंगल मूला ॥

सुमिरि सिवा सिव पाइ पसाऊ । बरनउँ रामचरित चित चाऊ ॥

भनिति मोरि सिव कृपां बिभाती । ससि समज मिलि मनहुँ सुराती ॥

जे एहि कथहि सनेह समेता । कहिहहिं सुनिहहिं समुझि सचेता ॥

होइहहिं राम चरन अनुरगी । कलि मल रहित सुमंगल भागी ॥

दो० — सपनेहुँ साचेहुँ मोहि पर जाँ हा गौरि पमाड ।

तौ फुर होउ जो कहेउँ सब भाषा भनिति प्रभाउ ॥ १५ ॥

बंदउँ अवध पुरी अति पावनि सरजू सरिकलि कलुष नमावनि ॥

प्रनवउँ पुर नर नारि बहोरी । ममता जिन्ह पर प्रभुहि न थोरी ॥

सिय निंदक अघ ओघ नसाए । लोक बिसोक बनाइ बसाए ॥

बंदउँ कौसल्या दिसि प्राची । कीरति जासु सकल जग याची ॥
 प्रगटेउ जहँ रघुपति ससि चारू । बिस्व सुखद खल कमल तुसारू ॥
 दसरथ राउ सहित सब रानी । सुकृत सुमंगल मूरति मानी ॥
 करउँ प्रनाम करम मन बानी । करहु कृपा सुत सेवक जानी ॥
 जिन्हहि बिचि बड़ भयउ बिधाता । महिमा अवधि राम पितु माता ॥
 सो०—बंदउँ अवध भुआल सत्य प्रेम जेहि राम पद ।

बिछुरत दीनदयाल प्रिय तनु तन इव परिहरेउ ॥ १६ ॥
 प्रनवउँ परिजन सहित बिदेहू । जाहि राम पद गूढ़ सनेहू ॥
 जोग भोग महँ राखेउ गोई । राम बिलोकत प्रगटेउ सोई ॥
 प्रनवउँ प्रथम भरत के चरना । जासु नेम ब्रत जाइ न बरना ॥
 राम चरन पंकज मन जासू । लुबुध मधुप इव तजइ न पासू ॥
 बंदउँ लछिमन पद जल जाता । सीतल सुभग भगत सुख दाता ॥
 रघुपति कीरति बिमल पताका । दंड समान भयउ जस जाका ॥
 सेष सहस्रसीस जग कारन । जो अवतरेउ भूमि भय टारन ॥
 सदा सो सानुकूल रह मो पर । कृपासिंधु सौमित्रि गुनाकर ॥
 रिपुसूदन पद कमल नमामी । सूर सुसील भरत अनुगामी ॥
 महाबीर बिनवउँ हनुमाना । राम जासु जस आप बखाना ॥
 सो०—प्रनवउँ पवनकुमार खल बन पावक ग्यान घन ।

जासु हृदय आगार बसहि राम सर चाप धर ॥ १७ ॥
 कपिपति रीछ निसाचर राजा । अंगदादि जे कीस समाजा ॥

बंदउँ सब के चरन सुहाए । अधम सरीर राम जिन्ह पाए ॥
 रघुपति चरन उपासक जेते । खग मृग सुर नर असुर समेते ॥
 बंदउँ पद सरोज सब केरे । जे बिनु काम राम के चरे ॥
 सुक सनकदि भगत मुनि नारद । जे मुनिबर बिग्यान बिसारद ॥
 प्रनवउँ सबहि धरनि धरि सीसा । करहु कृपा जन जानि मुनीसा ॥
 जनकसुता जग जननि जानकी । अतिसय प्रिय करुनानिधान की ॥
 ताके जुग पद कमल मनावउँ । जासु कृपाँ निरमल मति पावउँ ॥
 पुनि मन बचन कर्म रघुनायक । चरन कमल बंदउँ सब लायक ॥
 राजिवनयन धरें धनु सायक । भगत बिपति भंजन सुखदायक ॥
 दो० — गिरा अरथ जल बीचि सम कहिअत भिन्न न भिन्न ।

बंदउँ सीता राम पद जिन्हहि परम प्रिय खिन्न ॥ १८ ॥
 बंदउँ नाम राम रघुबर को । हेतु कृसानु भानु हिमकर को ।
 बिधि हरि हरमय बेद प्रान सो । अगुन अनूपम गुन निधान सो ॥
 महामंत्र जोइ जपत महेसू । कासीं मुकुति हेतु उपदेसू ॥
 महिमा जासु जान गनराऊ । प्रथम पूजअत नाम प्रभाऊ ॥
 जान आदिकबि नाम प्रतापू । भयउ सुद्ध करि उलटा जापू ॥
 सहस नाम सम मुनि सिव बानी । जपि जेई पिय संग भवानी ॥
 हरषे हेतु हेरि हर ही को । किय भूषन तिय भूषन ती को ।
 नाम प्रभाउ जान सिव नीको । कालकूट फलु दीन्ह अमी को ॥
 दो० — बरषा रितु रघुपति भगति तुलसी सालि सुदास ।

राम नाम बर बरन जुग सावन भादव मास ॥ १९ ॥

आखर मधुर मनोहर दोऊ । बरन बिलोचन जन जिय जोऊ ॥
 सुमिरत सुलभ सुखद सब काहू । लोक लाहु परलोक निबाहू ॥
 कहत सुनत सुमिरत सुठि नीके । राम लखन सम प्रिय तुलसी के ॥
 बरनत बरन प्रीति बिलगाती । ब्रह्म जीव सम सहज सँघाती ॥
 नर नारायन सरिस सुभ्राता । जग पालक बिसेषि जन त्राता ॥
 भगति सुतिय कल करन बिभूषन । जग हित हेतु बिमल बिधु पूषन ॥
 स्वाद तोष सम सुगति सुधा के । कमठ सेष सम धर बसुधा के ॥
 जन मन मंजु कंज मधुकर से । जीह जसोमति हरि हलधर से ।
 दो०—एकु छत्रु एकु मुकुटमनि सब बरननि पर जोड ।

तुलसी रघुबर नाम के बरन बिराजत दोड ॥ २० ॥
 समुझत सरिस नाम अरु नामी । प्रीति परसपर प्रभु अनुगामी ॥
 नाम रूप दुइ ईस उपाधी । अकथ अनादि सुसामुझि साधी ॥
 को बड़ छोट कहत अपराधू । सुनि गुन भेदु समुझिहहिं साधू ॥
 देखिअहिं रूप नाम आधीना । रूप ग्यान नहिं नाम बिहीना ॥
 रूप बिसेष नाम बिनु जानें । करतल गत न परहिं पहिचानें ॥
 सुमिरिअ नाम रूप बिनु देखें । आवत हृदयँ सनेह बिसेषें ॥
 नाम रूप गति अकथ कहानी । समुझत सुखद न परति बखानी ॥
 अगुन सगुन बिच नाम सुसाखी । उभय प्रबोधक चतुर दुभाषी ॥
 दो०—राम नाम भनिदीप धरु जोह देहरीं द्वार ।

तुलसी भीतर बाहेरहुँ जाँ चाहसि उजिआर ॥ २१ ॥

नाम जीहँ जपि जागहिं जोगी । बिरति बिरचि प्रपंच बियोगी ॥
 ब्रह्मसुखाहि अनुभवहिं अनूपा । अकथ अनामय नाम न रूपा ॥
 जाना चहहिं गूढ़ गति जेऊ । नाम जीहँ जपि जानहिं तेऊ ॥
 साधक नाम जपहिं लय लाएँ होहि सिद्ध अनिमादिक पाएँ ॥
 जपहिं नामु जन आरत भारी । मिटहिं कुसंकट होहिं सुखारी ॥
 राम भगत जग चारि प्रकारा । सुकृती चारिउ अनघ उदारा ॥
 चहू चतुर कहूँ नाम अधारा । ग्यानी प्रभुहि बिसेषि पिआरा ।
 चहूँ जुग चहूँ श्रुति नाम प्रभाऊ । कलि बिसेषि नहिं आन उपाऊ ॥
 दो०—सकल कामना हीन जे राम भगति रस लीन ।

नाम सुप्रेम पियूष हृद तिन्हहूँ किए मन मीन ॥ २२ ॥
 अगुन सगुन दुइ ब्रह्म सरूपा । अकथ अगाध अनादि अनूपा ॥
 मोरें मत बड़ नामु दुहू तें किए जेहिं जुग निज बस निज बूतें ।
 प्रौढ़ि सुजन जनि जानहिं जन की कहउँ प्रतीति प्रीति रुचि मन की ॥
 एकु दारुगत देखिअ एकू । पावक सम जुग ब्रह्म बिबेकू ।
 उभय अगम जुग सुगम नाम तें । कहेउँ नामु बड़ ब्रह्म राम तें ॥
 व्यापकु एकु ब्रह्म अबिनासी । सत चेतन घन आनँद रासी ॥
 अस प्रभु हृदयँ अछत अबिकारी । सकल जीव जग दीन दुखारी ॥
 नाम निरूपन नाम जतन तें । सोड प्रगटत जिमि मोल रतन तें ॥
 दो०—निगुन तें एहि भाँति बड़ नाम प्रभाउ अपार ।

कहउँ नामु बड़ राम तें निज बिचार अनुसार ॥ २३ ॥

राम भगत हित नर तनु धारी । सहि संकट किए साधु सुखारी ॥
 नामु सप्रेम जपत अनयासा । भगत होहिं मुद मंगल बासा ॥
 राम एक तापस तिय तारी । नाम कोटि खल कुमति सुधारी ॥
 रिषि हित राम सुकेतुसुता की । सहित सेन सुत कीन्हि बिबाकी ॥
 सहित दोष दुख दास दुरासा । दलइ नामु जिमि रवि निसि नासा ॥
 भंजेउ राम आपु भव चापू । भव भय भंजन नाम प्रतापू ।
 दंडक बन प्रभु कीन्ह सुहावन । जन मन अमित नाम किए पावन ॥
 निसिचर निकर दले रघुनंदन । नामु सकल कलि कलुष निकंदन ॥
 दो०— सबरी गीध सुसेवकनि सुगति दीन्ह रघुनाथ ।

नाम उधारे अमित खल बेद बिदित गुन गाथ ॥ २४ ॥
 राम सुकंठ बिभीषन दोऊ । राखे सरन जान सबु कोऊ ॥
 नाम गरीब अनेक नेवाजे । लोक बेद बर बिरिद बिराजे ॥
 राम भालु कपि कटकु बटोरा । सेतु हेतु श्रमु कीन्ह न थोरा ॥
 नामु लेत भवसिंधु सुखाहीं । करहु बिचारु सुजन मन माहीं ॥
 राम सकुल रन रावनु मारा । सीय सहित निज पुर पगु धारा ॥
 राजा रामु अवध रजधानी । गावत गुन सुर मुनि बर बानी ॥
 सेवक सुमिरत नामु सप्रीती । बिनु श्रम प्रबल मोह दलु जीती ॥
 फिरत सनेहँ मगन सुख अपनै । नाम प्रसाद सोच नहिं सपनै ।
 दो०— ब्रह्म राम तैं नामु बड़ बर दायक बर दानि ।

रामचरित सत कोटि यहँ लिय महेश जियँ जानि ॥ २५ ॥

मासपारायण, पहला विश्राम

नाम प्रसाद संभु अबिनासी । साजु अमंगल मंगल रासी ॥
 सुक सनकादि सिद्ध मुनि जोगी , नाम प्रसाद ब्रह्मसुख भोगी ॥
 नारद जानेउ नाम प्रतापू । जग प्रिय हरि हरि हर प्रिय आपू ॥
 नाम जपत प्रभु कौन्ह प्रसादू । भगत सिरोमनि भे प्रह्लादू ॥
 ध्रुव सगलानि जपेउ हरि नाऊँ । पायउ अचल अनूपम ठाऊँ ॥
 सुमिरि पवनसुत पावन नामू अपने बस करि राखे रामू ।
 अपतु अजामिलु गजु गनिकाऊ । भए मुकुत हरि नाम प्रभाऊ ॥
 कहौं कहौं लागि नाम बड़ाई । रामु न सकहिं नाम गुन गाई ॥
 दो० नाम राम को कलपतरु कलि कल्याण निवासु ।

जो सुमिरत भयो भाँग तेँ तुलसी तुलसीदासु ॥ २६ ॥
 चहुँ जुग तीनि काल तिहुँ लोका । भए नाम जपि जीव बिसोका ।
 बेद पुरान संत मत एहू । सकल सुकृत फल राम सनेहू ॥
 ध्यानु प्रथम जुग मख बिधि दूजै । द्वापर परितोषत प्रभु पूजै ॥
 कलि केवल मल मूल मलीना । पाप पयोनिधि जन मन मीना ।
 नाम कामतरु काल कराला । सुमिरत समन सकल जग जाला ॥
 राम नाम कलि अभिमत दाता । हित परलोक लोक पितु माता ।
 नहिं कलि करम न भगति बिबेकू । राम नाम अवलंबन एकू ।
 कालनेमि कलि कपट निधानू । नाम सुमति समरथ हनुमानू ।
 दो०—राम नाम नरकेसरी कनककसिपु कलिकाल ।

जापक जन प्रह्लाद जिमि पालिहि दलि सुरसाल ॥ २७ ॥

भायँ कुभायँ अनख आलसहूँ । नाम जपत मंगल दिसि दसहूँ ॥
 सुमिरि सो नाम राम गुन गाथा । करउँ नाइ रघुनाथहि माथा ।
 मोरि सुधारिहि सो सब भाँती । जासु कृपा नहिं कृपाँ अघाती ॥
 राम सुस्वामि कुसेवकु मोसो । निज दिसि देखि दयानिधि पोसो ॥
 लोकहूँ बेद सुसाहिब रीती । बिनय सुनत पहिचानत प्रीती ॥
 गनी गरीब ग्राम नर नागर । पंडित मूढ़ भलीन उजागर ॥
 सुकबि कुकबि निज मति अनुहारी । नृपहि सराहत सब नर नारी ।
 साधु सुजान सुसील नृपाला । ईस अंस भव परम कृपाला ॥
 सुनि सनमानहिं सबहि सुबानी । भनिति भगति नति गति पहिचानी ।
 यह प्राकृत महिपाल सुभाऊ । जान सिरोमनि कोसलराऊ ॥
 रीझत राम सनेह निसोते । को जग मंद मलिनमति मोते ॥
 दो०— सठ सेवक की प्रीति रुचि रखिहहि राम कृपालु ।

उपल किए जलजान जेहि सचिव सुमति कपि भालु ॥ २८ (क) ॥

हौंदु कहावत सबु कहत राम सहत उपहास ।

साहिब सीतानाथ सो सेवक तुलसीदास ॥ २८ (ख) ॥

अति बड़ि मोरि ढिठाई खोरी । सुनि अघ नरकहूँ नाक सकोरी ।
 समुझि सहम मोहि अपडर अपने । सो सुधि राम कोन्हि नहिं सपने ॥
 सुनि अवलोकि सुचित चख चाही । भगति मोरि मति स्वामि सराही ।
 कहत नसाइ होइ हियँ नीकी । रीझत राम जानि जन जी की ॥
 रहति न प्रभु चित चूक किए की । करत सुरति सय बार हिए की ।

जैहिं अघ बधेउ व्याध जिमि बाली फिरि सुकठ सोइ कीन्ह कुचाली
सोइ करतूति बिभीषन केरी सपनेहुँ सो न राम हियँ हेरी ।
ते भरतहि भेंटत सनमाने । राजसभाँ रघुबीर बखाने ॥

दो० — प्रभु तरु तर कपि डार पर ते किए आपु समान ।

तुलसी कहूँ न राम से सहिब सीलनिधान ॥ २९ (क) ॥

राम निकाई गवरी है सबही को नीक ।

जौ यह साँची है सदा तौ नीको तुलसीक ॥ २९ (ख) ॥

एहि बिधि निज गुन दोष कहि सबहि बहुरि सिरु नाइ ।

बरनउँ रघुवर बिसद जसु सुनि कलि कलुष नसाइ ॥ २९ (ग) ॥

जागबलिक जो कथा सुहाई भरद्वाज मुनिबरहि सुनाई ॥

कहिहउँ सोइ संवाद बखानी सुनहुँ सकल सज्जन सुखु मानी ॥

संभु कीन्ह यह चरित सुहावा । बहुरि कृपा करि उमाहि सुनावा ॥

सोइ सिव कागभुसुंझिहि दीन्हा राम भगत अधिकारी चीन्हा ॥

तेहि सन जागबलिक पुनि पावा । तिन्ह पुनि भरद्वाज प्रति गावा ॥

ते श्रोता बक्ता समसीला सर्वँदरसी जानहिं हरिलीला ॥

जानहिं तोनि काल निज ग्याना । करतल गत आमलक समाना ॥

औरउ जे हरिभगत सुजाना । कहहिं सुनिहिं समुझहिं बिधिनाना ॥

दो० — मैं पुनि निज गुर सन सुनी कथा सो सूकरखेत ।

समुझी नहिं तसि बालपन तब अति रहेउँ अचेत ॥ ३० (क) ॥

श्रोता बक्ता ग्याननिधि कथा राम कै गूढ ।

किमि समुझौं मैं जीव जड़ कलि मल ग्रसित बिमूढ ॥ ३० (ख) ॥

तदपि कही गुर बारहिं बारा । समुझि परी कछु मति अनुसारा ॥
 भाषाबद्ध करबि मैं सोई । मोरें मन प्रबोध जेहिं होई ॥
 जस कछु बुधि बिबेक बल मेरें । तस कहिहउँ हियँ हरि के प्रेरें ॥
 निज संदेह मोह भ्रम हरनी । करउँ कथा भव सरिता तरनी ॥
 बुध बिश्राम सकल जन रंजनि । रामकथा कलि कलुष बिभंजनि ॥
 रामकथा कलि पंगव भरनी । पुनि बिबेक पावक कहूँ अरनी ॥
 रामकथा कलि कामद गाई । सुजन सजीवनि मूरि सुहाई ॥
 सोइ बसुधातल सुधा तरंगिनि । भय भंजनि भ्रम भेक भुअंगिनि ॥
 असुर सेन सम नरक निकंदिनि । साधु बिबुध कूल हित गिरिनिदिनि ॥
 संत समाज पयोधि रमा सी । बिस्व भार भर अचल छाया सी ॥
 जम गन मुहँ मसि जग जमुना सी । जीवन मुक्ति हेतु जनु कासी ॥
 रामहि प्रिय पावनि तुलसी सी । तुलसिदास हित हियँ हुलसी सी ॥
 सिवप्रिय मेकल सैल सुता सी । सकल सिद्धि सुख संपति रासी ॥
 सदगुन सुरगन अंब अदिति सी । रघुबर भगति प्रेम परमिति सी ॥
 दो०— रामकथा मंदाकिनी चित्रकूट चित चारु ।

तुलसी सुभग सनेह बन सिय रघुबीर बिहारु ॥ ३१ ॥
 रामचरित चिंतामनि चारु । संत सुमति तिय सुभग सिंगारु ॥
 जग मंगल गुनग्राम राम के । दानि मुक्ति धन धरम धाम के ॥
 सदगुर ग्यान बिराग जोग के । बिबुध बैद भव भीम रोग के ॥
 जननि जनक सिय राम प्रेम के । बीज सकल व्रत धरम नेम के ॥

समन पाप संताप सोक के । प्रिय पालक परलोक लोक के ।
 सचिव सुभट भूपति बिचार के । कुंभज लोभ उदधि अपार के ।
 काम कोह कलिमल करिगन के । केहरि सावक जन मन बन के ।
 अतिथि पूज्य प्रियतम पुरारि के । कामद घन दारिद द्वारि के ।
 मंत्र महामनि बिषय ब्याल के । मेटत कठिन कुअंक भाल के ।
 हरन मोढ़ तम दिनकर कर से । सेवक सालि पाल जलधर से ।
 अभिमत दानि देवतरु बर से । सेवत सुलभ सुखद हरि हर से ।
 सुकवि सरद नभ मन उडगन से । रामभगत जन जीवन धन से ।
 सकल सुकृत फल भूरि भोग से । जग हित निरुपधि साधु लोग से ।
 सेवक मन मानस मराल से । पावन गंग तरंग माल से ॥

दो० — कुपथ कुतरक कुचालि कलि कपट दंभ पाषड ।

दहन राम गुन ग्राम जिमि इधन अनल प्रचंड । ३२ (क) ॥

रामचरित राकेस कर सरिस सुखद सब काहु ।

सज्जन कुमुद चकोर चित हित बिसेषि बड़ लाहु ॥ ३२ (ख) ॥

कीन्हि प्रसन्न जेहि भाँति भवानी । जेहि बिधि संकर कहा बखानी ॥
 सो सब हेतु कहब मैं गाई । कथा प्रबंध बिचित्र बनाई ।
 जेहिं यह कथा सुनी नहिं होई । जनि आचरजु करै सुनि सोई ॥
 कथा अलौकिक सुनहिं जे ग्यानी । नहिं आचरजु करहिं अस जानी ॥
 रामकथा कै मिति जग नाही । असि प्रतीति तिन्ह के मन माहीं ॥
 नाना भाँति राम अवतारा । रामायन सत कोटि अपारा ॥

कलपभेद हरिचरित सुहाए । भौंति अनेक मुनीसन्ह गाए ॥
करिअ न संसय अस उर आनी । सुनिअ कथा सादर रति मानी ॥
दो०—राम अनंत अनंत गुन अमित कथा बिस्तार ।

सुनि आचरजु न मानिहहिं जिन्ह कैं बिमल बिचार ॥ ३३ ॥
एहि बिधि सब संसय करि दूरी । सिर धरि गुर पद पंकज धूरी ॥
पुनि सबही बिनवउँ कर जोरी । करत कथा जेहिं लाग न खोरी ॥
सादर सिवहि नाइ अब माथा । बरनउँ बिसद राम गुन गाथा ॥
संबत सोरह सैं एकतीसा । करउँ कथा हरि पद धरि सीसा ॥
नौमी भौम बार मधुमासा । अवधपुरी यह चरित प्रकासा ॥
जेहि दिन राम जनम श्रुति गावहिं । तीरथ सकल तहाँ चलि आवहिं ॥
असुर नाग खग नर मुनि देवा । आइ करहिं रघुनायक सेवा ।
जन्म महोत्सव रचहिं सुजाना । करहिं राम कल कीरति गाना ॥
दो०—मज्जहिं सज्जन बृंद बहु पावन सरजू नीर ।

जयहिं राम धरि ध्यान उर सुंदर स्याम सरीर ॥ ३४ ॥
दरस परस मज्जन अरु पाना । हरइ पाप कह बेद पुराना ॥
नदी पुनीत अमित महिमा अति । कहिन सकइ सारदा बिमल मति ।
राम धामदा पुरी सुहावनि । लोकसमस्त बिदित अति पावनि ॥
चारि खानि जग जीव अपारा । अवध तजै तनु नहिं संसारा ॥
सब बिधि पुरी मनोहर जानी । सकल सिद्धिप्रद मंगल खानी ॥
बिमल कथा कर कीन्ह अरंभा । सुनत नसाहिं काम मद दंभा ।

रामचरितमानस एहि नामा । सुनत श्रवन पादअ बिश्रामा ॥
मन करि बिषय अनल बन जरई । होइ सुखी जौं एहिं सर परई ।
रामचरितमानस मुनि भावन । बिरचेउ संभु सुहावन पावन ॥
त्रिबिध दोष दुख दारिद दावन । कलि कुर्चाल कुलिल कलुष नसावन ॥
रचि महेस निज मानस राखा । पाइ सुसमउ सिखा सन भाषा ॥
तातें रामचरितमानस बर । धरेउ नाम हियैं हेरि हरषि हर ॥
कहउँ कथा सोइ सुखद मुहाई सादर सुनहु मृजन मन लाई ।
दो० जस मानस जेहि बिधि भयउ जग प्रचार जहि हेतु ।

अब सोइ कहउँ प्रसंग सब सुमिरि उमा वृषकेतु ॥ ३५ ॥
संभु प्रसाद सुमति हियैं हुलसी । रामचरितमानस कबि तुलसी ।
करइ मनोहर मति अनुहारी । मृजन सुचित सुनि लेहु मृधारी ।
सुमति भूमि थल हृदय अगाधू । बेद पुरान उदाधि घन साधू ॥
बरषाहिं राम सुजस बर बारी । मधुर मनोहर मंगलकारी ॥
लीला सगुन जो कहहिं बखानी । सोइ स्वच्छता करइ मल हानी ।
प्रेम भगति जो बरनि न जाई । सोइ मधुरता मुसीतलताई ॥
सो जल सुकृत सालि हित हंई । राम भगत जन जीवन सोई
मेधा महि गत सो जल पावन सर्किलि श्रवनमग चलेउ मुहावन ।
भरेउ सुमानस सुथल थिराना । सुखद सीत रुचि चारु चिराना ॥
दो०—सुठि सुंदर संवाद बर बिरचे बृद्धि बिचारि ।

तेइ एहि पावन मुभग सर घाट मनोहर चारि ॥ ३६ ॥

सस प्रबंध सुभग सोपाना । ग्यान नयन निरखत मन माना ॥
 रघुपति महिमा अगुन अबाधा । बरनब सोइ बर बारि अगाधा ॥
 राम सीय जस सलिल सुधासम । उपमा बीचि बिलास मनोरम ॥
 पुरइनि सधन चारु चौपाई । जुगुति मंजु मनि सीप सुहाई ॥
 छंद सोरठा सुंदर दोहा । सोइ बहुरंग कमल कुल सोहा ॥
 अरथ अनूप सुभाव सुभासा । सोइ पराग मकरंद सुबासा ।
 सुकृत पुंज मंजुल अलि माला । ग्यान बिराग बिचार मराला ।
 धुनि अवरेब कबित गुन जाती । मीन मनोहर ते बहुभाँती ।
 अरथ धरम कामादिक चारी । कहब ग्यान बिग्यान बिचारी ॥
 नव रस जप तप जोग बिरागा । ते सब जलचर चारु तड़ागा ॥
 सुकृती साधु नाम गुन गाना । ते बिचित्र जलबिहग समाना ॥
 संतसभा चहुँ दिसि अवैराई । श्रद्धा रितु बसंत सम गाई ॥
 भगति निरूपन बिबिध बिधाना । छमा दया दम लता बिताना ।
 सम जम नियम फूल फल ग्याना । हरि पद रति रस बेद बखाना ॥
 औरउ कथा अनेक प्रसंगा । तेइ सुक पिक बहुबरन बिहंगा ॥
 दो०— पुलक बाटिका बाग बन सुख सुबिहंग बिहार ।

माली सुमन सनेह जल सँचत लोचन चारु ॥ ३७ ॥
 जे गावहिं यह चरित सँभारे । तेइ एहि ताल चतुर रखवारे ॥
 सदा सुनहिं सादर नर नारी । तेइ सुरबर मानस अधिकारी ॥
 अति खल जे बिषई बग कागा । एहि सर निकट न जाहिं अभागा ।

संबुक भेक सेवार समाना । इहाँ न बिषय कथा रस नाना ॥
तेहि कारन आवत हियँ हरे । कामी काक बलाक बिचारे ॥
आवत एहिं सर अति कठिनाई । राम कृपा बिनु आइ न जाई ॥
कठिन कुसंग कुपंथ कराला । तिन्ह के बचन बाध हरि ब्याला ।
गृह कारज नाना जंजाला । ते अति दुर्गम सैल बिसाला ।
बन बहु बिषम मोह मद माना । नदीं कुतर्क भयकर नाना ।
दो० जे श्रद्धा संबल रहित नहिं संतन्ह कर साध ।

तिन्ह कहूँ मानस अगम अति जिन्हहि न प्रिय रघुनाथ ॥ ३८ ॥
जौं करि कष्ट जाइ पुनि कोई । जातहिं नीद जुड़ाई होई ॥
जड़ता जाइ बिषम उर लागी । गएहुँ न मज्जन पाव अभागी ॥
करि न जाइ सर मज्जन पाना । फिरि आवइ समेत अभिमाना ॥
जौं बहोरि कोउ पूछन आवा । सर निदा करि ताहि बुझावा ॥
सकल बिघ्न ब्यापहिं नहिं तेही । राम मुकृपाँ बिलोकहिं जेही ॥
सोइ सादर सर मज्जनु करई । महा घोर त्रयताप न जरई ॥
ते नर यह सर तजहिं न काऊ । जिन्ह के राम चरन भल भाऊ ॥
जो नहाइ चह एहिं सर भाई । सो सतसंग करउ मन लाई ॥
अस मानस मानस चख चाही । भइ कबि बुद्धि बिमल अवगाही ॥
भयउ हृदयँ आनंद उछाहू । उमगेउ प्रेम प्रमोद प्रबाहू ॥
चली सुभग कबिता सरिता सो । राम बिमल जस जल भरिता सो ।
सरजू नाम सुमंगल मूला । लोक बेद मत मंजुल कूला ॥

नदी पुनीत सुमानस नंदिनि । कलिमलतृनतरुमूलनिकंदिनि ॥

दो०— श्रोता त्रिविध समाज पुर ग्राम नगर दुहुँ कूल ।

संतसभा अनुपम अवध सकल सुमंगल मूल ॥ ३९ ॥

रामभगति सुरसरितहि जाई । मिली सुकीरति सरजु सुहाई ।

सानुज राम समर जसु पावन । मिलेउ महानदु सोन सुहावन ।

जुग बिच भगति देवधुनि धारा । सोहति सहित सुबिरति बिचारा ।

त्रिविध ताप त्रासक तिमुहानी । राम सरूप सिंधु समुहानी ॥

मानस मूल मिली सुरसारही । सुनत सुजन मन पावन करिही ॥

बिच बिच कथा बिचित्र बिभागा । जनु सरि तीर तीर बन बागा ॥

उमा महेस बिबाह बराती । ते जलचर अगनित बहुभाँती ॥

रघुबर जनम अनंद बधाई । भवँ तरंग मनोहरताई ॥

दो०— बालचरित चहु बंधु के बनज बिपुल बहुरंग ।

नृप रानी परिजन सुकृत मधुकर बारि बिहंग ॥ ४० ॥

सीय स्वयंबर कथा सुहाई । सरित सुहावनि सो छबि छाई ॥

नदी नाव पटु प्रसन्न अनेका । केवट कुसल उतर सबिबेका ॥

सुनि अनुकथन परस्पर होई । पथिक समाज सोह सरि सोई ॥

घोर धार भृगुनाथ रिसानी । घाट सुबद्ध राम बर बानी ॥

सानुज राम बिबाह उछाहू । सो सुभ उभग सुखद सब काहू ॥

कहत सुनत हरषहिं पुलकाहीं । ते सुकृती मन मुदित नहाहीं ।

राम तिलक हित मंगल साजा । परब जोग जनु जुरे समाजा ॥

काई कुमति केकई केरी । परी जासु फल बिपति घनेरी ॥
दो०— समन अमित उतपात सब भरत चरित जपजाग ।

कलि अघ खल अघगुन कथन ते जलमल बग काग ॥ ४१ ॥
कीरति सरित छहूँ रितु रूरी । समय सुहावनि पावनि भूरी ॥
हिम हिमसैलसुता सिव ब्याहू । सिसिर सुखद प्रभु जनम उछाहू ।
बरनब राम बिबाह समाजू । सो मुद मगलमय रितुराजू ।
ग्रीषम दुसह राम बनगवनू । पंथकथा खर आतप पवनू ॥
बरषा घोर निसाचर रारी । सुरकुल सालि सुमंगलकारी ॥
राम राज सुख बिनय बड़ाई । बिसद सुखद सोइ सरद सुहाई ।
सती सिरोमनि सिय गुन गाथा । सोइ गुन अमल अनूपम पाथा ॥
भरत सुभाउ सुसीतलताई । सदा एकरस बरनि न जाई ॥
दो०— अवलोकनि बोलनि मिलनि प्रीति परस्पर हास ।

भायप भलि चहु बंधु की जल माधुरी सुवास ॥ ४२ ॥
आरति बिनय दीनता मोरी । लघुता ललित सुबारि न थोरी ॥
अदभुत सलिल मुनत गुनकारी । आस पिआस मनोमल हारी ॥
राम सुप्रेमहि पोषत पानी । हरत सकल कलि कलुष गलानी ॥
भव श्रम सोषक तोषक तोषा । समन दुरित दुख दारिद दोषा ।
काम कोह मद मोह नसावन । बिमल बिबेक बिराग ब्रह्मवन ॥
सादर मज्जन पान किए तैं मिटहिं पाप परिताप हिए तैं ॥
जिन्ह एहिं बारि न मानस धोए । ते कायर कलिकाल बिगोए ॥

तृषित निरखि रबि करभव बारी । फिरहिं मृग जिमि जीव दुखारी ॥

दो० — मति अनुहारि सुबारि गुन गन गनि मन अन्हवाइ ।

सुमिरि भवानी संकरहि कह कबि कथा सुहाइ ॥ ४३ (क) ॥

अब रघुपति पद पंकरुह हिर्य धरि पाइ प्रसाद ।

कहउँ जुगल मुनिबर्य कर मिलन सुभग संवाद ॥ ४३ (ख) ॥

भरद्वाज मुनि बसहिं प्रयागा । तिन्हहिं राम पद अति अनुरागा ॥

तापस सम दम दया निधाना । परमारथ पथ परम सुजाना ॥

माघ मकरगत रबि जब होई । तीरथपतिहिं आव सब कोई ॥

देव दनुज किनर नर श्रेनीं । सादर मज्जहिं सकल त्रिबेनीं ॥

पूजहिं माधव पद जलजाता । परसि अखय बटु हरषहिं गाता ॥

भरद्वाज आश्रम अति पावन । परम रम्य मुनिबर मन भावन ॥

तहाँ होइ मुनि रिषय समाजा । जाहिं जे मज्जन तीरथ राजा ॥

मज्जहिं प्रात समेत उछाहा । कहहिं परसपर हरि गुन गाहा ॥

दो० — ब्रह्म निरूपन धरम बिधि बरनहिं तत्त्व बिभाग ।

कहहिं भगति भगवंत कै संजुत ग्यान बिराग ॥ ४४ ॥

एहि प्रकार भरि माघ नहाहीं । पुनि सब निज निज आश्रम जाहीं ॥

प्रति संबत अति होइ अनंदा । मकर मज्जि गवनहिं मुनिबृन्दा ॥

एक बार भरि मकर नहाए । सब मुनीस आश्रमन्ह सिधाए ॥

जागबलिक मुनि परम बिबेकी । भरद्वाज राखे पद टेकी ॥

सादर चरन सरोज पखारे । अति पुनीत आसन बैठारे ॥

करि पूजा मुनि सुजसु बखानी । बोले अति पुनीत मृदु बानी ।
नाथ एक संसउ बड़ मोरें । करगत बेदतत्त्व सबु तोरें ॥
कहत सो मोहि लागत भय लाजा । जौ न कहउँ बड़ होइ अकाजा ।
दो०—संत कहहिं असि नीति प्रभु श्रुति पुरान मुनि गाव ।

होइ न बिमल बिबेक उर गुर सन किएँ दुगव ॥ ४५ ॥
अस बिचारि प्रगटउँ निज मोहू । हरहु नाथ करि जन पर छोहू ॥
राम नाम कर अमित प्रभावा । संत पुरान उपनिषद गावा ॥
संतत जपत सभु अबिनासी । सिव भगवान ग्यान गुन रासी ॥
आकर चारि जीव जग अहहीं । कासीं भरत परम पद लहहीं ॥
सोपि राम महिमा मुनिराया सिव उपदेसु करत करि दाया ॥
रामु कवन प्रभु पूछउँ तोही । कहिअ बुझाइ कृपानिधि मोही ॥
एक राम अवधेस कुमारा । तिन्ह कर चरित बिदित संसारा ।
नारि बिरहँ दुखु लहेउ अपारा । भयउ रोषु रन रावनु मारा ॥
दो० - प्रभु सोइ राम कि अपर कोउ जाहि जपत त्रिपुरारि ।

सत्यधाम सबंग्य तुम्ह कहहु बिबेकु बिचारि ॥ ४६ ॥
जैसेँ मिटै मोर भ्रम भारी । कहहु सो कथा नाथ बिस्तारी ।
जागबलिक बोले मुसुकाई । तुम्हहि बिदित रघुपति प्रभुताई ।
रामभगत तुम्ह मन क्रम बानी । चतुराई तुम्हारि मैं जानी ।
चाहहु सुनै राम गुन गूढ़ा । कीन्हिहु प्रसन्न मनहुँ अति मूढ़ा ।
ताव सुनहु सादर मनु लाई । कहउँ राम कै कथा सुहाई ॥

महामोहु महिषेसु बिसाला । रामकथा कालिका कराला ॥
 रामकथा ससि किरन समाना । संत चकोर करहिं जेहि पाना ॥
 ऐसेइ संसय कीन्ह भवानी । महादेव तब कहा बखानी ॥
 दो०— कहउँ सो मति अनुहारि अब उमा संभु संवाद ।

भयउ समय जेहि हेतु जेहि सुनु मुनि मिटिहि बिषाद ॥ ४७ ॥
 एक बार त्रेता जुग माहीं । संभु गए कुंभज रिषि पाहीं ॥
 संग सती जगजननि भवानी । पूजे रिषि अखिलेस्वर जानी ॥
 रामकथा मुनिबर्ज बखानी । सुनो महेस परम सुखु मानी ॥
 रिषि पूछी हरिभगति सुहाई । कही संभु अधिकारी पाई ॥
 कहत सुनत रघुपति गुन गाथा । कछु दिन तहाँ रहे गिरिनाथा ॥
 मुनि सन बिदा मागि त्रिपुरारी । चले भवन सँग दच्छकुमारी ॥
 तेहि अवसर भंजन महिभारा । हरि रघुवंस लीन्ह अवतारा ॥
 पिता बचन तजि राजु उदासी । दंडक बन बिचरत अविनासी ॥
 दो०— हृदयँ बिचारत जात हर केहि बिधि दरसनु होइ ।

गुप्त रूप अवतरेउ प्रभु गएँ जान सबु कोइ ॥ ४८ (क) ॥
 सो०— संकर उर अति छेभु सती न जानहिं मरमु सोइ ।

तुलसी दरसन लोभु मन डरु लोचन लालची ॥ ४८ (ख) ॥
 रावन मरन मनुज कर जाचा । प्रभु बिधि बचनु कीन्ह चह साचा ॥
 जाँ नहिं जाउँ रहइ पछितावा । करत बिचारु न बनत बनावा ॥
 एहि बिधि भए सोचबस ईसा । तेही समय जाइ दससीसा ॥

लीन्ह नीच मारीचहि संगी । भयउ तुरत सोइ कपट कुरंगा ॥
 करि छलु मूढ़ हरी बैदेही । प्रभु प्रभाउ तस बिदित न तेही ॥
 मृग बधि बंधु सहित हरि आए । आश्रमु देखि नयन जल छाए ॥
 बिरह बिकल नर इव रघुराई । खोजत बिपिन फिरत दोउ भाई ॥
 कबहुँ जोग बियोग न जाके देखा प्रगट बिरह दुखु ताके ॥
 दो०—अति बिचित्र रघुपति चरित जानहि परम सुजान ।

जे मतिमंद बिमोह बस हृदयँ धरहि कछु आन ॥ ४९ ॥
 संभु समय तेहि रामहि देखा । उपजा हियँ अति हरषु बिसेषा ॥
 भरि लोचन छबिसिंधु निहारी । कुसमय जानि न कीन्ह चिन्हारी ॥
 जय सच्चिदानंद जग पावन । अस कहि चलेउ मनोज नसावन ॥
 चले जात सिव सती समेता । पुनि पुनि पुलकत कृपानिकेता ॥
 सती सो दसा संभु कै देखी । उर उपजा संदेहु बिसेषी ॥
 संकरु जगतबंध जगदीसा । सुर नर मुनि सब नावत सीसा ॥
 तिन्ह नृपसुतहि कीन्ह परनामा कहि सच्चिदानंद परधामा ॥
 भए मगन छाब तासु बिलोकी । अजहुँ प्रीति उर रहति न रोकी ।
 दो०—ब्रह्म जो व्यापक बिरज अज अकल अनीह अभेद ।

सो कि देह धरि होइ नर जाहि न जानत बेद ॥ ५० ॥
 बिष्णु जो सुर हित नरतनु धारी । सोउ सर्बग्य जथा त्रिपुरारी ॥
 खोजइ सो कि अग्य इव नारी । ग्यानधाम श्रीपति असुरारी ॥
 संभुगिरा पुनि मृषा न होई सित्र सर्बग्य जान सबु कोई ॥

अस संसय मन भयउ अपारा । होइ न हृदयँ प्रबोध प्रचारा ॥
 जद्यपि प्रगट न कहेउ भवानी । हर अंतरजामी सब जानी ॥
 सुनहि सती तव नारि सुभाऊ । संसय अस न धरिअ उर काऊ ॥
 जासु कथा कुंभज रिषि गाई । भगति जासु मैं मुनिहि सुनाई ॥
 सोइ मम इष्टदेव रघुबीरा । सेवत जाहि सदा मुनि धीरा ॥

छं०— मुनि धीर जोगी सिद्ध संतत बिमल मन जेहि ध्यावहीं ।
 कहि नेति निगम पुरान आगम जासु कीरति गावहीं ॥
 सोइ रामु व्यापक ब्रह्म भुवन निकाय पति माया धनी ।
 अवतरेउ अपने भगत हित निजतंत्र नित रघुकुलमनी ॥

सो० लाग न उर उपदेसु जद्यपि कहेउ सिवैं बार बहु ।

बोले बिहसि भहेसु हरिमाया बलु जानि जियैं ॥५१॥
 जौं तुम्हरेँ मन अति संदेहू । तौं किन जाद परीछा लेहू ।
 तब लगि बैठ अहउँ बटछाहीं । जब लगि तुम्ह ऐहहु मोहि पाहीं ।
 जैसें जाइ मोह भ्रम भारी । करेहु सो जतनु बिबेक बिचारी ॥
 चलीं सती सिव आयसु पाई । करहिं बिचारु करौं कां भाई ॥
 इहाँ संभु अस मन अनुमाना । दच्छसुता कहूँ नहिं कल्याना ॥
 मोरेहु कहें न संसय जाहीं । बिधि बिपरीत भलाई नाहीं ॥
 होइहि सोइ जो राम रचि राखा । को करि तर्क ब्रह्मवै साखा ॥
 अस कहि लगे जपन हरिनामा । गई सती जहाँ प्रभु सुखधामा ॥

दो०— पुनि पुनि हृदयँ बिचारु करि धरि सीता कर रूप ।

आगे होइ चलि पंथ तेहिं जेहिं आवत नरभूप ॥५२॥

लल्लिमन दीख उमाकृत बेषा । चकित भए भ्रम हृदयँ बिसेषा ॥
 कहि न सकत कछु अति गंभीरा । प्रभु प्रभाउ जानत मतिधीरा ॥
 सती कपटु जानेउ मुरस्वामी । सबदरसी सब अंतरजामी ॥
 सुमिरत जाहि मिटइ अग्याना । सोइ सरबग्य राम भगवाना ॥
 सती कीन्ह चह तहँहुँ दुराऊ । देखहु नारि सुभाव प्रभाऊ ।
 निज माया बलु हृदयँ बखानी । बोले बिहसि रामु मृदु बानी ॥
 जोरि पानि प्रभु कीन्ह प्रनामू । पिता समेत लीन्ह निज नामू ॥
 कहेउ बहोरि कहाँ बृषकेतू । बिपिन अकलि फिरहु केहि हंतू ॥
 दो०—राम बचन मृदु गूढ़ सुनि उपजा अति संकोचु ।

सती सभोत महेस पहिं चलीं हृदयँ बड़ सोचु ॥ ५३ ॥
 मैं संकर कर कहा न माना । निज अग्यानु राम पर आना ॥
 जाइ उत्तरु अब देहउँ काहा । उर उपजा अति दारुन दाहा ॥
 जाना राम सतीं दुखु पावा । निज प्रभाउ कछु प्रगटि जनावा ॥
 सतीं दीख कौतुकु भग जाता । आगें रामु सहित श्री भ्राता ॥
 फिरि चितवा पाछें प्रभु देखा । सहित बंधु सिय सुदर बेषा ॥
 जहँ चितवहिं तहँ प्रभु आसीना । सेवहिं सिद्ध मुनीस प्रबीना ॥
 देखे सिव बिधि बिष्णु अनेका । अमित प्रभाउ एक तैं एका ॥
 बंदत चरन करत प्रभु सेवा । बिबिध बेष देखे सब देवा ॥
 दो०—सती बिधात्री इंदिरा देखीं अमित अनूप ।

जेहिं जेहिं बेष अजादि सुर तेहि तेहि तन अनुरूप ॥ ५४ ॥

देखे जहँ तहँ रघुपति जेते । सक्तिन्ह सहित सकल सुर तेते ।
 जीव चराचर जो संसारा । देखे सकल अनेक प्रकारा ॥
 पूजहिं प्रभुहि देव बहु बेषा । राम रूप दूसर नहिं देखा ॥
 अवलोके रघुपति बहुतेरे । सीता सहित न बेष घनेरे ॥
 सोइ रघुबर सोइ लछिमनु सीता । देखि सती अति भई सभीता ॥
 हृदय कंप तन सुधि कछु नाहीं । नयन मूदि बैठीं मग माहीं ॥
 बहुरि बिलोकेउ नयन उघारी । कछु न दीख तहँ दच्छकुमारी ॥
 पुनि पुनि नाइ राम पद सीसा । चलीं तहाँ जहँ रहे गिरीसा ।
 दो०— गई समीप महेस तब हँसि पूछी कुसलात ।

लीन्हि परीछा कवन बिधि कहहु सत्य सब बात ॥ ५५ ॥

मासपारायण, दूसरा विश्राम

सतीं समुझि रघुबीर प्रभाऊ । भय बस सिव सन कीन्ह दुराऊ ॥
 कछु न परीछा लीन्हि गोसाईं । कीन्ह प्रनामु तुम्हारिहि नाई ॥
 जो तुम्ह कहा सो मृषा न होई । मोरें मन प्रतीति अति सोई ॥
 तब संकर देखेउ धरि ध्याना । सतीं जो कीन्ह चरित सबु जाना ॥
 बहुरि राममायहि सिरु नावा । प्रेरि सतिहि जेहिं झूठ कहावा ॥
 हरि इच्छा भावी बलवाना । हृदयँ बिचारत संभु सुजाना ।
 सतीं कीन्ह सीता कर बेषा । सिव उर भयउ बिषाद बिसेषा ।
 जाँ अब करउँ सती सन प्रीती । मिटइ भगति पथु होइ अनीती ॥
 दो०— परम पुनीत न जाइ तजि किअँ प्रेम बड़ पापु ।

प्रगटि न कहत महेसु कछु हृदयँ अधिक संतापु ॥ ५६ ॥

तब संकर प्रभु पद सिरु नावा । सुमिरत रामु हृदयँ अस आवा ।
 एहिं तन सतिहि भेट मोहि नहीं । सिव संकल्प कीन्ह मन माहीं ॥
 अस बिचारि संकरु मतिश्रीरा । चले भजन सुमिरत रघुबीरा ।
 चलत गगन भै गिरा सुहाई । जय महेस भलि भगति दृढाई ।
 अस पन तुम्ह बिनु करइ को आग । रामभगत समरथ भगवाना ।
 सुनि नभगिरा सती उर सोचा । पूछा सिवहि समेत सकोचा ॥
 कीन्ह कवन पन कहहु कृपाला । सत्यधाम प्रभु दीनदयाला ॥
 जदापि सतीं पूछा बहु भाँती । तदापि न कहेउ त्रिपुर आराती ॥
 दो० — सतीं हृदयँ अनुमान किय सबु जानेउ मर्बग्य ।

कीन्ह कपटु मैं संभु सन नारि सहज जड़ अग्य ॥ ५७ (क) ॥

श्लो० - जलु पथ सरिस बिकाइ देखहु प्रीति कि रीति भलि ।

बिलग होइ रसु जाइ कपट खटाई परत पुनि ॥ ५७ (ख) ॥
 हृदयँ सोचु समुझत निज करनी । चिंता अमित जाइ नहिं बरनी ॥
 कृपासिधु सिव परम अगाधा । प्रगट न कहेउ मोर अपराधा ॥
 संकर रुख अवलोकि भवानी । प्रभु मोहि तजेउ हृदयँ अकुलानी ॥
 निज अध समुझि न कछु कहि जाई । तपइ अवाँ इव उर अधिकारि ॥
 सतिहि ससोच जानि बृषकेतू । कहीं कथा सुंदर सुख हेतू ।
 बरनत पंथ बिबिध इतिहासा । बिस्वनाथ पहुँचे कैलासा ।
 तहाँ पुनि सभु समुझि पन आपन । बैठे बट तर करि कमलासन ।
 संकर सहज सरूपु सम्हारा लागि समार्ध अखंड अपारा ॥

दो० — सती बसहिं कैलास तब अधिक सोचु मन माहिं ।

मरम् न कोऊ जान कछु जुग सम दिवस सिराहिं ॥ ५८ ॥
 नित नव सोचु सती उर भारा । कब जैहउँ दुख सागर पारा ॥
 मैं जो कीन्ह रघुपति अपमाना । पुनि पतिबचनु मृषा करि जाना ॥
 सो फलु मोहि बिधाताँ दीन्हा । जो कछु उचित रह सोइ कीन्हा ॥
 अब बिधि अस बूझअ नहिं तोही । संकर बिमुख जिआवसि मोही ॥
 कहि न जाइ कछु हृदय गलानी । मन महुँ रामहि सुमिर सयानी ॥
 जाँ प्रभु दीनदयालु कहावा । आरति हरन बेद जसु गावा ॥
 तौ मैं बिनय करउँ कर जोरी । छूटउ बेगि देह यह मोरी ॥
 जाँ मोरें सिव चरन सनेहू । मन क्रम बचन सत्य ब्रतु एहू ॥
 दो० — तौ सबदरसी सुनिअ प्रभु करउ सो बेगि उपाइ ।

होइ मरनु जेहिं बिनहिं श्रम दुसह बिपत्ति बिहाइ ॥ ५९ ॥
 एहि बिधि दुखित प्रजेसकुमारी । अकथनीय दारुन दुखु भारी ॥
 बीतैं संबत सहस सतासी । तजी समाधि संभु अबिनासी ।
 राम नाम सिव सुमिरन लागे । जानेउ सती जगतपति जागे ।
 जाइ संभु पद बंदनु कीन्हा । सनमुख संकर आसनु दीन्हा ।
 लगे कहन हरि कथा रसाला । दच्छ प्रजेस भए तेहि काला ॥
 देखा बिधि बिचारि सब लायक । दच्छहि कीन्ह प्रजापति नायक ॥
 बड़ अधिकार दच्छ जब पावा । अति अभिमानु हृदयँ तब आवा ।
 नहिं कोउ अस जनमा जग माहीं । प्रभुता पाइ जाहि मद नाहीं

दो० — दच्छ लिए मुनि बोलि सब करन लगे बड़ जाग।

नेवते सादर सकल सुर जे पावत मख भाग॥६०॥
 किनर नाग सिद्ध गंधर्वा। बधुन्ह समेत चले सुर सर्वा॥
 बिष्णु बिरंचि महेसु बिहाई। चल सकल सुर जान बनाई॥
 सती बिलोके व्योम बिमाना। जात चले सुंदर बिधि नाना॥
 सुर सुदरी करहिं कल गाना। सुनत श्रवन छूटहिं मुनि ध्याना॥
 पूछेउ तब सिवैं कहेउ बखानी। पिता जग्य मुनि कछु हरषानी॥
 जौं महेसु मोहि आयसु देहीं। कछु दिन जाइ रहैं मिस एहीं॥
 पति परित्याग हृदयँ दुखु भारी। कहइ न निज अपराध बिचारी।
 बोली सती मनोहर बानी। भय संकोच प्रेम रस सानी॥
 दो०— पिता भवन उत्सव परम जौं प्रभु आयसु होइ।

ती मैं जाउँ कृपायत्तन सादर देखन सोइ॥६१॥
 कहेहु नीक मोरेहुँ मन भावा यह अनूचित नहिं नेवत पठावा।
 दच्छ सकल निज सुता बोलाई। हमरें बयर तुम्हउ बिसराई॥
 ब्रह्मसभाँ हम सन दुखु माना। तेहि तें अजहुँ करहिं अपमाना॥
 जौं बिनु बोलें जाहु भवानी। रहइ न सीलु सनेहु न कानी।
 जदपि मित्र प्रभु पितु गुर गेहा। जाइअ बिनु बोलेहुँ न सँदेहा।
 तदपि बिरोध मान जहँ कोई। तहाँ गएँ कल्यानु न होई॥
 भाँत अनेक संभु समुझावा। भावी बस न ग्यानु उर आवा॥
 कह प्रभु जहु जो बिनहिं बोलाएँ। नहिं भालि बान हमारे भाएँ

दो०— कहि देखा हर जतन बहु रहइ न दच्छकुमारि ।

दिए मुख्य मन संग तब बिदा कीन्ह त्रिपुरारि ॥ ६२ ॥
 पिता भवन जब गई भवानी । दच्छ त्रास काहुँ न सनमानी ॥
 सादर भलेहिं मिली एक माता । भगिनीं मिलीं बहुत मुसुकाता ॥
 दच्छ न कछु पूछी कुसलाता । सतिहि बिलोकि जेरे सब गाता ॥
 सतीं जाइ देखेउ तब जागा । कतहुँ न दीख संभु कर भागा ।
 तब चित चढ़ेउ जो संकर कहेऊ । प्रभु अपमानु समुझि उर दहेऊ ॥
 पाछिल दुखु न हृदयँ अस व्यापा । जस यह भयउ महा परितापा ।
 जद्यपि जग दारुन दुख नाना । सब तैं कठिन जाति अवमाना ॥
 समुझि सो सतिहि भयउ अति क्रोधा । बहु बिधि जननीं कीन्ह प्रबोधा ।
 दो०— सिव अपमानु न जाइ सहि हृदयँ न होइ प्रबोध ।

सकल सभहि हठि हटकि तब बोलीं बचन सक्रोध ॥ ६३ ॥
 सुनहु सभासद सकल मुनिदा । कही सुनी जिन्ह संकर निदा ।
 सो फलु तुरत लहब सब काहूँ । भली भाँति पछिताब पिताहूँ ।
 संत संभु श्रीपति अपबादा । सुनिअ जहाँ तहँ असि मरजादा ॥
 काटिअ तासु जीभ जो बसाई । श्रवन मूदि न त चलिअ पराई ॥
 जगदातमा महेसु पुरारी । जगत जनक सब के हितकारी ॥
 पिता मंदमति निंदत तेही । दच्छ सुक्र संभव यह देही ॥
 तजिहउँ तुरत देह तेहि हेतू । उर धरि चंद्रमौलि बृषकेतू ॥
 अस कहि जोग अगिनि तनु जारा । भयउ सकल मख हाहाकारा ॥

दो०— सती मरनु मुनि संभु गन लगे करन मख खीस।

जग्य बिधंस बिनोकि भृगु रच्छा कीन्हि मुनीस॥६४॥
समाचार सब संकर पाए। बीरभट्ट करि कोप पठाए।
जग्य बिधंस जाइ तिन्ह कीन्हा। सकल सुरन्ह बिधिबत फलु दीन्हा॥
भै जगबिदित दच्छ गति सोई। जसि कछु संभु बिमुख कै होई।
यह इतिहास सकल जग जानी। ताते मैं सछेप बखानी।
सतीं मरत हरि सन बरु मागा। जनम जनम सिव पद अनुरागा।
तेहि कारन हिमगिरि गृह जाई। जनमीं पारबती तनु पाई॥
जब तैं उमा सैल गृह जाई। सकल सिद्धि संपति तहँ छाई॥
जहँ तहँ मुनिन्ह सुआश्रम कीन्हे। उचित बास हिम भूधर दीन्हे॥
दो० सदा सुमन फल सहित सब द्रुम नव नाना जाति।

प्रगटीं मुंदर सैल पर मनि आकर बहु भाँति॥६५॥
सरिता सब पुनीत जलु बहहीं। खग मृग मधुप सुखी सब रहहीं॥
सहज बयरु सब जीवन्ह त्यागा। गिरि पर सकल करहिं अनुरागा॥
सोह सैल गिरिजा गृह आएँ। जिमि जनु रामभर्गति के पाएँ।
नित नूतन मंगल गृह तासू। ब्रह्मादिक गावहि जसु जासू॥
नारद समाचार सब पाए। कौनुकहीं गिरि गेह सिधाए॥
सैलराज बड़ आदर कीन्हा। पद पखारि बर आसनु दीन्हा॥
नारि सहित मुनि पद सिरु नावा। चरन सलिल सबु भवतु सिचावा॥
निज सौभाग्य बहुत गिरि बरना। सुता बोलि मेली मुनि चरना॥

दो०— त्रिकालग्य सर्वग्य तुम्ह गति सर्वत्र तुम्हारि।

कहहु सुता के दोष गुन मुनिबर हृदयँ बिचारि॥६६॥
 कह मुनि बिहसि गूढ़ मृदु बानी। सुता तुम्हारि सकल गुन खानी।
 सुंदर सहज सुसील सयानी। नाम उमा अंबिका भवानी॥
 सब लच्छन संपन्न कुमारी। होइहि संतत पियहि पिआरी॥
 सदा अचल एहि कर अहिवाता। एहि तें जसु पैहहि पितु माता॥
 होइहि पूज्य सकल जग माहीं। एहि सेवत कछु दुर्लभ नाही॥
 एहि कर नामु सुमिरि संसारा। त्रियचढ़िहि पतिव्रत असिधारा॥
 सैल सुलच्छन सुता तुम्हारी। सुनहु जे अब अवगुन दुइ चारी॥
 अगुन अमान मातु पितु हीना। उदासीन सब संसय छीना॥
 दो० जोगी जटिल अकाम मन नगन अमंगल बेष।

अस स्वामी एहि कहँ मिलिहि परी हस्त असि रेख॥६७॥
 सुनि मुनि गिरा सत्य जियँ जानी। दुख दंपतिहि उमा हरषानी॥
 नारदहूँ यह भेदु न जाना। दसा एक समुझब बिलगाना॥
 सकल सखीं गिरिजा गिरि मैना। पुलक सरीर भरे जल नैना॥
 होइ न मृगा देवरिषि भाषा। उमा सो बचनु हृदयँ धरि राखा॥
 उपजेउ सिव पद कमल सनेहू। मिलन कठिन मन भा संदेहू॥
 जानि कुअवसरु प्रीति दुराई। सखी उछँग बैठी पुनि जाई॥
 झूठि न होइ देवरिषि बानी। सोचहिं दंपति सखीं सयानी॥
 उर धरि धीर कहइ गिरिराऊ। कहहु नाथ का करिअ उपाऊ।

दो०— कह मुनीस हिमवत सुनु जो बिधि लिखा लिलार।

देव दनुज नर नाग मुनि कोउ न मेटनिहार ॥ ६८ ॥
तदपि एक मैं कहउँ उपाई । होइ करै जाँ दैउ सहाई ॥
जस बरु मैं बरनेउँ तुम्ह पाहीं । मिलिहि उमाहि तस ससय नाहीं ॥
जे जे बर के दोष बखाने । ते सब सिव पहिं मैं अनुमाने ।
जाँ बिबाहु संकर सन होई । दोषउ गुन सम कह सब कोई ॥
जाँ अहि सेज सयन हरि करहीं । बुध कछुतिन्ह कर दोषु न धरहीं ॥
भानु कृसानु सर्व रस खाहीं । तिन्ह कहैं मंद कहत कोउ नाहीं ॥
सुभ अरु असुभ सलिल सब बहई । सुरसरि कोउ अपुनीत न कहई ॥
समरथ कहूँ नहिं दोषु गोसाद । रबि पावक सुरसरि की नाई ॥
दो० जाँ अस हिसिषा करहिं नर जड़ बिबेक अभिमान ।

पराहिं कल्प भरि नरक महुँ जीव कि ईस समान ॥ ६९ ॥
सुरसरि जल कृत बारुनि जाना कबहुँ न संत करहिं तेहि पाना ॥
सुरसरि मिलें सो पावन जैसे । ईस अनीमहि अंतरु तैसे ॥
संभु सहज समरथ भगवाना । एहि बिबाहैं सब बिधि कल्याणा ॥
दुराराध्य पै अहहिं महेसू । आसुतोष पुनि किएँ कलेसू ॥
जाँ तपु करै कुमारि तुम्हारी । भाविउ मेटि सकाहिं त्रिपुरारी ॥
जद्यपि बर अनेक जग माहीं । एहि कहैं सिव तजि दूसर नाहीं ॥
बर दायक प्रनतरात भंजन । कृपासिधु सेवक मन रंजन ॥
इच्छित फल बिनु सिव अवराधैं । लहिअ न कोटि जोग जप साधैं ॥

दो०—अस कहि नारद सुमिरि हरि गिरिजहि दीन्हि असोस ।

होइहि यह कल्याण अब संसय तजहु गिरीस ॥ ७० ॥

कहि अस ब्रह्मभवन मुनि गयऊ । आगिल चरित सुनहु जस भयऊ ।

पतिहि एकांत पाइ कह मैना । नाथ न मैं समुझे मुनि बैना ॥

जौं घरु बरु कुलु होइ अनूपा । करिअ बिबाहु सुता अनुरूपा ॥

न त कन्या बरु रहउ कुआरी । कंत उमा मम प्रानपिआरी ।

जौं न मिलिहि बरु गिरिजहि जोगू । गिरि जड़ सहज कहिहि सबु लोगू ।

सोइ बिचारि पति करेहु बिबाहु । जेहिं न बहोरि होइ उर दाहु ॥

अस कहि परी चरन धरि सीसा । बोले सहित सनेह गिरीसा ॥

बरु पावक प्रगटै ससि माहीं । नारद बचनु अन्यथा नाहीं ॥

दो०—प्रिया सोचु परिहरहु सबु सुमिरहु श्रीभगवान ।

पारबतिहि निरमयउ जेहिं सोइ करिहि कल्याण ॥ ७१ ॥

अब जौं तुम्हहि सुता पर नेहू । तौ अस जाइ सिखावनु देहू ।

करै सो तपु जेहिं मिलहिं महेसू । आन उपायँ न मिटिहि कलेसू ॥

नारद बचन सगर्भ सहेतू । सुंदर सब गुन निधि बृषकेतू ॥

अस बिचारि तुम्ह तजहु असंका । सबहि भाँत संकरु अकलंका ॥

सुनि पति बचन हरषि मन माहीं । गई तुरत उठि गिरिजा पाहीं ॥

उमहि बिलोकि नयन भरे बारी । सहित सनेह गोद बैठारी ॥

बारहिं बार लेति उर लाई । गदगद कंठ न कछु कहि जाई ॥

जगत मातु सर्वग्य भवानी । मातु सुखद बोलौं मृदु बानी ॥

दो०— सुनहि मातु मैं दीख अस सपन सुनावउँ तोहि ।

सुंदर गौर सुबिप्रबर अस उपदेसेउ मोहि ॥ ७२ ॥
करहि जाइ तपु सैलकुमारी । नारद कहा सो सत्य बिचारी ॥
मातु पितहि पुनि यह मत भावा । तपु सुखप्रद दुख दोष नसावा ॥
तपबल रचइ प्रपंचु बिधाता । तपबल बिष्णु सकल जग त्राता ॥
तपबल सभु करहि संघारा । तपबल सषु धरइ महिभारा ॥
तप आधार सब सृष्टि भवानी । करहि जाइ तपु अस जियै जानी ॥
सुनत बचन बिसर्मित महतारी । सपन सुनायउ गिरिहि हैकारी ॥
मातु पितहि बहुबिधि समुझाई । चलीं उमा तप हित हरषाई ॥
प्रिय परिवार पिता अरु माता । भए बिकल मुख आव न बाता ॥
दो०— बेदसिरा भुनि आइ तब सबहि कहा समुझाइ ।

पारबती महिमा सुनत रहे प्रबोधहि पाइ ॥ ७३ ॥
उर धरि उमा प्रानपति चरना । जाइ बिपिन लागीं तपु करना ॥
अति सुकुमार न तनु तप जोगू । पति पद सुमिरि तजेउ सबु भोगू ॥
नित नव चरन उपज अनुरागा । बिसरी देह तपहिं मनु लागा ॥
संबत सहस मूल फल खाए । सागु खाइ सत बरष गवाँए ॥
कछु दिन भोजनु बारि बतासा । किए कठिन कछु दिन उपबासा ॥
बेल पाती महि परइ सुखाई । तीनि सहस संबत सोइ खाई ॥
पुनि परिहरे सुखानेउ परना । उमहि नामु तब भयउ अपरना ॥
देखि उमहि तप खीन सरीरा । ब्रह्मगिरा भै गगन गभीरा ॥

दो०— भयउ मनोरथ सुफल तब सुनु गिरिराजकुमारि ।

परिहर दुसह कलेस सब अब मिलिहहि त्रिपुरारि ॥ ७४ ॥
 अस तपु काहुँ न कीन्ह भवानी । भए अनेक धीर मुनि ग्यानी ॥
 अब उर धरहु ब्रह्म बर बानी । सत्य सदा संतत सुचि जानी ॥
 आवै पिता बोलावन जबहीं । हठ परिहरि धर जाएहु तबहीं ।
 मिलहिं तुम्हहि जब सप्त रिषीसा । जानेहु तब ग्रमान बागीसा ।
 सुनत गिरा बिधि गगन बखानी । पुलक गात गिरिजा हरषानी ॥
 उमा चरित सुंदर मैं गावा । सुनहु संभु कर चरित सुहावा ॥
 जब तैं सतीं जाइ तनु त्यागा । तब तैं सिव मन भयउ बिरागा ॥
 जपहिं सदा रघुनायक नामा । जहँ तहँ सुनिहिं राम गुन ग्रामा ॥
 दो०— चिदानंद सुखधाम सिव बिगत मोह षड काम ।

बिचरहिं यहि धरि हृदयँ हरि सकल लोक अभिराम ॥ ७५ ॥
 कतहुँ मुनिन्ह उपदेसहिं ग्याना । कतहुँ राम गुन करहिं बखाना ॥
 जदपि अकाम तदपि भगवाना । भगत बिरह दुख दुखित सुजाना ॥
 एहि बिधि गयउ कालु बहु बीती । नित नै होइ राम षड प्रीती ।
 नेमु प्रेमु संकर कर देखा । अबिचल हृदयँ भगति कै रेखा ॥
 प्रगटे रामु कृतम्य कृपाला । रूप सील निधि तेज बिसाला ॥
 बहु प्रकार संकरहि सराहा । तुम्ह बिनु अस व्रतु को निरबाहा ॥
 बहुबिधि राम सिवहि समुझावा । पारबती कर जन्मु सुनावा ॥
 अति पुनीत गिरिजा कै करनी । बिस्तर सहित कृपानिधि बरनी ॥

दो०— अब बिनती मम सुनहु सिव जौं मो पर निज नेहु।

जाइ बिबाहहु सैलजहि यह मोहि मार्गे देहु॥७६॥
 कह सिव जदपि उंचत अस नाही। नाथ बचन पुनि मेटि न जाहौं
 सिर धरि आयमु करिअ तुम्हारा। परम धरमु यह नाथ हमारा॥
 मातु पिता गुर प्रभु कै आनी। बिनहिं बिचार करिअ सुभ जानौ॥
 तुम्ह सब भाँति परम हितकारी। अग्या सिर पर नाथ तुम्हारी॥
 प्रभु तोपेउ सुनि संकर बचना। भक्ति बिबेक धर्म जुत रचना॥
 कह प्रभु हर तुम्हार पन रहेऊ। अब उर राखेहु जो हम कहेऊ॥
 अंतरधान भए अस भापी। संकर सोइ मूर्ति उर राखी॥
 तबहिं ससरिषि सिव पहिं आए। बोले प्रभु अति बचन सुहाए।
 दो०— पारबती पहिं जाइ तुम्ह प्रेम परिच्छा लेहु।

गिरिहि प्रेरि पठएहु भवन दूरि करेहु संदेहु॥७७॥
 रिषिन्ह गौरि देखी तहँ कैसी। मूर्तिमंत तपस्या जैसी॥
 बोले मुनि सुनु सैलकुमारी। करहु कवन कारन तपु भारी।
 केहि अत्राधहु का तुम्ह चहहु। हम सन सत्य परमु किन कहहु॥
 कहत बचन मनु अति सकुचाई। हँसिहहु सुनि हमारि जड़ताई।
 मनु हठ परा न सुनइ सिखावा। चहत बारि पर भीति उठावा॥
 नारद कहा सत्य सोइ जाना। बिनु पंखन्ह हम चहहिं उडाना॥
 देखहु मुनि अबिबेक हमारा। चाहिअ सदा सित्राह भरतारा॥
 दो०— सुनत बचन बिहसे रिषय गिरिसंभव तब देह।

नारद कर उपदेसु सुनि कहहु बसेउ किसु गेह॥७८॥

दच्छसुतन्ह उपदेसेन्हि जाई । तिन्ह फिरि भवनु न देख्वा आई ।
 चित्रकेतु कर घरु उन घाला । कनककसिपु कर पुनि अस हाला ॥
 नारद सिख जे सुनहिं नर नारी । अवसि होहिं तजि भवनु भिखारी ॥
 मन कपटी तन सज्जन चीन्हा । आपु सरिस सबही चह कीन्हा ॥
 तेहि कैं बचन मानि बिस्वासा । तुम्ह चाहहु पति सहज उदासा ॥
 निर्गुन निलज कृबेष कपाली । अकुल अगेह दिगंबर ब्याली ।
 कहहु कवन सुखु अस बरु पाएँ । भल भूलिहु ठग के बौराएँ ॥
 पंच कहैं सिवैं सती बिबाही । पुनि अवडेरि मराएन्हि ताही ।
 दो०— अब सुख सोवत सोचु नहिं भीख मागि भव खाहिं ।

सहज एकाकिन्ह के भवन कबहुँ कि नारि खटाहिं ॥ ७९ ॥
 अजहूँ मानहु कहा हमारा । हम तुम्ह कहूँ बरु नीक बिचारा ॥
 अति सुंदर सुचि सुखद सुसीला । गावहिं बेद जासु जस लीला ।
 दूषन रहित सकल गुन रासी । श्रीपति पुर बैकुंठ निवासी ॥
 अस बरु तुम्हहि मिलाउब आनी । सुनत बिहसि कह बचन भवानी ॥
 सत्य कहेहु गिरिभव तनु एहा । हठ न छूट छूटै बरु देहा ॥
 कनकउ पुनि पषान तैं होई । जारेहुँ सहजु न परिहर सोई ।
 नारद बचन न मैं परिहरऊँ । बसउ भवनु उजरउ नहिं डरऊँ ॥
 गुर कैं बचन प्रतीति न जेही । सपनेहुँ सुगम न सुख सिधि तेही ।
 दो०— महादेव अवगुन भवन बिष्णु सकल गुन धाम ।

जेहि कर मनु रम जाहि सन तेहि तेही सन काम ॥ ८० ॥

जौं तुम्ह मिलतेहु प्रथम मृतीसा । सुनतिउँ सिख तुम्हारि धरि सीसा ॥
 अब मैं जन्म संभु हित हारा । को गुन दूषन करै बिचारा ॥
 जौं तुम्हरे हठ हृदयँ बिसेषी । रहि न जाइ बिनु किऐ बरेषी ॥
 तौ कौतुकिअन्ह आलसु नाहीं । बर कन्या अनेक जग माहीं ।
 जन्म कोटि लागि रगर हमारी । बरउँ संभु न त रहउँ कुआरी ॥
 तजउँ न नारद कर उपदेसू । आपु कहहिं सत बार महेसू ।
 मैं पा परउँ कहइ जगदंबा । तुम्ह गृह गवनहु भयउ बिलंबा ॥
 देखि प्रेमु बोले मुनि ग्यानी । जय जय जगदंबिके भवानी ॥
 दो० — तुम्ह माया भगवान सिव सकल जगत पितु मातु ।

नाइ चरन सिर मुनि चले पुनि पुनि हरषत गातु ॥ ८१ ॥
 जाइ मुनिन्ह हिमवंतु पठाए । करि बिनती गिरजहिं गृह ल्याए
 बहुरि सप्तर्षि सिव पहिं जाई । कथा उमा कै सकल सुनाई ।
 भए मगन सिव सुनत सनेहा हरषि सप्तर्षि गवने गेहा ।
 मनु थिर करि तब संभु सुजाना । लगे करन रघुनाथक ध्याना ॥
 तारकु असुर भयउ तेहि काला । भुज प्रताप बल तेज बिसाला ॥
 तेहिं सब लोक लोकपति जीते । भए देव सुख संपति रीते ॥
 अजर अमर सो जीति न जाई । हारे सुर करि बिबिध लराई ॥
 तब बिरंचि सन जाइ पुकारे । देखे बिधि सब देव दुखारे ॥
 दो० — सब सन कहा बुझाइ बिधि दनुज निधन तब होइ ।

संभु सुक्र संभूत सुत एहि जीतइ रन सोइ । ८२ ॥

मोर कहा सुनि करहु उपाई । होइहि ईस्वर करिहि सहाई ॥
 सतीं जो तजी दच्छ मख देहा । जनमी जाइ हिमाचल गेहा ॥
 तेहिं तपु कीन्ह संभु पति लागी । सिव समाधि बैठे सबु त्यागी ॥
 जदपि अहइ असमंजस भारी । तदपि बात एक सुनहु हमारी ॥
 पठवहु कामु जाइ सिव पाहीं । करै छोभु संकर मन माहीं ॥
 तब हम जाइ सिवहि सिर नाई । करवाउब बिबाहु बरिआई ।
 एहि बिधि भलेहिं देवहित होई । मत अति नीक कहइ सबु कोई ॥
 अस्तुति सुरन्ह कीन्ह अति हेतू । प्रगटेउ बिषमबान झषकेतू ॥
 दो० — सुरन्ह कही निज बिपति सब सुनि मन कीन्ह बिचार ।

संभु बिरोध न कुसल मोहि बिहसि कहेउ अस भार ॥ ८३ ॥
 तदपि करब मैं काजु तुम्हारा । श्रुति कह परम धरम उपकारा ॥
 पर हित लागि तजइ जो देही । संतत संत प्रसंसहिं तेही ॥
 अस कहि चलेउ सबहि सिरु नाई । सुमन धनुष कर सहित सहाई ।
 चलत मार अस हृदयै बिचारा । सिव बिरोध ध्रुव मरनु हमारा ।
 तब आपन प्रभाउ बिस्तारा । निज बस कीन्ह सकल संसारा ॥
 कोपेउ जबहिं बारिचरकेतू । छन महँ मिटे सकल श्रुति सेतू ॥
 ब्रह्मचर्ज ब्रत संजम नाना । धीरज धरम ग्यान बिग्याना ॥
 सदाचार जप जोग बिरागा । सभय बिबेक कटक सबु भागा ॥
 छं० — भागेउ बिबेकु सहाय सहित सो सुभट संजुग महि मुरे ।
 सदग्रंथ पर्वत कंदगन्धि महँ जाइ तेहि अवसर दुरे ॥

होनिहार का करतार को रखवार जग खरभरु परा।

दुड़ माथ केहि रतिनाथ जेहि कहूँ कोपि कर धनु सरु धरा॥

दो० - जे सजीव जग अचर चर नारि पुरुष अस नाम।

ते निज निज मरजाद तजि भए सकल बस काम॥८४॥

सब के हृदयँ मदन आभलाषा । लता निहारि नवहिं तरु साखा॥

नदीँ उमगि अंबुधि कहूँ धाई । संगम करहिं तलाव तलाई॥

जहँ असि दसा जड़न्ह कै बरनी को कहि सकइ सचेतन करनी॥

पसु पच्छी नभ जल थल चारी । भए काम बस समय बिसारी ।

मदन अंध ब्याकुल सब लोका । निसि दिनु नहिं अवलोकहिं काका॥

देव दनुज नर किनर ब्याला । प्रेत पिसाच भूत बेताला॥

इन्ह कै दसा न कहेउँ बखानी । सदा काम के चेरे जानी॥

सिद्ध बिरक्त महामुनि जोगी । तेपि कामबस भए बियोगी॥

छं०— भए कामबस जोगीस तापस पार्वरन्हि की को कहै।

देखहिं चराचर नारिमय जे ब्रह्ममय देखत रहे॥

अबला बिलोकहिं पुरुषमय जगु पुरुष सब अबलामय।

दुड़ दंड भरि ब्रह्माड भीतर कामकृत कौतुक अयं॥

सो०— धरी न काहूँ धीर सब के मन मनसिज हरे।

जे राखे रघुबीर ते उबरे तेहि काल महुँ॥८५॥

उभय घरी अस कौतुक भयऊ जौ लागि कामु सभु पहिं गयऊ ।

सिवाहि बिलोकि ससंकेउ मारू । भयऊ जथाथिति सबु संसारू॥

भए तुरत सब जीव सुखारे । जिमि मद उतरि गएँ मतवारे ॥
 रुद्रहि देखि मदन भय माना । दुराधरष दुर्गम भगवाना ॥
 फिरत लाज कछु करि नहिं जाई । मरनु ठानि मन रचेसि उपाई ॥
 प्रगटेसि तुरत रुचिर रितुराजा । कुसुमित नव तरु राजि बिराजा ॥
 बन उपबन बापिका तड़ागा । परम सुभग सब दिसा बिभागा ॥
 जहँ तहँ जनु उमगत अनुरागा । देखि मुएहुँ मन मनसिज जागा ॥
 छं० — जागइ मनोभव मुएहुँ मन बन सुभगता न परै कही ।

सीतल सुगंध सुमंद मारुत मदन अनल सखा सही ॥

बिकसे सरन्हि बहु कंज गुंजत पुंज मंजुल मधुकरा ।

कलहंस पिक सुक सरस रव करि गान नार्चाहिं अपछरा ॥

दो० — सकल कला करि कोटि बिधि हारेउ सेन समेत ।

चली न अचल सप्ताधि सिव कोपेउ हृदयनिकेत ॥ ८६ ॥

देखि रसाल बिटप बर साखा । तेहि पर चढ़ेउ मदनु मन माखा ॥

सुमन चाप निज सर संधाने । अति रिस ताकि श्रवन लागि ताने ॥

छाड़े बिषम बिसिख उर लागे । छूटि समाधि संभु तब जागे ।

भयउ ईस मन छोभु बिसेषी । नयन उधारि सकल दिसि देखी ॥

सौरभ पल्लव मदनु बिलोका । भयउ कोपु कंपेउ त्रैलोका ॥

तब सिवैं तीसर नयन उधारा । चितवत कामु भयउ जरि छारा ॥

हाहाकार भयउ जग भारी । डरपे सुर भए असुर सुखारी ॥

समुझि कामसुख सोचहिं भोगी । भए अकंटक साधक जोगी ॥

छं०— जोगी अकंटक भए पति गति सुनत रति मुरुछित भई ।
 रोदति बदति बहु भाँति करुना करति संकर पहिँ गई ॥
 अति प्रेम करि बिनती बिबिध बिधि जोरि कर समुख रही ।
 प्रभु आसुतोष कृपाल सिब अबला निरखि बोले सही ॥

दो०— अब तें रति तव नाथ कर होइहि नामु अनंगु ।

बिनु बपु ब्यापिहि सबहि पुनि सुनु निज मिलन प्रसंगु ॥ ८७ ॥
 जब जदुबंस कृष्ण अवतारा । होइहि हरन महा महिभारा ॥
 कृष्ण तनय होइहि पति तोरा । बचनु अन्यथा होइ न मोरा ॥
 रति गवनी सुनि संकर बानी । कथा अपर अब कहउँ बखानी ।
 देवन्ह समाचार सब पाए । ब्रह्मादिक बैकुंठ सिधाए ॥
 सब सुर बिष्णु विरंचि समेता । गए जहाँ सिव कृपानिकेता ॥
 पृथकपृथक तिन्ह कीन्हि प्रसंसा । भए प्रसन्न चंद्र अवतंसा ॥
 बोले कृपासिधु बृषकेतू । कहहु अमर आए कैहि हेतू ॥
 कह बिधि तुम्ह प्रभु अतरजामी । तदपि भगति बस बिनवउँ स्वामी
 दो०— सकल सुरन्ह के हृदयँ अस संकर परम उछाहु ।

निज नयनन्हि देखी घहहि नाथ तुम्हार बिबाहु ॥ ८८ ॥
 यह उत्सव देखिअ भरि लोचन । सोइ कछु करहु मदन मद मोचन ॥
 कामु जाति रति कहँ बरु दीन्हा । कृपासिधु यह अति भल कीन्हा ॥
 सासति करि पुनि करहि पसाऊ । नाथ प्रभुन्ह कर सहज सुभाऊ ॥
 पारबती तपु कीन्ह अपारा । करहु तासु अब अंगीकारा ॥

सुनि बिधि बिनय समुझि प्रभु बानी । ऐसेइ होउ कहा सुखु मानी ॥
 तब देवन्ह दुंदुभीं बजाई । बरषि सुमन जय जय सुर साई ॥
 अवसरु जानि सतरिषि आए । तुरतहिं बिधि गिरिभवन पठाए ॥
 प्रथम गए जहँ रहों भवानी । बोलै मधुर बचन छल सानी ॥
 दो०— कहा हमार न सुनेहु तब नारद के उपदेस ।

अब भा झूठ तुम्हार पन जारेउ कामु महेस ॥ ८९ ॥

मासपारायण, तीसरा विश्राम

सुनि बोलों मुसुकाइ भवानी । उचित कहेहु मुनिबर बिग्यानी ॥
 तुम्हरेँ जान कामु अब जारा । अब लागि संभु रहे सबिकारा ॥
 हमरेँ जान सदा सिव जोगी । अब अनवद्य अकाम अभोगी ॥
 जौ मैं सिव सेये अस जानी । प्रीति समेत कर्म मन बानी ॥
 तौ हमार पन सुनहु मुनीसा । करिहाहं सत्य कृपानिधि ईसा ॥
 तुम्ह जो कहा हर जारेउ मारा । सोइ अति बड़ अबिबेकु तुम्हार ॥
 तात अनल कर सहज सुभाऊ । हिम तेहि निकट जाइ नहिं काऊ ॥
 गएँ समीप सो अवसि नसाई । असि मन्मथ महेस की नाई ॥
 दो०— हियँ हरषे मुनि बचन सुनि देखि प्रीति बिस्वास ।

चले भवानिहि नाइ सिर गए हिमाचल पास ॥ ९० ॥
 सबु प्रसंगु गिरिपतिहि सुनावा । मदन दहन सुनि अति दुखु पावा ॥
 बहुरि कहेउ रति कर बरदाना । सुनि हिमवंत बहुत सुखु माना ॥
 हृदयँ बिचारि संभु प्रभुताई । सादर मुनिबर लिए बोलाई ॥

सुदिनु सुनखनु सुधरी सोचाई । बेगि बेदबिधि लगन धराई ॥
 पत्री ससरिषिन्ह सोइ दीन्ही । गहि पद बिनय हिमाचल कीन्ही ॥
 जाइ बिधिहि तिन्ह दीन्हि सो पाती । बाचत प्रीति न हृदयँ समाती ॥
 लगन बाचि अज सबहि सुनाई । हरषे मुनि सब सुर समुदाई ॥
 सुमन वृष्टि नभ बाजन बाजे । मंगल कलस दसहुँ दिसि साजे ॥
 दो० लगे सँवारन सकल सुर बाहन बिबिध बिमान ।

होहि सगुन मंगल सुभद करहि अपछरा गान ॥ ११ ॥
 सिवहि संभु गन करहि सिंगारा । जटा मुकुट अहि मौरु सँवारा ।
 कुंडल कंकन पहिरे ब्याला । तन बिभूति पट केहरि छाला ॥
 ससि ललाट सुंदर सिर गंगा । नयन तीनि उपबीत भुजंगा ॥
 गरल कंठ उर नर सिर माला । असिव बेष सिवधाम कृपाला ॥
 कर त्रिसूल अरु डमरु बिराजा । चले बसहँ चढ़ि बाजहिं बाजा ॥
 देखि सिवहि सुरत्रिय मुसुकाहीं । बर लायक दुलहिनि जग नाही ॥
 बिष्णु बिरंचि आदि सुरब्राता । चढ़ि चढ़ि बाहन चले बराता ।
 सुर समाज सब भाँति अनूपा । नहिं बरात दूलह अनुख्या ॥
 दो० — बिष्णु कहा अस बिहसि तब बोलि सकल दिसिराज ।

बिलग बिलग होइ चलहु सब निज निज सहित ममाज ॥ १२ ॥
 बर अनुहारि बरात न भाई हैसी करैहु पर पुर जाई ।
 बिष्णु बचन सुनि सुर मुसुकाने । निज निज सेन सहित बिलगाने ॥
 मनहीं मन महेसु मुसुकाहीं । हरि के बिग्य बचन नहि जाहीं ।

अति प्रिय बचन सुनत प्रिय केरे । भृंगहि प्रेरि सकल गन ठेरे ॥
 सिव अनुसासन सुनि सब आए । प्रभु पद जलत्र सीस तिन्ह नाए ॥
 नाना बाहन नाना बेषा । बिहसे सिव समाज निज देखा ॥
 कोउ मुख हीन बिपुल मुख काहू । बिनु पद कर कोउ बहु पद बाहू ॥
 बिपुल नयन कोउ नयन बिहीना । रिष्टपुष्ट कोउ अति तनखीना ॥
 छं० — तन खीन कोउ अति पीन पावन कोउ अपावन गति धरें ।

भूषन कराल कपाल कर सब सद्य सोनित तन धरें ॥
 खर स्वान सुअर मृकाल मुख गन बेष अगनित को गनै ॥
 बहु जिनस प्रेत पिसाच जोगि जभात बरनत नहिं बनै ॥

सो० — नाचहिं गावहिं गीत परम तरंगी भूत सब ।

देखत अति बिपरीत बोलहिं बचन बिचित्र बिधि ॥ ९३ ॥
 जस दूलहु तसि बनी बराता । कौतुक बिबिध होहिं मग जाता ॥
 इहाँ हिमाचल रचेउ बिताना । अति बिचित्र नहिं जाइ बखाना ।
 सैल सकल जहँ लागि जग माहीं । लघु बिसाल नहिं बरनि सिराहीं ।
 बन सागर सब नदीं तलावा । हिमगिरि सब कहूँ नेवत पठावा ॥
 कामरूप सुंदर तन धारी । सहित समाज सहित बर नारी ॥
 गए सकल तुहिनाचल गेहा । गावहिं मंगल सहित सनेहा ॥
 प्रथमहिं गिरि बहु गृह सँवराए । जथाजोगु तहँ तहँ सब छाए ॥
 पुर सोभा अवलोकि सुहाई । लागइ लघु बिरंचि निपुनाई ॥
 छं० — लघु लाग बिधि की निपुनता अवलोकि पुर सोभा सही ।

बन बाग कूप तड़ाग सरिता सुभग सब सक को कही ॥

मंगल बिपुल तोरन पताका केतु गृह गृह सोहहीं ।

बनिता पुरुष सुंदर चतुर छबि देखि मुनि मन मोहहीं ॥

दो० — जगदंबा जहँ अवतरी सो पुरु बगनि कि जाइ ।

रिद्धि सिद्धि संपत्ति सुख नित नूतन अधिकाइ ॥ ९४ ॥

नगर निकट बरात सुनि आई । पुर खरभरु सोभा अधिकाई ॥

करि बनाव सजि बाहन नाना चले लेन सादर अगवाना ॥

हियँ हरषे सुर सेन निहारी । हरिहि देखि भति भए सुखारी ॥

सिव समाज जब देखन लागे बिडरि चले बाहन सब भागे ।

धरि धीरजु तहँ रहे सयाने बालक सब लै जीव पराने ।

गएँ भवन पूछहिं पितृ माता कहहिं बचन भय कंपित गाता ।

कहिअ काह कहि जाइ न बाता जम कर धार किधौं बरिआता ।

बरु बौराह बसहँ असवारा ब्याल कपाल बिभूषन छारा ॥

छं० — तन छार ब्याल कपाल भूषन नगन जटिल भयकरा ।

सँग भूत प्रेत पिसाच जोगिनि बिकट मुख रजनीचरा ॥

जो जितत रहिहि बरात देखत पुन्य बड़ तेहि कर सही ।

देखिहि सो उमा बिबाहु घर घर बात अमि लगिकन्ह कही ॥

दो० समुझि महेस समाज सब जननि जनक मुसुकाहिं

बाल बुझाए बिबिध बिधि निडर होहु डरु नाहिं ॥ ९५ ॥

लै अगवान बरातहि आए दिए सर्बाहि जनवास सुहाए ॥

मैनँ सुभ आरती सँवारी संग सुमंगल गावहिं नारी ।

कंचन थार सोह बर पानी । परिछन चली हरहि हरषानी ॥
 बिकट बेष रुद्रहि जन देखा । अबलन्ह उर भय भयउ बिसेषा ॥
 भागि भवन पैठीं अति त्रासा । गए महेसु जहाँ जनवासा ॥
 मैना हृदयँ भयउ दुखु भारी । लोन्ही बोलि गिरीसकुमारी ॥
 अधिक सनेहँ गोद बैठारी । स्याम सरोज नयन भरे बारी ॥
 जेहिं बिधि तुम्हहि रूपु अस दीन्हा । तेहिं जड़ बरु बाउर कस कीन्हा ॥

छं० — कस कीन्ह बरु बौराह बिधि जेहिं तुम्हहि सुंदरता दर्ई ।
 जो फलु चहिअ सुरतरुहिं सो बरबस बबूरहिं लागई ॥
 तुम्ह सहित गिरि तें गिरौं पावक जरौं जलनिधि महुँ परौं ।
 घरु जाउ अपजसु होउ जग जीवत बिबाहु न हौं करौं ॥

दो० — भई बिकल अबला सकल दुखित देखि गिरिनारि ।

करि बिलापु रोदति बदति सुता सनेहु सँभारि ॥ ९६ ॥
 नारद कर मैं काह बिगारा । भवनु मोर जिन्ह बसत उजारा ॥
 अस उपदेसु उमहि जिन्ह दीन्हा । बौरि बरहि लागि तपु कीन्हा ॥
 साचेहुँ उन्ह के मोह न माया । उदासीन धनु धामु न जाया ॥
 पर घर घालक लाज न भीरा । बाँझ कि जान प्रसव कै पीरा ॥
 जननिहि बिकल त्रिलोकि भवानी । बोली जुत बिबेक मृदु बानी ।
 अस बिचारि सोचहि मति माता । सो न टरइ जो रचइ बिधाता ॥
 करम लिखा जौं बाउर नाहू । तौ कत दोसु लगाइअ काहू ।
 तुम्ह सन मिटहिं कि बिधि के अंका । मातु व्यर्थ अनि लेहु कलंका ॥

छं०— जनि लेहु पातु कलकु करुना परिहरहु अवसर नहीं ।
 दुख सुख जो लिखा लिलार हमों जाब जहँ पाउब तहीं ॥
 सुनि उमा बचन बिनीत कोमल सकल अबला सोचहीं ।
 बहु भाँति विधिहि लगाइ दूषन नयन बारि बिमोचहीं ॥

दो०— तेहि अवसर नारद सहित अरु गिधि सप्त समेत ।

समाचार सुनि तुहिनगिरि गवने तुरत निकेत । १७ ॥
 तब नारद सबही समुझावा । पूरुब कथाप्रसंगु सुनावा ॥
 मयना सत्य सुनहु मम बानी जगदंबा तव सुता भवानी ॥
 अजा अनादि सक्ति अबिनासिनि सदा संभु अरधंग निवासिनि ॥
 जग संभव पालन लय कारिनि निज इच्छा लीला बपु धारिनि ॥
 जनमों प्रथम दच्छ गृह जाई नामु सती सुंदर तनु पाई ॥
 तहँहुँ सती संकरहि बिबाहीं कथा प्रसिद्ध सकल जग माहीं ॥
 एक बार आवत सिव संगी देखेउ रघुकुल कमल पतगा ॥
 भयउ मोहु सिव कहा न कीन्हा । भ्रम बस बेषु सीय कर लीन्हा ॥

छं०— सिय बेषु सती जो कीन्ह तेहि अपराध संकर परिहरी ।
 हर बिरहँ जाइ बहोरि पितु के जग्य जोगानल जरौ ॥
 अब जनमि तुम्हरे भवन निज पति लागि दारुन तपु किया ।
 अस जानि संस्रय तजहु गिरिजा सर्वदा संकरप्रिया ॥

दो०— सुनि नारद के बचन तब सब कर मिटा बिषाद

छन महुँ व्यापेउ सकल पुर घर घर यह संवाद । १८ ॥

तब मयना हिमवंतु अनंदे । पुनि पुनि पारबती पद बंदे ॥
 नारि पुरुष सिंसु जुब्रा सयाने । नगर लोग सब अति हरषाने ॥
 लागे होन पुर मंगल गाना । सजे सबहिं हाटक घट नाना ॥
 भौति अनेक भई जेवनारा । सूपमास्त्र जस कछु ब्यवहारा ॥
 सो जेवनार कि जाइ बखानी । बसहिं भवन जेहिं मातु भवानी ॥
 सादर बोले सकल बराती । बिष्णु बिरंचि देव सब जाती ॥
 बिबिधि पौति ब्रैठी जेवनारा । लागे परसन निपुन सुआरा ॥
 नारिबृद सुर जेवँत जानी । लगीं देन गारीं मृदु बानी ॥
 छं० गारीं मधुर स्वर देहिं सुंदरि बिंग्य बचन सुनावहीं ।

भोजनु करहिं सुर अति बिलंबु बिनोदु सुनि सचु पावहीं ॥
 जेवँत जो बढ्यो अनंदु सो मुख कोटिहूँ न परै कह्यो ।
 अचवाँड़ दीन्हें पान गवने बास जहँ जाको रह्यो ॥

दो० — बहुरि मुनिन्ह हिमवंत कहूँ लगन सुनाई आइ ।

समय बिलोकि बिबाह कर पठए देव बोलाइ ॥ ९९ ॥
 बोलि सकल सुर सादर लीन्हे । सबहि जथोचित आसन दीन्हे ॥
 बेदी बेद बिधान सँवारी । सुभग सुमंगल गावहिं नारी ॥
 सिंघासनु अति दिव्य सुहावा । जाइ न बरनि बिरंचि बनावा ॥
 बैठे सिव बिप्रन्ह सिरु नाई । हृदयँ सुमिरि निज प्रभु रघुराई ॥
 बहुरि मुनीसन्ह उमा बोलाई । करि सिंगारु सखीं लै आई ॥
 देखत रूप सकल सुर मोहे । बरनै छबि अस जग कबि को है ॥

जगदंबिका जानि भव भामा । सुरन्ह मनाहं मन कीन्ह प्रनामा ॥
 सुंदरता मरजाद भवानी । जाइ न कोटिहुं बदन बखानी ।
 छं० कोटिहुं बदन नहिं बने बरनत जग जननि सोभा महा ।
 सकुचहि कहत श्रुति सेष सारद मंदमति तुलसी कहा ॥
 छबिखानि मातु भवानि गवनीं मध्य मंडप सिव जहाँ ।
 अवलोकि सकहिं न सकुच पति पद कमल मन मधुकरु तहाँ ।

दो०— मुनि अनुसासन गनपतिहि पूजेउ संभु भवानि ।

कोउ सुनि संसय करै अनि सुर अनादि जियै जानि ॥ १०० ॥
 जसि बिबाह कै बिधि श्रुति गाई, महामुनिन्ह सो सब करवाई ॥
 गहि गिरीस कुस कन्या पानी । भवहि समरपीं जानि भवानी ॥
 पानिग्रहन जब कीन्ह महेसा । हियँ हरषे तब सकल सुरेसा ॥
 बेदमंत्र मुनिबर उच्चरहीं । जय जय जय संकर सुर करहीं ॥
 बाजहिं बाजन बिबिध बिधाना । सुमनबृष्टि नभ भै बिधि नाना ।
 हर गिरिजा कर भयउ बिबाहू । सकल भुवन भरि रहा उछाहू ॥
 दासीं दास तुरग रथ नागा । धेनु बसन मनि बस्तु बिभागा ॥
 अन्न कनकभाजन भरि जाना दाइज दीन्ह न जाइ बखाना ॥

छं०— दाइज दियो बहु भाँति पुनि कर जोरि हिमभूधर कह्यो ।
 का देखँ पूरनकाम संकर चरन पंकज गहि रह्यो ॥
 सिव कृपासागर ससुर कर संतोषु सब भाँतिहि कियो ।
 पुनि गहे पद पाथोज मयनाँ प्रेम परिपूरन हियो ॥

दो०—नाथ उमा मम प्रान सम गृहकिंकरी करेहु।

छमेहु सकल अपराध अब होइ प्रसन्न बरु देहु॥ १०१॥
 बहु बिधि संभु सासु समुझाई। गवनी भवन चरन सिरु नाई॥
 जननीं उमा बोलि तब लीन्ही। लै उछंग सुंदर सिख दीन्ही।
 करेहु सदा संकर पद पूजा। नारिधरमु पति देउ न दूजा॥
 बचन कहत भरे लोचन बारी। बहुरि लाइ उर लीन्ह कुमारी॥
 कत बिधि सृजौं नारि जग माहीं। पराधीन सपनेहुँ सुखु नाही॥
 भै अति प्रेम बिकल महतारी। धीरजु कीन्ह कुसमय बिचारी॥
 पुनि पुनि मिलति परति गहि चरना। परम प्रेमु कछु जाइ न बरना।
 सब नारिन्ह मिलि भेटि भवानी। जाइ जननि उर पुनि लपटानी॥

छं०— जननिहि बहुरि मिलि चली उचित असीस सब काहूँ दर्ई।
 फिरि फिरि बिलोकति मातु तन तब सखीं लै सिव पहि गई॥
 जाचक सकल संतोषि संकरु उमा सहित भवन चले।
 सब अमर हरषे सुमन बरषि निसान नभ बाजे भले॥

दो०—चले संग हिमवंतु तब पहुँचावन अति हेतु।

बिबिध भाँति परितोषु करि बिदा कीन्ह बृषकेतु॥ १०२॥
 तुरत भवन आए गिरिराई। सकल सैल सर लिए बोलाई।
 आदर दान बिनय बहुमाना। सब कर बिदा कीन्ह हिमवाना॥
 जबहिं संभु कैलासहिं आए। सुर सब निज निज लोक सिधाए॥
 जगत मातु पितु संभु भवानी। तेहिं सिंगारु न कहउँ बखानी॥

करहिं बिबिध बिधि भोग बिलासा । गनन्ह समेत बसहि कैलासा ।
हर गिरिजा बिहार नित नयऊ । एहि बिधि बिपुल काल चलि गयऊ ॥
तब जनमेउ षटबदन कुमारा तारकु असुरु समर जेहिं मारा ॥
आगम निगम प्रसिद्ध पुराना । षन्मुख जन्मु सकल जग जाना ।

छं०— जगु जान षन्मुख जन्मु कर्म प्रतापु पुरुषारथु महा ।
तेहि हेतु मैं बृषकेतु सुत कर चरित संछेपहि कहा ॥
यह उमा संभु बिबाहु जे नर नारि कहहिं जे गावहीं ।
कल्याण काज बिबाह मंगल सर्बदा सुखु पावहीं ॥

दो० चरित सिधु गिरिजा रमन बेद न पावहिं पारु ।

बरनै तुलसीदासु किमि अति मतिमंद गवारू ॥ १०३ ॥
संभु चरित सुनि सरस सुहावा । भरद्वाज मुनि अति सुखु पावा ॥
बहु लालसा कथा पर बाढ़ी । नयनन्ह नीरु रोमावलि ठाढ़ी ॥
प्रेम बिबस मुख आव न बानी । दसा देखि हरषे मुनि ग्यानी ।
अहो धन्य तव जन्मु मुनीसा । तुम्हहि प्रान सम प्रिय गौरीसा ॥
सिव पद कमल जिन्हहि रति नाहीं । रामहि ते सपनेहुं न सोहाहीं ॥
बिनु छल बिस्वनाथ पद नेहू । राम भगत कर लच्छन एहू ॥
सिव सम को रघुपति ब्रतधारी । बिनु अघ तजी सती असि नारी ॥
पनु करि रघुपति भगति देख्राई । को सिव सम रामहि प्रिय भाई ॥

दो०— प्रथमहिं मैं कहि सिव चरित बूझा मरमु तुम्हार ।

सुचि सेवक तुम्ह राम के रहित सम्स्त बिकार ॥ १०४ ॥

मैं जाना तुम्हार गुन सीला । कहउँ सुनहु अब रघुपति लीला ।
 सुनु मुनि आजु समागम तोरैं । कहि न जाइ जस सुखु मन मोरैं ॥
 राम चरित अति अमित गुनीसा । कहि न सकहिं सत कोटि अहीसा ॥
 तदपि जथाश्रुत कहउँ बखानी । सुमिरि गिरापति प्रभु धनुषानी ।
 सारद दारुनारि सम स्वामी । रामु सूत्रधर अंतरजामी ॥
 जेहि पर कृपा करहिं जनु जानी । कबि उर अजिर नचावहिं बानी ।
 प्रनवउँ सोइ कृपाल रघुनाथा । बरनउँ बिसद तासु गुन गाथा ॥
 परम रम्य गिरिवरु कैलासू । सदा जहाँ सिव उमा निवासू ।
 दो०— सिद्ध तपोधन जोगिजन सुर किंनर मुनिबृंद ।

बसहिं तहाँ सुकृती सकल सेवहिं सिव सुखकंद ॥ १०५ ॥
 हरि हर बिमुख धर्म रति नाहीं । ते नर तहँ सपनेहुँ नहिं जाहीं ॥
 तेहि गिरि पर बट बिटप बिसाला । नित नूतन सुंदर सब काला ॥
 त्रिविध समीर सुसीतलि छाया । सिव बिश्राम बिटप श्रुति गाया ॥
 एक बार तेहि तर प्रभु गयऊ । तरु बिलोकि उर अति सुखु भयऊ ॥
 निज कर डसि नागरिपु छाला । बैठे सहजहिं संभु कृपाला ॥
 कुंद इंदु दर गौर सरीरा । भुज प्रलंब परिधन मुनिचीरा ॥
 तरुन अरुन अंबुज सम चरना । नख दुति भगत हृदय तम हरना ॥
 भुजग भूति भूषन त्रिपुरारी । आननु सरद चंद छबि हारी ।
 दो०— जटा मुकुट सुस्सरित सिर लोचन नलिन बिसाल ।

नीलकंठ लावन्यनिधि सोह बालबिधु भाल ॥ १०६ ॥

बैठे सोह कार्मारपु कैसें । धरें सरीरु सांतरसु जैसें ॥
 पारबती भल अवसरु जानी गई संभु पहिं मातु भवानी ॥
 जानि प्रिया आदरु अति कीन्हा । बाम भाग आसनु हर दीन्हा ॥
 बैठीं सिव समीप हरषाई । पूरुब जन्म कथा चित आई ॥
 पति हियँ हेतु अधिक अनुमानी । बिहसि उमा बोलौं प्रिय बानी ॥
 कथा जो सकल लोक हितकारी । सोइ पूछन चह सैलकुमारी ।
 बिस्वनाथ मम नाथ पुरारी । त्रिभुवन महिमा बिदित तुम्हारी ।
 चर अरु अचर नाग नर देवा । सकल करहिं पद पकज सेवा ।
 दो०— प्रभु समरथ सर्वग्य सिव सकल कला गुन धाम ।

जोग ग्यान बैराग्य निधि प्रनत कलपतरु नाम ॥ १०७ ॥
 जौं मो पर प्रसन्न सुखरासी । जानिअ सत्य मोहि निज दासी ।
 तौ प्रभु हरहु मोर अग्याना कहि रघुनाथ कथा बिधि नाना ॥
 जासु भवनु सुरतरु तर होई । सहि कि दरिद्र जनित दुखु सोई ॥
 ससिभूषन अस हृदयँ बिचारी हरहु नाथ मम मति भ्रम भारी ॥
 प्रभु जे मुनि परमारथवादी कहहिं राम कहूँ ब्रह्म अनादी ॥
 सेस सारदा बेद पुराना । सकल करहिं रघुपति गुन गाना ॥
 तुम्ह पुनि राम राम दिन राती । सादर जपहु अनैंग आराती ।
 रामु सो अवध नृपति सुत सोई । को अज अगुन अलखगति कोई ।
 दो०— जौं नृप तनय त ब्रह्म किमि नारि बिरहँ मति भोरि ।

देखि चरित महिमा सुनत भ्रमति बुद्धि अति मोरि ॥ १०८ ॥

जौं अनीह व्यापक बिभु कोऊ । कहहु बुझाई नाथ मोहि सोऊ ॥
 अग्य जानि रिस उर जनि धरहू । जेहि बिधि मोह मिटै सोइ करहू ॥
 मैं बन दीखि राम प्रभुताई । अतिभयबिकलन तुम्हहि सुनाई ।
 तदपि मलिन मन बोधु न आवा । सो फलु भली भाँति हम पावा ॥
 अजहूँ कछु संसउ मन मोरें । कहहु कृपा बिनवउँ कर जोरें ॥
 प्रभु तब मोहि बहु भाँति प्रबोधा । नाथ सो समुझि कहहु जनि क्रांथा ॥
 तब कर अस बिमोह अब नाहीं । रामकथा पर रुचि मन माहीं ॥
 कहहु पुनीत राम गुन गाथा । भुजगराज भूषन सुरनाथा ॥
 दो०— बंदउँ पद धरि धरनि सिरु बिनय करउँ कर जोरि ।

बरनहु रघुबर बिसद जसु श्रुति सिद्धांत निचोरि ॥ १०९ ॥
 जदपि जोषिता नहिं अधिकारी । दासी मन क्रम बचन तुम्हारी ॥
 गूढ़उ तत्त्व न साधु दुरावहिं । आरत अधिकारी जहँ पावहिं ॥
 अति आरति पूछउँ मुरराया । रघुपति कथा कहहु करि दाया ॥
 प्रथम सो कारन कहहु बिचारी । निर्गुन ब्रह्म सगुन बपु धारी ॥
 पुनि प्रभु कहहु राम अवतारा । बालचरित पुनि कहहु उदारा ॥
 कहहु जथा जानकी बिबाहीं । राज तजा सो दूषन काहीं ॥
 बन बसि कीन्है चरित अपारा । कहहु नाथ जिमि रावन मारा ॥
 राज बैठि कीन्हिं बहु लीला । सकल कहहु संकर सुखसीला ॥
 दो०— बहुरि कहहु करुनायतन कीन्ह जो अचरज राम ।

प्रजा सहित रघुबंसमनि किमि गवने निज धाम ॥ ११० ॥

पुनि प्रभु कहहु सो तत्त्व बखानी । जेहि बिग्यान मगन मुनि ग्यानी ॥
 भगति ग्यान बिग्यान बिरागा । पुनि सब बरनहु सहित बिभागा ॥
 औरउ राम रहस्य अनेका । कहहु नाथ अति बिमल बिबेका ॥
 जो प्रभु मैं पूछा नहिं होई । सोउ दयाल राखहु जनि गोई ॥
 तुम्ह त्रिभुवन गुर बेद बखाना । आन जीव पाँवर का जाना ॥
 प्रसन्न उमा कै सहज सुहाई । छल बिहीन सुनि सिव मन भाई ॥
 हर हियँ रामचरित सब आए । प्रेम पुलक लोचन जल छाए ॥
 श्रीरघुनाथ रूप उर आवा । परमानंद अमित सुख पावा ॥
 दो०— मगन ध्यान रस दंड जुग पुनि मन बाहेर कीन्ह ।

रघुपति चरित महेश तब हरषित बरनै लीन्ह ॥ १११ ॥
 झूठेउ सत्य जाहि बिनु जानें । जिमि भुजग बिनु रजु पहिचानें ।
 जेहि जानें जग जाइ हेराई । जागें जथा सपन भ्रम जाई ॥
 बंदउँ बालरूप सोइ रामू । सब सिद्धि सुलभ जपत जिसु नामू ॥
 मंगल भवन अमंगल हारी । द्रवउ सो दसरथ अजिर बिहारी ॥
 करि प्रनाम रामहि त्रिपुरारी । हरषि सुधा सम गिरा उचारी ॥
 धन्य धन्य गिरिराजकुमारी । तुम्ह समान नहिं कोउ उपकारी ॥
 पूछेहु रघुपति कथा प्रसंगा । सकल लोक जग पावनि गंगा ॥
 तुम्ह रघुबीर चरन अनुरागी । कीन्हहु प्रसन्न जगत हित लागी ।
 दो०— राम कृपा तें पारबनि सपनेहुँ तब मन माहिं ।

सोक मोह संदेह भ्रम मग बिचार कछु नाहिं ॥ ११२ ॥

जौं अनी
अग्य जा
मैं बन
तदपि म
अजहूँ
प्रभु तब
तब कर
कहहु
दो०—

जदपि
गूढ़उ
अति
प्रथम
पुनि प्र
कहहु
बन ब
राज
दो०—

तदपि असंका कीन्हिहु सोई । कहत सुनत सब कर हित
जिन्ह हरिकथा सुनी नहिं काना । श्रवन रंध्र अहिभवन स
नयनन्हि संत दरस नहिं देखा । लोचन मोरपंख कर त
ते सिर कटु तुंबरि समतूला । जे न नमत हरि गुर पद
जिन्ह हरिभगति हृदयै नहिं आनी । जीवत सब समान तेइ
जो नहिं करइ राम गुन गाना । जीह सो दादुर जीह स
कुलिस कठोर नितुर सोइ छाती । सुनि हरिचरित न जो हर
गिरिजा सुनहु राम कै लीला । सुर हित दनुज बिमोहनस
दो०— रामकथा सुग्धेनु सम सेवन सब सुख दानि ।

सतसमाज सुरलोक सब को न सुनै अस जानि ॥

रामकथा सुंदर कर तारी । संसय बिहग उड़ावनि
रामकथा कलि बिटप कुठारी । सादर सुनु गिरिराजकु
राम नाम गुन चरित सुहाए । जनम करम अगनित श्रुति
जथा अनंत राम भगवाना । तथा कथा कीरति गुन
तदपि जथा श्रुत जसि मति मोरी । कहिहउँ देखि प्रीति अति
उमा प्रसन्न तव सहज सुहाई । सुखद संतसंमत मोहि
एक बात नहिं मोहि सोहानी । जदपि मोह बस कहेहु भ
तुम्ह जो कहा राम कोउ आना । जेहि श्रुति गाव धरहिं मुनि
दो०— कहहिं सुनिहिं अस अथम नर ग्रसे जे मोह पिशाच ।

पाषंडी हरि पद बिमुख जानहिं झूठ न साच ॥

होई । अग्य अकोबिद अंध अभागी । काई बिषय मुकुर मन लागी ॥
 ाना । लंपट कपटी कुटिल बिसेषी । सपनेहुँ संतसभा नहिं देखी ॥
 खा ॥ कहहिं ते बेद असंमत बानी । जिन्ह केँ सूझ लाभु नहिं हानी ।
 ला । मुकुर मलिन अरु नयन बिहीना । राम रूप देखहिं किमि दीना ॥
 ानी । जिन्ह केँ अगुन न सगुन बिबेका । जल्पहि कल्पित बचन अनेका ॥
 ाना ॥ हरिमाया बस जगत भ्रमाहीं । तिन्हहि कहत कछु अघटित नाहीं ॥
 ाती ॥ बातुल भूत बिबस मतवारे । ते नहिं बोलहिं बचन बिचारे ॥
 ला । जिन्ह कृत महामोह मद पाना । तिन्ह कर कहा करिअ नहिं काना ।
 सो० - अस निज हृदयँ बिचारि तजु संसय भञ्जु राम पद ।

:१३॥ सुनु गिरिराज कुमारी भ्रम तम रवि कर बचन मम ॥ ११५ ॥
 ारी ॥ सगुनिहि अगुनिहि नहिं कछु भेदा । गावहिं मुनि पुरान बुध बेदा
 ारी ॥ अगुन अरूप अलख अज जोई । भगत प्रेम बस सगुन सो होई ॥
 ाए ॥ जो गुन रहित सगुन सोइ कैसैं जलुहिम उपल बिलग नहिं जैसैं ।
 ाना ॥ जासु नाम भ्रम तिमिर पतगा तंहिं किमि कहिअ बिमोह प्रसंगा ॥
 ारी ॥ राम सच्चिदानंद दिनेसा । नहिं तहँ मोह निसा लवलेसा ॥
 ाई । सहज प्रकासरूप भगवाना । नाह तहँ पुनि बिग्यान बिहाना ।
 ानी । हरष बिषाद ग्यान अग्याना । जीव धर्म अहमिति अभिमाना ॥
 ाना । राम ब्रह्म व्यापक जग जाना । परमानंद परेस पुराना ।
 दो० - पुरुष प्रसिद्ध प्रकास निधि प्रगट परावर नाथ ।

:१४॥ रघुकुलपति मम स्वामि सोइ कहि सिवँ नायड माथ ॥ ११६ ॥

निज भ्रम नहिं समुझहिं अग्यानी । प्रभु पर मोह धरहिं जड़ प्रानी ॥
 जथा गगन घन पटल निहारी । झाँपेउ भानु कहहिं कुबिचारी ॥
 चितव जो लोचन अंगुलि लाएँ । प्रगट जुगल ससि तेहि के भाएँ ॥
 उमा राम बिषइक अस मोहा । नभ तम धूम धूरि जिमि सोहा ॥
 बिषय करन सुर जीव समेता । सकल एक तैं एक सचेता ॥
 सब कर परम प्रकासक जोई । राम अनादि अवधपति सोई ॥
 जगत प्रकास्य प्रकासक रामू । मायाधीस ग्यान गुन धामू ॥
 जासु सत्यता तैं जड़ माया । भास सत्य इव मोह सहाया ॥
 दो० — रजत सीप महुँ भास जिमि जथा भानु कर बारि ।

जदपि मृषा तिहुँ काल सोइ भ्रम न सकइ कोउ टारि ॥ ११७ ॥
 एहि बिधि जग हरि आश्रित रहई । जदपि असत्य देत दुख अहई ।
 जाँ सपनेँ सिर काटै कोई । बिनु जागें न दूरि दुख होई ॥
 जासु कृपाँ अस भ्रम मिटि जाई । गिरिजा सोइ कृपाल रघुसाई ॥
 आदि अंत कोउ जासु न पावा । मति अनुमानि निगम अस गावा ॥
 बिनु पद चलइ सुनइ बिनु काना । कर बिनु करम कइ बिधि नाना ॥
 आनन रहित सकल रस भोगी । बिनु बानी बकता बड़ जोगी ॥
 तन बिनु परस नयन बिनु देखा । ग्रहइ घान बिनु बास असेषा ॥
 असि सब भाँति अलौकिक करनी । महिमा जासु जाइ नहिं बरनी ॥
 दो० — जेहि इमि गावहिं बेद बुध जाहि धरहिं मुनि ध्यान ।

सोइ दसरथ सुत भगत हित कोसलपति भगवान ॥ ११८ ॥
 कासीं मरत जंतु अवलोकी । जासु नाम बल करउँ बिसोकी ॥

सोइ प्रभु मोर चराचर स्वामी । रघुबर सब उर अंतरजामी ॥
 बिबसहुँ जासु नाम नर कहहीं । जनम अनेक रचित अघ दहहीं ॥
 सादर सुमिरन जे नर करहीं । भव बारिधि गोपद इव तरहीं ॥
 राम सो परमात्मा भवानी । तहँ भ्रम अति अबिहित तव बानी ॥
 अस संसय आनत उर माहीं । ग्यान बिराग सकल गुन जाहीं ॥
 मुनि सिव के भ्रम भंजन बचना । मिटि नै सब कुतर कैं रचना ॥
 भइ रघुपति पद प्रीति प्रतीती । दारुन अमंभावना बीती ॥
 दो० - पुनि पुनि प्रभु पद कमल गहि जोरि पंकरुह पानि ।

बोलीं गिरिजा बचन बर मनहुँ प्रेम रस सानि ॥ ११९ ॥
 ससि कर सम सुनि गिरि तुम्हारी । मिटा मोह सरदातप भारी ॥
 तुम्ह कृपाल सबु संसउ हरेऊ । राम स्वरूप जानि मोहि परेऊ ॥
 नाथ कृपाँ अब गयउ बिषादा । सुखी भयउँ प्रभु चरन प्रसादा ।
 अब मोहि आपनि किकरि जानी । जदपि सहज जड नारि अयानी ।
 प्रथम जो मैं पूछा सोइ कहहू । जौं मो पर प्रसन्न प्रभु अहहू ॥
 राम ब्रह्म चिनमय अबिनासी । सब रहित सब उर पुर बासी ॥
 नाथ धरेउ नरतनु केहि हेतू । मोहि समझाइ कहहु वृषकेतू ॥
 उमा बचन सुनि परम विनीता । रामकथा पर प्रीति पुनीता ॥
 दो० - हियँ हारि कामारि तब संकर सहज सुजान ।

बहु बिधि उमहि प्रससि पुनि बोले कृपानिधान ॥ १२० (क) ॥

नवाह्नपारायण, पहला विश्राम

मासपारायण, चौथा विश्राम

सो० — सुनु सुभ कथा भवानि रामचरितमानस बिमल ।

कहा भुमुंडि बखानि सुना बिहग नायक गरुड़ ॥ १२० (ख) ॥

सो संबाद उदार जेहि बिधि भा आगें कहब ।

सुनहु राम अवतार चरित परम सुंदर अनघ ॥ १२० (ग) ॥

हरि गुन नाम अपार कथा रूप अगनित अमित ।

मैं निज मति अनुसार कहउँ उमा सांदर सुनहु ॥ १२० (घ) ॥

सुनु गिरिजा हरिचरित सुहाए । बिपुल बिसद निगमागम गाए ॥

हरि अवतार हेतु जेहि होई । इदमित्थं कहि जाइ न सोई ॥

राम अतर्क्य बुद्धि मन बानी । मत हमार अस सुनिहि सयानी ।

तदपि सत मृनि बेद पुराना । जस कछु कहिहिं स्वमति अनुमाना ॥

तस मैं सुमुखि सुनावउँ तोही । समुझि परइ जस कारन मोही ॥

जब जब होइ धरम कै हानी । बाढ़िहिं असुर अधम अभिमानी ॥

करहिं अनीति जाइ नहिं बरनी । सीदहिं बिप्र धेनु सुर धरनी ॥

तब तब प्रभु धरि बिबिध सरीरा । हरहिं कृपानिधि सज्जन पीरा ॥

दो० — असुर मारि थापहिं सुरन्ह राखहिं निज श्रुति सेतु ।

जग बिस्तारहिं बिसद जस राम जन्म कर हेतु ॥ १२१ ॥

सोइ जस गाइ भगत भव तरहीं । कृपासिंधु जन हित तनु धरहीं ॥

राम जनम के हेतु अनेका । परम बिचित्र एक तैं एका ॥

जनम एक दुइ कहउँ बखानी । सावधान सुनु सुमति भवानी ॥

द्वारपाल हरि के प्रिय दोऊ । जय अरु बिजय जान सब कोऊ ॥

बिप्र श्राप तें दूनउ भाई तामस असुर देह तिन्ह पाई ॥
 कनककसिपु अरु हाटकलोचन । जगतबिदित सुरपति मद मोचन ॥
 बिजई समर बीर बिख्याता । धरि बराह अपु एक निपाता ॥
 होइ नरहरि दूसर पुनि मारा । जन प्रह्लाद सुजस बिस्तारा ॥
 दो०— भए निसाचर जाइ तेइ महाबीर बलवान ।

कुंभकरन रावन सुभट सुर बिजई जय जान ॥ १२२ ॥
 मुकुत न भए हते भगवाना । तीनि जनम द्विज बचन प्रवाना ॥
 एक बार तिन्ह के हित लागी । धरेउ सरीर भगत अनुरागी ।
 कस्यप अदिति तहाँ पितु माता । दसरथ कौसल्या बिख्याता ॥
 एक कलप एहि बिधि अवतारा । चरित पवित्र किए संसारा ॥
 एक कलप सुर देखि दुखारे । समर जलंधर सन सब हारे ॥
 संभु कीन्ह संग्राम अपारा । दनुज महाबल मरइ न मारा ॥
 परम सती असुराधिप नारी । तेहि बल ताहि न जितहि पुरारी ।
 दो०— छल करि टारेउ तामु बत प्रभु सुर कारज कीन्ह

जब तेहि जानेउ मरम तब श्राप कोप करि दीन्ह ॥ १२३ ॥
 तामु श्राप हरि दीन्ह प्रमाना । कौतुकनिधि कृपाल भगवाना ॥
 तहाँ जलंधर रावन भयऊ । रन हति राम परम पद दयऊ ॥
 एक जनम कर कारन एहा । जेहि लागि राम धरी नरदेहा ।
 प्रति अवतार कथा प्रभु केरी । सनु मुनि बरनी कबिन्ह घनेरी ।
 नारद श्राप दीन्ह एक बारा । कलप एक तहि लागि अवतारा ।

गिरिजा चकित भई सुनि बानी । नारद बिष्णुभगत पुनि ग्यानी ॥
 कारन कवन श्राप मुनि दीन्ह। का अपराध रमापति कीन्ह ॥
 यह प्रसंग मोहि कहहु पुरारी । मुनि मन मोह आचरज भारी ।
 दो०— बोले बिहसि महेस तब ग्यानी मूढ़ न कोइ ।

जेहि जस रघुपति करहि जब सो तस तेहि छन होइ ॥ १२४ (क) ॥

सो०— कहउँ राम गुन गाथ भरद्वाज सादर सुनहु ।

भव भंजन रघुनाथ भजु तुलसी तजि मान मद ॥ १२४ (ख) ॥
 हिमगिरि गुहा एक अति पावनि । बह समीप सुरसरी सुहावनि ॥
 आश्रम परम पुनीत सुहावा । देखि देवरिषि मन अति भावा ॥
 निरखि सैल सरि बिषिन बिभागा । भयउ रमापति पद अनुरागा ॥
 सुमिरत हरिहि श्राप गति बाधी । सहज बिमल मन लागि समाधी ॥
 मुनि गति देखि सुरेस डेराना । कामहि बोलि कीन्ह सनमाना ॥
 सहित सहाय जाहु मम हेतू । चलेउ हरषि हियँ जलचरकेतू ।
 सुनासीर मन महँ असि त्रासा । चहत देवरिषि मम पुर बासा ॥
 जे कामी लोलुप जग माहीं । कुटिल काक इव सबहि डेराहीं ॥
 दो०— सूख हाड़ लै भाग सठ स्वान निरखि मृगराज ।

छीनि लेइ जनि जान जड़ तिमि सुरपतिहि न लाज ॥ १२५ ॥
 तेहि आश्रमहिं मदन जब गयऊ । निज मायाँ बसंत निरमयऊ ॥
 कुसुमित बिबिध बिटप बहुरंगा । कूजहिं कोकिल गुंजहिं भृंगा ॥
 चली सुहावनि त्रिविध बयारी । काम कृसानु बढावनिहारी ॥

रंभादिक सुर नारि नबीना । सकल असमसर कला प्रबीना ॥
करहिं गान बहु तान तरंगा । बहुबिधि क्रीडहिं पानि पतंगा ॥
देखि सहाय मदन हरषाना । कीन्हैसि पुनि प्रपच बिधि नाना ॥
कामकला कछु मुनिहि न व्यापी । निज भयँ हरेठ मनोभव पापी ।
सीम कि चौपि सकइ कोउ तासू । बड़ रखवार रमापति जासू ॥
दो० - सहित सहाय सधीत अति पानि हारि मन पैन ।

गहेसि जाइ मुनि चरन तब कहि मुठि आरत बैन ॥ १२६ ॥
भयउ न नारद मन कछु रोषा कहि प्रिय बचन काम परितोषा ।
नाइ चरन सिरु आयसु पाई । गयउ मदन तब सहित सहाई ॥
मुनि सुसीलता आपनि करनी । सुरपति सभौ जाइ सब बरनी ॥
मुनि सब के मन अचरजु आवा । मुनिहि प्रसंसि हरिहि सिरु नावा ॥
तब नारद गवने सिव पाहीं । जिता काम अहमिति मन माहीं ॥
मार चरित संकरहि सुनाए । अतिप्रिय जानि महेस सिखाए ॥
बार बार बिनवउँ मुनि तोही । जिमि यह कथा सुनायहु मोही ॥
तिमि जनि हरिहि सुनावहु कबहूँ । चलेहुँ प्रसंग दुराएहु तबहूँ ॥
दो० — संभु दीन्ह उपदेस हित नहिं नारदहि मोहान ।

भरद्वाज कौतुक सुनहु हरि इच्छा बलवान ॥ १२७ ॥
राम कीन्ह चाहहिं सोइ होई । करै अन्यथा अस नाह कोई ॥
संभु बचन मुनि मन नहिं भाए । तब बिरचि के लोक सिधाए ॥
एक बार करतल बर बीना गावत हरि गुन गान प्रबीना ॥

छीरसिधु गवने मुनिनाथा । जहँ बस श्रीनिवास श्रुतिमाथा ॥
 हरषि मिले उठि रमानिकेता । बैठे आसन रिषिहि समेता ।
 बोले बिहसि चराचर राया । बहुते दिनन कीन्हि मुनि दाया ॥
 काम चरित नारद सब भाषे । जद्यपि प्रथम बरजि सिबैं राखे ॥
 अति प्रचंड रघुपति कै माया । जेहि न मोह अस को जग जाया ॥
 दो०—रूख बदन करि बचन मृदु बोले श्रीभगवान ।

तुम्हरे सुमिरन तैं मिटहिं मोह मार मद मान ॥ १२८ ॥
 सुनु मुनि मोह होइ मन तार्के । ग्यान बिराग हृदय नहिं जाके ॥
 ब्रह्मचरज ब्रत रत मतिधीरा । तुम्हहिं कि करइ मनोभव पीरा ।
 नारद कहेउ सहित अभिमाना । कृपा तुम्हारि सकल भगवाना ॥
 करुनानिधि मन दीख बिचारी । उर अंकुरेउ गरब तरु भारी ।
 बेगि सो मैं डारिहउँ उखारी । पन हमार सेवक हितकारी ॥
 मुनि कर हित मम कौतुक होई । अवसि उपाय करबि मैं सोई ॥
 तब नारद हरि पद सिर नाई । चले हृदयँ अहमिति अधिकाई ॥
 श्रीपति निज माया तब प्रेरी । सुनहु कठिन करनी तेहि केरी ॥
 दो०—बिरचेउ मग महँ नगर तेहिं मत जोजन बिस्तार ।

श्रीनिवासपुर तैं अधिक रचना बिबिध प्रकार ॥ १२९ ॥
 बसहिं नगर सुंदर नर नारी । जनु बहु मनसिज रति तनुधारी ॥
 तेहिं पुर बसइ सीलनिधि राजा । अगनित हय गय सेन समाजा ।
 सत सुरेस सम बिभव बिलासा । रूप तेज बल नीति निवासा ॥

बिस्वमोहनी तासु कुमारी । श्री बिमोह त्रिसु रूपु निहारी ।
 सोइ हरिमाया सब गुन खानी । सोभा तासु कि जाइ बखानी ।
 करइ स्वयंबर सो नृपवाला । आए तहँ अगनित महिपाला ।
 मुनि कौतुकी नगर तेहिं गयऊ । पुरबासिन्ह सब पूछत भयऊ ॥
 सुनि सब चरित भूपगृहँ आए । करि पूजा नृप मुनि बैठाए ॥
 दो० आनि देख्यै नारदहि भूपति राजकुमारि ।

कहु नाथ गुन दोष सब एहि के हृदयँ बिचारि ॥ १३० ॥
 देखि रूप मुनि बिरति बिसारी बड़ी बार लगि रहे निहारी ॥
 लच्छन तासु बिलोकि भुलाने हृदयँ हरष नहि प्रगट बखाने ॥
 जो एहि बरइ अमर सोइ होई समरभूमि तेहि जीत न कोई ॥
 सेवहिं सकल चराचर ताही बरइ सीलनिधि कन्या जाही ।
 लच्छन सब बिचारि उर राखे कछुक बनाइ भूप सन भाषे ॥
 सुता सुलच्छन कहि नृप पाहीं । नारद चले सोच मन माहीं ॥
 करौं जाइ सोइ जतन बिचारी । जेहि प्रकार मोहि बरै कुमारी ।
 जप तप कछु न होइ तेहि काला । हे बिधि मिलइ कवन बिधि बाला ।
 दो० - एहि अवसर चाहिअ परम सोभा रूप बिसाल ।

जो बिलोकि रीझै कुअँरि तब मैलै जयमाल ॥ १३१ ॥
 हरि सन भागौं सुंदरताई । होइहि जात गहरु अति भाई ।
 मोरें हित हरि सम नहिं कोऊ । एहि अवसर सहाय सोइ होऊ ॥
 बहुबिधि बिनय कीन्ह तेहि काला । प्रगटेठ प्रभु कौतुकी कृपाला ॥

प्रभु बिलोकि मुनि नयन जुड़ाने । होइहि काजु हिउँ हरषाने ॥
 अति आरति कहि कथा सुनाई । करहु कृपा करि होहु सहाई ॥
 आपन रूप देहु प्रभु मोही । आन भाँति नहिं पावौं ओही ॥
 जेहि बिधि नाथ होइ हित मोरा । करहु सो बेगि दास मैं तोरा ॥
 निज माया बल देखि बिसाला । हियँ हँसि बोले दीनदयाला ॥
 दो०— जेहि बिधि होइहि परम हित नारद सुनहु तुम्हार ।

सोइ हम करब न आन कछु बचन न मृषा हमार ॥ १३२ ॥
 कुपथ माग रुज ब्याकुल रोगी । बैद न देइ सुनहु मुनि जोगी ॥
 एहि बिधि हित तुम्हार मैं ठयऊ । कहि अस अंतरहित प्रभु भयऊ ॥
 माया बिबस भए मुनि मूढ़ । समुझी नहिं हरि गिरा निगूढ़ ॥
 गवने तुरत तहाँ रिषिराई । जहाँ स्वयंबर भूमि बनाई ॥
 निज निज आसन बैठे राजा । बहु बनाव करि सहित समाजा ॥
 मुनि मन हरष रूप अति भोरें । मोहि तजि आनहि बरिहि न भोरें ॥
 मुनि हित कारन कृपानिधाना । दीन्ह कुरूप न जाइ बखाना ॥
 सो चरित्र लखि काहुँ न पावा । नारद जानि सबहिं सिर नावा ॥
 दो०— रहे तहाँ दुइ रुद्र गन ते जानहि सब भेड ।

बिप्रबेष देखत फिरहि परम कौतुकी तेउ ॥ १३३ ॥
 जेहिं समाज बैठे मुनि जाई । हृदयँ रूप अहमिति अधिकारि ॥
 तहाँ बैठे महेस गन दोऊ । बिप्रबेष गति लखइ न कोऊ ॥
 करहिं कूटि नारदहि सुनाई । नीकि दीन्ह हरि सुंदरताई ॥

रोझिहि राजकुआँरि छबि देखी । इन्हहि बरिहि हरि जानि बिसेषी ।
 मुनिहि मोह मन हाथ पराएँ । हैंसहिं सभु गन अति सचु पाएँ ॥
 जदपि सुनिहिं मुनि अटपटि बानी । समुझि न परइ बुद्धि भ्रम सानी ॥
 काहुँ न लखा सो चरित बिसेषा । सो सरूप नृपकन्याँ देखा ॥
 मर्कट बदन भयंकर देही । देखत हृदयँ क्रोध भा तेही ।
 दो०— सखीँ संग लै कुआँरि तब चलि जनु राजमसल ।

देखत फिह महीष सब कर सरोज जयमाल ॥ १३४ ॥
 जेहि दिसि बैठे नारद फुली । सो दिसि तेहिं न बिलोकी भूली ॥
 पुनि पुनि मुनि उकसहिं अकुलाहीं देखि दसा हर गन मुसुकाहीं ॥
 धरि नृपतनु तहँ गयउ कृपाला । कुआँरि हरषि मेलेउ जयमाला ॥
 दुलहिनि लै गे लच्छिनिवासा । नृपसमाज सब भयउ निरासा ॥
 मुनि अति बिकल मोहँ मति नाठी । मनि गिरि गई छूटि जनु गाँठी ॥
 तब हर गन बोले मुसुकाई । निज मुख मुकुर बिलोकहु जाई ॥
 अस कहि दोउ भागे भयँ भारी । बदन दीख मुनि बारि निहारी ॥
 बेषु बिलोकि क्राध अति बाढ़ा । तिन्हहि सराप दीन्ह अति गाढ़ा ॥
 दो० होहु निसाचर जाइ तुम्ह कपटी पापी दोउ ।

हँसेहु हमहि सो लेहु फल बहुरि हँसेहु मुनि कोउ ॥ १३५ ॥
 पुनि जल दीख रूप निज पावा । तदपि हृदयँ संतोष न आवा ॥
 फरकत अधर कोप मन माही । सपदि चले कमलार्पति पाही ॥
 देहउँ श्राप कि मरिहउँ जाई । जगत मोरि उपहास कराई ॥

बीचहिं पंथ मिले दनुजारी । संग रमा सोइ राजकुमारी ॥
 बोले मधुर बचन सुरसाई । मुनि कहँ चले बिकल की नाई ।
 सुनत बचन उपजा अति क्रोधा । माया बस न रहा मन बोधा ॥
 पर संपदा सकहु नहिं देखी । तुम्हरेँ इरिषा कपट बिसेषी ॥
 मथत सिंधु रुद्रहि बौरायहु । सुरन्ह प्रेरि बिष पान करायहु ॥
 दो०— असुर सुरा बिष संकरहि आपु रमा मनि चारु ।

स्वारथ साधक कुटिल तुम्ह सदा कपट व्यवहारु ॥ १३६ ॥
 परम स्वतंत्र न सिर पर कोई । भावइ मनहि करहु तुम्ह सोई ।
 भलेहि मंद मंदेहि भल करहु । बिसमय हरष न हियँ कछु धरहु ॥
 डहकि डहकि परिचेहु सब काहु । अति असंक मन सदा उछहू ॥
 करम सुभासुभ तुम्हहि न बाधा । अब लागि तुम्हहि न काहँ साधा ॥
 भले भवन अब बायन दीन्हा । पावहुगे फल आपन कीन्हा ।
 बंचेहु मोहि जवनि धरि देहा । सोइ तनु धरहु श्राप मम एहा ।
 कपि आकृति तुम्ह कीन्हि हमारी । करिहहिं कीस सहाय तुम्हारी ॥
 मम अपकार कीन्ह तुम्ह भारी । नारि बिरहँ तुम्ह होब दुखारी ॥
 दो०— श्राप सीस धरि हरषि हियँ प्रभु बहु बिनती कीन्हि ।

निज माया कै प्रबलता करषि कृपानिधि लीन्हि ॥ १३७ ॥
 जब हरि माया दूरि निवारी । नहिं तहँ रमा न राजकुमारी ॥
 तब मुनि अति सभित हरि चरना । गहे पाहि प्रनतारति हरना ॥
 मृषा होउ मम श्राप कृपाला । मम इच्छा कह दीनदयाला ॥

मैं दुर्बचन कहे बहुतेरे । कह मुनि पाप मिटिहिं किमि मेरे ॥
 जपहु जाइ संकर सत नामा होइह हृदयँ तुरत बिश्रामा ॥
 कोउ नहि सिव समान प्रिय मारें आस परतीति तजहु जनि भारें ॥
 जेहि पर कृपा न करहिं पुरारी सो न पाव मुनि भगति हमारी ।
 अस उर धार महि बिचरहु जाई । अब न तुम्हहि माया निअराई ॥
 दो०—बहुबिधि मुनिहि प्रबोधि प्रभु तब भए अंतरधान ।

सत्यलोक नारद चले करत राम गुन गान ॥ १३८ ॥
 हर गन मुनिहि जात पथ देखी । बिगत मोह मन हरष बिमेषी ।
 अति सभित नारद पहिं आए । गहि पद आरत बचन सुनाए ॥
 हर गन हम न बिप्र मुनिराया । बड़ अपराध कीन्ह फल पाया ।
 श्राप अनुग्रह करहु कृपाला । बोले नारद दीनदयाला ॥
 निसिचर जाइ होहु तुम्ह दोऊ बैभव बिपुल तेज बल होऊ ॥
 भुजबल बिस्व जितब तुम्ह जाहिआ । धरिहहिं बिष्णु मनुज तनु तहिआ
 समर मरन हरि हाथ तुम्हारा । होइहहु मुकुत न पुनि संसारा ॥
 चले जुगल मुनि पद सिर नाई भए निसाचर कालहि पाई ॥
 दो०—एक कलप एहि हेतु प्रभु लीन्ह मनुज अवतार ।

सुर रंजन सज्जन सुखद हरि भंजन भुवि भार ॥ १३९ ॥
 एहि बिधि जनम करम हरि केरे । सुंदर सुखद बिचित्र घनेरे ॥
 कलप कलप प्रति प्रभु अवतरहीं । चारु चरित नानाबिधि करहीं ॥
 तब तब कथा मुनीसन्ह गाई । परम पुनीत प्रबंध बनाई ॥

बिबिध प्रसंग अनूप बखाने । करहिं न सुनि आचरजु सयाने ॥
 हरि अनंत हरि कथा अनंता । कहहिं सुनिहिं बहुबिधि सब संता ॥
 रामचंद्र के चरित सुहाए । कल्प कोटि लागि जाहिं न गाए ॥
 यह प्रसंग मैं कहा भवानी । हरिमायाँ मोहहिं मुनि ग्यानी ॥
 प्रभु कौतुकी प्रनत हितकारी । सेवत सुलभ सकल दुखहारी ॥
 सो०— सुर नर मुनि कोउ नाहिं जेहि न मोह माया प्रबल ।

अस बिचारि मन माहिं भजिअ महामाया पतिहि ॥ १४० ॥
 अपर हेतु सुनु सैलकुमारी । कहउँ बिचित्र कथा बिस्तारी ॥
 जेहि कारन अज अगुन अरूपा । ब्रह्म भयउ कोसलपुर भूपा ॥
 जो प्रभु बिपिन फिरत तुम्ह देखा । बंधु समेत धरें मुनिबेषा ॥
 जासु चरित अवलोकि भवानी । सती सरीर रहिहु बौरानी ॥
 अजहुँ न छाया मिटति तुम्हारी । तासु चरित सुनु भ्रम रुज हारी ॥
 लीला कीन्हि जो तेहिं अवतारा । सो सब कहिहउँ मति अनुसारा ॥
 भरद्वाज सुनि संकर बानी । सकुचि सप्रेम उमा मुसुकानी ॥
 लागे बहुरि बरनै बृषकेतू । सो अवतार भयउ जेहि हेतू ॥
 दो०— सो मैं तुम्ह सन कहउँ सब सुनु मुनीस मन लाइ ।

राम कथा कलि मल हरनि पंगल करनि सुहाइ ॥ १४१ ॥
 स्वायंभू मनु अरु सतरूपा । जिन्ह तें भै नरसृष्टि अनूपा ॥
 दंपति धरम आचरन नीका । अजहुँ गाव श्रुति जिन्ह कै लीका ॥
 नृप उत्तानपाद सुत तासू । ध्रुव हरिभगत भयउ सुत जासू ॥

लघु सुत नाम प्रियव्रत ताही । बेद पुरान प्रसंसहिं जाही ।
 देवहूति पुनि तासु कुमारी । जो मुनि कर्दम कै प्रिय नारी ।
 आदिदेव प्रभु दीनदयाला । जठर धरेउ जेहिं कपिल कृपाला ॥
 सांख्य सास्त्र जिन्ह प्रगट बखाना । तत्त्व बिचार निपुन भगवाना ॥
 तेहिं मनु राज कीन्ह बहु काला । प्रभु आयसु सब बिधि प्रतिपाला ॥
 सो०— होइ न बिषय बिराग भवन बसत भा चौथपन ।

हृदयँ बहुत दुख लाग जनम गयउ हरिभगति बिनु ॥ १४२ ॥
 बरबस राज सुतहि तब दीन्हा । नारि समेत गवन बन कीन्हा ॥
 तीरथ बर नैमिष बिख्याता । अति पुनीत साधक सिधि दाता ॥
 बसहिं तहाँ मुनि सिद्ध समाजा । तहाँ हियँ हरषि चलेउ मनु राजा ॥
 पंथ जात सोहहिं मतिधीरा । ग्यान भगति जनु धरौ सरीरा ।
 पहुँचे जाइ धेनुमति तीरा । हरषि नहाने निरमल नीरा ॥
 आए मिलन सिद्ध मुनि ग्यानी । धरम धुरंधर नृपरिषि जानी ॥
 जहँ जहँ तीरथ रहे सुहाए । मुनिन्ह सकल सादर करवाए ।
 कृस सरीर मुनिपट परिधाना । सत समाज नित सुनिहिं पुराना ॥
 दो०— द्वादस अच्छर मंत्र पुनि जपहिं सहित अनुराग ।

बासुदेव पद पंकरुह दंषति मन अति लाग । १४३ ॥
 करहिं अहार साक फल कंदा । सुमिरहिं ब्रह्म सच्चिदानंदा ॥
 पुनि हरि हेतु करन तप लागे । बारि आधार मूल फल त्यागे ॥
 उर अभिलाष निरंतर होई । देखिअ नयन परम प्रभु सोई ॥

अगुन अखंड अनंत अनादी । जेहि चितहिं परमारथबादी ।
 भेति नेति जेहि बेद निरूपा । निजानंद निरूपाधि अनूपा ॥
 संभु बिरंचि बिष्नु भगवाना । उपजहिं जासु अंस तैं नाना ॥
 ऐसेउ प्रभु सेवक बस अहई । भगत हेतु लीलातनु गहई ॥
 जौ यह बचन सत्य श्रुति भाषा । तौ हमार पूजिहि अभिलाषा ॥
 दो०— एहि बिधि बीते बरष षट सहस बारि आहार ।

संबत सम सहस्र पुनि रहे समीर आधार ॥ १४४ ॥
 बरष सहस दस त्यागेउ सोऊ । ठाढ़े रहे एक पद दोऊ ।
 बिधि हरि हर तप देखि अपारा । मनु समीप आए बहु बारा ॥
 मागहु बर बहु भाँति लोभाए । परम धीर नहिं चलहिं चलाए ॥
 अस्थिमात्र होइ रहे सरीरा । तदपि मनाग मनहिं नहिं पीरा ॥
 प्रभु सर्वग्य दास निज जानी । गति अनन्य तापस नृप रानी ॥
 मागु मागु बरु भै नभ बानी । परम गभीर कृपामृत सानी ॥
 मृतक जिआवनि गिरा सुहाई । श्रवन रंध्र होइ उर जब आई ।
 हृष्ट पुष्ट तन भए सुहाए । मानहुँ अबहिं भवन ते आए ॥
 दो०— श्रवन सुधा सम बचन मुनि पुलक प्रफुल्लित गात ।

बोले मनु करि दंडवत प्रेम न हृदयँ समात ॥ १४५ ॥
 सुनु सेवक सुरतरु सुरधेनू । बिधि हरि हर बंदित पद रेनू ॥
 सेवत सुलभ सकल सुखदायक । प्रनतपाल सचराचर नायक ॥
 जौ अनाथ हित हम पर नेहू । तौ प्रसन्न होइ यह बर देहू ॥

जो सरूप बस सिव मन माहीं । जेहि कारन मुनि जतन कराहीं ।
जो भुसुंड़ि मन मानस हंसा । सगुन अगुन जेहि निगम प्रसंसा ।
देखाहिं हम सो रूप भरि लोचन कृपा करहु प्रनतारति मोचन ॥
दंपति बचन परम प्रिय लागे मृदुल बिनीत प्रेम रस पागे ।
भगत बछल प्रभु कृपानिधाना बिस्ववास प्रगटे भगवाना ।
दो०— नील सरोरुह नील यनि नील नीरधर स्याम ।

लाजहिं तन सोभा निरखि कोटि कोटि सत काम ॥ १४६ ॥
सरद मयंक बदन छबि सीवा । चारु कपोल चिबुक दर ग्रीवा ॥
अधर अरुन रद सुंदर नासा । बिधु कर निकर बिनिंदक हासा ।
नव अंबुज अंबक छबि नीकी । चितवनि ललित भावैती जी की ॥
भृकुटि मनोज चाप छबि हारी तिलक ललाट पटल दुतिकारी ॥
कुंडल मकर मुकुट सिर भ्राजा । कुटिल केस अनु मधुप समाजा ॥
उर श्रीबत्स रुचिर बनमाला । पदिक हार भूषन मनि जाला ।
केहरि कंधर चारु जनेऊ । बाहु बिभूषन सुंदर तेऊ ॥
करि कर सरिस सुभग भुजदंडा कटि निषंग कर सर कोदंडा ।
दो० तडित बिनिंदक पीत पट उदर रेख बर तीनि ।

नाभि मनोहर लेति जनु जमुन भवै छबि छीनि ॥ १४७ ॥
पद राजीव बरान नहिं जाहीं । मुनि मन मधुप बसहिं जेन्ह माहीं ।
बाम भाग सोधति अनुकूला । आदिसक्ति छबिनिधि जगमूला ।
जासु अंस उपजहिं गुनखानी अगनित लच्छि उमा ब्रह्मानी ॥

भृकुटि बिलास जासु जग होई । राम बाम दिसि सीता सोई ॥
छबिसमुद्र हरि रूप बिलोकी । एकटक रहे नयन पट रोकी ॥
चितवहिं सादर रूप अनूपा । तृप्ति न मानहिं मनु सतरूपा ॥
हरष बिबस तन दसा भुलानी । परे दंड इव गहि पद पानी ॥
सिर परसे प्रभु निज कर कंजा । तुरत उठाए करुनापुंजा ॥
दो० — बोले कृपानिधान पुनि अति प्रसन्न मोहि जानि ।

मागहु बर जोइ भाव मन महादानि अनुमानि ॥ १४८ ॥
सुनि प्रभु बचन जोरि जुग पानी । धरि धीरजु बोली मृदु बानी ॥
नाथ देखि पद कमल तुम्हारे । अब पूरे सब काम हमारे ॥
एक लालसा बड़ि उर माहीं । सुगम अगम कहि जाति सो नाहीं ॥
तुम्हहि दैत अति सुगम गोसाईं । अगम लाग मोहि निज कृपनाई ॥
जथा दरिद्र बिबुधतरु पाई । बहु संपति भागत सकुचाई ॥
तासु प्रभाउ जान नहिं सोई । तथा हृदयँ मम संसय होई ॥
सो तुम्ह जानहु अंतरजामी । पुरवहु मोर मनोरथ स्वामी ॥
सकुच बिहाइ मागु नृप मोही । मोरें नहिं अदेय कछु तोही ॥
दो० — दानि सिरोमनि कृपानिधि नाथ कहउँ सतिभाउ ।

चाहउँ तुम्हहि समान सुत प्रभु सन कवन दुराउ ॥ १४९ ॥
देखि प्रीति सुनि बचन अमोले । एवमस्तु करुनानिधि बोले ॥
आपु सरिस खोजौं कहँ जाई । नृप तव तनय होब मैं आई ॥
सतरूपहि बिलोकि कर जोरें । देबि मागु बरु जो रुचि तोरें ॥

जो बरु नाथ चतुर नृप मागा । सोइ कृपाल मोहि अति प्रिय लागी ॥
 प्रभु परंतु सुठि होति ढिठाई । जदपि भगत हित तुम्हहि सोहाई ॥
 तुम्ह ब्रह्मादि जनक जग स्वामी । ब्रह्म सकल ठर अंतरजामी ॥
 अस समुझत मन ससय होई । कहा जो प्रभु प्रवान पुनि सोई ॥
 जे निज भगत नाथ तव अहहीं । जो सुख पावहिं जो गति लहहीं ॥
 दो० — सोइ सुख सोइ गति सोइ भगति सोइ निज चरन सनेहु ।

सोइ बिबेक सोइ रहनि प्रभु हमहि कृपा करि देहु ॥ १५० ॥
 सुनि मृदु गूढ़ रुचिर बर रचना । कृपासिधु बोले मृदु बचना ।
 जो कछु रुचि तुम्हरे मन माहीं । मैं सो दीह सब संसय नाहीं ।
 मानु बिबेक अलौकिक तोरे । कबहुँ न मिटिहि अनुग्रह मोरें ॥
 बंदि चरन मानु कहेउ बहोरी । अवर एक बिनती प्रभु मोरी ॥
 सूत बिषइक तव पद रति होऊ । मोहि बड़ मूढ़ कहै किन कोऊ ।
 मानि बिनु फनि जिमि जल बिनु मीना । मम जीवन तिमि तुम्हहि अधीना ॥
 अस बरु मागि चरन गहि रहेऊ । एवमस्तु करुनानिधि कहेऊ ॥
 अब तुम्ह मम अनुसासन मानी । बसहु जाइ सुरपति रजधानी ॥
 सो० — तहैं करि भोग बिसाल तात गएँ कछु काल पुनि ।

होइहहु अवध भुआल तब मैं होव तुम्हार सुन ॥ १५१ ॥
 इच्छामय नरबेष सँवारें । होइहउँ प्रगट निकेत तुम्हारें ॥
 अंसन्ह सहित देह धरि ताता करिहउँ चरित भगत सुखदाता ॥
 जे सुनि सादर नर बड़भागी । भव तरिहहिं ममता मद त्यागी ॥

आदिसक्ति जेहिं जग उपजाया । सोउ अवतरिहि मोरि यह माया ।
 पुरउब मैं अभिलाष तुम्हारा । सत्य सत्य पन सत्य हमारा ॥
 पुनि पुनि अस कहि कृपानिधाना । अंतरधान भए भगवाना ।
 दंपति उर धरि भगत कृपाला । तेहिं आश्रम निवसे कछु काला ॥
 समय पाइ तनु तजि अनयासा । जाइ कीन्ह अमरावति बासा ॥
 दो०— यह इतिहाम पुनीत अति उपहि कही बृषकेतु ।

भरद्वाज सुनु अपर पुनि राघ जनम कर हेतु ॥ १५२ ॥

मासपारायण, पाँचवाँ विश्राम

सूनु मुनि कथा पुनीत पुरानी । जो गिरिजा प्रति संभु बखानी ।
 बिस्व बिदित एक कैकय देसू । सत्यकेतु तहँ बसइ नरेसू ।
 धरम धुरंधर नीति निधाना । तेज प्रताप सील बलवाना ॥
 तेहि के भए जुगल सुत बीरा । सब गुन धाम महा रनधीरा ।
 राज धनी जो जेठ सुत आही । नाम प्रतापभानु अस ताही ॥
 अपर सुतहि अरिमर्दन नामा । भुजबल अतुल अचल संग्रामा ।
 भाइहि भाइहि परम समीती । सकल दोष छत्र बरजित प्रीती ॥
 जेठे सुतहि राज नृप दीन्हा । हरि हित आपु गवन बन कीन्हा ॥
 दो०— जब प्रतापरवि भयउ नृप फिरी दोहाई देस ।

प्रजा पाल अति ब्रह्मबिधि कतहुँ नहीं अघ लेस ॥ १५३ ॥

नृप हितकारक सचिव सयाना । नाम धरमरुचि सुक्र समाना ॥
 सचिव सयान बंधु बलबीरा । आपु प्रतापपुंज रनधीरा ।

सेन सग चतुरंग अपारा । अमित सुभट सब समर जुझारा ।
 सेन बिलोकि राउ हरषाना । अरु बाजे गहगहे निसाना ।
 बिजय हेतु कटकई बनाई । मृदिन माधि नृप चलेउ बजाई ।
 जहाँ तहाँ परीं अनेक लराई । जीते सकल भूप बरिआई ॥
 साम दीप भुजबल बस कीन्हे । लै लै दंड छाड़ि नृप दीन्हे ॥
 सकल अवनि मडल तेहि काला । एक प्रतापभानु महिपाला ॥
 दो०— स्ववस बिस्व करि बाहुबल निज पुर कीन्ह प्रबेसु ।

अथ धरम कामादि सुख सेवइ समर्थ नरेसु ॥ १५४ ॥
 भूप प्रतापभानु बल पाई । कामधेनु भै भूमि सुहाई ।
 सब दुख बरजित प्रजा सुखारी । धरमसील सुंदर नर नारी ॥
 सचिव धरमसुचि हरि पद प्रीती । नृप हित हेतु सिखव नित नीती ॥
 गुर सुर संत पितर महिदेवा करइ सदा नृप सब कै सेवा ।
 भूप धरम जे बेद बखाने । सकल करइ सादर सुख माने ।
 दिन प्रति देइ बिबिध बिधि दाना । सुनइ सास्त्र बर बेद पुराना ।
 नाना बापीं कूप तड़ागा । सुमन बाटिका सुंदर बागा ॥
 बिप्रभवन सुरभवन मुहाए । सब तीरथन्ह बिचित्र बनाए ॥
 दो०— जहाँ लगि कहे पुरान श्रुति एक एक सब जाग

बार सहस्र सहस्र नृप किए महित अनुराग ॥ १५५ ॥
 हृदयँ न कछु फल अनुसधाना भूप बिबेकी परम सुजाना ॥
 करइ जे धरम करम मन बानी बासुदेव अर्पित नृप ग्यानी ॥

चढ़ि बर बाजि बार एक राजा । मृगया कर सब साजि समाजा ॥
 बिंध्याचल गभीर बन गयऊ । मृग पुनीत बहु मारत भयऊ ॥
 फिरत बिपिन नृप दीख बराहू । जनु बन दुरेउ ससिहि ग्रसि राहू ॥
 बड़ बिधु नहिं समात मुख माहीं । मनहुँ क्रोध बस उगिलत नाहीं ॥
 कोल कराल दसन छबि गाई । तनु बिसाल पीवर अधिकाई ॥
 घुरुघुरात हय आरौ पाएँ । चकित बिलोकत कान उठाएँ ॥
 दो०— नील महीधर सिखर सम देखि बिसाल बराहु ।

चपरि चलेउ हय सुटुकि नृप हाँकि न होइ निबाहु ॥ १५६ ॥
 आवत देखि अधिक रव बाजी । चलेउ बराह मरुत गति भाजी ॥
 तुरत कीन्ह नृप सर संधाना । महि मिलि गयउ बिलोकत बाना ।
 तकि तकि तीर महीस चलावा । करि छल सुअर सरीर बचावा ॥
 प्रगटत दुरत जाइ मृग भागा । रिस बस भूष चलेउ सँग लागा ॥
 गयउ दूरि घन गहन बराहू । जहँ नाहिन गज बाजि निबाहू ॥
 अति अकेल बन बिपुल कलेसू । तदपि न मृग मग तजइ नरेसू ॥
 कोल बिलोकि भूष बड़ धीरा । भागि पैठ गिरिगुहाँ गभीरा ॥
 अगम देखि नृप अति पछिताई । फिरेउ महाबन परेउ भुलाई ॥
 दो०— खेद खिन्न छुद्धित तृषित राजा बाजि समेत ।

खोजत व्याकुल सरित सर जल बिनु भयउ अचेत ॥ १५७ ॥
 फिरत बिपिन आश्रम एक देखा । तहँ बस नृपति कपट मुनिबेषा ॥
 जासु देस नृप लीन्ह छड़ाई । समर सेन तजि गयउ पराई ॥

समय प्रतापभानु कर जानी । आपन अति असमय अनुमानी ॥
 गयउ न गृह मन बहुत गलानी । मिला न राजहि नृप अभिमानी ॥
 रिस उर भारि रंक जिमि राजा । बिपिन बसइ तापस के साजा ॥
 तासु समीप गवन नृप कीन्हा । यह प्रतापरबि तेहिं तब चीन्हा ॥
 राउ तृषित नहिं सो पहिचाना । देखि सुब्रेष महामुनि जाना ॥
 उतरि तुरग तैं कीन्ह प्रनामा । परम चतुर न कहेउ निज नामा ॥
 दो०—भूपति तृषित बिलोकि तेहिं सरबरु दीन्ह देखाइ ।

मज्जन पान समेत हय कीन्ह नृपति हरषाइ ॥ १५८ ॥
 गै श्रम सकल सुखी नृप भयऊ । निज आश्रम तापस लै गयऊ ।
 आसन दीन्ह अस्त रबि जानी । पुनि तापस बोलेउ मृदु बानी ॥
 को तुम्ह कस बन फिरहु अकेलें । सुंदर जुबा जीव परहेलें ॥
 चक्रवर्ति के लच्छन तोरें । देखत दया लागि अति मोरें ॥
 नाम प्रतापभानु अवनीसा । तासु सांचव मैं सुनहु मुनीसा ॥
 फिरत अहेरें परेउँ भुलाई । बड़ें भाग देखेउँ पद आई ॥
 हम कहैं दुर्लभ दरस तुम्हारा । जानत हौं कछु भल होनिहारा ॥
 कह मुनि तात भयउ आँधिआरा । जोजन सत्तरि नगरु तुम्हारा ।
 दो०—निसा घोर गंभीर बन पथ न सुनहु सुजान ।

बसहु आजु अस जानि तुम्ह जाएहु होत बिहान ॥ १५९ (क) ॥

तुलसी जसि भवतब्यता तैसी मिलइ सहाइ ।

आपुनु आवइ ताहि पहिं ताहि तहाँ लै जाइ ॥ १५९ (ख) ॥

भलेहिं नाथ आयमु धरि सीसा । बौंश्च तुरग तरु बैठ महीसा ॥
 नृप बहु भौंत्त प्रसंसेउ ताही । चरन बौंद निज भाग्य सराही ॥
 पुनि बोलेउ मृदु गिरा सुहाई । जानि पिता प्रभु करउँ ढिठाई ॥
 मोहि मुनीस सुत सेवक जानी । नाथ नाम निज कहहु बखानी ॥
 तेहि न जान नृप नृपाह सो जाना । भूप सुहृद सो कपट सयाना ॥
 बैरी पुनि छत्री पुनि राजा । छन बल कीन्ह चहइ निज काजा ॥
 रामाँझ राजमुख दुखित अराती । अवाँ अनल इव सुलगइ छाती ॥
 सरल बचन नृप के सुनि काना । बयर सँभारि हृदयँ हरषाना ॥
 दो०— कपट बोरि बानी मृदुल बोलेउ जगुति समेत ।

नाम हमार भिखारि अब निर्धन रहित निकेत ॥ १६० ॥
 कह नृप जे बिग्यान निधाना । तुम्ह सारिखे गलित अभिमाना ॥
 सदा रहहिं अपनपौ दुराएँ । सब बिधि कुसल कुबेष बनाएँ ।
 तेहि तैं कहहिं संत श्रुति टेरें । परम अकिचन प्रिय हरि केरें ॥
 तुम्ह सम अधन भिखारि अगेहा । होत बिरंच सिवहि संदेहा ।
 जोसि सोसि तव चरन नमामी । मो पर कृपा करिअ अब स्वामी ॥
 सहज प्रीति भूपति कै देखी । आपु बिषय बिस्वास बिसेषी ।
 सब प्रकार राजाह अपनाई । बोलेउ अधिक सनेह जनाई ॥
 मनु सातिभाउ कहउँ महिपाला । इहाँ बसत बीते बहु काला ॥
 दो०— अब लागि मोहि न मिलेउ कोउ मैं न जनावउँ काहु ।

लोकमान्यता अनल सम कर तप कानन दाहु ॥ १६१ (क) ॥

सो० तुलसी देखि सुबेषु भूलहि मूढ़ न चतुर नर ।

सुंदर केकिहि पेखु बचन सुधा सम असन अहि ॥ १६१ (ख) ॥
ताते गुपुत रहउँ जग माहीं । हरि तजि किमपि प्रयोजन नाहीं ।
प्रभु जानत सब बिनाहि जनाएँ कहहु कवनि सिंध लोक रिझाएँ ॥
तुम्ह सुनि सुमति परम प्रिय मोरें । प्रीति प्रतीति मोहि पर तोरें ॥
अब जौ तात दुरावउँ तोही । दारुन दोष घटइ अति मोही ॥
जिमि जिमि तापसु कथइ उदासा । तिमि तिमि नृपहि उपज बिस्वासा ॥
देखा स्वबस कम मन बानी । तब बोला तापस बगध्यानी ।
नाम हमार एकतनु भाई । सुनि नृप बोलेउ पुनि सिरु नाई ।
कहहु नाम कर अरथ बखानी । मोहि सेवक अति आपन जानी ।
दो०— आदिसृष्टि उपजी जबहि तब उत्पति भै मोरि ।

नाम एकतनु हेतु तहि देह न धरी बहोरि ॥ १६२ ॥
जनि आचरजु करहु मन माहीं । सुत तप तैं दुर्लभ कह्यु नाहीं ॥
तपबल तैं जग सृजइ बिधाता । तपबल बिष्णु भए परित्राता ॥
तपबल संभु करहि संघारा । तप तैं अगम न कह्यु संसारा ॥
भयउ नृपहि सुनि अति अनुरागा । कथा पुरातन कहै सो लागा ॥
करम धरम इतिहास अनेका । करइ निरूपन बिरति बिबेका ।
उदभव पालन प्रलय कहानी । कहेमि अमित आचरज बखानी ।
सुनि महीप तापस बस भयऊ आपन नाम कहन तब लयऊ ।
कह तापस नृप जानउँ तोही । कोन्हहु कपट लाग भल मोही ॥

सो०— सुनु महीस असि नीति जहँ तहँ नाम न कहहि नृप ।

मोहि तोहि पर अति प्रीति सोइ चतुरता बिचारि तव ॥ १६३ ॥
 नाम तुम्हार प्रताप दिनेसा । सत्यकेतु तव पिता नरेसा ॥
 गुर प्रसाद सब जानिअ राजा । कहिअ न आपन जानि अकाजा ॥
 देखि तात तव सहज सुधार्द । प्रीति प्रतीति नीति निपुनाई ॥
 उपजि परी ममता मन मोरें । कहउँ कथा निज पूछे तोरें ॥
 अब प्रसन्न मैं संसय नाहीं । मागु जो भूप भाव मन माहीं ॥
 सुनि सुबचन भूपति हरषाना । गहि पद बिनय कीन्हि बिधि नाना ॥
 कृपासिंधु मुनि दरसन तोरें । चारि पदारथ करतल मोरें ॥
 प्रभुहि तथापि प्रसन्न बिलोकी । मागि अगम बर होउँ असोकी ॥
 दो०— जरा मरन दुख रहित तनु समर जितै जनि कोउ ।

एकछत्र रिपुहीन महि राज कलप सत होउ ॥ १६४ ॥
 कह तापस नृप ऐसेइ होऊ । करन एक कठिन सुनु सोऊ ॥
 कालउ तुअ पद नाइहि सीसा । एक बिप्रकुल छाड़ि महीसा ॥
 तपबल बिप्र सदा बरिआग । तिन्ह के कोप न कोउ रखवारा ॥
 जाँ बिप्रन्ह बस करहु नरेसा । तौ तुअ बस बिधि बिष्णु महेसा ॥
 चल न ब्रह्मकुल सन बरिआई । सत्य कहउँ दोउ भुजा उठाई ॥
 बिप्र श्राप बिनु सुनु महिपाला । तोर नास नहिं कवनेहुँ काला ।
 हरषेउ राउ बचन सुनि तासू । नाथ न होइ मोर अब नासू ॥
 तव प्रसाद प्रभु कृपानिधाना । मो कहूँ सर्व काल कल्याणा ॥

दो०— एवमस्तु कहि कपट मुनि बोला कुटिल बहोरि।

मिलब हमार भुलाब निज कहहु न हमहि न खोरि। १६५॥
तातैं मैं तोहि बरजउँ राजा। कहैं कथा तव परम अकाजा॥
छठैं श्रवन यह परत कहानी। नास तुम्हार सत्य मम बानी॥
यह प्रगटैं अथवा द्विजश्रापा। नास तोर सुनु भानुप्रतापा॥
आन उपायैं निधन तव नाहीं। जौं हरि हर कोपहिं मन माहीं॥
सत्य नाथ पद गहि नृप भाषा। द्विज गुर कोप कहहु को राखा॥
राखइ गुर जौं कोप बिधाता। गुर बिरोध नहिं कोउ जग त्राता॥
जौं न चलब हम कहे तुम्हारें। होउ नास नहिं सोच हमारें॥
एकहिं डर डरपत मन मोरा। प्रभु महिदेव श्राप अति घोरा॥
दो०—होहिं बिप्र बस कवन बिधि कहहु कृपा करि सोउ।

तुम्ह तजि दीनदयाल निज हितू न देखउँ कोउ॥ १६६॥
सुनु नृप बिबिध जतन जग माहीं। कष्टसाध्य पुनि होहिं कि नाहीं॥
अहइ एक अति सुगम उपाई। तहाँ परंतु एक कठिनाई॥
मम आधीन जुगुति नृप सोई। मोर जाब तव नगर न होई॥
आजु लगैं अरु जब तैं भयऊँ। काहू के गृह ग्राम न गयऊँ॥
जौं न जाउँ तव होइ अकाजू। बना आइ असमंजस आजू॥
सुनि महीस बोलेउ मृदु बानी। नाथ निगम असि नीति बखानी॥
बड़े सनेह लघुन्ह पर करहीं। गिरि निज मिरनि सदा तृन धरहीं॥
जलधि अगाध मौलि बह फेनू। संतत धरनि धरत सिर रेनू॥

दो०—अस कहि गहे नरेस पद स्वामी होहु कृपाल ।

मोहि लागि दुख सहिअ प्रभु सज्जन दीनदयाल ॥ १६७ ॥
 जानि नृपहि आपन आधीना । बोला तापस कपट प्रबीना ॥
 सत्य कहउँ भूपति सुनु तोही । जग नाहिन दुर्लभ कछु मोही ।
 अवसि काज मैं करिहउँ तोरा । मन तन बचन भगत तैं मोरा ।
 जोग जुगुति तप मंत्र प्रभाऊ । फलइ तबहिं जब करिअ दुराऊ ॥
 जाँ नरेस मैं करौं रसोई । तुम्ह परसहु मोहि जान न कोई ।
 अन्न सो जोइ जोइ भोजन करई । सोइ सोइ तव आयसु अनुसरई ॥
 पुनि तिन्ह के गृह जेवँइ जोऊ । तव बस होइ भूप सुनु सोऊ ॥
 जाइ उपाय रचहु नृप एहू । संबत भरि संकलप करेहू ॥
 दो०—नित नूतन द्विज सहस सत बरेहु सहित परिवार ।

मैं तुम्हरे संकलप लागि दिनहिं करबि जेवनार ॥ १६८ ॥
 एहि बिधि भूप कष्ट अति थोरें । होइहहिं सकल बिप्र बस तोरें ।
 करिहहिं बिप्र होम मख सेवा । तेहिं प्रसंग सहजेहिं बस देवा ।
 और एक तोहि कहउँ लखाऊ । मैं एहिं बेष न आउब काऊ ॥
 तुम्हरे उपरोहित कहूँ राया । हरि आनब मैं करि निज माया ।
 तपबल तेहि करि आपु समाना । रखिहउँ इहाँ बरष परवाना ॥
 मैं धरि तासु बेषु सुनु राजा । सब बिधि तोर सँवारब काजा ॥
 गै निंसि बहुत सयन अब कीजे । मोहि तोहि भूप भेंट दिन तीजे ।
 मैं तपबल तोहि तुरग समेता । पहुँचैहउँ सोवतहि निकेता ॥

दो० — मैं आउब सोइ बेषु धरि पहिचानेहु तब मोहि।

जब एकांत बोलाइ सब कथा सुनावौं तोहि॥ १६९॥
 सयन कीन्ह नृप आयसु मानी। आसन जाइ बैठ छलग्यानी॥
 श्रमित भूप निद्रा अति आई। सो किमि सोच सोच अधिकाई॥
 कालकेतु निसिचर तहैं आवा। जेहिं सूकर होइ नृपहि भुलावा॥
 परम मित्र तापस नृप करा। जानइ सो अति कपट घनेरा।
 तेहि के सत सुत अरु दस भाई। खल अति अजय देव दुखदाई॥
 प्रथमहिं भूप समर सब मारे। बिप्र सत सुर देखि दुखारे।
 तेहिं खल पाछिल बयरु सँभारा। तापस नृप मिलि मंत्र बिचारा॥
 जेहिं रिपु छ्य सोइ रचेन्ह उपाऊ। भावी बस न जान कह्यु राऊ॥
 दो० - रिपु तेजसी अकेल अपि लघु करि गनिअ न ताहु।

अजहुँ देत दुख रबि ससिहि सिर अवसेषित राहु॥ १७०॥
 तापस नृप निज सम्बहि निहारी। हरषि मिलेउ उठि भयउ सुखारी॥
 मित्रहि कहि सब कथा सुनाई। जातुधान बोला सुख पाई॥
 अब साधेउँ रिपु सुनहु नरेसा। जौं तुम्ह कीन्ह मोर उपदेसा।
 परिहरि सोच रहहु तुम्ह सोई। बिनु औषध बिआधि बिधि खोई॥
 कुल समेत रिपु मूल बहाई। चौथैं दिवस मिलब मैं आई॥
 तापस नृपहि बहुत परितोषी। चला महाकपटी अतिरोषी।
 भानुप्रतापहि बाजि समेता। पहुँचाएसि छन माझ निकेता॥
 नृपहि नारि पहिं सयन कराई। हय गृहँ बाँधेसि बाजि बनाई॥

दो०— राजा के उपरोहितहि हरि लै गयउ बहोरि।

लै राखेसि गिरि खोह महुँ मायाँ करि मति भोरि॥ १७१ ॥
 आपु बिरचि उपरोहित रूपा। परेउ जाइ तेहि सेज अनूपा॥
 जागेउ नृप अनभएँ बिहाना। देखि भवन अति अचरजु माना॥
 मुनि महिमा मन महुँ अनुमानी। उठेउ गवौँहिं जेहिं जान न रानी॥
 कानन गयउ बाजि चढ़ि तेहीं। पुर नर नारि न जानेउ केहीं॥
 गएँ जाम जुग भूपति आवा। घर घर उत्सव बाज बधावा॥
 उपरोहितहि देखि जब राजा। चकित बिलोक सुमिरि सोइ काजा॥
 जुग सम नृपहि गए दिन तीनी। कपटी मुनि पद रह मति लीनी॥
 समय जानि उपरोहित आवा। नृपहि मते सब कहि समुझावा॥
 दो० नृप हरषेउ पहिचानि गुरु भ्रम बस रह न चेत।

बरे तुरत सत सहस बर बिप्र कुटुंब समेत॥ १७२ ॥
 उपरोहित जेवनार बनाई। छरस चारि बिधि जसि श्रुति गाई॥
 मायामय तेहिं कीन्हि रसोई। बिजन बहु गनि सकइ न कोई॥
 बिबिध मृगन्ह कर आमिष राँधा। तेहि महुँ बिप्र माँसु खल साँधा॥
 भोजन कहूँ सब बिप्र बोलाए। पद पखारि सादर बैठाए॥
 परुसन जबहिं लाग महिपाला। भै अकासबानी तेहि काला॥
 बिप्रबृंद उठि उठि गृह जाहू। है बड़ि हानि अत्र जनि खाहू॥
 भयउ रसोई भूसुर माँसू। सब द्विज उठे मानि बिस्वासू॥
 भूप बिकल मति मोहँ भुलानी। भावी बस न आव मुख बानी॥

दो०— बोले बिप्र सकोप तब नहिं कछु कीन्ह बिचार।

जाइ निसाचर होहु नृप मृढ़ सहित परिवार॥१७३॥
छत्रबंधु तैं बिप्र बालाई। घालै लिए सहित समुदाई॥
ईस्वर राखा धरम हमारा। जैहसि तैं समेत परिवारा॥
संबत मध्य नास तव होऊ। जलदाता न रहिहि कुल कोऊ॥
नृप सुनि श्राप बिकल अति त्रासा, भै बहोरि बर गिरा अकासा॥
बिप्रहु श्राप बिचारि न दीन्हा। नहिं अपराध भूप कछु कीन्हा॥
चकित बिप्र सब सुनि नभबानी। भूप गयउ जहँ भोजन खानी॥
तहँ न असन नहि बिप्र सुआरा। फिरेउ राउ मन सोच अपारा॥
सब प्रसंग महिसुरन्ह सुनाई। त्रसित परेउ अवनीं अकुलाई॥
दो०— भूपति भावी मिटइ नहिं जदपि न दूषन तोर।

किऐँ अन्यथा होइ नहिं बिप्रश्राप अति घोर॥१७४॥
अस कहि सब महिदेव सिधाए। समाचार पुरलोगन्ह पाए॥
सोचहि दूषन दैवहि देहीं। बिरचत हंस काग किय जेहीं॥
उपरोहितहि भवन पहुँचाई। असुर तापसहि खबरि जनवाई॥
तेहिं खल जहँ तहँ पत्र पठाए। सजि सजि सेन भूप सब धाए॥
घेरेन्हि नगर निसान बजाई बिबिध भाँति नित होइ लराई॥
जूझै सकल सुभट करि करनी। बंधु समेत परेउ नृप धरनी॥
सत्यकेतु कुल कोउ नहिं बाँचा। बिप्रश्राप किमि होइ असौँचा॥
रिपु जिति सब नृप नगर बसाई। निज पुर गवने जय जसु पाई॥

दो०— भरद्वाज सुनु जाहि जब होइ बिधाता बाम ।

धूरि मेरुसम जनक जम ताहि ब्यालसम दाम ॥ १७५ ॥
 काल पाइ मुनि सुनु सोइ राजा । भयउ निसाचर सहित समाजा ॥
 दस सिर ताहि बीस भुजदंडा । रावन नाम बीर बरिबंडा ॥
 भूप अनुज अरिमर्दन नामा । भयउ सो कुंभकरन बलधामा ।
 सचिव जो रहा धरमरुचि जासू । भयउ बिमात्र बंधु लघु तासू ॥
 नाम बिभीषन जेहि जग जाना । बिष्णुभगत बिग्यान निधाना ॥
 रहे जे सुत सेवक नृप केरे । भए निसाचर घोर घनेरे ॥
 कामरूप खल जिनस अनेका । कुटिल भयंकर बिगत बिबेका ॥
 कृपा रहित हिंसक सब पापी । बरनि न जाहिं बिस्व परितापी ॥
 दो० - उपजे जदपि पुलस्त्यकुल पावन अमल अनूप ।

तदपि महीसुर श्राप बस भए सकल अधरूप ॥ १७६ ॥
 कीन्ह बिबिध तप तीनिहुँ भाई । परम उग्र नहिं बरनि सो जाई ॥
 गयउ निकट तप देखि बिधाता । मागहु बर प्रसन्न मैं ताता ।
 करि बिनती पद गहि दससीमा । बोलेउ बचन सुनहु जगदीसा ॥
 हम काहू के मरहिं न मारे । बानर मनुज जाति दुइ बारे ॥
 एवमस्तु तुम्ह बड़ तप कीन्हा । मैं ब्रह्माँ मिलि तेहि बर दीन्हा ॥
 पुनि प्रभु कुंभकरन पहिं गयऊ । तेहि बिलोकि मन बिसमय भयऊ ॥
 जाँ एहिं खल नित करब अहारू । होइहि सब उजारि संसारू ॥
 सारद प्रेरि तासु मति फेरी । मागेसि नीद मास षट केरी ॥

दो० - गए बिभीषन पास पुनि कहेउ पुत्र बर मागु।

तेहि मागेउ भगवंत पद कमल अमल अनुरागु ॥ १७७ ॥
तिन्हहि देइ बर ब्रह्म सिधाए। हरषित ते अपने गृह आए ॥
मय तनुजा मदोदरि नामा। परम सुंदरी नारि ललामा ॥
सोइ मयँ दीन्हि रावनहि आनी। होइहि जातुधानपति जानी ॥
हरषित भयउ नारि भलि पाई। पुनि दोउ बंधु बिआहेसि जाई ॥
गिरि त्रिकूट एक सिधु मझारी। बिधि निर्मित दुर्गम अति भारी ॥
सोइ मय दानवँ बहुरि सँवारा। कनक रचित मनिभवन अपारा ॥
भोगावति जसि अहिकुल बासा। अमरावति जसि सक्रनिवासा ॥
तिन्ह तें अधिक रम्य अति बंका। जग बिख्यात नाम तेहि लंका ॥

दो० — खाई सिधु गभीर अति चारिहुँ दिसि फिरि आव।

कनक कोट मनि खचित दृढ़ बरनि न जाइ बनाव ॥ १७८ (क) ॥

हरि प्रेरित जेहि कलप जोड़ जातुधानपति होइ।

सुर प्रतापी अतुलबल दल समेत बस सोइ ॥ १७८ (ख) ॥
रहे तहाँ निसिचर भट भारे। ते सब सुरन्ह समर संघारे ॥
अब तहाँ रहहि सक्र के प्रेरे। रच्छक कोटि जच्छपति केरे ॥
दसमुख कतहुँ खबरि असि पाई। सेन साजि गढ़ घेरेसि जाई ॥
देखि बिकट भट बड़ि कटकाई जच्छ जीव लै गए पराई ॥
फिरि सब नगर दसानन देखा। गयउ सोच सुख भयउ बिसेषा ॥
मुंदर सहज अगम अनुमानी। कीन्हि तहाँ रावन रजधानी ॥

जेहि जस जोग बाँटि गृह दीन्हे । सुखी सकल रजनीचर कीन्हे ॥
 एक बार कुबेर पर धावा । पुष्पक जान जीति लै आवा ॥
 दो०— कौतुकहीं कैलास पुनि लीन्हेसि जाइ उठाइ ।

मनहुँ तौलि निज बाहुबल चला बहुत सुख पाइ ॥ १७९ ॥
 सुख संपति सुत सेन सहाई । जय प्रताप बल बुद्धि बड़ाई ॥
 नित नूतन सब बाढ़त जाई । जामि प्रतिलाभ लोभ अधिकाई ॥
 अतिबल कुंभकरन अस भ्राता । जेहि कहूँ नहिं प्रतिभट जग जाता ॥
 करइ पान सोवइ षट मासा । जागत होइ तिहूँ पुर त्रासा ॥
 जौं दिन प्रति अहार कर सोई । बिस्व बेगि सब चौपट होई ॥
 समर धीर नहिं जाइ बखाना । तेहि सम अमित बीर बलवाना ॥
 बारिदनाद जेठ सुत तासू । भट महुँ प्रथम लीक जग जासू ॥
 जेहि न होइ रन सनमुख कोई । सुरपुर नितहिं परावन होई ॥
 दो०— कुमुख अकंपन कुलिसरद धूमकेतु अतिकाय ।

एक एक जग जीति सक ऐसे सुभट निकाय ॥ १८० ॥
 कामरूप जानहिं सब माया । सपनेहुँ जिन्ह कैं धरम न दाया ॥
 दसमुख बैठ सभाँ एक बारा । देखि अमित आपन परिवारा ॥
 सुत समूह जन परिजन नाती । गनै को पार निसाचर जाती ॥
 सेन बिलोकि सहज अभिमानी । बोला बचन क्रोध मद सानी ॥
 सुनहु सकल रजनीचर जूथा । हमरे बैरी बिबुध बरूथा ॥
 ते सनमुख नहिं करहिं लराई । देखि सबल रिपु जाहिं पराई ॥

तेह कर मरन एक विधि होई । कहउँ बुझाइ सुनहु अब सोई ।
द्विजभोजन मख होम सराधा । सब कै जाइ करहु तुम्ह बाधा ॥
दो० — छुथा छैन बलहीन सुर सहजेहि मिलिहहि आइ ।

तब मागिहउँ कि छाड़िहउँ भली भाँति अपनाइ ॥ १८१ ॥
मेघनाद कहूँ पुनि हँकरावा । दीन्हीं सिख बलु बयरु बढ़वा ॥
जे सुर समर धीर बलवाना । जिन्ह केँ लरिबे कर अभिमाना ॥
तिन्हहि जीति रन आनेसु बाँधी । उठि सुत पितु अनुसासन काँधी ॥
एहि बिधि सबही अग्या दीन्ही । आपुनु चलेउ गदा कर लीन्ही ॥
चलत दसानन डोलति अवनी । गर्जत गर्भ स्वहिं सुर रवनी ॥
रावन आवत सुनेउ सकोहा । देवन्ह तके मेरु गिरि खोहा ॥
दिगपालन्ह के लोक सुहाए । मूने सकल दसानन पाए ।
पुनि पुनि सिघनाद करि भारी । देइ देवतन्ह गारि पचारी ॥
रन मद मत फिरइ जग धावा । प्रतिभट खोजत कतहुँ न पावा ॥
रवि ससि पवन बरुन धनधारी । अर्गानकाल जम सब अधिकारी ॥
किनर सिद्ध मनुज सुर नागा । हठि सबही के पंथाहिं लागा ॥
ब्रह्मसृष्टि जहाँ लागि तनुधारी । दसमुख बसवतीं नर नारी ॥
आयसु करहिं सकल भयभीता । नवहिं आइ नित चरन बिनीता ॥
दो० — भुजबल बिस्व बस्य करि राखेसि कोउ न सुतंत्र ।

मंडलीक भनि रावन राज कण्ड निज मंत्र ॥ १८२ (क) ॥

देव जच्छ गंधर्व नर किनर नाग कुषारि ।

जीनि बरीं निज बाहु बल बहु सुंदर बर नारि ॥ १८२ (ख) ॥

इंद्रजीत सन जो कछु कहेऊ । सो सब जनु पहिलेहिं करि रहेऊ ॥
 प्रथमहिं जिन्ह कहूँ आयसु दोन्हा । तिन्ह कर चरित सुनहु जो कीन्हा ॥
 देखत भीमरूप सब पापी । निसिचर निकर देव परितापी ॥
 करहिं उपद्रव असुर निकाया । नाना रूप धरहिं करि माया ॥
 जेहि बिधि होइ धर्म निर्मूला । सो सब करहिं बेद प्रतिकूला ।
 जेहिं जेहिं देस धेनु द्विज पावहिं । नगर गाउँ पुर आगि लगावहिं ॥
 सुभ आचरन कतहुँ नहिं होई । देव बिप्र गुरु मान न कोई ॥
 नहिं हरिभगति जग्य तप ग्याना । सपनेहुँ सुनिअ न बेद पुराना ॥

छं० - जप जोग बिरागा तप मख भागा श्रवन सुनइ दससीसा ।
 आपुनु उठि धावइ रहै न पावइ धरि सब घालइ खीसा ॥
 अस भ्रष्ट अचारा भा संसारा धर्म सुनिअ नहिं काना ।
 तेहि बहुबिधि त्रासइ देस निकासइ जो कह बेद पुराना ॥
 सो०— बरनि न जाइ अनीति घोर निसाचर जो करहिं ।

हिंसा पर अति प्रीति तिन्ह के पापहि कवनि मिति ॥ १८३ ॥

मासपारायण, छठा विश्राम

बाढ़े खल बहु चोर जुआरा । जे लंपट परधन परदारा ॥
 मानहिं मातु पिता नहिं देवा । साधुन्ह सन करवावहिं सेवा ॥
 जिन्ह के यह आचरन भवानी । ते जानेहु निसिचर सब प्रानी ॥
 अतिसय देखि धर्म कै ग्लानी । परम सभौत धरा अकुलानी ॥
 गिरि सरि सिधु भार नहिं मोही । जस मोहि गरुअ एक परद्रोही ॥

सकल धर्म देखइ बिपरीता , कहि न सकइ रावन भय भीता ॥
धेनु रूप धरि हृदयँ बिचारी । गई तहाँ जहाँ सुर मुनि झारी ॥
निज संताप सुनाएसि रोई । काहू तैं कछु काज न होई ॥

छं० सुर मुनि गंधर्वा मिलि करि सर्वा गे बिरंचि के लोका ।
सँग गोतनुधारी भूमि बिचारी परम बिकल भय सोका ।
ब्रह्म सब जाना मन अनुमाना मोर कछू न बसाई ।
जा करि तैं दासी सो अबिनासी हमरेउ तोर सहाई ।

सो०—धरनि धरहि मन धीर कह बिरंचि हरिपद सुमिरु ।

जानत जन की पीर प्रभु भंजिहि दारुन बिपति ॥ १८४ ॥

बैठे सुर सब करहि बिचारा । कहँ पाइअ प्रभु करिअ पुकारा ॥
पुर बैकुंठ जान कह कोई । कोउ कह पयनिधि बस प्रभु सोई ॥
जाके हृदयँ भगति जसि प्रीती प्रभु तहँ प्रगट सदा तेहिं रीती ॥
तेहिं समाज गिरिजा में रहेऊँ । अवसर पाइ बचन एक कहेऊँ ॥
हरि व्यापक सर्वत्र समाना । प्रेम तैं प्रगट होहिं मैं जाना ॥
देस काल दिसि बिदिसिहु माहीं । कहहु सो कहाँ जहाँ प्रभु नाहीं ॥
अग जगमय सब रहित बिरागी प्रेम तैं प्रभु प्रगटइ जिमि आगी ॥
मोर बचन सब के मन माना । साधु साधु करि ब्रह्म बखाना ॥
दो० - सुनि बिरंचि मन हरष तन पुलकि नयन बह नीर ।

अस्तुति करत जोरि कर सावधान मतिधीर ॥ १८५ ॥

छं०— जय जय सुरनायक जन सुखदायक प्रनतपाल भगवंता ।
 गो द्विज हितकारी जय असुरारी सिधुमुता प्रिय कंता ॥
 पालन सुर धरनी अद्भुत करनी परम न जानइ कोई ।
 जो सहज कृपाला दीनदयाला करउ अनुग्रह सोई ॥
 जय जय अबिनासी सब घट बासी व्यापक परमानंदा ।
 अविगत गोतीतं चरित पुनीतं मायारहित मुकुंदा ॥
 जेहि लागि बिरागी अति अनुरागी बिगत मोह मुनिबुंदा ।
 निसि बासर ध्यावहिं गुन गन गावहिं जयति सच्चिदानंदा ॥
 जेहिं सृष्टि उपाईं त्रिबिध बनाई संग सहाय न दूजा ।
 सो करउ अधारी चिंत हमारी जानिअ भगति न पूजा ॥
 जो भव भय भंजन मुनि मन रंजन गंजन बिपति बरुथा ।
 मन बच क्रम बानी छाड़ि सयानी सरन सकल सुरजूथा ॥
 सारद श्रुति सेवा रिषय असेषा जा कहूँ कोउ नहिं जाना ।
 जेहि दीन पिआरे बेद पुकारे द्रवउ सो श्रीभगवाना ॥
 भव बारिधि पंदर सब बिधि सुंदर गुनमंदिर सुखपुंजा ।
 मुनि सिद्ध सकल सुर परम भयातुर नमत नाथ पद कंजा ॥

दो०— जानि सभय सुर भूमि सुनि बचन समेत सनेह ।

गगनगिरा गंभीर भइ हरनि सोक संदेह ॥ १८६ ॥

जनि डरपहु मुनि सिद्ध सुरेसा । तुम्हहि लागि धरिहउँ नर बेसा ॥
 अंसन्ह सहित मनुज अवतारा । लेहउँ दिनकर बंस उदारा ।

कस्यप अदिति महातप कीन्हा तिन्ह कहँ मैं पूरब बर दीन्हा ॥
 ते दसरथ कौसल्या रूपा कोसलपुरीं प्रगट नर भूषा ॥
 तिन्ह केँ गृह अवतरिहउँ जाई । रघुकुल तिलक सो चारिउ भाई ॥
 नारद बचन सत्य सब करिहउँ । परम सक्ति समेत अवतरिहउँ ॥
 हरिहउँ सकल भूमि गरुआई निर्भय होहु देव समुदाई ।
 गगन ब्रह्मबानी सुनि काना । तुरत फिरे सुर हृदय जुड़ाना ।
 तब ब्रह्माँ धरनिहि समुझावा । अभय भई भरोस जियँ आवा ।
 दो० — निज लोकहि बिरंचि गे देवन्ह इहइ सिखाइ ।

बानर तनु धरि धरि महि हरि पद सेवहु जाइ ॥ १८७ ॥
 गए देव सब निज निज धामा । भूमि सहित मन कहँ बिश्रामा ।
 जो कष्टु आयसु ब्रह्माँ दीन्हा । हरषे देव बिलब न कीन्हा ।
 बनचर देह धरो छिति माहीं । अतुलित बल प्रताप तिन्ह पाहीं ।
 गिरि तरु नख आयुध सब बीरा । हरि मारग चितबहिं मतिधीरा ।
 गिरि कानन जहँ तहँ भरि पूरी । रहे निज निज अनीक रचि रूरी ।
 यह सब रुचिर चरित मैं भाषा । अब सो सुनहु जो बीचहिं राखा ।
 अवधपुरीं रघुकुलमनि राऊ । बेद बिदित तेहि दसरथ नाऊँ ॥
 धरम धुरंधर गुननिधि ग्यानी । हृदयँ भगति मति सारँगषानी ॥
 दो० — कौसल्यादि नारि प्रिय सब आचरन पुनीत ।

पति अनुकूल प्रेम दूढ़ हरि पद कमल बिनीत ॥ १८८ ॥
 एक बार भूपति मन माहीं । भै गलानि मोरें सुत नाहीं ॥

गुर गृह गयउ तुरत महिपाला । चरन लागि करि बिनय बिसाला ।
 निज दुख सुख सब गुरहि सुनायउ । कहि बसिष्ठ बहुबिधि समुझायउ ॥
 धरहु धीर होइहहिं सुत चारी । त्रिभुवन बिदित भगत भय हारी ॥
 सृंगी रिषिहि बसिष्ठ बोलावा । पुत्रकाम सुभ जग्य करावा ॥
 भगति सहित मुनि आहुति दीन्हें । प्रगटे अगिनि चरू कर लीन्हें ॥
 जो बसिष्ठ कहु हृदयँ बिचारा । सकल काजु भा सिद्ध तुम्हारा ॥
 यह हवि बाँटि देहु नृप जाई । जथा जोग जेहि भाग बनाई ॥
 दो०— तब अदृश्य भए पावक सकल सभहि समुझाइ ।

परमानंद मगन नृप हरष न हृदयँ समाइ ॥ १८९ ॥
 तबहिं रायँ प्रिय नारि बोलाई । कौसल्यादि तहाँ चलि आई ॥
 अर्ध भाग कौसल्यहि दीन्हा । उभय भाग आधे कर कोन्हा ॥
 कैकई कहँ नृप सो दयऊ । रह्यो सो उभय भाग पुनि भयऊ ॥
 कौसल्या कैकई हाथ धरि । दीन्ह सुमित्रहि मन प्रसन्न करि ॥
 एहि बिधि गर्भसहित सब नारी । भई हृदयँ हरषित सुख भारी ॥
 जा दिन तें हरि गर्भहिं आए । सकल लोक सुख संपति छाए ॥
 मंदिर महँ सब राजहिं रानी । सोभा सील तेज की खानी ॥
 सुख जुत कल्लुक काल चलि गयऊ । जेहिं प्रभु प्रगट सो अवसर भयऊ ॥
 दो०— जोग लगन ग्रह बार तिथि सकल भए अनुकूल ।

चर अरु अचर हर्षजुत राम जनम सुखमूल ॥ १९० ॥
 नौमी तिथि मधु मास पुनीता । सुकल पच्छ अभिजित हरिप्रीता ॥

मध्यदिवस अति सीत न घामा । पावन काल लोक बिश्रामा ॥
 सीतल मंद सुरभि ब्रह्म बाऊ । हरषित सुर संतन मन चाऊ ॥
 बन कुसुमित गिरिगन भनिआरा । स्रवहिं सकल सरिताऽमृतधारा ॥
 सो अवसर बिराचि जब जाना । चले सकल सुर साजि बिमाना ॥
 गगन त्रिमल संकुल सुर जूथा । गावहिं गुन गंधर्व बरूथा ॥
 वरषहिं सुमन सुअंजुलि साजी । गहगहि गगन दुंदुभी बाजी ॥
 अस्तुति करहिं नाग मुनि देवा । बहुबिधि लावहिं निज निज सेवा ॥
 दो०— सुर समूह बिनती करि पहुँचे निज निज धाम ।

जगनिवास प्रभु प्रगटे अखिल लोक बिश्राम । १९१ ॥

छं०— भए प्रगट कृपाला दीनदयाला कौसल्या हितकारी ।
 हरषित महतारी मुनि मन हारी अद्भुत रूप बिचारी ॥
 लोचन अभिरामा तनू घनम्यामा निज आयुध भुज चारी ।
 भूषन बनमाला नयन बिसाला सोभासिंधु खरारी ॥
 कह दुइ कर जोरी अस्तुति तोरी केहि बिधि करौं अनंता ।
 माया गुन ग्यानातीत अमाना बेद पुगन भनंता ॥
 करुना सुख सागर सब गुन आगर जेहि गावहिं श्रुति संता ।
 सो मम हित लागी जन अनुरागी भयउ प्रगट श्रीकंता ।
 ब्रह्मांड निकाया निर्मित माया रोम रोम प्रति बेद कहै
 मम उर सो बासी यह उपहासी सुनत धीर मति थिर न रहै ।
 उपजा जब ग्याना प्रभु मुसुकाना चरित बहुत बिधि कीन्ह चहै
 कहि कथा सुहाई मातु बुझाई जेहि प्रकार सुत प्रेम लहै ॥

माता पुनि बोली सो भति डोली तजहु तात यह रूपा ।
 कीजै सिसुलीला अति प्रियसीला यह सुख परम अनूपा ॥
 सुनि बचन सुजाना रोदन ठाना होइ बालक सुरभूपा ।
 यह चरित जे गावहिं हरिषद पावहिं ते न परहिं भवकूपा ॥

दो०— बिप्र धेनु सुर संत हित लीन्ह मनुज अवतार ।

निज इच्छा निर्मित तनु पाया गुन गो पार ॥ १९२ ॥

सुनि सिसु रुदन परम प्रिय बानी । संध्रम चलि आई सब रानी ॥
 हरषित जहँ तहँ धाई दासी । आनंद मगन सकल पुरबासी ॥
 दसरथ पुत्रजन्म सुनि काना । मानहुँ ब्रह्मानंद समाना ॥
 परम प्रेम मन पुलक सरीरा । चाहत उठन करत मति धीरा ॥
 जाकर नाम सुनत सुभ होई । मोरें गृह आवा प्रभु सोई ॥
 परमानंद पूरि मन राजा । कहा बोलाइ बजावहु बाजा ॥
 गुर बसिष्ठ कहँ गयउ हँकारा । आए द्विजन सहित नृपद्वारा ॥
 अनुपम बालक देखेन्हि जाई । रूप रासि गुन कहि न सिसाई ॥

दो०— नंदीमुख सराध करि जातकरम सब कीन्ह ।

हाटक धेनु बसन मनि नृप बिप्रन्ह कहँ दीन्ह ॥ १९३ ॥

ध्वज पताक तोरन पुर छावा । कहि न जाइ जेहि भौति बनावा ॥
 सुमनबृष्टि अकास तें होई । ब्रह्मानंद मगन सब लोई ॥
 बृंद बृंद मिलि चलीं लोगाई । सहज सिगार किएँ उठि धाई ॥

कनक कलस मंगल भरि धारा । गावत पैठहि भूप दुआरा ॥
करि आरति नेवछावरि करहीं । बार बार सिसु चरनन्हि परहीं ॥
मागथ सूत बंदिगन गायक । पावन गुन गावहिं रघुनायक ।
सबस दान दीन्ह सब काहू । जेहिं पावा राखा नहिं ताहू ।
मृगमद चंदन कुंकुम कीचा । मची सकल बीथिन्ह बिच बीचा ॥
दो०—गृह गृह बाज बधाव सुभ प्रगटे सुषमा कंद ।

हरषवंत सब जहँ तहँ नगर चारि नर बृंद ॥ १९४ ॥
कैकयसुता सुमित्रा दोऊ सुंदर सुत जनमत भैं ओऊ ॥
वह सुख संपति समय समाजा । कहि न सकइ सारद अहिराजा ॥
अवधपूरी सोहइ एहि भाँती । प्रभुहि मिलन आई जनु राती ॥
देखि भानु जनु मन सकुचानी । तदपि बनी संध्या अनुमानी ॥
अगर धूप बहू जनु औंधआरी । उड़इ अबीर मनहुँ अरुनारी ॥
मंदिर मनि समूह जनु तारा । नृप गृह कलस सो इंदु उदारा ॥
भवन बेदधुनि अति मृदु बानो । जनु खग मुखर समयँ जनु सानी ॥
कौतुक देखि पतंग भुलाना । एक मास तेइँ जात न जाना ॥
दो०—मास दिवस कर दिवस भा मरम न जानइ कोइ ।

रथ समेत रवि थाकेउ निसा कवन बिधि होइ ॥ १९५ ॥
यह रहस्य काहूँ नहिं जाना । दिनमनि चले करत गुनगाना ॥
देखि महोत्सव सुर मुनि नागा । चले भवन बरनत निज भागा ।
औरउ एक कहउँ निज चोरी । सुनु गिरिजा अति दृढ़ मति तोरी ॥

काकभुसुंडि संग हम दोऊ । मनुजरूप जानइ नहिं कोऊ ॥
 परमानंद प्रेम सुख फूले । बीथिन्ह फिरहिं मगन मन भूले ॥
 यह सुभ चरित जान पै सोई । कृपा राम कै जापर होई ॥
 तेहि अवसर जो जेहि बिधि आवा । दीन्ह भूप जो जेहि मन भावा ॥
 गज रथ तुरग हेम गो हीरा । दीन्ह नृप नानाबिधि चीरा ॥
 दो०— मन संतोषे सबन्ह के जहँ तहँ देहिं असीस ।

सकल तनय चिर जीवहुँ तुलसिदास के ईस ॥ १९६ ॥
 कछुक दिवस बीते एहि भाँती । जात न जानिअ दिन अरु राती ॥
 नामकरन कर अवसरु जानी । भूप बोलि पठए मुनि ग्यानी ॥
 करि पूजा भूपति अस भाषा । धरिअ नाम जो मुनि गुनि राखा ॥
 इन्ह के नाम अनेक अनूपा । मैं नृप कहब स्वमति अनुरूपा ॥
 जो आनंद सिंधु सुखरासी । सीकर तैं त्रैलोक सुपासी ॥
 सो सुखधाम राम अस नामा । अखिल लोक दायक बिश्रामा ॥
 बिस्व भरन पोषन कर जोई । ताकर नाम भरत अस होई ।
 जाके सुमिरन तैं रिपु नासा । नाम सत्रुहन बेद प्रकासा ॥
 दो०— लच्छन धाम राम प्रिय सकल जगत आधार ।

गुरु बसिष्ट तेहि राखा लछिमन नाम उदार ॥ १९७ ॥
 धरे नाम गुर हृदयँ बिचारी । बेद तत्व नृप तब सुत चारी ॥
 मुनि धन जन सरबस सिव प्राणा । बाल केलि रस तेहिं सुख माना ॥
 बारेहि ते निज हित पति जानी । लछिमन राम चरन रति मानी ॥

भरत सत्रुहन दूनउ भाई । प्रभु सेवक जसि प्रीति बड़ाई ॥
 स्याम गौर सुदर दोउ जोरी । निरखहिं छबि जननीं तून तोरी ।
 चारिउ सील रूप गुन धामा । तदपि अधिक सुखसागर रामा ॥
 हृदयँ अनुग्रह इंदु प्रकासा सूचत किरन मनोहर हासा ॥
 कबहुँ उछग कबहुँ बर पलना । मानु दुलारद कहि प्रिय ललना ॥
 दो०— व्यापक बह्य निरंजन निर्गुन बिगत बिनोद

सो अज प्रेम भर्गति बस कौसल्या के गोद ॥ १९८ ॥
 काम कोटि छबि स्याम सरीरा । नील कंज बारिद गंभीरा ॥
 अरुन चरन पंकज नख जोती । कमल दलन्हि बैठे अनु मोती ॥
 रेख कुलिस ध्वज अंकुस सोह । नूपुर धुनि सुनि मुनि मन मोहे ॥
 कटि किंकिनी उदर त्रय रेखा । नाभि गभीर जान जेहिं देख ॥
 भुज बिसाल भूषन जुत भूरी । हियँ हरि नख अति सोभा रूरी ॥
 उर मनहार पदिक की सोभा । बिप्र चरन देखत मन लोभा ॥
 कंबु कंठ अति चिबुक सुहाई । आनन अमित मदन छबि छाई ॥
 दुइ दुइ दसन अधर अरुनारे । नासा तिलक को बरनै पारे ॥
 सुंदर श्रवन सुचारु कपोला अति प्रिय मधुर तोतरे बोला ।
 चिक्कन कच कुंचित गभुआरे । बहु प्रकार रचि मातु सँवारे ॥
 पीत झगुलिआ तनु पहिराई । जानु पानि बिचरनि मोहि भाई ॥
 रूप सकहिं नहिं कहि श्रुति सेषा । सो जानइ सपनेहुँ जेहिं देखा ॥
 दो०— सुख संदोह मोहपर ग्यान गिरा गोतीत ।

दंपति परम प्रेम बस कर सिसुचरिन पुनीत ॥ १९९ ॥

एहि बिधि राम जगत पितु माता । कोसलपुर बासिन्ह सुखदाता ॥
 जिन्ह रघुनाथ चरन रति मानी । तिन्ह की यह गति प्रगट भवानी ॥
 रघुपति बिमुख जतन कर कोरी । कवन सकइ भव बंधन छोरी ॥
 जीव चराचर बस कै राखे । सो माया प्रभु सों भय भाखे ॥
 भूकुटि बिलास नचावइ ताही । अस प्रभु छाड़ि भजिअ कहु काही ॥
 मन क्रम बचन छाड़ि चतुराई । भजत कृपा करिहहिं रघुराई ॥
 एहि बिधि सिसुबिनोद प्रभु कीन्हा । सकल नगरबासिन्ह सुख दीन्हा ॥
 लै उछंग कबहुँक हलरावै । कबहुँ पालने धालि झुलावै ॥
 दो०— प्रेम मगन कौसल्या निसि दिन जात न जान ।

सुत सनेह बस माता बालचरित कर गान ॥ २०० ॥
 एक बार जननीं अन्हवाए । करि सिंगार पलनाँ पौढ़ाए ॥
 निज कुल इष्टदेव भगवाना । पूजा हेतु कीन्ह अस्नाना ॥
 करि पूजा नैबेद्य चढ़ावा । आपु गई जहाँ पाक बनावा ॥
 बहुरि मातु तहवाँ चलि आई । भोजन करत देख सुत जाई ॥
 गै जननी सिमु पहिं भयभीता । देखा बाल तहाँ पुनि सूता ॥
 बहुरि आइ देखा सुत सोई । हृदयँ कंप मन धीर न होई ॥
 इहाँ उहाँ दुइ बालक देखा । मतिभ्रम मोर कि आन बिसेषा ॥
 देखि राम जननी अकुलानी । प्रभु हौंस दीन्ह मधुर मुसुकानी ॥
 दो०— देखरावा मातहि निज अद्भुत रूप अखंड ।

रोम रोम प्रति लागे कोटि कोटि ब्रह्मंड ॥ २०१ ॥

अग्नित रबि ससि सिव चतुरानन । बहु गिरि सरित सिधु भहि कानन ॥
काल कर्म गुन ग्यान सुभाऊ । सोउ देखा जो सुना न काऊ ॥
देखी माया सब बिधि गाढ़ी । अति सपीत जोरें कर ठाढ़ी ॥
देखा जीव नचावइ जाहो । देखो भगति जो धोरइ ताही ॥
तन पुलकित मुख बचन न आवा । नयन मूदि चरननि सिरु नावा ॥
बिसमयवंत देखि महतारी । भए बहुरि सिसुरूप खरारी ॥
अस्तुति करि न जाइ भय माना । जगत पिता मैं सुत करि जाना ॥
हरि जननी बहुबिधि समुझाई । यह जनि कतहुँ कहसि सुनु माई ॥
दो०— बार बार कौसल्या बिनय करइ कर जोरि ।

अब जनि कबहुँ ब्यापै प्रभु मोहि माया तोरि ॥ २०२ ॥
बालचरित हरि बहुबिधि कीन्हा । अति अनंद दासन्ह कहँ दीन्हा ॥
कछुक काल बीतें सब भाई । बड़े भए परिजन सुखदाई ॥
चूड़ाकरन कीन्ह गुरु जाई । बिप्रन्ह पुनि दछिना बहु पाई ॥
परम मनाहर चरित अपारा । करत फिरत चारिउ सुकुमारा ॥
मन क्रम बचन अगोचर जोई । दसरथ अजिर बिचर प्रभु सोई ।
भोजन करत बोल जब राजा । नहि आवत तजि बाल समाजा ॥
कौसल्या जब बोलन जाई । ठुमकु ठुमकु प्रभु चलहिं पराई ॥
निगम नेति सिव अत न पावा । ताहि धरै जननी हठि धावा ॥
धूसर धूरि भरें तनु आए । भूर्पात बिहसि गोद बैठाए ।
दो०— भोजन करत चपल चित इत उत अवसरु पाइ ।

भाजि चले किलकत मुख दधि ओदन लपटाइ ॥ २०३ ॥

बालचरित अति सरल सुहाए । सारद सेष संभु श्रुति गाए ॥
 जिन्ह कर मन इन्ह सन नहिं गता । ते जन बंचित किए बिधाता ॥
 भए कुमार जबहिं सब भ्राता । दीन्ह जनेऊ गुरु पितु माता ॥
 गुरगृहँ गए पढ़न रघुराई । अल्प काल बिद्या सब आई ॥
 जाकी सहज स्वास श्रुति चारी । सो हरि पढ़ यह कौतुक भारी ॥
 बिद्या बिनय निपुन गुन सीला । खेलहिं खेल सकल नृप लीला ॥
 करतल बान धनुष अति सोहा । देखत रूप चराचर मोहा ॥
 जिन्ह बीथिन्ह बिहरहिं सब भाई । थकित होहिं सब लोग लुगाई ।
 दो०— कोसलपुर बासी नर नारि बृद्ध अरु बाल ।

प्रानहु ते प्रिय लागत सब कहुँ राम कृपाल ॥ २०४ ॥
 बंधु सखा सँग लेहिं बोलाई । बन मृगया नित खेलहिं जाई ॥
 पावन मृग मारहिं जियँ जानी । दिन प्रति नृपहिं देखावहिं आनी ॥
 जे मृग राम बान के मारे । ते तनु तजि सुरलोक सिधारे ॥
 अनुज सखा सँग भोजन करहीं । मातु पिता अग्या अनुसरहीं ॥
 जेहि बिधि सुखी होहिं पुर लोगा । करहिं कृपानिधि सोइ संजोगा ॥
 बेद पुरान सुनहिं मन लाई । आपु कहहिं अनुजन्ह समुझाई ॥
 प्रातकाल उठि कै रघुनाथा । मातु पिता गुरु नावहिं माथा ॥
 आयसु मागि करहिं पुर काजा । देखि चरित हरषइ मन राजा ॥
 दो०— ब्यापक अकल अनीह अज निर्गुन नाम न रूप ।

भगत हेतु नाना बिधि करत चरित्र अनूप ॥ २०५ ॥

यह सब चरित कहा मैं गाई । आगिलि कथा सुनहु मन लाई ॥
 बिस्वामित्र महामुनि प्यानी । बसहिं बिपिन सुभ आश्रम जानी ॥
 जहँ जप जग्य जोग मुनि कहों । अति मारीच सुबाहुहि डरहों ॥
 देखत जग्य निसाचर धावहिं । कहिं उपद्रव मुनि दुख पावहिं ॥
 गाधितनय मन चिंता व्यापी । हरि बिनु मरहिं न निसिचर पापी ॥
 तब मुनिबर मन कीन्ह बिचारा । प्रभु अवतरेउ हरन महि भारा ॥
 एहूँ मिस देखौँ पद जाई । करि बिनती आनीँ दोउ भाई ॥
 ग्यान बिराग सकल गुन अयना । सो प्रभु मैं देखब भरि नयना ॥
 दो०—बहुबिधि करत मनोरथ जात लागि नहिं बार ।

करि मज्जन सरळ जल गए भूप दरबार ॥ २०६ ॥
 मुनि आगमन सुना जब राजा । मिलन गयउ लै बिप्र समाजा ॥
 करि दंडवत मुनिहि सनमानी । निज आसन बैठारेहि आनी ॥
 चरन पखारि कीन्ह अति पूजा । मो सम आजु धन्य नहिं दूजा ।
 बिबिध भाँति भोजन करवावा । मुनिबर हृदयँ हरष अति पावा ।
 पुनि चरननि मेलै सुत चारी । राम देखि मुनि देह बिसारी ॥
 भए मगन देखत मुख सोभा । जनु चकोर पूरन ससि लोभा ॥
 तब मन हरषि बचन कह राऊ । मुनि अस कृपा न कीन्हहु काऊ ॥
 केहि कारन आगमन तुम्हारा । कहहु सो करत न लावउँ बारा ।
 असुर समूह सतावहिं मोही । मैं जाचन आयउँ नृप तोही ॥
 अनुज समेत देहु रघुनाथा । निसिचर बंध मैं होब सनाथा ॥

दो०— देहु भूप मन हरषित तजहु मोह अग्यान।

धर्म सुजस प्रभु तुम्ह कौं इन्ह कहैं अति कल्याण ॥ २०७ ॥
 सुनि राजा अति अप्रिय बानी । हृदय कंप मुख दुति कुमुलानी ॥
 चौथेंपन पायउँ सुत चारी । बिप्र बचन नहिं कहेहु बिचारी ॥
 मागहु भूमि धेनु धन कोसा । सर्वस देउँ आजु सहरोसा ॥
 देह प्रान तैं प्रिय कह्यु नाहीं । सोउ मुनि देउँ निमिष एक माहीं ॥
 सब सुत प्रिय मोहि प्रान कि नाई । राम देत नहिं बनइ गोसाईं ॥
 कहैं निसिचर अति घोर कठोरा । कहैं सुंदर सुत परम किसोरा ॥
 सुनि नृप गिरा प्रेम रस सानी । हृदयँ हरष माना मुनि ग्यानी ॥
 तब बसिष्ट बहुबिधि समुझावा । नृप संदेह नास कहैं पावा ॥
 अति आदर दोउ तनय बोलाए । हृदयँ लाइ बहु भाँति सिखाए ॥
 मेरे प्रान नाथ सुत दोऊ । तुम्ह मुनि पिता आन नहिं कोऊ ॥
 दो०— साँपे भूप रिषिहि सुत बहुबिधि देइ असीस।

जननी भवन गए प्रभु चले नाइ पद सीस ॥ २०८ (क) ॥

सो०— पुरुषस्मिह दोउ बीर हरषि चले मुनि भय हरन।

कृपासिंधु मतिधीर अखिल बिस्व कारन करन ॥ २०८ (ख) ॥
 अरुन नयन उर बाहु बिसाला । नील जलज तनु स्याम तमाला ॥
 कटि पट पीत कसैं बर भाथा । रुचिर चाप सायक दुहुँ हाथा ॥
 स्याम गौर सुंदर दोउ भाई । बिस्वामित्र महानिधि पाई ॥
 प्रभु ब्रह्मन्यदेव मैं जाना । मोहि निति पिता तजेउ भगवाना ॥

चले जात मुनि दीन्हि देखाई । सुनि ताड़का क्रोध करि धाई ।
 एकहिं बान प्राण हरि लीन्हा । दीन जानि तेहि निज पद दीन्हा ॥
 तब सिधि निज नाथहि जियँ चीन्ही । बिद्यानिधि कहूँ बिद्या दीन्ही ॥
 जाते लाग न छुधा पिपासा । अतुलित बल तनु तेज प्रकासा ॥
 दो०— आयुध सर्व समर्पि कै प्रभु निज आश्रम आनि ।

कंद मूल फल भोजन दीन्ह भगति हित जानि ॥ २०९ ॥
 प्रात कहा मुनि सन रघुराई निर्भय जग्य करहु तुम्ह जाई ।
 होम करन लागे मुनि झारी आपु रहे मख कीं रखवारी ॥
 सुनि मारीच निसाचर क्रोही लै सहाय धावा मुनिद्रोही ॥
 बिनु फर बान राम तेहि मारा सत जोजन गा सागर पारा ॥
 पावक सर सुबाहु पुनि मारा । अनुज निसाचर कटकु सँधारा ॥
 मारि अमुर द्विज निर्भयकारी अस्तुति करहि देव मुनि झारी ।
 तहँ पुनि कछुक दिवस रघुराया रहे कीन्हि बिप्रह पर दाया ।
 भगति हेतु बहु कथा पुराना कहे बिप्र जद्यपि प्रभु जाना ॥
 तब मुनि सादर कहा बुझाई चरित एक प्रभु देखिअ जाई ॥
 धनुषजग्य सुनि रघुकुल नाथा हरषि चले मुनिबर के साथी ।
 आश्रम एक दीख मग माहीं खग मृग जीव जंतु तहँ नाहीं ।
 पूछा मुनिहि सिला प्रभु देखी सकल कथा मुनि कहा बिसेषी ॥
 दो०— गौतम नारि श्राप बस उपल देह धरि धीर ।

चरन कमल रज चाहति कृपा करहु रघुबीर ॥ २१० ॥

छं० — परसत पद पावन सोक नसावन प्रगट भई तपपुंज सही ।
 देखत रघुनायक जन सुखदायक सनमुख होइ कर जोरि रही ॥
 अति प्रेम अधीरा पुलक सरीरा मुख नहि आयइ बचन कही ।
 अतिसय बड़भागी चरनन्हि लागी जुगल नयन जलधार बही ॥
 धीरजु मन कीन्हा प्रभु कहूँ चीन्हा रघुपति कृपाँ भगति पाई ।
 अति निर्मल बानी अस्तुति ठानी ग्यानगम्य जय रघुराई ॥
 मैं नारि अपावन प्रभु जग पावन रावन रिपु जन सुखदाई ।
 राजीव बिलोचन भव भय मोचन पाहि पाहि सरनहि आई ॥
 मुनि श्राप जो दीन्हा अति भल कीन्हा परम अनुग्रह मैं माना ।
 देखेउँ भरि लोचन हरि भव मोचन इहइ लाभ संकर जाना ॥
 बिनती प्रभु मोरी मैं मति भोरी नाथ न मागउँ बर आना ।
 पद कमल परागा रस अनुरागा मम मन पधुप करै पाना ॥
 जेहि पद सुरसरिता परम पुनीता प्रगट भई सिव सीस धरी ।
 सोई पद पंकज जेहि पूजत अज मम सिर धरेउ कृपाल हरी ॥
 एहि भाँति सिधारी यौतम नारी बार बार हरि चरन परी ।
 जो अति मन भावा सो बरु पावा गै पति लोक अनंद भरी ॥

दो० — अस प्रभु दीनबंधु हरि कारन रहित दयाल ।

तुलसिदास सठ तेहि भजु छाड़ि कपट जंजाल ॥ २११ ॥

मासपारायण, सातवाँ विश्राम

चले राम लछिमन मुनि संगी । गए जहाँ जग पावनि गंगा ॥
 गाधिसूनु सब कथा सुनाई । जेहि प्रकार सुरसरि माहि आई ॥

तब प्रभु विरिषिन्ह समेत नहाए । बिबिध दान महिदेबन्हि पाए ॥
हरषि चलेन मुनि बृंद सहाया । बेग बिदेह नगर निअराया ॥
पुर रम्यत राम जब देखी । हरषे अनुज समेत बिसेषी ।
बापी कूष्म सरित सर नाना । सलिल सुधासम मनि सोपाना ॥
गुंजत मंजु मत्त रस भृंगा । कूजत कल बहुबरन बिहंगा ॥
बरन बरन बिकसे बनजाता । त्रिबिध समीर सदा सुखदाता ।
दो०— सुवन बाटिका खाग बन बिपुल बिहंग निवास ।

फूलत फलत सुपल्लवत सोहत पुर चहुँ पास ॥ २१२ ॥
बनइ न बरनत नगर निकई । जहाँ जाइ मन तहँई लोभाई ।
चारु बजारु बिचित्र अँबारी । मनिमय बिधि जनु स्वकर सँवारी ।
धनिक बनिनिक बर धनद समाना । बैठे सकल बस्तु लै नाना ॥
चौहट सुंदर गली सुहाई संतत रहाहं सुगंध सिचाई ॥
मंगलमय मंदिर सब केरें चित्रित जनु रतनाथ चितेरें ॥
पुर नर नरि सुभग सुचि संता । धरमसोल ग्यानी गुनवंता ॥
अति अनूप जहँ जनक निवासू । बिथकहिं बिबुध बिलोकि बिलासू ।
होत चकिस्त चित कोट बिलोकी । सकल भुवन सोभा जनु रोकी ॥
दो०— धखल धाम मनि पुरट पट सुघटित नाना भाँति ।

स्निग्ध निवास सुंदर सदन सोभा किमि कहि जाति ॥ २१३ ॥
सुभग द्वार सब कूलिस कपाटा । भूप भीर नट मागध भाटा ॥
बनी बिसाल बाजि गज साला । हय गय रथ संकुल सब काला ।

सूर सचिव सेनप बहुतेरे । नृपगृह सरिस सदन सब केरे ॥
 पुर बाहेर सर सरित समीपा । उतरे जहँ तहँ बिपुल महीपा ॥
 देखि अनूप एक अँवराई । सब सुपास सब भाँति सुहाई ॥
 कौसिक कहेउ मोर मनु माना । इहाँ रहिअ रघुबीर सुजाना ॥
 भलेहिं नाथ कहि कृपानिकेता । उतरे तहँ मुनिबृंद समेता ॥
 बिस्वामित्र महामुनि आए । समाचार मिथिलापति पाए ॥
 दो०— संग सचिव सुचि भूरि भट भूसुर बर गुर ग्याति ।

चले मिलन मुनिनायकहि मुदित राउ एहि भाँति ॥ २१४ ॥
 कीन्ह प्रनामु चरन धरि माथा । दीन्ह असीस मुदित मुनिनाथा ॥
 बिप्रबृंद सब सादर बंदे । जानि भाग्य बड़ राउ अनंदे ॥
 कुसल प्रसन्न कहि बारहिं बारा । बिस्वामित्र नृपहि बैठारा ॥
 तेहि अवसर आए दोउ भाई । गए रहे देखन फुलवाई ॥
 स्याम गौर मृदु बयस किसोरा । लोचन सुखद बिस्व चित चोरा ॥
 उठे सकल जब रघुपति आए । बिस्वामित्र निकट बैठाए ।
 भए सब सुखी देखि दोउ भ्राता । बारि बिलोचन पुलकित गाता ॥
 मूरति मधुर मनोहर देखी । भयउ बिदेहु बिदेहु बिसेषी ॥
 दो०— प्रेम मगन मनु जानि नृपु करि बिबेकु धरि धीर ।

बोलेउ मुनि पद नाइ सिरु गदगद गिरा गभीर ॥ २१५ ॥
 कहहु नाथ सुंदर दोउ बालक । मुनिकुल तिलक कि नृपकुल पालक ॥
 ब्रह्म जो निगम नेति कहि गावा । उभय बेष धरि की सोइ आवा ॥

सहज बिरागरूप मनु मोरा । शक्ति होत जिमि चंद चकोरा ॥
ताते प्रभु पूछउँ सतिभाऊ । कहहु नाथ जनि करहु दुराऊ ॥
इन्हहि बिलोकत अति अनुरागा । बरबस ब्रह्मसुखहि मन त्यागा ॥
कह मुनि बिर्हास कहेहु नृप नीका । बचन तुम्हार न होइ अलीका ॥
ए प्रिय सबहि जहाँ लगि प्राणी । मन मुसुकाहिं रामु सुनि बानी ॥
रघुकुल मनि दसरथ के जाए । मम हित लागि नरेस पठाए ॥
दो०— रामु लखनु दोउ बंधुबर रूप सोल बल धाम ।

मख राखेउ सबु साखि जगु जिते असुर संग्राम ॥ २१६ ॥
मुनि तव चरन देखि कह राऊ । कहि न सकउँ निज पुन्य प्रभाऊ ॥
सुंदर स्याम गौर दोउ भ्राता । आनँदहू के आनँद दाता ॥
इन्ह कै प्रीति परसपर पावनि । कहि न जाइ मन भाव सुहावनि ॥
सुनहु नाथ कह मुदित बिदेहू । ब्रह्म जीव इव सहज सनेहू ॥
पुनि पुनि प्रभुहि चितव नरनाहू । पुलक गात उर अधिक उछाहू ॥
मुनिहि प्रसंसि नाइ पद सीसू । चलेउ लवाइ नगर अवनीसू ॥
सुंदर सदनु सुखद सब काला । तहाँ बासु लै दीन्ह भुआला ॥
करि पूजा सब बिधि सेवकाई । गयउ राउ गृह बिदा कराई ॥
दो०— रिषय संग रघुबंस मनि करि भोजनु विश्रामु ।

बैठे प्रभु भ्राता सहित दिवसु रहा भरि जामु ॥ २१७ ॥
लखन हृदयँ लालसा बिसेषी । जाइ जनकपुर आइअ देखी ॥
प्रभु भय बहुरि मुनिहि सकुचाहीं । प्रगट न कहहिं मनहिं मुसुकाहीं ॥

राम अनुज मन की गति जानी । भगत बछलता हियँ हुलसानी ॥
 परम बिनीत सकुचि मुसुकाई । बोले गुर अनुसासन पाई ॥
 नाथ लखनु पुरु देखन चहहीं । प्रभु सकोच डर प्रगट न कहहीं ॥
 जौं राउर आयसु मैं पावौं । नगर देखाइ तुरत लै आवौं ॥
 सुनि मुनीसु कह बचन सग्रीती । कस न राम तुम्ह राखहु नीती ॥
 धरम सेतु पालक तुम्ह ताता । प्रेम बिबस सेवक सुखदाता ॥
 दो०— जाइ देखि आवहु नगरु सुख निधान दोउ भाइ ।

कगहु सुफल सब के नयन सुंदर बदन देखाइ ॥ २१८ ॥
 मुनि पद कमल बंदि दोउ भ्राता । चले लोक लोचन सुख दाता ।
 बालक बृंद देखि अति सोभा । लगे संग लोचन मनु लोभा ॥
 पीत बसन परिकर कटि भाथा । चारु चाप सर सोहत हाथा ॥
 तन अनुहरत सुचंदन खोरी । स्यामल गौर मनोहर जोरी ।
 केहरि कंधर बाहु बिसाला । उर अति रुचिर नागमनि माला ॥
 सुभग सोन सरसीरुह लोचन । बदन मयंक तापत्रय मोचन ॥
 कानन्हि कनक फूल छबि देहीं । चितवत चितहि चोरि जनु लेहीं ॥
 चितवनि चारु भृकुटि बर बाँकी । तिलक रेख सोभा जनु चाँकी ॥
 दो०— रुचिर चौतनीं सुभग सिर मेचक कुंचित केस ।

नख सिख सुंदर बंधु दोउ सोभा सकल सुदेस ॥ २१९ ॥
 देखन नगरु भूपसुत आए । समाचार पुरबासिन्ह पाए ॥
 धाए धाम काम सब त्यागी । मनहुँ रंक निधि लूटन लागी ॥

निरखि सहज सुंदर दोउ भाई । होहिं सुखी लोचन फल पाई ॥
 जुबतीं भवन झरोखन्हि लागीं । निरखहि राम रूप अनुरागीं ॥
 कहहिं परसपर बचन सप्रीती । सखि इन्ह कोटि काम छबि जीती ॥
 सुर नर असुर नाग मुनि माहीं । सोभा आस कहैं सुनिअति नाहीं ।
 बिष्णु चारि भुज बिधि मुख चारी । बिकट बेध मुख पंच पुरारी ।
 अपर देठ अस कोउ न आही । यह छबि सखी पटतरिअ जाही ॥
 दो०— बय किसोर सुषमा सदन स्याम गौर सुख धाम ।

अग अग पर चारिअहि कोटि कोटि सत काम ॥ २२० ॥
 कहहु सखी अस को तनु धारी । जो न मोह यह रूप निहारी ॥
 कोउ सप्रेम बोली मृदु बानी । जो मैं सुना सो सुनहु सयानी ॥
 ए दोऊ दसरथ के द्योटा । बाल मरालन्हि के कल जोटा ॥
 मुनि कौंसिक मख के रखवारे । जिन्ह रन अजिर निसाचर मारे ॥
 स्याम गात कल कंज बिलोचन । जो मारीच सुभुज मदु मोचन ।
 कौसल्या सुत सो सुख खानी । नामु रामु धनु सायक पानी ।
 गौर किसोर बेषु बर काछें । कर सर चाप राम के पाछें ॥
 लछिमनु नामु राम लघु भ्राता । सुनु सखि तासु सुमित्रा माता ।
 दो०— बिप्रकाजु करि बंधु दोउ मग भुनिबधु उधारि ।

आए देखन चापमख सुनि हरषीं सब नारि ॥ २२१ ॥
 देखि राम छबि कोउ एक कहई । जोगु जानकिहि यह बरु अहई ॥
 जौं सखि इन्हहि देख नरनाहू । पन परिहरि हटि करइ बिबाहू ॥

कोउ कह ए भूपति पहिचाने । मुनि समेत सादर सनमाने ॥
 सखि परंतु पनु राउ न तजई । बिधि बस हठि अबिबेकहि भजई ।
 कोउ कह जाँ भल अहइ बिधाता । सब कहँ सुनिअ उचित फल दाता ॥
 तौ जानकिहि मिलिहि बरु एहू । नाहिन आलि इहाँ संदेहू ॥
 जाँ बिधि बस अस बनै सँजोगू । तौ कृतकृत्य होइ सब लोगू ॥
 सखि हमरें आरति अति तातें । कबहुँक ए आवहिं एहि नातें ॥
 दो०— नाहिं त हम कहँ सुनहु सखि इन्ह कर दरसनु दूरि ।

यह संघटु तब होइ जब पुन्य पुराकृत भूरि ॥ २२२ ॥
 बोली अपर कहेहु सखि नीका । एहिं बिआह अति हित सबही का ॥
 कोउ कह संकर चाप कठोरा । ए स्यामल मृदु गात किसोरा ॥
 सबु असमंजस अहइ सयानी । यह सुनि अपर कहइ मृदु बानी ॥
 सखि इन्ह कहँ कोउ कोउ अस कहहीं । बड़ प्रभाउ देखत लघु अहहीं ।
 परसि जासु पद पंकज धूरी । तरी अहल्या कृत अघ भूरी ॥
 सो कि रहिहि बिनु सिक्धनु तौरें । यह प्रतीति परिहरिअ न भोरें ॥
 जेहिं बिरंचि रचि सीय सँवारी । तेहिं स्यामल बरु रचेउ बिचारी ॥
 तासु बचन सुनि सब हरषानी । ऐसेइ होउ कहहिं मृदु बानी ॥
 दो०— हियँ हरषहिं बरषहिं सुमन सुमुखि सुलोचनि बृंद ।

जाहिं जहाँ जहँ बंधु दोउ तहँ तहँ परमानंद ॥ २२३ ॥
 पुर पूरव दिसि गे दोउ भाई । जहँ धनुमख हित भूमि बनाई ॥
 अति बिस्तार चारु गच ढारी । बिमल बेदिका रुचिर सँवारी ॥

चहुँ दिसि कंचन मंच बिसाला । रचे जहाँ बैठहिं महिपाला ॥
 तेहि पाछें समीप चहुँ पासा । अपर मंच मंडली बिलासा ॥
 कछुक ऊँच सब भाँति सुहाई । बैठहिं नगर लोग जहाँ जाई ॥
 तिन्ह के निकट बिसाल सुहाए । धत्रल धाम बहुबरन बनाए ॥
 जहाँ बैठें देखहिं सब नारी । जथाजोगु निज कुल अनुहारी ॥
 पुर बालक कहि कहि मृदु बचना । सादर प्रभुहिं देखावहिं रचना ॥
 दो०— सब सिसु एहि मिस प्रेमबस परसि मनोहर गात ।

तन पुलकहिं अति हरषु हियें देखि देखि दोउ भात ॥ २२४ ॥
 सिसु सब राम प्रेमबस जाने । प्रीति समेत निकेत बखाने ॥
 निज निज रुचि सब लेहिं बोलाई । सहित सनेह जाहिं दोउ भाई ॥
 राम देखावहिं अनुजहिं रचना । कहि मृदु मधुर मनोहर बचना ॥
 लव निमेष महुँ भुवन निकाया । रचइ जासु अनुसासन माया ॥
 भगति हेतु सोइ दीनदयाला । चितवत चकित भनुष मखसाला ॥
 कौतुक देखि चले गुरु पाहीं । जानि बिलंबु त्रास मन माहीं ॥
 जासु त्रास डर कहूँ डर होई । भजन प्रभाउ देखावत सोई ॥
 कहि बातें मृदु मधुर सुहाई । किए बिदा बालक बरिआई ॥
 दो०— सभय सप्रेम बिलीत अति सकुच सहित दोउ भाइ ।

गुर पद पंकज नाइ सिर बैठे आयसु पाइ ॥ २२५ ॥
 निसि प्रवेस मुनि आयसु दीन्हा । सबहीं संध्याबंदनु कीन्हा ॥
 कहत कथा इतिहास पुरानी । रुचिर रजनि जुग जाम सिरानी ॥

मृनिबर सयन कीन्हि तब जाई । लगे चरन चापन दोउ भाई ॥
 जिन्ह के चरन सरोरुह लागी । करत बिबिध जप जोग बिरागी ॥
 तेइ दोउ बंधु प्रेम जनु जीते । गुर पद कमल पलोटत प्रीते ॥
 बार बार मुनि अग्या दीन्ही । रघुबर जाइ सयन तब कीन्ही ।
 चापत चरन लखनु उर लाएँ । सभय सप्रेम परम सचु पाएँ ।
 पुनि पुनि प्रभु कह सोवहु ताता । पौढ़े धरि उर पद जलजाता ।
 दो० — उठे लखनु निसि बिगत सुनि अरुनसिखा धुनि कान ।

गुर तें पहिलेहि जगतपति जागे रामु सुजान ॥ २२६ ॥
 सकल सौच करि जाइ नहाए । नित्य निबाहि मुनिहि सिर नाए ॥
 समय जानि गुर आयसु पाई । लेन प्रसून चले दोउ भाई ॥
 भूप बागु बर देखेउ जाई । जहँ बसंत रितु रही लोभाई ।
 लागे बिटप मनोहर नाना । बरन बरन बर बेलि बिताना ॥
 नव पल्लव फल सुमन सुहाए । निज संपति सुर रूख लजाए ॥
 चातक कोकिल कीर चकोरा । कूजत बिहग नटत कल मोरा ॥
 मध्य बाग सरु सोह सुहावा । मनि सोपान बिचित्र बनावा ॥
 बिमल सलिलु सरसिज बहुरंगा । जलखग कूजत गुंजत भृंगा ॥
 दो० — बागु तड़ागु बिलोकि प्रभु हरषे बंधु समेत ।

परम रम्य आरामु यहु जो रामहि सुख देत ॥ २२७ ॥
 चहुँ दिसि चितइ पूँछि मालीगन । लगे लेन दल फूल मुदित मन ।
 तेहि अवसर सीता तहँ आई । गिरिजा पूजन जननि पठाई ॥

संग सखीं सब सुभग सयानीं । गावहिं गीत मनोहर बानीं ॥
 सर समीप गिरिजा गृह सोहा । बरनि न जाइ देखि मनु मोहा ॥
 मज्जनु करि सर सखिन्ह समेता । गई मुदित मन गौरि निकेता ॥
 पूजा कीन्हि अधिक अनुरागा । निज अनुरूप सुभग बरु मागा ॥
 एक सखी सिय संगु बिहाई गई रही देखन फुलवाई ॥
 तेहिं दोउ बंधु बिलोके जाई । प्रेम बिबस सीता पहिं आई ॥
 दो०— तासु दसा देखी सखिन्ह पुलक गात जलु भैन ।

कहु कारनु निज हरष कर पूछहिं सब मृदु बैन ॥ २२८ ॥
 देखन बागु कुअँर दुइ आए । बय किसोर सब भाँति सुहाए ॥
 स्याम गौर किमि कहौं बखानी । गिरा अनयन नयन बिनु बानी ॥
 सुनि हरषीं सब सखीं सयानी । सिय हियँ अति उतकंठा जानी ॥
 एक कहइ नृपसुत तेइ आली । सुने जे मुनि सँग आए काली ॥
 जिन्ह निज रूप मोहनी डारी । कीन्हे स्वबस नगर नर नारी ॥
 बरनत छबि जहँ तहँ सब लोगू । अवसि देखिअहिं देखन जोगू ॥
 तासु बचन अति सियहि सोहाने । दरस लागि लोचन अकुलाने ॥
 चली अग्र करि प्रिय सखि सोई । प्रीति पुरातन लखइ न कोई ।
 दो०— सुमिरि सीय नारद बचन उपजी प्रीति पुनीत ।

चकित बिलोकति सकल दिसि जनु सिसु मृगी सधीत ॥ २२९ ॥
 कंकन किंकिनि नूपुर धुनि सुनि । कहत लखन सन रामु हृदयँ गुनि ।
 मानहुँ मदन दुंदुभी दीन्ही । मनसा बिस्व बिजय कहँ कीन्ही ।

अस कहि फिरि चितए तेहि ओरा । सिय मुख ससि भए नयन चकोरा ॥
 भए बिलोचन चारु अचंचल । मनहुँ सकुचि निमि तजे दिगंचल ॥
 देखि सीय सोभा सुखु पावा । हृदयँ सराहत बचनु न आवा ॥
 जनु बिरंचि सब निज निपुनाई । बिरचि बिस्व कहँ प्रगटि देखाई ॥
 सुंदरता कहूँ सुंदर करई । छबिगृहँ दीपसिखा जनु बरई ॥
 सब उपमा कबि रहे जुठारी । केहिं पटतरौं बिदेहकुमारी ॥
 दो०— सिय सोभा हियँ बरनि प्रभु आपनि दसा बिचारि ।

बोले सुचि मन अनुज सन बचन समय अनुहारि ॥ २३० ॥
 तात जनकतनया यह सोई । धनुषजग्य जेहि कारन होई ॥
 पूजन गौरि सखीं लै आई । करत प्रकासु फिरइ फुलवाई ॥
 जासु बिलोकि अलौकिक सोभा । सहज पुनीत मोर मनु छोभा ॥
 सो सबु कारन जान बिधाता । फरकहिं सुभद अंग सुनु भ्राता ॥
 रघुबंसिन्ह कर सहज सुभाऊ । मनु कुपंथ पगु धरइ न काऊ ॥
 मोहि अतिसय प्रतीति मन केरी । जेहिं सपनेहुँ परनारि न हेरी ॥
 जिन्ह कै लहहिं न रिपु रन पीठी । नहिं पावहिं परतिय मनु डीठी ॥
 मंगन लहहिं न जिन्ह कै नाहीं । ते नरबर थोरे जग माहीं ॥
 दो०— करत बतकही अनुज सन मन सिय रूप लोभान ।

मुख सरोज मकरंद छबि करइ मधुप इव पान ॥ २३१ ॥
 चितवति चकित चहुँ दिसि सीता । कहँ गए नृप किसोर मनु चिंता ॥
 जहँ बिलोक मृग सावक नैनी । जनु तहँ बरिस कमल सित श्रेनी ॥

लता ओट तब सखिन्ह लखाए । स्यामल गौर किसोर सुहाए ॥
 देखि रूप लोचन ललचाने हरषे जनु निज निधि पहिचाने ॥
 थके नयन रघुपति छबि देखें । पलकन्हिहूँ परिहरीं निमेषें ॥
 अधिक सनेहँ देह भैं भोरी सरद ससिहि जनु चितत चकोरी ॥
 लोचन मग रामहि उर आनी दीन्है पलक कपाट सयानी ॥
 जब सिय सखिन्ह प्रेमबस जानी कहिन सकहिं कछु मन सकुचानी ॥
 दो०— लताभवन तें प्रगट भे तेहि अवसर दोउ भाइ ।

निकसे जनु जुग बिमल बिधु जलद पटल बिलगाइ ॥ २३२ ॥
 सोभा सीवँ सुभग दोउ बीरा नील पीत जलजाभ सरीरा ॥
 मोरपंख सिर सोहत नीके गुच्छ बीच बिच कुसुम कली के ॥
 भाल तिलक श्रमबिंदु सुहाए श्रवन सुभग भूषन छबि छाए ॥
 बिकट भृकुटि कच घूघरवारे नव सरोज लोचन रतनरे ॥
 चारु चिबुक नसिका कपोल हास बिलास लैत मनु मोला ॥
 मुखछाँब कहि न जाइ मोहि पाहीं जो बिलोकि बहु काम लजाहीं ॥
 उर मनि माल कंबु कल गीवा काम कलभ कर भुज बलसीवा ॥
 सुमन समेत बाम कर दोना । सावँर कुअँर सखी सुठि लोना ।
 दो०— केहरि कटि पट पीत धर सुप्रभा सील निधान ।

देखि भानुकुलभूषनहि बिसरा सखिन्ह अपान ॥ २३३ ॥
 धरि धीरजु एक आलि सयानी सीता सन बोली गहि पानी ॥
 बहुरि गौरि कर ध्यान करेहूँ, भूपकिसोर देखि किन लेहूँ ।

सकुचि सीयँ तब नयन उधारे । सनमुख दोउ रघुसिंघ निहारे ॥
 नख सिख देखि राम कै सोभा । सुमिरि पिता पनु मनु अति छोभा ॥
 परबस सखिन्ह लखी जब सीता । भयउ गहरु सब कहहिं सभोता ॥
 पुनि आउब एहि बेरिआँ काली । अस कहि मन बिहसी एक आली ॥
 गूढ़ गिरा सुनि सिय सकुचानी । भयउ बिलंबु मातु भय मानी ॥
 धरि बड़ि धीर रामु उर आने । फिरी अपनपउ पितुबस जाने ॥
 दो०— देखन मिस मृग बिहग तरु फिरइ बहोरि बहोरि ।

निरखि निरखि रघुबीर छबि बाढ़इ प्रीति न थोरि ॥ २३४ ॥
 जानि कठिन सिवचाप बिसूरति । चली राखि उर स्थामल मूरति ॥
 प्रभु जब जात जानकी जानी । सुख सनेह सोभा गुन खानी ॥
 परम प्रेममय मृदु मसि कीन्ही । चारु चित्त भीतीं लिखि लीन्ही ॥
 गई भवानी भवन बहोरी । बंदि चरन बोली कर जोरी ॥
 जय जय गिरिबरराज किसोरी । जय महेस मुख चंद चकोरी ॥
 जय गजबदन षडानन माता । जगत जननि दामिनि दुति गाता ॥
 नहिं तव आदि मध्य अवसाना । अमित प्रभाउ बेदु नहिं जाना ॥
 भव भव बिभव पराभव कारिनि । बिस्व बिमोहन स्वबस बिहारिनि ॥
 दो०— पतिदेवता सुतीय महँ मातु प्रथम तब रेख ।

महिमा अमित न सकहिं कहि सहस सारदा सेष ॥ २३५ ॥
 सेवत तोहि सुलभ फल चारी । बरदायनी पुरारि पिआरी ॥
 देबि पूजि पद कमल तुम्हारे । सुर नर मुनि सब होहिं सुखारे ॥

मोर मनोरथु जानहु नीकैं । बसहु सदा उर पुर सबही कैं ।
कीन्हेउँ प्रगट न कारन तेहीं अस कहि चरन गहे बैदेहीं ।
बिनय प्रेम बस भई भवानी । खसौ भाल मूरति मुसुकानी ।
सादर सियँ प्रसादु सिर धरेऊ बोली गौरि हरषु हियँ भरेऊ ॥
सुनु सिय सत्य असीस हमारी । पूजिहि मन कामना तुम्हारी ॥
नारद बचन सदा सुचि साचा । सो बरु मिलिहि जाहि मनु राचा ॥

छ०— मनु जाहि राचेउ मिलिहि सो बरु सहज सुंदर माँवरो ।
करुना निधान सुजान सीलु सनेहु जानत रावरो ॥
एहि भाँति गौरि असीस सुनि सिय सहित हियँ हरषीं अली ।
तुलसी भवानिहि पूजि पुनि पुनि मुदित मन मंदिर चली ॥
सो० जानि गौरि अनुकूल सिय हिय हरषु न जाइ कहि ।

मंजुल मंगल मूल बाम अंग फरकन लगे ॥ २३६ ॥
हृदयँ सराहत सीय लोनाई । गुर समीप गवने दोउ भाई ॥
राम कहा सबु कौंसिक पाहीं । सरल सुपाठ छुअत छल नाही ॥
सुमन पाइ मुनि पूजा कीन्ही पुनि असीस दहु भाइन्ह दीन्ही ॥
सुफल मनोरथ होहुँ तुम्हारे । रामु लखनु सुनि भए सुखारे ॥
करि भोजनु मुनिबर बिग्यानी । लगे कहन कछु कथा पुरानी ॥
बिगत दिवसु गुरु आयसु पाई । संभ्या करन चले दोउ भाई ॥
प्राची दिसि ससि उयउ सुहावा । सिय मुख ससि देखि सुखु पावा ॥
बहुरि बिचारु कीन्ह मन माहीं । सीय बदन सम हिमकर नाही ॥

दो० — जनमु सिंधु पुनि बंधु बिषु दिन मलीन सकलंक ।

सिय मुख समता पाव किमि चंदु ब्यापुरो रंक ॥ २३७ ॥
 घटइ बढइ त्रिरहिनि दुखदाई । प्रसइ राहु निज संधिहिं पाई ॥
 कोक सोकप्रद पंकज द्रोही । अवगुन बहुत चंद्रमा तोही ॥
 बैदेही मुख पटतर दीन्हे । होइ दोषु बड़ अनुचित कीन्हे ॥
 सिय मुख छबि बिंधु ब्याज बखानी । गुर पहिं चले निसा बड़ि जानी ॥
 करि मुनि चरन सरोज प्रनामा । आयसु पाइ कीन्ह बिश्रामा ॥
 बिगत निसा रघुनायक जागे । बंधु बिलोकि कहन अस लागे ॥
 उयउ अरुन अवलोकहु ताता । पंकज कोक लोक सुखदाता ॥
 बोले लखनु जोरि जुग पानी । प्रभु प्रभाउ सूचक मृदु बानी ॥
 दो० — अरुनोदयँ सकुचे कुमुद उडगन जोति मलीन ।

जिमि तुम्हार आगमन सुनि भए नृपति बलहीन ॥ २३८ ॥
 नृप सब नखत करहिं उजिआरी । टारि न सकहिं चाप तम भारी ॥
 कमल कोक मधुकर खग नाना । हरषे सकल निसा अवसाना ॥
 ऐसेहिं प्रभु सब भगत तुम्हारे । होइहिं टूटें धनुष सुखारे ॥
 उयउ भानु बिनु श्रम तम नासा । दुरे नखत जग तेजु प्रकासा ।
 रबि निज उदय ब्याज रघुराया । प्रभु प्रतापु सब नृपन्ह दिखाया ॥
 तव भुज बल महिमा उदघाटी । प्रगटी धनु बिघटन परिपाटी ॥
 बंधु बचन सुनि प्रभु मुसुकाने । होइ सुचि सहज पुनीत नहाने ॥
 नित्यक्रिया करि गुरु पहिं आए । चरन सरोज सुभग सिर नाए ॥

सतानंदु तब जनक बोलाए । कौंसिक मुनि पहिं तुरत पठाए ॥
जनक बिनय तिन्ह आइ सुनाई । हरषे बोलि लिए दोठ भाई ॥
दो०— सतानंद पद बदि प्रभु बैठे गुर पहिं जाइ ।

चलहु तात मुनि कहेउ तब पठवा जनक बोलाइ ॥ २३९ ॥

मासपारायण, आठवाँ विश्राम

नवाह्नपारायण, दूसरा विश्राम

सीय स्वयंबरु देखिअ जाई । ईसु काहि धौं देइ बड़ाई ॥
लखन कहा जस भाजनु सोई । नाथ कृपा तब जापर होई ॥
हरषे मुनि सब सुनि बर बानी । दीन्ह असीस सबहिं सुखु मानी ॥
पुनि मुनिबृंद समेत कृपाला । देखन चले धनुषमख साला ॥
रंगभूमि आए दोठ भाई । असि सुधि सब पुरबासिन्ह पाई ॥
चले सकल गृह काज बिसारी । बाल जुबान जरठ नर नारी ॥
देखी जनक भीर भै भारी । सुचि सेवक सब लिए हँकारी ।
तुरत सकल लोगन्ह पहि जाहू । आसन उचित देहु सब काहू ॥
दो०— कहि मृदु बचन बिनीत तिन्ह बैठारे नर नारि ।

उत्तम मध्यम नीच लघु निज निज थल अनुहारि ॥ २४० ॥

राजकुअँर तेहि अवसर आए । मनहुँ मनोहरता तन छाए ॥
गुन सागर नागर बर बीरा । सुंदर स्यामल गौर सरीरा ॥
राज समाज बिराजत रूरे । उडगन महुँ अनु जुग बिधु पूरे ॥
जिन्ह कें रही भावना जैसी । प्रभु मूरति तिन्ह देखी तैसी ॥

देखहिं रूप महा रनधीरा । मनहुँ बीर रसु धरें सरीरा ॥
 डरे कुटिल नृप प्रभुहि निहारी । मनहुँ भयानक मूरति भारी ॥
 रहे असुर छल छेनिप बेषा । तिन्ह प्रभु प्रगट काल सम देखा ॥
 पुरबासिन्ह देखे दोउ भाई । नर भूषन लोचन सुखदाई ॥
 दो०— नारि बिलोकहिं हरषि हियँ निज निज रुचि अनुरूप ।

जनु सोहत सिंगार धरि मूरति परम अनूप ॥ २४१ ॥
 बिदुषन्ह प्रभु बिराटमय दीसा । बहु मुख कर पग लोचन सीसा ॥
 जनक जाति अवलोकहिं कैसैं । सजन सगे प्रिय लागाहिं जैसैं ॥
 सहित बिदेह बिलोकहिं रानी । सिसु सम प्रीति न जाति बखानी ॥
 जोगिन्ह परम तत्त्वमय भासा । सांत सुद्ध सम सहज प्रकासा ॥
 हरिभगतन्ह देखे दोउ भ्राता । इष्टदेव इव सब सुख दाता ॥
 रामहि चितव भायँ जेहि सीया । सो सनेहु सुखु नहिं कथनीया ॥
 उर अनुभवति न कहि सक सोऊ । कवन प्रकार कहै कबि कोऊ ॥
 एहि बिधि रहा जाहि जस भाऊ । तेहिं तस देखेउ कोसलराऊ ॥
 दो०— राजत राज समाज महुँ कोसलगज किसोर ।

सुंदर स्यामल गौर तन बिस्व बिलोचन चोर ॥ २४२ ॥
 सहज मनोहर मूरति दोऊ । कोटि काम उपमा लघु सोऊ ॥
 सरद चंद निंदक मुख नीके । नीरज नयन भावते जी के ॥
 चितवनि चारु मार मनु हरनी । भावति हृदय जाति नहिं बरनी ॥
 कल कपोल श्रुति कुंडल लोला । चिबुक अधर सुंदर भृदु बोला ॥

कुमुदबंधु कर निदक हौंसा । भृकुटी बिकट मनोहर नासा ॥
भाल बिसाल तिलक झलकाहीं । कच बिलोकि अलि अवलि लजाहीं ॥
पीत चौतनीं सिरन्हि सुहाई । कुसुम कलीं बिच बीच बनाई ॥
रेखें रुचिर कंबु कल गोवाँ । जनु त्रिभुवन सुषमा की सीवाँ ॥
दो०— कुंजर मनि कठा कलित उरन्हि तुलसिका माल ।

बृषभ कंध केहरि ठवनि बल निधि बाहु बिसाल ॥ १४३ ॥
कटि तूनीर पीत पट बाँधें । कर सर धनुष बाम बर काँधें ।
पीत जग्य उपबीत सुहाए । नख सिख मंजु महाछबि छाए ॥
देखि लोग सब भए सुखारे । एकटक लोचन चलत न तारे ॥
हरषे जनक देखि दोउ भाई । मुनि पद कमल गहे तब जाई ॥
करि बिनती निज कथा सुनाई । रंग अवनि सब मुनिहि देख्वाई ॥
जहँ जहँ जाहिं कुअँर बर दोऊ । तहँ तहँ चकित चितव सबु कोऊ ॥
निज निज रुख रामहि सबु देखा । कोउ न जान कछु मरमु बिसेषा ॥
भलि रचना मुनि नृप सन कहेऊ । राजाँ मुदित महासुख लहेऊ ॥
दो०— सब मंचन्ह ते पंचु एक सुंदर बिसद बिसाल ।

मुनि समेत दोउ बंधु तहँ बैठारे महिपाल ॥ १४४ ॥
प्रभुहि देखि सब नृप हियँ हारे । जनु राकेस उदय भएँ तारे ॥
असि प्रतीति सब के मन माहीं । राम चाप तोरब सक नाहीं ।
बिनु भंजेहुँ भव धनुषु बिसाला । मेलिहि सीय राम उर माला ॥
अस बिचारि गवनहु घर भाई । जसु प्रताप बल तेजु गवाई ॥

बिहसे अपर भूप सुनि बानी । जे अबिबेक अंध अभिमानी ॥
 तोरेहुँ धनुषु ब्याहु अवगाहा । बिनु तोरें को कुअरि बिआहा ॥
 एक बार कालउ किन होऊ । सिय हित समर जितब हम सोऊ ॥
 यह सुनि अवर महिष मुसुकाने । धरमसील हरिभगत सयाने ।
 सो०— सीय बिआहबि राम गरब दूरि करि नृपन्ह के ।

जीति को सक संग्राम दसरथ के रन बाँकुरे ॥ २४५ ॥
 व्यर्थ मरहु जानि गाल बजाई । मन मोदकन्हि कि भूख बुताई ॥
 सिख हमारि सुनि परम पुनीता । जगदंबा जानहु जियँ सीता ।
 जगत पिता रघुपतिहि बिचारी । भरि लोचन छबि लेहु निहारी ॥
 सुंदर सुखद सकल गुन रासी । ए दोउ बंधु संभु उर बासी ॥
 सुधा समुद्र समीप बिहाई । मृगजलु निरखि मरहु कत धाई ॥
 करहु जाइ जा कहँ जोइ भावा । हम तौ आजु जनम फलु पावा ॥
 अस कहि भले भूप अनुरागे । रूप अनूप बिलोकन लागे ॥
 देखहिं सुर नभ चढ़े बिमाना । बरषहिं सुमन करहिं कल गाना ।
 दो०— जानि सुअवसरु सीय तब पठई जनक बोलाइ ।

चतुर सखीं सुंदर सकल सादर चलीं लवाइ ॥ २४६ ॥
 सिय सोभा नहिं जाइ बखानी । जगदंबिका रूप गुन खानी ॥
 उपमा सकल मोहि लघु लागीं । प्राकृत नारि अंग अनुरागीं ॥
 सिय बरनिअ तेइ उपमा देई । कुकबि कहाइ अजसु को लेई ॥
 जौ पटतरिअ तीय सम सीया । जग असि जुबति कहँ कमनीया ॥

गिरा मुखर तन अरध भवानी । रति अति दुखित अतनु पति जानी ।
 बिष बारुनी बंधु प्रिय जेही । कहिअ रमासम किमि बैदेही ।
 जौ छबि सुधा पयोर्नाथि होई । परम रूपमय कच्छपु सोई ।
 सोभा रजु मंदरु सिंगारू । मथै पानि पंकज निज मारू ।
 दो० — एहि बिधि उपजै लच्छि जब सुदस्ता सुख मूल ।

तदपि सकोच समेत कबि कहहिं सीय समतूल ॥ २४७ ॥
 चलीं संग लै सखीं सयानी । गावत गीत मनोहर बानी ॥
 सोह नवल तनु सुंदर सारी । जगत जननि अतुलित छबि भारी ॥
 भूषन सकल सुदेस सुहाए अंग अंग रचि सखिन्ह बनाए ॥
 रंगभूमि जब सिय पगु धारी । देखि रूप मोहै नर नारी ॥
 हरषि सुरन्ह दुंदुभीं बजाई । बरषि प्रसून अपछरा गाई ॥
 पानि सरोज सोह जयमाला । अवचट चितए सकल भुआला ॥
 सीय चकित चित रामहि चाहा । भए मोहबस सब नरनाहा ॥
 मुनि समीप देखे दोउ भाई । लगे ललकि लोचन निधि पाई ॥
 दो० गुरजन लाज समाजु बड़ देखि सीय सकुचनि ।

लागि बिलोकन सखिन्ह तन रघुबीरहि उर आनि ॥ २४८ ॥
 राम रूपु अरु मिय छबि देखें । नर नारिन्ह परिहरौं निमेषें ॥
 सोचहिं सकल कहत सकुचाहीं । बिधि सन बिनय करहिं मन माहीं ॥
 हरु बिधि बेगि जनक जड़ताई । मति हमारि असि देहि सुहाई ॥
 बिनु बिचार पनु तजि नरनाहू । सीय राम कर करै बिबाहू ॥

जगु भल कहिहि भाव सब काहू । हठ कीन्हें अंतहुँ उर दाहू ॥
 एहि लालसाँ मगन सब लोगू । बरु साँवरो जानकी जोगू ॥
 तब बंदीजन जनक बोलाए । बिरदावली कहत चलि आए ॥
 कह नृपु जाइ कहहु पन मोरा । चले भाट हियँ हरषु न थोरा ॥
 दो०— बोले बंदी बचन बर मुनहु सकल महिपाल ।

पन बिदेह कर कहहिं हम भुजा उठाइ बिसाल ॥ २४९ ॥
 नृप भुजबलु बिधु सिवधनु राहू । गरुअ कठोर बिदित सब काहू ॥
 रावनु बानु महाभट भारे । देखि सरासन गवौंहं सिधारे ॥
 सोइ पुरारि कोदंडु कठोरा । राज समाज आजु जोइ तोरा ॥
 त्रिभुवन जय समेत बैदेही । बिनहिं बिचार बरइ हठि तेही ॥
 सुनि पन सकल भूप अभिलाषे । भटमानी अतिसय मन माखे ॥
 परिकर बाँधि उठे अकुलाई । चले इष्टदेवन्ह सिर नाई ॥
 तमकि ताकि तकि सिवधनु धरहीं । उठइ न कोटि भाँति बलु करहीं ॥
 जिन्ह के कछु बिचारु मन माहीं । चाप समीप महीप न जाहीं ॥
 दो०— तमकि धरहिं धनु मूढ़ नृप उठइ न चलहिं सजाइ ।

मनहुँ पाइ भट बाहुबलु अधिकु अधिकु गरुआइ ॥ २५० ॥
 भूप सहस दस एकहि बारा । लगे उठावन टरइ न टारा ॥
 डगइ न संभु सरासनु कैसें । कामी बचन सती मनु जैसें ॥
 सब नृप भए जोगु उपहासी । जैसें बिनु बिराग संन्यासी ॥
 कीरति बिजय बीरता भारी । चले चाप कर बरबस हारी ॥

श्रीहत भए हरि हियँ राजा । बैठे निज निज जाइ समाजा ।
नृपन्ह बिलोकि जनकु अकुलाने । बोले बचन रोष जनु साने ।
दीप दीप के भूपति नाना । आए सुनि हम जो पनु ठाना ॥
देव दनुज धरि मनुज सरीरा । बिपुल बीर आए रनधीरा ।
दो०— कुअँरि मनोहर बिजय बड़ि कीरति अति कमनीय ।

पावनिहार बिरंचि जनु रचेउ न धनु दमनीय ॥ २५१ ॥
कहहु काहि यहु लाभु न भावा । काहुँ न संकर चाप चढ़ावा ॥
रहउ चढ़ाउब तोरब भाई । तिलु भरि भूमि न सके छड़ाई ॥
अब जनि कोउ माखै भट मानी । बीर बिहीन मही मैं जानी ॥
तजहु आस निज निज गृह जाहू । लिखा न बिधि बैदेहि बिबाहू ॥
सुकुतु जाइ जौ पनु परिहरऊँ । कुअँरि कुआरि रहउ का करऊँ ॥
जौ जनतेउँ बिनु भट भुबि भाई । तौ पनु करि होतेउँ न हँसाई ॥
जनक बचन सुनि सब नर नारी । देखि जानकिहि भए दुखारी ॥
माखे लखनु कुटिल भई भौहैं । रदपट फरकत नयन रिसौहैं ॥
दो०— कहि न सकत रघुबीर डर लगे बचन जनु बान ।

नाइ राम पद कमल सिरु ओले गिरा प्रमान ॥ २५२ ॥
रघुबंसिन्ह महुँ जहँ कोउ होई । तेहि समाज अस कहइ न कोई ।
कही जनक जसि अनुचित बानी । बिद्यमान रघुकुलमनि जानौ ।
सुनहु भानुकुल पंकज भानू । कहउँ सुभाउ न कछु अभिमानू ।
जौ तुम्हारि अनुसासन पावौं । कंदुक इव ब्रह्मांड उठावौं ॥

काचे घट जिमि डारौं फोरी । सकउँ मेरु मूलक जिमि तोरी ॥
 तव प्रताप महिमा भगवाना । को बापुरो पिनाक पुराना ॥
 नाथ जानि अस आयसु होऊ । कौतुकु करौं बिलोकिअ सोऊ ॥
 कमल नाल जिमि चाप चढ़ावौं । जोजन सत प्रमान लै धावौं ॥
 दो०— तोरौं छत्रक दंड जिमि तव प्रताप बल नाथ ।

जौं न करौं प्रभु पद सपथ कर न धरौं धनु भाथ ॥ २५३ ॥
 लाखन सकोप बचन जे बोले । डगमगानि महि दिग्गज डोले ॥
 सकल लोग सब भूप डेराने । सिय हियँ हरषु जनकु सकुचाने ॥
 गुर रघुपति सब मुनि मन माहीं । मुदित भए पुनि पुनि पुलकाहीं ॥
 सयनहिं रघुपति लाखनु नेवारे । प्रेम समेत निकट बैठारे ॥
 बिस्वामित्र समय सुभ जानी । बोले अति सनेहमय बानी ॥
 उठहु राम भंजहु भवचापा । मेटहु तात जनक परितापा ॥
 सुनि गुरु बचन चरन सिरु नावा । हरषु बिषादु न कछु उर आवा ॥
 ठाढ़े भए उठि सहज सुभाएँ । ठवनि जुब्रा मृगराजु लजाएँ ॥
 दो०— उदित उदय गिरि मंच पर रघुबर बालपतंग ।

बिकसे संत सरोज सब हरषे लोचन भृंग ॥ २५४ ॥
 नृपन्ह केरि आसा निसि नासी । बचन नखत अवली न प्रकासी ॥
 मानी महिष कुमुद सकुचाने । कपटी भूप उलूक लुकाने ॥
 भए बिसोक कोक मुनि देवा । बरिसहिं सुमन जनावहिं सेवा ॥
 गुर पद बंदि सहित अनुरागा । राम मुनिन्ह सन आयसु मागा ॥

सहजहिं चले सकल जग स्वामी । मत्त मंजु वर कुंजर गामी ।
चलत राम सब पुर नर नारी । पुलक पूरि तन भए सुखारी ॥
बंदि पितर सुर सुकृत सँभारे । औं कछु पुन्य प्रभाउ हमारे ॥
तौ सिवधनु मृनाल की नाई तोरहुँ रामु गनेस गोसाईं ।
दो०— रामहि प्रेम समेत लखि सखिन्ह समीप बोलाइ ।

सीता मातु सनेह बम बचन कहइ बिलखाइ ॥ २५५ ॥
सखि सब कौतुक देखनिहारे । जेउ कहावत हितू हमारे ।
काठ न बुझाइ कहइ गुर पाहीं । ए बालक असि हठ भलि नाहीं ।
रावन बान छुआ नहिं चापा । हारे सकल भूप करि दापा ॥
सो धनु राजकुँअर कर देहीं । बाल मराल कि मंदर लेहीं ।
भूप सयानप सकल सिरानी । सखि बिधि गतिकछु जाति न जानी ॥
बोली चतुर सखी मृदु बानो । तेजवंत लघु गानअ न रानी ॥
कहँ कुंभज कहँ सिंधु अपारा । सोषेठ सुजसु सकल संसारा ॥
रबि मंडल देखत लघु लागा । उदयँ तासु तिभुवन तम भागा ॥
दो० मंत्र परम लघु जासु बस बिधि हरि हर सुर सब ।

महामत्त गजराज कहँ बस कर अकुस खर्ब ॥ २५६ ॥
काम कुसुम धनु सायक लीन्दे । सकल भुवन अपने बस कीन्दे ।
देबि तजिअ ससउ अस जानी । भंजव धनुषु राम सुनु रानी ।
सखी बचन सुनि भै परतीती । मिटा बिषादु बढ़ी अति प्रीती ॥
तब रामहि बिलोकि बैदेही । सभय हृदयँ बिनवति जेहि तेही ॥

मनहीं मन मनाव अकुलानी । होहु प्रसन्न महेस भवानी ॥
 करहु सफल आपनि सेवकाई । करि हितु हरहु चाप गरुआई ॥
 गननायक बर दायक देवा । आजु लगे कीन्हिउँ तुअ सेवा ॥
 बार बार बिनती सुनि मोरी । करहु चाप गुरुता अति थोरी ॥
 दो०— देखि देखि रघुबीर तन सुर मनाव धरि धीर ।

भरे बिलोचन प्रेम जल पुलकावली सरीर ॥ २५७ ॥
 नीकें निरखि नयन भरि सोभा । पितु पनु सुमिरि बहुरि मनु छोभा ॥
 अहह तात दारुनि हठ ठानी । समुझत नहिं कछु लाभु न हानी ॥
 सचिव सभय सिख देइ न कोई । बुध समाज बड़ अनुचित होई ॥
 कहँ धनु कुलिसहु चाहि कठेरा । कहँ स्यामल मृदुगात किसोरा ॥
 बिधि केहि भाँति धरौं उर धीरा । सिरस सुमन कन बेधिअ हीरा ॥
 सकल सभा कै मति भै भोरी । अब मोहि संभुचाप गति तोरी ।
 निज जड़ता लोगन्ह पर डारी । होहि हरुअ रघुपतिहि निहारी ॥
 अति परिताप सीय मन माहीं । लव निमेष जुग सय सम जाहीं ॥

दो०— प्रभुहि चितइ पुनि चितव महि राजत लोचन लोल ।

खेलत मनसिज मीन जुग जनु बिधु मंडल डोल ॥ २५८ ॥
 गिरा अलिनि मुख पंकज रोकी । प्रगट न लाज निसा अवलोकी ॥
 लोचन जलु रह लोचन कोना । जैसे परम कृपन कर सोना ॥
 सकुची ब्याकुलता बड़ि जानी । धरि धीरजु प्रतीति उर आनी ॥
 तन मन बचन मोर पनु साचा । रघुपति पद सरोज चितु राचा ॥

तौ भगवानु सकल उर बासी । करिहि मोहि रघुवर कै दासी ।
 जेहि कै जेहि पर सत्य सनेहू । सो तेहि मिलइ न कछु संदेहू ॥
 प्रभु तन चितइ प्रेम तन ठाना । कृपानिधान राम सबु जाना ॥
 सियहि बिलोकि तकेउ धनु कैसें । चितव गरु लघु ब्यालहि जैसें ॥
 दो०— लखन लखेउ रघुबंसपनि ताकेउ हर कोदंडु ।

पुलकि गात बोले बचन चरन चापि ब्रह्मांडु ॥ २५९ ॥
 दिसिकुंजरहु कमठ अहि कोला । धरहु धरनि धरि धीर न डोला ॥
 रामु पहिहि संकर धनु तोरा । होहु सजग सुनि आयसु मोरा ॥
 चाप समीप रामु जब आए । नर नारिन्ह सुर सुकृत मनाए ॥
 सब कर संसउ अरु अग्यानु । मंद महीपन्ह कर अभिमानू ॥
 भृगुपति केरि गरब गरुआई । सुर मुनिबरन्ह केरि कदराई ।
 सिय कर सोचु जनक पछितावा । रानिन्ह कर दारुन दुख दावा ॥
 संभुचाप बड़ बोहितु पाई । चढ़े जाइ सब सगु बनाई ॥
 राम बाहुबल सिंधु अपारु । चहत पारु नहि कोउ कड़हारु ॥
 दो०— राम बिलोके लोग सब चित्र लिखे से देखि ।

चितई सीय कृपायत्तन जानी बिकल बिसेषि ॥ २६० ॥
 देखी बिपुल बिकल बैदेही । निमिष बिहात कलप सम तेही ॥
 तृषित बारि बिनु जो तनु त्यागा । मुएँ करइ का सुधा तड़ागा ॥
 का बरषा सब कृषी सुखानें । समय चुके पुनि का पछितानें ॥
 अस जियँ जानि जानकी देखी । प्रभु पुलके लखि प्रीति बिसेषी ॥

गुरहि प्रनामु मनहिं मन कीन्हा । अति लाघवँ उठाइ धनु लीन्हा ॥
 दमकेउ दामिनि जिमि जब लयऊ । पुनि नभ धनु मंडलसम भयऊ ॥
 लेत चढ़ावत खँचत गाढ़ें । काहुँ न लखा देख सबु ठाढ़ें ॥
 तेहि छन राम मध्य धनु तोरा । भरे भुवन धुनि घोर कठोरा ॥

छं० — भरे भुवन घोर कठोर रव रबि बाजि तजि मारगु चले ।
 चिक्करहिं दिगाज झेल महि अहि कोल कूरुम कलमले ॥
 सुर असुर मुनि कर कान दीन्हें सकल बिकल बिचारहीं ।
 कोदंड खंडेउ राम तुलसी जयति बचन उचारहीं ॥

सो० — संकर चापु जहाजु सागरु रघुबर बाहुबलु ।

बूड़ सो सकल सभाजु चढ़ा जो प्रथमहिं मोह बस ॥ २६१ ॥
 प्रभु दोउ चापखंड महि डारे । देखि लोग सब भए सुखारे ॥
 कौंसिकरूप पयोनिधि पावन । प्रेम बारि अवगाहु सुहावन ॥
 रामरूप राकेसु निहारी । बढ़त बीच पुलकावलि भारी ।
 बाजे नभ गहगहे निसाना । देवबधू नाचहिं करि गाना ॥
 ब्रह्मादिक सुर सिद्ध मुनीसा । प्रभुहि प्रसंसहिं देहिं असीसा ॥
 बरिसहिं सुमन रंग बहु माला । गावहिं किनर गीत रसाला ॥
 रही भुवन भरि जय जय बानी । धनुष भंग धुनि जात न जानी ॥
 मुदित कहहिं जहँ तहँ नर नारी । भंजेउ राम संभुधनु भारी ॥
 दो० — बंदी पागध सूतगन बिरुद बदहिं मतिधीर ।

करहिं निछावरि लोग सब हय गय धन मनि चीर ॥ २६२ ॥

झाँझि मृदंग संख सहनाई । भेरि ढोल दुंदुभी सुहाई ॥
 बाजहिं बहु बाजने सुहाए । जहाँ तहाँ जूबतिन्ह मंगल गाए ।
 सखिन्ह सहित हरषी अति रानी । सूखत धान परा जनु पानी ॥
 जनक लहेउ सुख सोचु बिहाई । पैरत थकें थाह जनु पाई ॥
 श्रीहत भए भूप धनु टूटे । जैसें दिवस दीप छबि छूटे ॥
 सोय सुखहि बरनिअ केहि भाँती । जनु चातकी पाइ जलु स्वाती ॥
 रामहि लखनु बिलोकत कैसें । ससिहि चकोर किसोरकु जैसें ॥
 सतानंद तब आयसु दीन्हा । सीताँ गमनु राम पहिं कीन्हा ॥
 दो० संग सखीं सुंदर चतुर गावहिं मंगलचार ।

गवनी बाल मराल गति सुषमा अंग अपार ॥ २६३ ॥
 सखिन्ह मध्य सिय सोहति कैसें । छबिगन मध्य महाछबि जैसें ॥
 कर सरोज जयमाल सुहाई । बिस्व बिजय सोभा जेहि छाई ॥
 तन सकोचु मन परम उछाहू । गूढ़ प्रेमु लखि परइ न काहू ॥
 जाइ समीप राम छबि देखी । रहि जनु कुअँरि चित्र अवरेखी ॥
 चतुर सखीं लखि कहा बुझाई । पहिरावहु जयमाल सुहाई ॥
 सुनत जुगल कर माल उठाई । प्रेम बिबस पहिराइ न जाई ॥
 सोहत जनु जुग जलज सनाला । ससिहि समीत देत जयमाला ॥
 गावहिं छबि अवलोकि सहेली । सियँ जयमाल राम उर मेली ॥
 सो०— रघुबर उर जयमाल देखि देव बरिसहिं सुमन ।

सकुचे सकल भुआल जनु बिलोकि रबि कुमुदगन ॥ २६४ ॥

पुर अरु ब्योम बाजने बाजे । खल भए मलिन साधु सब राजे ॥
 सुर किंनर नर नाग मुनीसा । जय जय जय कहि देहिं असीसा ॥
 नाचहिं गावहिं बिबुध बधूटी । बार बार कुसुमांजलि छूटी ॥
 जहँ तहँ बिप्र बेदधुनि करहीं । बंदी बिरिदावलि उच्चरहीं ॥
 महि पाताल नाक जसु ब्यापा । राम बरी सिय भंजेउ चापा ॥
 करहिं आरती पुर नर नारी । देहिं निछावरि बित्त बिसारी ॥
 सोहति सीय राम कै जोरी । छबि सिंगारु मनहुँ एक ठोरी ॥
 सखीं कहहिं प्रभु पद गहु सीता । करति न चरन परस अति भीता ॥
 दो०— गौतम तिय गति सुरति करि नहिं परसति पग पानि ।

मन बिहसे रघुबंसमनि प्रीति अलौकिक जानि ॥ २६५ ॥
 तब सिय देखि भूप अभिलाषे । कूर कपूत मूढ़ मन माखे ॥
 उठि उठि पहिरि सनाह अभागे । जहँ तहँ गाल बजावन लागे ॥
 लेहु छड़ाइ सीय कह कोऊ । धरि बाँधहु नृप बालक दोऊ ॥
 तोरें धनुषु चाड़ नहिं सरई । जीवत हमहि कुअँरि को बरई ।
 जाँ बिदेहु कछु करै सहाई । जीतहु समर सहित दोउ भाई ॥
 साधु भूप बोले सुनि बानी । राजसमाजहि लाज लजानी ॥
 बलु प्रतापु बीरता बड़ाई । नाक पिनाकहि संग सिधाई ॥
 सोइ सूरता कि अब कहूँ पाई । असि बुधि तौ बिधि मुहँ मसि लाई ॥
 दो०— देखहु रामहि नयन भरि तजि इरिषा महु कोहु ।

लखन रोषु पावकु प्रबल जानि सलभ जनि होहु ॥ २६६ ॥

बैनतेय बलि जिमि चह कागू । जिमि ससु चहै नाग अरि भागू ॥
जिमि चह कुसल अकारन कोही । सब संपदा चहै सिवद्रोही ॥
लोभी लोलुप कल कोरति चहई । अकलकता कि कामी लहई ।
हरि पद बिमुख परम गति चाहै । तस तुम्हार लालचु नरनाह्य ॥
कोलाहलु सुनि सीय सकानी । सखीं लवाइ गई जहँ रानी ॥
रामु सुभायँ चले गुरु पाहीं । सिय सनेहु बरनत मन माहीं ॥
रानिन्ह सहित सोचबस सीया । अब धौं बिधिहि काह करनीया ॥
भूप बचन सुनि इत उत तकहीं । लखनु राम डर बोलि न सकहीं ॥
दो० — अरुन नयन भृकुटी कुटिल चितवत नृपन्ह सकोष ।

मनहुँ मत्त राजगन निरखि सिंधिकिसोरहि चोप ॥ २६७ ॥
खरभरु देखि बिकल पुर नारीं । सब मिलि देहिं महीपन्ह गारीं ॥
तेहि अवसर सुनि सिवधनु भगा आयउ भृगुकुल कमल पतगा ।
देखि महीप सकल सकुचाने । बाज झपट जनु लवा लुकाने ॥
गौरि सरीर भूति भल भ्राजा । भाल बिसाल त्रिपुंड बिराजा ॥
सीस जटा ससिबदनु सुहावा । रिसबस कछुक अरुन होइ आवा ॥
भृकुटी कुटिल नयन रिस राते । सहजहुँ चितवत मनहुँ रिसाते ।
बृषभ कंध उर बाहु बिमाला । चारु जनेउ माल मृगछाला ।
कटि मुनिबसन तून दुइ बाँधैं । धनु सर कर कुठारु कल काँधैं ॥
दो० मांत बेषु करनी कठिन बरनि न जाइ सरूप ।

धरि मुनितनु जनु बीर रसु आयउ जहँ सब भूप ॥ २६८ ॥

देखत भृगुपति बेषु कराला । उठे सकल भय बिकल भुआला ॥
 पितु समेत कहि कहि निज नामा । लगे करन सब दंड प्रनामा ॥
 जेहि सुभायँ चितवहं हितु जानी । सो जानइ जनु आइ खुटानी ॥
 जनक बहोरि आइ सिरु नावा । सीय बोलाइ प्रनामु करावा ॥
 आसिष दीन्हि सखीं हरषानीं । निज समाज लै गई सयानीं ॥
 बिस्वामित्रु मिले पुनि आई । पद सरोज मेले दोउ भाई ॥
 रामु लखनु दसरथ के ढोटा । दीन्हि असीस देखि भल जोटा ॥
 रामहि चितइ रहे थकि लोचन । रूप अपार मार मद मोचन ॥
 दो०— बहुरि बिलोकि बिदेह मन कहहु काह अति भीर ।

पूँछत जानि अजान जिमि व्यापेउ कोपु सरीर ॥ २६९ ॥
 समाचार कहि जनक सुनाए । जेहि कारन महीप सब आए ॥
 सुनत बचन फिरि अनत निहारे । देखे चापखंड महि छारे ॥
 अति रिस बोले बचन कठोरा । कहु जड़ जनक धनुष कै तोरा ॥
 बेगि देखाउ मूढ़ न त आजू । उलटउँ महि जहँ लहि तव राजू ॥
 अति डरु उतरु देत नृपु नाहीं । कुटिल भूप हरषे मन माहीं ।
 सुर मुनि नाग नगर नर नारी । सोचहिं सकल त्रास उर भारी ॥
 मन पछिताति सीय महतारी । बिधि अब सँवरी बात बिगारी ॥
 भृगुपति कर सुभाउ सुनि सीता । अरध निमेष कलष सम बीता ॥
 दो०— सभय बिलोके लोग सब जानि जानकी भीरु ।

हृदयँ न हरषु बिषादु कछु बोले श्रीरघुबीरु ॥ २७० ॥

मासपारायण, नवाँ विश्राम

नाथ संभुधनु भंजानहारा होइहि केउ एक दास तुम्हारा ॥
 आयसु काह कहिअ किन मोही सुनि रिसाइ बोले मुनि कोही ॥
 सेवकु सो जो करै सेवकाई । और करनी करि करिअ लराई ।
 सुनहु राम जेहिं सिवधनु तोरा । सहसबाहु सम सो रिपु मोरा ॥
 सो बिलगाउ बिहाइ समाजा । न त मारे जैहहिं सब राजा ॥
 सुनि मुनि बचन लखन मुसुकाने । बोले परसुधराह अपमाने ।
 बहु धनुहीं तोरीं लरिकई, कबहुँ न असि रिस कीन्हि गोसाईं ।
 एहि धनु पर ममता कहि हंतू । सुनि रिसाइ कह भृगुकुलकेतू ॥
 दो०— रे नृप बालक काल बस बोलत तोहि न सँभार ।

धनुही सप तिपरागि धनु बिदित सकल ससार ॥ २७१ ॥
 लखन कहा हौंस हमरें जाना । सुनहु देव सब धनुष समाना ।
 का छति लाभु जून धनु तोरें । देखा राम नयन के भोरें ।
 छुअत दूट रघुपतिहु न दोसू । मुनि बिनु काज करिअ कत रोसू ।
 बोले चितइ परसु की ओरा । रे सठ सुनेहि सुभाउ न मोरा ।
 बालकु बोलि बधउँ नहिं तोही । केवल मुनि जइ जानहि मोही ।
 बाल ब्रह्मचारी अति कोही । बिस्व बिदित छत्रियकुल द्रोही ।
 भुजबल भूमि भूप बिनु कीन्ही । बिपुल बार महिदेवन्ह दीन्ही ।
 सहसबाहु भुज छेदिनहारा परसु बिनोकु महीपकुमारा ॥
 दो०— मातृ पितहि जनि मोचबस करसि महीसकिसोर ।

गर्भन्ह के अर्भक दलन परसु मोर अति घोर ॥ २७२ ॥

नाथ करहु बालक पर छोहू । सूध दूधमुख करिअ न कोहू ॥
 जाँ पै प्रभु प्रभाउ कछु जाना । तौ कि बराबरि करत अयाना ॥
 जाँ लरिका कछु अचगारि करहीं । गुर पितु मातु मोद मन भरहीं ॥
 करिअ कृपा सिसु सेवक जानी । तुम्ह सम सील धीर मुनि ग्यानी ॥
 राम बचन सुनि कछुक जुड़ाने । कहि कछु लखनु बहुरि मुसुकाने ॥
 हँसत देखि नख सिख रिस ब्यापी । राम तोर भ्राता बड़ पापी ॥
 गौर सरीर स्याम मन माहीं । कालकूटमुख पयमुख नाही ॥
 सहज टेढ़ अनुहरइ न तोही । नीचु भीचु सम देख न मोही ॥
 दो०— लखन कहेउ हँसि सुनहु मुनि क्रोधु पाप कर मूल ।

जेहि बस जन अनुचित करहिं चरहिं बिस्व प्रतिकूल ॥ २७७ ॥
 मैं तुम्हार अनुचर मुनिराया । परिहरि कोपु करिअ अब दाय्या ॥
 टूट चाप नहिं जुरिहि रिसाने । बैठिअ होइहिं पाय पिराने ॥
 जाँ अति प्रिय तौ करिअ उपाई । जोरिअ कोउ बड़ गुनी बोलाई ॥
 बोलत लखनहिं जनकु डेराहीं । मष्ट करहु अनुचित भल नाही ॥
 थर थर काँपहिं पुर नर नारी । छोट कुमार खोट बड़ भारी ॥
 भृगुपति सुनि सुनि निरभय बानी । रिस तन जरइ होइ बल हानी ॥
 बोले रामहि देइ निहोरा । बचउँ बिचारि बंधु लघु तोरा ॥
 मनु मलीन तनु सुंदर कैसें । बिष रस भरा कनक घटु जैसें ॥
 दो०— सुनि लछिमन बिहसे बहुरि नयन तरेरे राम ।

गुर समीप गवने सकुचि परिहरि बानी बाप ॥ २७८ ॥

अति विनीत मृदु सीतल बानी । बोले राम जोरि जुग पानी ॥
 सुनहु नाथ तुम्ह सहज सुजाना । बालकबचनु करिअ नहिं कना ॥
 बरै बालकु एक सुभाऊ । इन्हहि न संत विदूषाहं काऊ ॥
 तेहिं नाहीं कछु काज बिगारा । अपराधी मैं नाथ तुम्हारा ॥
 कृपा कोपु बंधु बँधब गोसाईं । मो पर करिअ दास की नाई ॥
 कहिअ बेगि जेहि बिधि रिस जाई । मुनिनायक सोइ करौ उपाई ॥
 कह मुनि राम जाइ रिस कैसें । अजहुँ अनुज तब चितव अनैसैं ॥
 एहि के कंठ कुठारु न दीन्हा । तौ मैं काह कोपु करि कीन्हा ॥
 दो० - गर्भ स्रवहिं अवनिय रविनि सुनि कुठार गति घोर ।

परसु अछन देखउँ जिअत बैरी भूपकिसोर ॥ २७९ ॥
 बहइ न हाथु दहइ रिस छाती । भा कुठारु कुंठित नृपघाती ॥
 भयउ बाम बिधि फिरेउ सुभाऊ । मोरे हृदयँ कृपा किस काऊ ॥
 आजु दया दुखु दुसह सहावा । सुनि सौमित्र बिर्हास सिरु नावा ॥
 बाउ कृपा मूरति अनुकूला । बोलत बचन झरत जनु फूला ॥
 जाँ पै कृपाँ जरिहिं मुनि गाता । क्रोध भरै तनु राख बिधाता ॥
 देखु जनक हठि बालकु एहू । कीन्ह चहत जइ जमपुर गेहू ॥
 बेगि करहु किन आँखिन्ह ओटा । देखत छोट खोट नृपु छोट ॥
 बिहसे लखनु कहा मन माहीं । मूढ़े आँख कतहुँ कोउ नाहीं ॥
 दो० — परसुरामु तब राम प्रति बोले उर अति क्रोधु ।

संभु सरासनु तोरि सठ करमि हमार प्रबोधु ॥ २८० ॥

बंधु कहइ कटु संमत तोरें । तू छल बिनय करसि कर जोरें ॥
 करु परितोषु मोर संग्रामा । नाहिं त छाड़ कहाउब रामा ॥
 छलु तजि करहि समरु सिवद्रोही । बंधु सहित न त मारउँ तोही ॥
 भृगुपति बकहिं कुठार उठाएँ । मन मुसुकाहि रामु सिर नाएँ ॥
 गुनह लखन कर हम पर रोषू । कतहुँ सुधाइहु ते बड़ दोषू ॥
 टेढ़ जानि सब बंदइ काहू । बक्र चंद्रमहि ग्रसइ न राहू ॥
 राम कहेउ रिस तजिअ मुनीसा । कर कुठारु आगेँ यह सीसा ॥
 जेहि रिस जाइ करिअ सोइ स्वामी । मोहि जानिअ आपन अनुगामी ॥
 दो०— प्रभुहि सेवकहि समरु कम तजहु बिप्रवर रोसु ।

बेषु बिलोकें कहेसि कछु बालकहु नहिं दोसु ॥ २८१ ॥
 देखि कुठार बान धनु धारी । भै लरिकहि रिस बीरु बिचारी ॥
 नाम जान पै तुम्हहि न चीन्हा । बंस सुभायँ उतरु तेहिं दीन्हा ॥
 जाँ तुम्ह ओतेहु मुनि की नाई । पद रज सिर सिसु धरत गोसाई ॥
 छमहु चूक अनजानत केरी । चहिअ बिप्र उर कृपा घनेरी ॥
 हमहि तुम्हहि सरिबरि कसि नाथा । कहहु न कहाँ चरन कहँ माथा ॥
 राम मात्र लघु नाम हमारा । परसु सहित बड़ नाम तोहारा ॥
 देव एकु गुनु धनुष हमारें । नव गुन परम पुनीत तुम्हारे ॥
 सब प्रकार हम तुम्ह सन हारे । छमहु बिप्र अपराध हमारे ॥
 दो०— बार बार मुनि बिप्रवर कहा राम सन राम ।

बोले भृगुपति सरुष हसि तहँ बंधु सम बाम ॥ २८२ ॥

निपटहिं द्विज करि जानहि मोही । मैं जस बिप्र सुनावउँ तोही ॥
 चाप सुवा सर आहुति जानू । कोपु मोर अति घोर कृसानू ।
 समिधि सेन चतुरंग सुहाई । महा महीप भए पसु आई ॥
 मैं एहिं परसु काटि बलि दीन्हे । समर जग्य जप कोटिन्ह कीन्हे ।
 मोर प्रभाउ बिदित नहिं तोरें । बोलसि निदरि बिप्र के भोरें ।
 भंजेउ चापु दापु बड़ बाढ़ा । अहमति मनहुँ जीति जगु ठाढ़ा ॥
 राम कहा मुनि कहहु बिचारी । रिस अति बड़िलघु चूक हमारी ।
 छुअतहिं टूट पिनाक पुराना । मैं केहि हेतु करौ अभिमाना ।
 दो०— जौं हम निदरहिं बिप्र बदि सत्य सुनुहु भृगुनाथ ।

तौ अस को जग सुभटु जेहि भय बस नावहिं माथ ॥ २८३ ॥
 देव दनुज भूपति भट नाना । समबल अधिक होउ बलवाना ।
 जौं रन हमहिं पचारै कोऊ । लरहिं सुखेन कालु किन होऊ ।
 छत्रिय तनु धरि समर सकाना । कुल कलंकु तेहि पावरै आना ॥
 कहउँ सुभाउ न कुलहि प्रसंसी । कालहु डरहिं न रन रघुबंसी ।
 बिप्रबस कै असि प्रभुताई । अभय होइ जो तुम्हहि डेराई ।
 सुनि मृदु गूढ़ बचन रघुपति के । उधरे पटल परसुधर मति के ।
 राम रमापति कर धनु लेहू । खैंचहु मिटै मोर संदेहू ।
 देत चापु आपुहिं चलि गयऊ परसुराम मन बिसमय भयऊ ।
 दो०— जाना राम प्रभाउ तब पुलक प्रफुल्लित गात ।

जोरि पाणि बोले बचन हृदयैं न प्रेमु अमात ॥ २८४ ॥

जय रघुबंस बनज बन भानू । गहन दनुज कुल दहन कृसानू ॥
 जय सुर विप्र धेनु हितकारी । जय मद मोह कोह भ्रम हारी ।
 बिनय सील करुना गुन सागर । जयति बचन रचना अति नागर ॥
 सेवक सुखद सुभग सब अंगा । जय सरीर छबि कोटि अनंगा ॥
 करौं काह मुख एक प्रसंसा । जय महेस मन मानस हंसा ॥
 अनुचित बहुत कहेउँ अग्याता । छमहु छमामंदिर दोउ भ्राता ॥
 कहि जय जय जय रघुकुलकेतू । भृगुपति गए बनहि तप हेतू ॥
 अपभयँ कुटिल महीप डेराने । जहँ तहँ कायर गर्वहि पराने ।
 दो०— देवन्ह दीन्हों दुंदुभीं प्रभु पर बरषहिं फूल ।

हरषे पुर नर नारि सब मिटी मोहमय सूल ॥ २८५ ॥
 अति गहगहे बाजने बाजे । सबहिं मनोहर मंगल साजे ॥
 जूथ जूथ मिलि सुमुखि सुनयनीं । करहिं गान कल कोकिलबयनीं ॥
 सुखु बिदेह कर बरनि न जाई । जन्मदरिद्र मनहुँ निधि पाई ॥
 बिगत त्रास भइ सीय सुखारी । जनु बिधु उदयँ चकोरकुमारी ॥
 जनक कीन्ह कौसिकहि प्रनामा । प्रभु प्रसाद धनु भंजेउ रामा ॥
 मोहि कृतकृत्य कीन्ह दुहुँ भाई । अब जो उचित सो कहिअ गोसाई ॥
 कह मुनि सुनु नरनाथ प्रबीना । रहा बिबाहु चाप आधीना ॥
 दूटतहीं धनु भयउ बिबाहू । सुर नर नाग बिदित सब काहू ॥
 दो०— तदपि जाइ तुम्ह करहु अब जथा बंस व्यवहार ।

बृझि विप्र कुलवृद्ध गुर बेद बिदित आचारु ॥ २८६ ॥

दूत अवधपुर पठवहु जाई । आनहिं नृप दसरथहि बोलाई ॥
मुदित राउ कहि भलेहिं कृपाला । पठए दूत बोलि तेहि काला ॥
बहुरि महाजन सकल बोलाए । आइ सबन्हि सादर मिर नाए ॥
हाट बाट मंदिर सुरबासा । नगरु सँवारहु चारिहुँ पासा ॥
हरषि चले निज निज गृह आए । पुनि परिचारक बोलि पठाए ।
रचहु बिचित्र बितान बनाई । सिर धरि बचन चले मनु पाई ॥
पठए बोलि गुनी तिन्ह नाना । जे बितान बिधि कुसल सुजाना ॥
बिधिहि बंदि तिन्ह कीन्ह अरंभा । बिरचे कनक कदलि के खंभा ॥
दो०— हरित मनिन्ह के पत्र फल पदुमराग के फूल ।

रचना देखि बिचित्र अति मनु विरंचि कर भूल ॥ २८७ ॥
बेनु हरित मनिमय सब कीन्हे । सरल सपरब परहिं नहिं चीन्हे ।
कनक कलित अहिबेलि बनाई । लखि नहिं परइ सपरन सुहाई ।
तेहि के रचि पचि बंध बनाए । बिच बिच मुकृता दाम सुहाए ॥
मानिक मरकत कुलिस पिरोजा । चीरि कोरि पचि रचे सरोजा ।
किए भृग बहुरंग बिहंगा । गुंजहिं कूजहिं पवन प्रसंगा ॥
सुर प्रतिमा खंभन गढ़ि काढी । मंगल द्रव्य लिएँ सब ठाढ़ी ॥
चौकें भाँति अनेक पुराई । सिधुर मनिमय सहज सुहाई ॥
दो०— सौरभ पल्लव सुभग सुठि किए नीलमनि कोरि ।

हेम बौर मरकत धवरि लमत पाटमय छेरि ॥ २८८ ॥
रचे रुचिर बर बंदनिवारे । मनहुँ मनोभवँ फंद सँवारे ॥

मंगल कलस अनेक बनाए । ध्वज पताक पट चमर सुहाए ।
 दीप मनोहर मनमय नाना । जाइ न बरनि बिचित्र बिताना ॥
 जेहि मंडप दुर्लहानि बैदेही । सो बरनै असि मति कबि केही ॥
 दूल्हा रामु रूप गुन सागर । सो बितानु तिहुँ लोक उजागर ।
 जनक भवन कै सोभा जैसी । गृह गृह प्रति पुर देखिअ तैसी ॥
 जेहि तेरहुति तेहि समय निहारी । तेहि लघु लगहिं भुवन दस चारी ।
 जो संपदा नीच गृह सोहा । सो बिलोकि सुरनायक मोहा ॥
 दो० बसइ नगर जेहि लच्छि करि कपट नारि बर बेधु ।

तेहि पुर कै सोभा कहत सकुचहिं सारद सेधु ॥ २८९ ॥
 पहुँचे दूत राम पुर पावन । हरषे नगर बिलोकि सुहावन ॥
 भूप द्वार तिन्ह खबरि जनाई । दसरथ नृप सुनि लिए बोलाई ॥
 करि प्रनामु तिन्ह पाती दीन्ही । मुदित महीप आपु उठि लीन्ही ॥
 बारि बिलोचन बाँचत पाती । पुलक गात आई भरि छाती ।
 रामु लखनु उर कर बर चौंटी । रहि गए कहत न खाटी मीठी ॥
 पुनि धरि धीर पात्रका बाँची । हरषी सभा बात सुनि साँची ॥
 खेलत रहे तहाँ सुधि पाई । आए भरतु सहित हित भाई ।
 पूछत अति सनेहँ सकुचाई । तात कहाँ तें पाती आई ॥
 दो०— कुसल प्रानप्रिय बंधु दोउ अहहिं कहहु केहिं देस ।

सुनि सनेह साने बचन बाची बहुरि नरेस ॥ २९० ॥
 सुनि पाती पुलके दोउ भ्राता । अधिक सनेहु समात न गाता ॥

प्रीति पुनीत भरत कै देखी । सकल सभाँ सुख लहेउ बिसेषी ।
 तब नृप दूत निकट बैठारे । मधुर मनोहर बचन उचारे ।
 भैया कहहु कुसल दोउ बारे । तुम्ह नोकें निज नयन निहारे ।
 स्यामल गौर धरें धनु भाथा बय किसोर कौमिक मुनि साथा ॥
 पहिचानहु तुम्ह कहहु सुभाऊ । प्रेम बिबस पुनि पुनि कह राऊ ॥
 जा दिन तैं मुनि गए लवाई । तब तैं अजु साँच सुधि पाई ॥
 कहहु बिदेह कवन बिधि जाने । मुनि प्रिय बचन दूत मसुकाने ॥
 दो० सुनहु महीपाति मुकुट मनि तुम्ह सम धन्य न कोउ ।

रामु लखनु जिन्ह के तनय बिख बिभूषन दोउ ॥ २९१ ॥
 पूछन जोगु न तनय तुम्हारे । पुरुषसिघ तिहु पुर उजिआरे ॥
 जिन्ह के जस प्रताप कैं आगे । मसि मलीन रवि सीतल लागे ॥
 तिन्ह कहैं कहिअ नाथ किमि चीन्हे । देखिअ रवि कि दीप कर लीन्हे ॥
 सीय स्वयंबर भूप अनेका । समिटै सुभट एक तैं एका ॥
 संभु सरासनु काहुँ न टारा हारे सकल बीर बरिआरा ॥
 तीनि लोक महँ जे भटमानी सभ कै सकति संभु धनु भानी ॥
 सकइ उठाइ सरासुर मेरू । सोउ हियँ हारि गयउ करि फेरू ॥
 जेहिं कौतुक सिवसैलु उठावा सोउ तेहि सभाँ पराभउ पावा ॥
 दो० — तहाँ राम रघुबंसमनि सुनिअ महा महिपाल ।

भंजेउ चाप प्रयास बिनु जिमि गज पंकज नाल ॥ २९२ ॥
 सुनि सरोष भृगुनायकु आए । बहुत भौति तिन्ह आँखि देखाए ॥

देखि राम बलु निज धनु दीन्हा । करि बहु बिनय गवनु बन कीन्हा ॥
 राजन रामु अतुलबल जैसैं । तेज निधान लखनु पुनि तैसैं ॥
 कंपहिं भूप बिलोकत जाकैं । जिमि गज हरि किसोर के ताकैं ॥
 देव देखि तव बालक दोऊ । अब न आँखि तर आवत कोऊ ॥
 दूत बचन रचना प्रिय लागी । प्रेम प्रताप बीर रस पागी ॥
 सभा समेत राउ अनुरागे । दूतन्ह देन निछावरि लागे ॥
 कहि अनीति ते मूढ़हि काना । धरमु बिचारि सबहिं सुखु माना ॥
 दो०— तब उठि भूप बसिष्ठ कहूँ दीन्हि पत्रिका जाइ ।

कथा सुनाई गुरहि सब सादर दूत बोलाइ ॥ २९३ ॥
 सुनि बोले गुर अति सुखु पाई । पुन्य पुरुष कहूँ महि सुख छाई ॥
 जिमि सरिता सागर महुँ जाहीं । जद्यपि ताहि कामना नाहीं ॥
 तिमि सुख संपति बिनहिं बोलाएँ । धरमसील पहिं जाहिं सुभाएँ ॥
 तुम्ह गुर बिप्र धेनु सुर सेबी । तसि पुनीत कौसल्या देबी ॥
 सुकृती तुम्ह समान जग माहीं । भयउ न है कोउ होनेउ नाहीं ॥
 तुम्ह ते अधिक पुन्य बड़ काकैं । राजन राम सरिस सुत जाकैं ॥
 बीर बिनोत धरम ब्रत धारी । गुन सागर बर बालक चारी ॥
 तुम्ह कहूँ सब काल कल्याना । सजहु बरात बजाइ निसाना ॥
 दो०— चलहु बेगि सुनि गुर बचन भलेहिं नाथ सिरु नाइ ।

भूपति गवने भवन तब दूतन्ह बासु देवाइ ॥ २९४ ॥
 राजा सबु रनिवास बोलाई । जनक पत्रिका बाचि सुनाई ॥
 सुनि संदेसु सकल हरषानी । अपर कथा सब भूप बखानी ॥

प्रेम प्रफुल्लित राजहिं रानी । मनहुँ सिखिनि मुनि बारिद बानी ।
मुदित असीस देहिं गुर नारीं । अति आनंद मगन महतारीं ॥
लेहिं परस्पर अति प्रिय पाती । हृदयँ लगाइ जुड़ावहिं छती ॥
राम लखन कै कीरति करनी । बारहिं बार भूपवर बरनी ॥
मुनि प्रसादु कहि द्वार मिधाए । रानिन्ह तब महिदेव बोलाए ॥
दिए दान आनंद समेता । चले बिप्रवर आसिष देता ॥
सो०— जाचक लिए हँकारि दीन्हि निछावरि कोटि बिधि ।

चिरु जीवहुँ सुत चारि चक्रवर्ति दसरत्थ के ॥ २९५ ॥
कहत चले पहिरे पट नाना । हरषि हने गहगहे निसाना ॥
समाचार सब लोगन्ह पाए । लागे घर घर होन बधाए ॥
भुवन चारिदस भरा उछाहू । जनकसुता रघुबीर बिआहू ॥
सुनि सुभ कथा लोग अनुरागे । मग गृह गलीं सँवारन लागे ॥
जद्यपि अवध सदैव सुहावनि । राम पुरी मंगलमय पावनि ॥
तदपि प्रीति कै प्रीति सुहाई । मंगल रचना रची बनाई ॥
ध्वज पताक पट चामर चारू । छावा परम बिचित्र बजारू ॥
कनक कलस तोरन मनि जाला । हरद दूब दधि अच्छत माला ।
दो० मंगलमय निज निज भवन लोगन्ह रचे बनाइ ।

बीथीं सींचीं चतुरसम चौकें चारु पुगइ ॥ २९६ ॥
जहँ तहँ जूथ जूथ मिलि भामिनि । सजि नव सस सकल दुति दामिनि ॥
बिधुबदनीं मृग सावक लोचनि । निज सरूप रति मानु बिमोचनि ॥
गावहिं मंगल मंजुल बानीं । सुनि कल ख कलकंठि लजानीं ॥

तब सुमंत्र दुइ स्यंदन साजी । जोते रबि हय निंदक बाजी ॥
 दोउ रथ रुचिर भूप पहिं आने । नहिं सारद पहिं जाहिं बखाने ॥
 राज समाजु एक रथ साजा । दूसर तेज पुंज अति भ्राजा ॥
 दो०— तेहिं रथ रुचिर बसिष्ठ कहुं हरषि चढ़ाइ नरेसु ।

आपु चढ़ेउ स्यंदन सुमिरि हर गुर गौरि गनेसु ॥ ३०१ ॥
 सहित बसिष्ठ सोह नृप कैसैं । सुर गुर संग पुरंदर जैसैं ॥
 करि कुल रीति बेद बिधि राऊ । देखि सबहि सब भाँति बनाऊ ॥
 सुमिरि रामु गुर आयसु पाई । चले महीपति संख बजाई ॥
 हरषे बिबुध बिलोकि बराता । बरषहिं सुमन सुमंगल दाता ॥
 भयउ कोलाहल हय गय गाजे । ब्योम बरात बाजने बाजे ॥
 सुर नर नारि सुमंगल गाई । सरस राग बाजहिं सहनाई ॥
 घंट घंटी धुनि बरनि न जाहीं । सरव करहिं पाइक फहराहीं ॥
 करहिं बिदूषक कौतुक नाना । हास कुसल कल गान सुजाना ॥
 दो०— तुरग नचावहिं कुअँर बर अकनि मृदंग निसान ।

नागर नट चितवहिं चकित छगहिं न ताल बँधान ॥ ३०२ ॥
 बनइ न बरनत बनी बराता । होहिं सगुन सुंदर सुभदाता ॥
 चारा चाषु बाम दिसि लेई । मनहुँ सकल मंगल कहि देई ॥
 दाहिन काग सुखेत सुहावा । नकुल दरसु सब काहूँ पावा ॥
 सानुकूल बह त्रिबिध बयारी । सघट सबाल आव बर नारी ॥
 लोवा फिरि फिरि दरसु देखावा । सुरभी सनमुख सिसुहि पिआवा ॥
 मृगमाला फिरि दाहिनि आई । मंगल मन जनु दीन्हि देखाई ॥

छेमकरी कह छेम बिसेषी । स्यामा बाम सुतरु पर देखी ॥
सनमुख आयउ दधि अरु मीना । कर पुस्तक दुइ बिप्र प्रवीना ॥
दो० मंगलमय कल्याणमय अभिमत फल दातार ।

जनु सब साचे होन हित भए सगुन एक बार ॥ ३०३ ॥
मंगल सगुन सुगम सब ताकैं सगुन ब्रह्म सुंदर सुत जाकैं ।
राम सरिस बरु दुलहिनि सीता । समथी दसरथु जनकु पुनीता ॥
सुनि अस ब्याहु सगुन सब नाचे अब कीन्हें बिरंचि हम साँचे ॥
एहि बिधि कीन्ह बरात पयाना हय गय गाजहि हने निसाना ।
आवत जानि भानुकुल केतू । सरितन्हि जनक बैधाए सेतू ।
बीच बीच बर बास बनाए । सुरपुर सरिस संपदा छाए ।
असन सयन बर बसन सुहाए । पार्वहिं सब निज निज मन भाए ।
नित नूतन सुख लखि अनुकूले । सकल बरातिन्ह मंदिर भूले
दो०— आवत जानि बरात बर सुनि गहगहे निसान ।

सजि गज रथ पदचर तुरग लेन चले अगवान ॥ ३०४ ॥

मासपारायण, दसवाँ विश्राम

कनक कलस भरि कोपर थारा । भाजन ललित अनेक प्रकारा ॥
भरे सुधा सम सब पकवाने । नाना भाँति न जाहिं बखाने ॥
फल अनेक बर बस्तु सुहाई हरषि भेंट हित भूप पठाई ॥
भूषन बसन महामनि नाना । खग मृग हय गय बहुबिधि जाना ॥
मंगल सगुन सुगंध सुहाए बहुत भाँति महिपाल पठाए ॥
दधि चिउरा उपहार अपारा । भरि भरि काँवरि चले कहारा ॥

अगवानन्ह जब दीखि बराता । उर आनंदु पुलक भर गाता ॥
 देखि बनाव सहित अगवाना । मुदित बरातिन्ह हने निसाना ॥
 दो०— हरषि परसपर मिलन हित कछुक चले बगमेल ।

जनु आनंद समुद्र दुइ मिलत बिहाइ सुबेल ॥ ३०५ ॥
 बरषि सुमन सुर सुंदरि गार्वाहिं । मुदित देव दुंदुभीं बजावहिं ॥
 बस्तु सकल राखीं नृप आगें । बिनय कोन्हि तिन्ह अति अनुरगें ॥
 प्रेम समेत रायें सबु लीन्हा । भै बकसीस जाचकन्हि दीन्हा ।
 करि पूजा मान्यता बड़ाई । जनवासे कहूँ चले लवाई ॥
 बसन बिचित्र पाँवड़े परहीं । देखि धनदु धन मदु परिहरहीं ॥
 अति सुंदर दीन्हैउ जनवासा । जहँ सब कहूँ सब भाँति सुपासा ॥
 जानी सियँ बरात पुर आई । कछु निज महिमा प्रगटि जनाई ॥
 हृदयँ सुमिरि सब सिद्धि बोलाई । भूप पहुनई करन पठाई ॥
 दो०— सिधि सब सिय आयसु अकनि गई जहाँ जनवास ।

लिऐँ संपदा सकल सुख सुरपुर भोग बिलास ॥ ३०६ ॥
 निज निज बास बिलोकि बराती । सुरसुख सकल सुलभ सब भाँती ॥
 बिभव भेद कछु कोउ न जाना । सकल जनक कर कहिं बखाना ।
 सिय महिमा रघुनायक जानी । हरषे हृदयँ हेतु पहिचानी ॥
 पितु आगमनु सुनत दोउ भाई । हृदयँ न अति आनंदु अमाई ।
 सकुचन्ह कहि न सकत गुरु पाहीं । पितु दरसन लालचु मन माहीं ॥
 बिस्वामित्र बिनय बड़ि देखी । उपजा उर संतोषु बिसेषी ।
 हरषि बंधु दोउ हृदयँ लगाए । पुलक अंग अंबक जल छाए ॥

चले जहाँ दसरथु जनवासे । मनहुँ सरोबर तकेउ पिआसे ।
दो०— भूप बिलोके जबहिं मुनि आवत सुतन्ह समेत ।

उठे हगषि सुखसिधु महुँ चले थाह सी लेत ॥ ३०७ ॥
मुनिह दडवत कीन्ह महीसा । बार बार पद रज धरि सीसा ॥
कौंसक राउ लिए उर लाई । काह असोस पूछी कुसलाई ।
पुनि दंडवत करत दोउ भाई । देखि नृपति उर सुगु न समई ।
सुत हियँ लाइ दुसह दुख मेटे । मृतक सरीर प्राण जनु भेंटे ॥
पुनि बसिष्ठ पद सिर तिन्ह नाए । प्रेम मुदित मुनिबर उर लाए ॥
बिप्र बृंद बदे दुहुँ भाई । मनभावती असोसैं पाई ॥
भरत सहानुज कीन्ह प्रनामा । लिए उठाइ लाइ उर रामा ॥
हरषे लखन देखि दोउ भ्राता । मिले प्रेम परिपूरित गाता ॥
दो०— पुरजन परिजन जातिजन जाचक मंत्री मीत ।

मिले जथाविधि सबहि प्रभु परम कृपाल बिनीत ॥ ३०८ ॥
रामहि देखि बरात जुड़ानी । प्रीति कि रीति न जाति बखानी ॥
नृप समीप सोहहिं सुत चारी । जनु धन धरमादिक तनुधारी ।
सुतन्ह समेत दसरथहि देखी । मुदित नगर नर नारि बिसेषी ॥
सुमन बरिसि सुर हनहिं निसाना । नाकनटीं नाचहि करि गाना ॥
सतानद अरु बिप्र सचिव गन । मागध सूत बिदुष बदीजन ॥
सहित बरात राउ सनमाना । आयसु मागि फिरे अगवाना ॥
प्रथम बरात लगन तैं आई । ततैं पुर प्रमोदु अधिकाई ॥
ब्रह्मानंदु लोग सब लहहीं । बहूँ दिवस निर्मि बिधि सन कहहीं ।

दो०— रामु सीय सोभा अवधि सुकृत अवधि दोउ राज ।

जहँ तहँ पुरजन कहहिँ अस मिलि नर नारि समाज ॥ ३०९ ॥
 जनक सुकृत मूर्ति बैदेही । दसरथ सुकृत रामु धरें देही ॥
 इन्ह सम काहुँ न सिव अवराधे । काहुँ न इन्ह समान फल लाधे ॥
 इन्ह सम कोउ न भयउ जग माहीं । है नहिं कतहुँ होनेउ नाहीं ।
 हम सब सकल सुकृत कै रासी । भए जग जनमि जनकपुर बासी ॥
 जिन्ह जानकी राम छबि देखी । को सुकृती हम सरिस बिसेषी ॥
 पुनि देखब रघुबीर बिआहू । लेब भली बिधि लोचन लाहू ॥
 कहहिं परसपर कोकिलबयनीं । एहि बिआहँ बड़ लाभु सुनयनीं ॥
 बड़ें भाग बिधि बात बनाई । नयन अतिथि होइहहिं दोउ भाई ॥
 दो०— बारहिं बार सनेह बस जनक बोलाउब सीय ।

लेन आइहहिं बंधु दोउ कोटि काम कमनीय ॥ ३१० ॥
 बिबिध भाँति होइहि पहुनाई । प्रिय न काहि अस सासुर माई ॥
 तब तब राम लखनहि निहारी । होइहहिं सब पुर लोग सुखारी ॥
 सखि जस राम लखन कर जोय । तैसेइ भूप संग दुइ ढोटा ॥
 स्याम गौर सब अंग सुहाए । ते सब कहहिं देखि जे आए ॥
 कहा एक मैं आजु निहारे । जनु बिरंचि निज हाथ सँवारे ॥
 भरतु रामही की अनुहारी । सहसा लखि न सकहिं नर नारी ॥
 लखनु सत्रुसूदनु एकरूपा । नख सिख ते सब अंग अनूपा ॥
 मन भावहिं मुख बरनि न जाहीं । उपमा कहूँ त्रिभुवन कोउ नाहीं ॥

छं०— उपमा न कोउ कह दास तुलसी कतहुँ कबि कोबिद कहैं।
बल बिनय बिद्या सील सोभा सिंधु इन्ह से एड़ अहैं॥
पुर नारि सकल पमारि अंचल बिधिहि बचन सुनावहीं।
ब्याहिअहुँ चारिउ भाइ एहिं पुर हम सुमंगल गावहीं॥
सो०— कहहि परस्पर नारि ब्यारि बिलोचन पुलक तन।

साखि सबु करब पुरारि पुन्य पयोनिधि भूप दोउ। ३११॥
एहि बिधि सकल मनोरथ करहीं। आनंद उमगि उमगि उर भरहीं॥
जे नृप सीय स्वयंबर आए। देखि बंधु सब तिन्ह सुख पाए॥
कहत राम जमु बिसद बिसला। निज निज भवन गए महिपाला॥
गए बीति कछु दिन एहि भौंती। प्रमुदित पुरजन सकल बराती॥
मंगल मूल लगन दिनु आवा। हिम रितु अगहन मास मुहावा॥
ग्रह तिथि नखतु जोगु नर बारू। लगन सोधि बिधि कीन्ह बिचारू॥
पठै दीन्हि नारद सन साई। गनी जनक के गनकन्ह जोई॥
सुनी सकल लोगन्ह यह बाता। कहहि जोतिषी आहिं बिधाता॥
दो०— धेनुधुरि बेला बिमल सकल सुमंगल मूल।

बिप्रन्ह कहेउ बिदेह सन जानि सगुन अनुकूल॥ ३१२॥
उपरोहिताहि कहेउ नरनाहा। अब बिलंब कर कारनु काहा।
सतानंद तब सचिव बोलाए। मंगल सकल साजि सब ल्याए॥
संख निसान पनव बहु बाजे। मंगल कलस सगुन मुभ साजे॥
सुभग सुआमिनि गावाहिं गीता। कर्हिं बेद धुनि बिप्र पुनीता॥
लेन चले सादर एहि भौंती। गए जहाँ जनवास बराती॥
कोसलर्पात कर दोख समाजू। आनि लग्न लाग तिन्हहि सुरराजू।

भयउ समउ अब धारिअ पाऊ । यह सुनि परा निसानहिं घाऊ ॥
 गुरहि पूछि करि कुल बिधि राजा । चले संग मुनि साधु समाजा ॥
 दो०— भाग्य बिभव अवधेस कर देखि देव ब्रह्मादि ।

लगे सराहन सहस मुख जानि जनम निज बादि ॥ ३१३ ॥
 सुरन्ह सुमंगल अवसरु जाना । बरषहिं सुमन बजाइ निसाना ॥
 सिव ब्रह्मादिक बिबुध बरूथा । चढ़े बिमानन्हि नाना जूथा ॥
 प्रेम पुलक तन हृदयँ उछाहू । चले बिलोकन राम बिआहू ॥
 देखि जनकपुरु सुर अनुसंगे । निज निज लोक सबहिं लघु लागे ॥
 चितवहिं चकित बिचित्र बिताना । रचना सकल अलौकिक नाना ॥
 नगर नारि नर रूप निधाना । सुघर सुधरम सुसील सुजाना ॥
 तिन्हहि देखि सब सुर सुरनारी । भए नखत जनु बिधु अजिआरी ॥
 बिधिहि भयउ आचरजु बिसेषी । निज करनी कछु कतहुँ न देखी ॥
 दो०— सिवँ समुझाए देव सब जनि आचरज भुलाहु ।

हृदयँ बिचारहु धीर धरि सिय रघुबीर बिआहु ॥ ३१४ ॥
 जिन्ह कर नामु लेत जग माहीं । सकल अमंगल मूल नसाहीं ॥
 करतल होहिं पदारथ चारी । तेइ सिय रामु कहेउ कामारी ॥
 एहि बिधि संभु सुरन्ह समुझावा । पुनि आगें बर बसह चलावा ॥
 देवन्ह देखे दसरथु जाता । महामोद मन पुलकित गाता ॥
 साधु समाज संग महिदेवा । जनु तनु धरें करहिं सुख सेवा ॥
 सोहत साथ सुभग सुत चारी । जनु अपबरग सकल तनुधारी ॥
 मरकत कनक बरन बर जोरी । देखि सुरन्ह भै प्रीति न थोरी ॥

पुनि रामहि बिलोकि हियँ हरषे । नृपहि सराहि सुमन तिन्ह बरषे ॥
दो०—राम रूपु नख सिख सुभग बारहि बार निहारि।

पुलक गात लोचन सजल उमा समेत पुरारि ॥ ३१५ ॥
कैकि कंठ दुति स्यामल अंगा । तड़ित बिनिदक बसन सुरंगा ॥
ब्याह बिभूषन बिबिध बनाए । मंगल सब सब भाँति सुहाए ॥
सरद बिमल बिधु बदन सुहावन । नयन नवल राजीव लजावन ॥
सकल अलौकिक सुदरताई । काह न जाइ मनहीं मन भाई ॥
बंधु मनोहर सोहहि संग । जात नचावत चपल तुरंगा ॥
राजकुँअर बर बाजि देखावहि । बंस प्रसंसक बिरिद सुनावहि ॥
जेहि तुरंग पर रामु बिराजे । गति बिलोकि खगनायकु लाजे ॥
कहि न जाइ सब भाँति सुहावा बाजि बैपु जनु काम बनावा ॥
छं०— जनु बाजि बेषु बनाइ मनसिजु राम हित अति सोहई।

आपनेँ बय बल रूप गुन गति सकल भुवन बिषोहई ॥
जगमगत जीनु जराव जोति सुमोति मनि मानिक लगे ।
किंकिनि ललाम लगामु ललित बिलोकि सुर नर मुनि ठगे ॥
दो० - प्रभु मनसहि लयलीन मनु चलत बाजि छबि पाव।

भूषित उड़गन तड़ित घनु जनु बर बरहि नचाव ॥ ३१६ ॥
जेहिं बर बाजि रामु असवारा । तेहि सारदउ न बरनै पाग ॥
संकरु राम रूप अनुरागे । नयन पंचदस अति प्रिय लागे ॥
हरि हित सहित रमु जब जोहे रमा समेत रमापति मोहे ॥
निरखि राम छबि बिधि हरषाने । आठइ नयन जानि पछिताने ॥

सुर सेनप उर बहुत उछाहू । बिधि ते डेवढ़ लोचन लाहू ॥
 रामहि चितव सुरेस सुजाना । गौतम श्रापु परम हित माना ॥
 देव सकल सुरपतिहि सिहार्ही । आजु पुरंदर सम कोउ नार्ही ॥
 मुदित देवगन रामहि देखी । नृपसमाज दुहुँ हरषु बिसेषी ॥

छं०— अति हरषु राजसमाज दुहुँ दिसि दुंदुभीं बाजहिं घनी ।
 बरषहिं सुमन सुर हरषि कहि जय जयति जय रघुकुलमनी ॥
 एहि भाँति जानि बरात आवत बाजने बहु बाजहिं ।
 रानी सुआसिनि बोलि परिछनि हेतु मंगल साजहिं ॥

दो०— सजि आरती अनेक बिधि मंगल सकल सँवारि ।

चलीं मुदित परिछनि करन गजगामिनि बर नारि ॥ ३१७ ॥
 बिधुबदनीं सब सब मृगलोचनि । सब निज तन छबि रतिमदु मोचनि ॥
 पहिरें बरन बरन बर चीरा । सकल बिभूषन सजें सरीरा ॥
 सकल सुमंगल अंग बनाएँ । करहिं गान कलकंठि लजाएँ ॥
 कंकन किंकिनि नूपुर बाजहिं । चालि बिलोकि काम गज लाजहिं ॥
 बाजहिं बाजने बिबिध प्रकारा । नभ अरु नगर सुमंगलचारा ॥
 सची सारदा रमा भवानी । जे सुरतिय सुचि सहज सयानी ॥
 कपट नारि बर बेष बनाई । मिलीं सकल रनिवासहिं जाई ।
 करहिं गान कल मंगल बानी । हरष बिबस सब काहुँ न जानीं ॥

छं०— को जान केहि आनंद बस सब बह्यु बर परिछन चली ।
 कल गान मधुर निमान बरषहिं सुमन सुर सोभा भली ॥
 आनंदकंदु बिलोकि दूलहु सकल हियें हरषित भई ।
 अंभोज अंबक अंबु उमगि सुअंग पुलकावलि छई ॥

दो०— जो सुखु भा सिख मातु मन देखि राम बर बेषु।

सो न सकहिं कहि कलष सत सहस सारदा सेषु ॥ ३१८ ॥
नयन नीरु हटि मंगल जानी परिछनि करहिं मुदित मन रानी।
बेद बिहित भरु कुल आचारु। कीन्ह भली बिधि सब ब्यवहारु।
पंच सबद धुनि मंगल गाना। पट पाँवड़े परहिं बिधि नाना।
करि आरती अरघु तिन्ह दीन्हा। राम गमनु मंडप तब कीन्हा।
दसरथु सहित समाज बिराजे। बिभव बिलोकि लोकपति लाजे।
समयँ समयँ सुर बरषहिं फूला। सांति पढ़हिं महिसुर अनुकूला।
नभ अरु नगर कोलाहल होई। आपनि पर कछु सुनइ न कोई ॥
एहि बिधि रामु मंडपहिं आए अरघु देइ आसन बैठाए ॥

छं०— बैठारि आसन आरती करि निरखि बरु सुखु पावहीं।
मनि बसन भूषन भूरि वारहिं नारि मंगल गावहीं ॥
ब्रह्मादि सुरबर बिप्र बेष बनाइ कौतुक देखहीं।
अवलोकि रघुकुल कमल रबि छबि सुफल जीवन लखहीं ॥

दो०— नाऊ बारी भाट नट राम निछावरि परइ।

मुदित अमीसहिं नाइ सिर हरषु न हृदयँ समाइ ॥ ३१९ ॥
मिले जनकु दसरथु अति प्रीती। करि बैदिक लौकिक सब रीती।
मिलत महा दोड राज बिराजे। उपमा खोजि खोजि कबि लाजे।
लही न कतहुँ हारि हियँ मानी। इन्ह सम एइ उपमा उर आनी।
सामध देखि देव अनुरागे। सुमन बरखि जमु गावन लागे।
जगु बिरंचि उपजावा जब तैं देखे सुने ब्याह बहू तब तैं।

सकल भाँति सम साजु समाजू । सम समधी देखे हम आजू ॥
 देव गिरा सुनि सुंदर साँची । प्रीति अलौकिक दुहु दिसि माची ।
 देत पाँवड़े अरधु सुहाए । सादर जनकु मंडपहिं ल्याए ।

छं०— मंडपु बिलोकि बिचित्र रचनाँ रुचिरताँ भुनि मन हरे ।
 निज पानि जनक सुजान सब कहूँ आनि सिंघासन धरे ॥
 कुल इष्ट सरिस बसिष्ट पूजे बिनय करि आसिष लही ।
 कौसिकहि पूजत परम प्रीति कि रीति तौ न परै कही ॥

दो०— बामदेव आदिक रिपथ पूजे मुदित महीस ।

दिए दिव्य आसन सबहि सब सन लही असीस ॥ ३२० ॥
 बहुरि कीन्हि कोसलपति पूजा । जानि ईस सम भाउ न दूजा ।
 कीन्हि जोरि कर बिनय बड़ाई । कहि निज भाग्य बिभव बहुताई ॥
 पूजे भूपति सकल बराती । समधी सम सादर सब भाँती ॥
 आसन उचित दिए सब काहू । कहौँ काह मुख एक उछाहू ॥
 सकल बरात जनक सनमानी । दान मान बिनती बर बानी ॥
 बिधि हरि हरु दिसिपति दिनराऊ । जे जानहिं रघुबीर प्रभाऊ ।
 कपट बिप्र बर बेष बनाएँ । कौतुक देखहिं अति सचु पाएँ ॥
 पूजे जनक देव सम जानें । दिए सुआसन बिनु पहिचानें ।

छं०— पहिचान को केहि जान सबहि अपान सुधि भोरी भई ।
 आनंद कंदु बिलोकि दूलहु उभय दिसि आनंदमई ॥
 सुर लखे राम सुजान पूजे मानसिक आसन दए ।
 अवलोकि सीलु सुभाउ प्रभु को बिबुध मन प्रमुदित भए ॥

दो०— रामचंद्र मुख चंद्र छबि लोचन चारु चकोर

करत पान सादर सकल प्रेम् प्रमोदु न शोर ॥ ३२१ ॥
 समउ बिलोकि बसिष्ठ बोलाए । सादर सतानंदु सुनि आए ॥
 बेगि कुऔरि अब आनहु जाई । चले मुदित मुनि आयसु पाई ॥
 रानी सुनि उपरोहित बानी । प्रमुदित सखिन्ह समेत सगानी ॥
 बिप्र बधू कुलबृद्ध बोलाई । करि कुलरीति सुमंगल गाई ॥
 नारि बेष ज सुर बर बामा । सकल सुभायँ सुंदरी स्यामा ॥
 तिन्हहि देखि सुखु पावहि नारी । बिनु पहिचानि प्रानहु ते प्यारी ॥
 बार बार सनमानहि रानी । उमा रमा सारद सम जानी ॥
 सीय सँवारि समाजु बनाई । मुदित मंडपहिं चलीं लवाई ॥

छं०— छलि ल्याइ सीतहि सखीं सादर सजि सुमंगल भामिनीं ।
 नवसम साजें सुंदरीं सब मत्त कुजर गामिनीं ॥
 कल गान सुनि मुनि ध्यान त्यागहिं काम कोकिल लाजहीं ।
 मंजीर नूपुर कलित कंकन ताल गति बर बाजहीं ॥

दो०— सोहति बनिता बृंद महुँ सहज सुहावनि सीय ।

छबि ललना गन मध्य जनु सुषमा तिथ कमनीय ॥ ३२२ ॥
 सिय सुंदरता बरनि न जाई । लघु माति बहुत मनोहरताई ॥
 आवत दीखि बरातिन्ह सीता । रूप रासि सब भाँति पुनीता ॥
 सबहि मनहिं मन किए प्रनाम्ना । देखि राम भए पूरनकामा ॥
 हरषे दसरथ सुतन्ह समेता कहि न जाइ उर आनंदु जेता ॥
 सुर प्रनाम् करि बरिसहिं फूला । मुनि असीस धुनि मंगल मूला ॥

गान निसान कोलाहलु भारी । प्रेम प्रमोद मगन नर नारी ॥
 एहि बिधि सीय मंडपहिं आई । प्रमुदित सांति पढ़हिं मुनिराई ॥
 तेहि अवसर कर बिधि व्यवहारु । दुहुँ कुलगुर सब कीन्ह अचारु ॥

छं०— आचारु करि गुर गौरि गनपति मुदित बिप्र पुजावहीं ।
 सुर प्रगटि पूजा लेहिं देहिं असीस अति सुख पावहीं ॥
 मधुपर्क मंगल द्रव्य जो जेहि समय मुनि मन महुँ चहैं ।
 भरे कनक कोपर कलस सो तब लिएहिं परिचारक रहैं ॥
 कुल रीति प्रीति समेत रबि कहि देत सब सादर कियो ।
 एहि भाँति देव पुजाइ सीतहि सुभग सिंघासन दियो ॥
 सिय राम अवलोकनि परसपर प्रेमु काहुँ न लखि परै ।
 मन बुद्धि बर बानी अगोचर प्रगट कबि कैसें करै ॥

दो०— होम समय तनु धरि अनलु अति सुख आहुति लेहिं ।

बिप्र बेष धरि बेद सब कहि बिबाह बिधि देहिं ॥ ३२३ ॥
 जनक पाटमहिषी जग जानी । सीय मातु किमि जाइ बखानी ॥
 सुजसु सुकृत सुख सुंदरताई । सब समेटि बिधि रची बनाई ॥
 समउ जानि मुनिबरन्ह बोलाई । सुनत सुआसिनि सादर ल्याई ॥
 जनक बाम दिसि सोह सुनयना । हिमगिरि संग बनी जनु मयना ॥
 कनक कलस मनि कोपर रुरे । सुचि सुगंध मंगल जल पूरे ॥
 निज कर मुदित रायँ अरु रानी । धरे राम के आगें आनी ॥
 पढ़हिं बेद मुनि मंगल बानी । गगन सुमन झरि अवसरु जानी ॥
 बरु बिलोकि दंपति अनुरागे । पाय पुनीत पखारन लागे ॥

छं०— स्नागे परखारन पाथ पंकज प्रेम तन पुलकावली ।
 नभ नगर गान निमान जय धुनि उभगि जनु चहुँ दिशि चली ॥
 जे पद सगेज मनोज अरि उर सर सदैव बिराजहीं ।
 जे सकृत् भुमिगत बिमलता मन सकल कलि मल भाजहीं ॥
 जे परमि मुनिबनिता लही गति रही जो पातकमई ।
 मकरदु जिन्ह को सभु सिर सुचिता अर्वाधि सुर बरनई ॥
 करि मधुप मन मुनि जोगिजन जे सेइ अभिमत गति लहैं ।
 ते पद पखारत भाग्यभाजनु जनकु जय जय सब कहैं ॥
 बर कुँआँरि करतल जोरि साखोचारु दोउ कुलगुर करें ।
 भयो पानिगहन बिलोकि बिधि सुर मनुज मुनि आनंद भरें ॥
 सुखमूल दूलहु देखि दपति पुलक तन हुलस्यो हियो ।
 करि लोक बेद बिधानु कन्यादानु नृपभूषन कियो ॥
 हिमवंत जिमि गिरिजा महेसहि हरिहि श्री सागर दई ।
 तिमि जनक रामहि सिय समरपी बिस्व कल कीरति नई ॥
 क्यों करै बिनय विदेहु कियो बिदेहु मूरति सावैरी ।
 करि होमु बिधिवत गाँठि जोरी होन लागीं भावैरी ॥

दो०— जय धुनि बंदी बेद धुनि मंगल गान निमान ।

सुनि हरषहि बरषहि बिबुध मुगतरु सुमन भुजान ॥ ३२४ ॥
 कुँआँरु कुँआँर कल भावैर देहीं । नयन लाभु सब सादर लेहीं ॥
 जाइ न बरनि मनोहर जोरी । जो उपमा कछु कहैं सो थोरी ॥
 राम सीय सुंदर प्रतिछाहीं । जगमगात मनि खंभन माहीं ॥

मनहुँ मदन रति धरि बहु रूपा । देखत राम बिआहु अनूपा ॥
 दरस लालसा सकुच न थोरी । प्रगटत दुरत बहोरि बहोरी ॥
 भए मगन सब देखनिहारे । जनक समान अपान बिसारे ॥
 प्रमुदित मुनिन्ह भावैरौं फेरौं । नेगसहित सब रीति निबेरौं ॥
 राम सीय सिर सेंदुर देहीं । सोभा कहि न जाति बिधि केहीं ॥
 अरुन पराग जलजु भरि नीकें । ससिहि भूष अहि लोभ अमी कें ॥
 बहुरि बसिष्ठ दीन्ह अनुसासन । बरु दुलहिनि बैठे एक आसन ॥

छं०— बैठे बरासन रामु जानकि मुदित मन दसरथु भए ।
 तनु पुलक पुनि पुनि देखि अपने सुकृत सुरतरु फल नए ॥
 भरि भुवन रहा उछाहु राम बिबाहु भा सबहीं कहा ।
 केहि भाँति बरनि सिरात रसना एक यहु मंगलु महा ॥
 तब जनक पाइ बसिष्ठ आयसु ब्याह साज सँवारि कै ।
 मांडवी श्रुतकीरति उरमिला कुअरि लई हँकारि कै ॥
 कुसकेतु कन्या प्रथम जो गुन सील सुख सोभामई ।
 सब रीति प्रीति समेत करि सो ब्याहि नृप भरतहि दई ॥
 जानकी लघु भगिनी सकल सुंदरि सिरोमनि जानि कै ।
 सो तनय दोन्ही ब्याहि लखनहि सकल बिधि सनमानि कै ॥
 जेहि नामु श्रुतकीरति सुलोचनि सुमुखि सब गुन आगरी ।
 सो दई रिपुसूदनहि भूपति रूप सील उजागरी ॥
 अनुरूप बर दुलहिनि परस्पर लखि सकुच हियै हरषहीं ।
 सब मुदित सुंदरता सराहहि सुमन सुर गन बरषहीं ॥

सुंदरीं सुंदर बरन्ह सह सब एक मंडप राजहीं।

जनु जीव उर चारिउ अवस्था बिभून सहित बिराजहीं॥

दो० मुदित अवधपति सकल सुत बधुन्ह समेत निहारि।

जनु पाए महिपाल मनि क्रियन्ह सहित फल चारि॥ ३२५ ॥

जसि रघुवीर ब्याह बिधि बरनी । सकल कुअर ब्याहे तेहिं करनी ॥

कहि न जाइ कछु दाइज भूरी । रहा कनक मनि मंडपू पूरी ॥

कंबल बसन बिचित्र पटोरे । भाँति भाँति बहु मोल न थोरे ॥

गज रथ तुरग दास अरु दासी धेनु अलंकृत कामदुहा सी ।

बस्तु अनेक करिअ किमि लेखा । कहि न जाइ जानहिं जिन्ह देखा ॥

लोकपाल अवलोकि सिहाने । लीन्ह अवधपति सब सुखु माने ॥

दीन्ह जाचकन्हि जो जेहि भावा । उबरा सो जनवासेहिं आवा ॥

तब कर जोरि जनकु मृदु बानी । बोले सब बरात सनमानी ॥

छं० — सनमानि सकल बरात आदर दान बिनय बड़ाइ कै ।

प्रमुदित महामुनि बृंद बदे पूजि प्रेम लड़ाइ कै ॥

सिरु नाइ देव मनाइ सब सन कहत कर संपुट किएँ ।

सुर साथु चाहत भाउ सिधु कि तोष जल अंजलि दिएँ ।

कर जोरि जनकु बहोरि बंधु समेत कोसलराय सों ।

बोले मनोहर बचन सानि सनेह सोल सुभाय सों ॥

संबंध राजन रावरें हम बड़े अब सब बिधि भए ।

एहि राज साज समेत सेवक जानिबे बिनु गथ लए ॥

ए दारिका परिचारिका करि पालिबौ करुना नई ।
 अपराधु छमिबो बोलि पठए बहुत हौं ढीठयो कई ॥
 पुनि भानुकुलभूषन सकल सनमान निधि समधी किए ।
 कहि जाति नहिं बिनती परस्पर प्रेम परिपूरन हिए ॥
 बृंदारका गन सुमन बरिसहिं राउ जनवासेहि चले ।
 दंदुभी जय धुनि बेद धुनि नभ नगर कौतूहल भले ॥
 तब सखीं मंगल गान करत मुनीस आयसु पाइ कै ।
 दूलह दुलहिनिन्ह सहित सुंदरि चलीं कोहबर ल्याइ कै ॥

दो० - पुनि पुनि रामहि चितव सिय सकुचति मनु सकुचै न ।

हरत मनोहर मीन छबि प्रेम पिआसे नैन ॥ ३२६ ॥

मासपारायण, ग्यारहवाँ विश्राम

स्याम सरीर सुभायँ सुहावन । सोभा कोटि मनोज लजावन ॥
 जावक जुत पद कमल सुहाए । मुनि मन मधुप रहत जिन्ह छाए ॥
 पीत पुनीत मनोहर धोती । हरति बाल रबि दामिनि जोती ॥
 कल किंकिनि कटि सूत्र मनोहर । बाहु बिसाल बिभूषन सुंदर ॥
 पीत जनेउ महाछबि देई । कर मुद्रिका चोरि चितु लेई ॥
 सोहत ब्याह साज सब साजे । उर आयत उरभूषन राजे ॥
 पिअर उपरना काखासोती । दुहुँ आँचरन्हि लगे मनि मोती ॥
 नयन कमल कल कुंडल काना । बदन सक्ल सौंदर्ज निधाना ॥
 सुंदर भृकुटि मनोहर नासा । भाल तिलकु रुचिरता निवासा ॥
 सोहत मौर मनोहर माथे । मंगलमय मुकुता मनि गाथे ॥

छं०— गाथे महामनि मौर मंजुल अंग सब चित चोरहीं ।
 पुर नारि सुर सुंदरीं बरहि बिलोकि सब तिन तोरहीं ॥
 मनि बसन भूषन वारि आरति करहि मंगल गावहीं ।
 सुर सुमन बरिमहि सूत मागध बंदि सुजमु सुनावहीं ॥
 कोहबरहि आने कुअँर कुअँरि सुआसनिन्ह मुख पाइ कै ।
 अति प्रीति लौकिक रीति लागीं करन मंगल गाइ कै ॥
 लहकौरि गौरि सिखाव रामहि सीय सन सारद कहैं ।
 रगिचाम् हास बिलास रस बस जन्म को फलु सब लहैं ।
 निज पानि मनि महुं देखिअति मूरति सूरूपनिधान की ।
 चालति न भुजबल्ली बिलोकनि बिरह भय बस जानकी ॥
 कौतुक बिनोद प्रमोद प्रेम न जाइ कहि जानहि अलीं ।
 बर कुअँरि सुंदर सकल सखीं लवाइ जनवासेहि चलीं ॥
 तेहि समय सुनिअ असोस जहँ तहँ नगर नभ आनँदु महा ।
 चिरु जिअहुँ जोरीं चारु चार्यो मुदित मन सबहीं कहा ॥
 जोगींद्र सिद्ध मुनीस देव बिलोकि प्रभु दुंदुभि हनी ।
 चले हर्षि बरषि प्रसून निज निज लोक जय जय जय भनी ॥

दो०— सहित बधूटिन्ह कुअँर सब तब आए पितु पास ।

सोभा मंगल मोद भरि डमगेउ जनु जनवास ॥ ३२७ ॥

पुनि जेवनार भई बहु भाँती । पटए जनक बोलाइ बराती ॥

परत पाँवदे ब्रमन अनूषा सुतन्ह समेत गवन कियो भूषा ।

सादर सब के पाय पखारे । जथाजोगु पीढ़न्ह बैठारे ।
 धोए जनक अवधपति चरना । सीलु सनेहु जाइ नहिं बरना ॥
 बहुरि राम पद पंकज धोए । जे हर हृदय कमल महुँ गोए ॥
 तीनिउ भाइ राम सम जानी । धोए चरन जनक निज पानी ॥
 आसन उचित सबहि नृप दीन्हे । बोलि सूपकारी सब लीन्हे ॥
 सादर लगे परन पनवारे । कनक कील मनि पान सँवारे ॥
 दो०—सूपोदन सुरभी सरपि सुंदर स्वादु पुनीत ।

छन महुँ सब के परुसि मे चतुर सुआर बिनीत ॥ ३२८ ॥
 पंच कवल करि जेवन लागे । गारि गान सुनि अति अनुरागे ॥
 भाँति अनेक परे पकवाने । सुधा सरिस नहिं जाहिं बखाने ॥
 परुसन लगे सुआर सुजाना । बिजन बिबिध नाम को जाना ॥
 चारि भाँति भोजन बिधि गाई । एक एक बिधि बरनि न जाई ।
 छरस रुचिर बिजन बहु जाती । एक एक रस अर्गानत भाँती ॥
 जेवँत देहिं मधुर धुनि गारी । लै लै नाम पुरुष अरु नारी ।
 समय सुहावनि गारि बिराजा । हँसत राउ सुनि सहित समाजा ।
 एहि बिधि सबहीं भोजनु कीन्हा । आदर सहित आचमनु दीन्हा ॥
 दो०—देइ पान पूजे जनक दसरथु सहित समाज ।

जनवामेहि गवने मुदित सकल भूप सिरताज ॥ ३२९ ॥
 नित नूतन मंगल पुर माहीं । निमिष सरिस दिन जामिनि जाहीं ॥
 बड़े भोर भूपतिमनि जागे । जाचक गुन गन गावन लागे ॥

देखि कुअरै बर बधुन्ह समेता । किमि कहि जात मोदु मन जेता ॥
 प्रार्ताक्रिया करि गे गुरु पाहीं । महाप्रमोदु प्रेमु मन माहीं ॥
 करि प्रनामु पूजा कर जासी बाले गिरा अमिअँ जनु बोरी ॥
 तुम्हरी कृपाँ सुनहु मुनिराजा भयउँ आजु मैं पूरन काजा ॥
 अब सब बिप्र बोलाइ गोसाईं । देहु धेनु सब भाँत बनाई ।
 सुनि गुर करि महिपाल बटाई पुनि पठए मुनिबृद बोलाई ।
 दो० — बामदेउ अरु देवराधि बालमोँक जाबालि ।

आए मुनिबर निकर तब कौंसिकादि तपसालि ॥ ३३० ॥
 दंड प्रनाम सर्वाहि नृप कीन्हें । पूजि सप्रेम बरासन दीन्हें ।
 चारि लच्छ बर धेनु मगाई काम सुराधि सम सील सुहाई ।
 सब बिधि सकल अलंकृत कीन्हों । मुदित महिप महिदेवन्ह दीन्हों ।
 करत बिनय बहु बिधि नरनाहू । लहेउँ आजु जग जीवन लाहू ।
 पाइ असीस महीसु अनंदा लिए बोलि पुनि जाचक बृंदा ।
 कनक बसन मानि हय गय स्यदन । दिए बृझि रुचि रबिकुलनंदन ।
 चले पद्धत गावत गुन गाथा । जय जय जय दिनकर कुल नाथा ।
 एहि बिधि राम बिआह उछाहू । सकइ न बरान सहस मुख जाहू ।
 दो० बार बार कौंसिक चरन सीसु नाइ कह राउ ।

यह सबु सुखु मुनिराज तब कृपा कटाच्छ पसाउ ॥ ३३१ ॥
 जनक सनेहु सीसु करतूनी नृप सब भाँन सराह बिभूती ॥
 दिन उठि बिदा अवधर्पात मागा । राखहिं जनक सहित अनुरागा ।

नित नूतन आदरु अधिकार्ई । दिन प्रति सहस भौंति पहुनाई ॥
 नित नव नगर अनंद उछाहू । दसरथ गवनु सोहाइ न काहू ॥
 बहुत दिवस बीते एहि भाँती । जनु सनेह रजु बँधे बराती ॥
 कौंसिक सतानंद तब जाई । कहा बिदेह नृपहि समुझाई ॥
 अब दसरथ कहँ आयसु देहू । जद्यपि छाड़ि न सकहु सनेहू ॥
 भलेहिं नाथ कहि सचिव बोलाए । कहि जय जीव सीस तिन्ह नाए ॥
 दो०— अवधनाथु चाहत चलन भीतर करहु जनाउ ।

भए प्रेमबस सचिव सुनि बिग्र सभासद राउ ॥ ३३२ ॥
 पुरबासी सुनि चलिहि बराता । बूझत बिकल परस्पर बाता ॥
 सत्य गवनु सुनि सब बिलखाने । मनहुँ साँझ सरसिज सकुचाने ॥
 जहँ जहँ आवत बसे बराती । तहँ तहँ सिद्ध चला बहु भाँती ॥
 बिबिध भाँति मेवा पकवाना । भोजन साजु न जाइ बखाना ॥
 भरि भरि बसहँ अपार कहारा । पठई जनक अनेक सुसारा ॥
 तुरग लाख रथ सहस पचीसा । सकल सँवारे नख अरु सीसा ॥
 मत्त सहस दस सिधुर साजे । जिन्हहि देखि दिसि कुंजर लाजे ।
 कनक बसन मनि भरि भरि जाना । महिषी धेनु बस्तु बिधि नाना ।
 दो०— दाइज अमित न सकिअ कहि दीन्ह बिदेहँ बहोरि ।

जो अवलोकत लोकपति लोक संपदा धोरि ॥ ३३३ ॥
 सबु समाजु एहि भाँति बनाई । जनक अवधपुर दीन्ह पठाई ॥
 चलिहि बरात सुनत सब रानी । बिकल मीनगन जनु लघु पानी ॥

पुनि पुनि सीय गोद करि लेहीं । देइ असीस सिखावनु देहीं ॥
 होएहु संतत पियहि पिआरी । चिरु अहिबात असीस हमारी ॥
 मासु समुर गुर सेवा करेहू । पति रुख लखि आयसु अनुसेहू ॥
 अति सनेह बस सखीं सयानी । नारि धरम सिखवहिं मृदु बानी ॥
 सादर सकल कुआँरि समुझाई । रानिन्ह बार बार उर लाई ॥
 बहुरि बहुरि भेटहिं महतारीं । कहहिं बिरंचि रचीं कत नारीं ॥
 दो०— तहि अवसर भाइन्ह सहित रामु भानु कुल केतु ।

चले जनक मंदिर मुदित बिदा करावन हेतु ॥ ३३४ ॥
 चारिउ भाइ सुभायँ सुहाए । नगर नारि नर देखन धाए ॥
 कोउ कह चलन चहत हहिं आजू । कीन्ह बिदेह बिदा कर साजू ।
 लेहु नयन परि रूप निहारी । प्रिय पाहुने भूप सुत चारी ॥
 को जानै केहिं सुकृत सयानी । नयन अतिथि कीन्हे बिधि आनी ॥
 मरनसीलु जिमि पाव पिऊष । सुरतरु लहै जनम कर भूखा ॥
 पाव नारकी हरिपदु जैसें । इन्ह कर दरसनु हम कहँ तैसें ।
 निरखि राम सोभा उर धरहू । निज मन फनि मूरति मनि करहू ॥
 एहि बिधि सबहि नयन फलु देता । गए कुआँर सब राज निकेता ॥
 दो०— रूप सिंधु सब बंधु लखि हरषि उठा रनिवामु ।

करहिं निछावरि आरती महा मुदित मन सासु ॥ ३३५ ॥
 देखि राम छवि अति अनुगर्गी । प्रेमबिबम पुनि पुनि पद लागीं ॥
 रही न लाज प्रीति उर छाई । सहज सनेहु बरनि किमि जाई ॥

भाइन्ह सहित उबटि अन्हवाए । छरस असन अति हेतु जेवाँए ।
 बोले रामु सुअवसरु जानी । सील सनेह सकुचमय बानी ॥
 राउ अवधपुर चहत सिधाए । बिदा होन हम इहाँ पठाए ॥
 मातु मुदित मन आयसु देहू । बालक जानि करब नित नेहू ॥
 सुनत बचन बिलखेउ रनिवामू । बोलि न सकहिं प्रेमबस सासू ॥
 हृदयँ लगाइ कुअँरि सब लीन्हो । पतिन्ह सौँपि बिनती अति कीन्हो ॥
 छं० - करि बिनय सिय रामहि समरपी जोरि कर पुनि पुनि कहै ।

बलि जाउँ तात सुजान तुम्ह कहँ बिदित गति सब की अहै ॥

परिवार पुरजन मोहि राजहि प्रानप्रिय सिय जानिबी ।

तुलसीस सीलु सनेहु लखि निज किंकरी करि मानिबी ॥

सो० - तुम्ह परिपूरन काम जान सिरोमनि भावप्रिय ।

जन गुन गाहक राम दोष दलन करुनायतन ॥ ३३६ ॥

अस कहि रही चरन गहि रानी । प्रेम पंक जनु गिरा समानी ॥

सुनि सनेहसानी बर बानी । बहुर्बाध राम सासु सनभानी ॥

राम बिदा मागत कर जोरी । कीन्ह प्रनामु बहोरि बहोरी ॥

पाइ असीस बहुरि सिरु नाई । भाइन्ह सहित चले रघुराई ॥

मंजु मधुर मूरति उर आनी । भई सनेह सिथिल सब रानी ॥

पुन धीरजु धरि कुअँरि हँकारी । बार बार भेटहि महतारी ॥

पहुँचावहि फिरि मिलहि बहोरी । बढ़ी परस्पर प्रीति न थोरी ॥

पुनि पुनि मिलत सखिन्ह बिलगाई । बाल बच्छ जिमि धेनु लवाई ।

दो०— प्रेमबिबस नर नारि सब सखिन्ह सहित रनिवासु।

मानहुँ कीन्ह बिदेहपुर करुनाँ बिरहँ निवासु ॥ ३३७ ॥
 सुक सारिका जानकी ज्याए । कनक पिजरन्हि सखि पढ़ाए ।
 व्याकुल कहहिं कहाँ बैदेही । सुनि धीरजु परिहरइ न केही ॥
 भए बिकल खग मृग एहि भाँती । मनुज दसा कैसैं कहि जाती ॥
 बंधु समेत जनकु तब आए । प्रेम उमगि लोचन जल छाए ॥
 सीय बिलोकि धीरता भागी । रहे कहावत परम बिरागी ।
 लीन्हि रायँ उर लाइ जानकी । मिटी महामरजाद ग्यान की ।
 समुझावत सब सचिव सयाने । कीन्ह बिचारु न अवसर जाने ।
 बारहिं बार सुता उर लाई । सजि सुंदर पालकी मगाई ॥

दो०— प्रेमबिबस परिवारु सबु जानि सुलगन नैस।

कुऔरि चढ़ाई पालकिन्ह सुमिरे सिद्धि गनेस ॥ ३३८ ॥
 बहुबिधि भूप सुता समुझाई । नारिधरमु कुलसीति सिखाई ॥
 दासीं दास दिए बहुतेरे । सुचि सेवक जे प्रिय सिय केरे ॥
 सीय चलत व्याकुल पुरबासी । होहि सगुन सुभ मंगल रासी ॥
 भूसुर सचिव समेत समाजा । संग चले पहुँचावन राजा ।
 समय बिलोकि बाजने बाजे रथ गज बाजि बरातिन्ह साजे ॥
 दसरथ बिप्र बोलि सब लीन्है । दान मान परिपूरन कीन्है ॥
 चरन सरोज धूरि धरि सीसा । मुदित महीपति पाइ असीसा ॥
 सुमिरि गजाननु कीन्ह पयाना मंगलमूल सगुन भए नाना ॥

दो०— सुर प्रसून बरषहिं हरषि करहिं अपछरा गान ।

चले अवधपति अवधपुर मुदित बजाइ निसान ॥ ३३९ ॥
 नृप करि बिनय महाजन फेरे । सादर सकल मागने टेरे ।
 भूषन बसन बाजि गज दीन्हे । प्रेम पोषि ठाढ़े सब कीन्हे ॥
 बार बार बिरिदावलि भाषी । फिरे सकल रामहि उर राखी ॥
 बहुरि बहुरि कोसलपति कहहीं । जनकु प्रेमबस फिरै न चहहीं ॥
 पुनि कह भूपति बचन सुहाए । फिरिअ महीस दूर बड़ि आए ।
 राउ बहोरि उतरि भए ठाढ़े । प्रेम प्रबाह बिलोचन बाढ़े ॥
 तब बिदेह बोले कर जोरी । बचन सनेह सुधौं जनु बोरी ॥
 करौं कवन बिधि बिनय बनाई । महाराज मोहि दीन्हि बड़ाई ॥
 दो०— कोसलपति समधी सजन सनमाने सब भाँति ।

मिलनि परसपर बिनय अति प्रीति न हृदयँ समाति ॥ ३४० ॥
 मुनि मंडलिहि जनक सिरु नावा । आसिरबादु सबहि सन पावा ॥
 सादर पुनि भेंटे जामाता । रूप सील गुन निधि सब भ्राता ॥
 जोरि पंकरुह पानि सुहाए । बोले बचन प्रेम जनु जाए ॥
 राम करौं केहि भाँति प्रसंसा । मुनि महेस मन मानस हंसा ॥
 करहिं जोग जोगी जेहि लागी । कोहु मोहु ममता मदु त्यागी ॥
 व्यापकु ब्रह्म अलखु अबिनासी । चिदानंदु निरगुन गुनरासी ॥
 मन समेत जेहि जान न बानी । तर्यक न सकहिं सकल अनुमानी ॥
 महिमा निगमू नेति कहि कहई । जो तिहँ काल एकरस रहई ॥

दो०— नयन बिषय मो कहँ भयउ सो समस्त सुख मूल।

सबइ लाभु जग जीव कहँ थएँ ईमु अनुकूल ॥ ३४१ ॥
 सबहि भौंति मोहि दीन्ह बड़ाई । निज जन जानि लीन्ह अपनाई ॥
 होहिं सहस दस सारद सेषा । करहिं कल्प कोटिक भरि लेखा ॥
 मोर भाग्य राउर गुन गाथा । कहि न सिराहिं सुनहु रघुनाथा ॥
 मैं कछु कहउँ एक बल मोरे । तुम्ह रीझहु सनेह सुठि थोरें ॥
 बार बार मागउँ कर जोरें । मनु परिहरै चरन जनि भोरें ॥
 सुनि बर बचन प्रेम जनु पोषे । पूरनकाम रामु परितोषे ॥
 करि बर बिनय ससुर सनमाने । पितु कौसिक बसिष्ठ सम जाने ॥
 बिनती बहुरि भरत सन कोन्ही । मिलि सप्रेम पुनि आसिष दीन्ही ॥
 दो०—मिले लखन रिपुमृदनहि दीन्हि असीस महीस।

भए परसपर प्रेमबस फिरि फिरि नावहिं सीस ॥ ३४२ ॥
 बार बार करि बिनय बड़ाई । रघुपति चले संग सब भाई ॥
 जनक गहै कौसिक पद जाई । चरन रेनु सिर नयनन्ह लाई ॥
 सुनु मुनीस बर दरसन तोरें । अगमु न कछु प्रतीति मन मोरें ।
 जो सुख सुजसु लोकपति चहहीं । करत मनोरथ सकुचत अहहीं ॥
 सो सुख सुजसु सुलभ मोहि स्वामी । सब सिधि तव दरसन अनुगामी ॥
 कोन्हि बिनय पुनि पुनि स्मि नई । फिरे महीसु आसिषा पाई ॥
 चली बरात निसान बजाई । मृदित छोट बड़ सब समुदाई ॥
 रामहि निरखि ग्राम नर नारी । पाइ नयन फलु होहिं सुखारी ॥

दो०— बीच बीच बर बास करि मग लोगन्ह सुख देत।

अवध समीप पुनीत दिन पहुँची आइ जनेत ॥ ३४३ ॥
 हने निसान पनव बर बाजे । भेरि संख धुनि हय गय गाजे ।
 झाँझ बिरत्र डिंडिमीं सुहाई । सरस राग बाजहिं सहनाई ।
 पुर जन आवत अकनि बराता । मुदित सकल पुलकावलि गाता ॥
 निज निज सुंदर सदन सँवारे । हाट बाट चौहट पुर द्वारे ।
 गलीं सकल अरगजाँ सिंचाई । जहँ तहँ चौकें चारु पुराई ।
 बना बजारु न जाइ बखाना । तोरन केतु धताक बिताना ॥
 सफल पूगफल कदल रसाला । रोपे बकुल कदंब तमाला ॥
 लगे सुभग तरु परसत धरनी । मनिमय आलबाल कल करनी ॥
 दो०— बिबिध भाँति मंगल कलस गृह गृह रचे सँवारि।

सुर ब्रह्मादि सिंहाहिं सब रघुबर पुरी निहारि ॥ ३४४ ॥
 भूप भवनु तेहि अवसर मोहा । रचना देखि मदन मनु मोहा ॥
 मंगल सगुन मनोहरताई । रिधि सिधि सुख संपदा सुहाई ॥
 जनु उछाह सब सहज सुहाए । तनु धरि धरि दसरथ गृहँ छाए ॥
 देखन हेतु राम बैदेही । कहहु लालसा होहि न केही ॥
 जूथ जूथ मिलि चलीं सुआसिनि । निज छबि निदर्हि मदन बिलासिनि ॥
 सकल सुमंगल सजें आरती । गावहिं जनु बहु बेष भारती ॥
 भूपति भवन कोलाहलु होई । जाइ न बरनि समउ सुखु सोई ॥
 कौसल्यादि राम महतारीं । प्रेमबिबस तन दसा बिसारीं ॥

दो०— दिए दान बिप्रन्ह बिपुल पूजि गनेस पुरारि।

प्रमुदित परम दरिद्र जनु पाइ पदारथ चारि॥ ३४५॥
 मोद प्रमोद बिबस सब माता चलहि न चरन सिथिल भए गाता॥
 राम दरस हित अति अनुसगीं परिछनि साजु सजन सब लागीं॥
 बिबिध बिधान बाजने बाजे । मंगल मुदित सुमित्राँ साजे ।
 हरद दूब दधि पल्लव फूला । पान पूगफल मंगल मूला॥
 अच्छत अकुर लोचन लाजा । मंजुल मंजरि तुलसि बिराजा॥
 छुहे पुरट घट सहज सुहाए मदन सकुन जनु नीड़ बनाए॥
 सगुन सुगंध न जाहिं बखानी मंगल सकल सजहिं सब रानी॥
 रचीं आरतीं बहुत बिधाना । मुदित करहिं कल मंगल गाना॥
 दो०— कनक थार भरि मंगलन्हि कमल करन्हि लिएँ मात ।

चलीं मुदित परिछनि करन पुलक पल्लवित गात॥ ३४६॥
 धूप धूप नभु मेचक भयऊ । सावन घन घमंडु जनु ठयऊ॥
 सुरतरु सुमन माल सुर बरषहिं । मनहुँ बलाक अवलि मनु करषहिं॥
 मंजुल मानमय बंदनिवारे । मनहुँ पाकरिपु चाप सँवारे॥
 प्रगटहिं दुरहिं अटन्ह पर भामिनि । चारु चपल जनु दमकहिं दामिनि॥
 दुंदुभि धुनि घन गरजनि घोरा । जाचक चातक दादुर मोरा॥
 सुर सुगंध सुचि बरषहिं बारी । सुखी सकल ससि पुर नर नारी॥
 समउ जानि गुर आयसु दीन्हा । पुर प्रबेसु रघुकुलमनि कीन्हा ।
 सुमिरि संभु गिरिजा गनराजा । मुदित महीपति सहित समाजा॥

दो०— होहिं सगुन बरषहि सुमन सुर दुंदुभीं बजाइ ।

बिबुध बधू नाचहि मुदित मंजुल मंगल गाइ ॥ ३४७ ॥
 मागध सूत बंदि नट नागर । गावहिं जसु तिहु लोक उजागर ॥
 जय धुनि बिमल बेद बर बानी । दस दिसि सुनिअ सुमंगल सानी ॥
 बिपुल बाजने बाजन लागे । नभ सुर नगर लोग अनुरागे ॥
 बने बराती बरनि न जाहीं । मह मुदित मन सुख न समाहीं ॥
 पुरबासिन्ह तब राय जोहारे । देखत रामहि भए सुखारे ॥
 करहिं निछावरि मनिगन चीरा । बारि बिलोचन पुलक सरीरा ॥
 आरति करहिं मुदित पुर नारी । हरषहिं निरखि कुअर बर चारी ॥
 सिबिका सुभग ओहार उघारी । देखि दुलहिनिन्ह होहिं सुखारी ॥
 दो०— एहि बिधि सबही देत सुखु आए राजदुआर ।

मुदित मातु परिछनि करहिं बधुन्ह समेत कुमार ॥ ३४८ ॥
 करहिं आरती बारहिं बारा । प्रेमु प्रमोदु कहै को पारा ॥
 भूषन मनि पट नाना जाती । करहिं निछावरि अगनित भाँती ॥
 बधुन्ह समेत देखि सुत चारी । परमानंद मगन महतारी ॥
 पुनि पुनि सीय राम छबि देखी । मुदित सफल जग जीवन लेखी ॥
 सखीं सीय मुख पुनि पुनि चाही । गान करहिं निज सुकृत सराही ॥
 बरषहिं सुमन छर्नाहिं छन देवा । नाचहिं गावहिं लावहिं सेवा ॥
 देखि मनोहर चारिउ जोरीं । सारद उपमा सकल ढँढोरीं ॥
 देत न बनहिं निपट लघु लागीं । एकटक रहीं रूप अनुरागीं ॥

दो०—निगम नीति कुल रीति करि अरघ पाँवड़े देत।

बधुन्ह सहित सत परिछि सब चलीं लवाइ निकेत॥ ३४९॥
 चारि सिघासन सहज सुहाए । जनु मनोज निज हाथ बनाए ॥
 तिन्ह पर कुअँरि कुअँर बैठारे । सादर पाय पुनोत पखारे ॥
 धूप दीप नैबेद बेद बिधि । पूजे बर दुलहिनि मंगल निधि ॥
 बारहिं बार आरती करहीं । व्यजन चारु चामर सिर ढरहीं ॥
 बस्तु अनेक निछावरि होहीं । भरौ प्रमोद मातु सब सोहीं ।
 पावा परम तत्व जनु जोगीं । अमृतु लहेउ जनु संतत रोगीं ॥
 जनम रंक जनु पारस पावा । अंधहि लोचन लाभु सुहावा ॥
 मूक बदन जनु सारद छाई । मानहुँ समर सूर जय पाई ॥
 दो०— एहि सुख ते सत कोटि गुन पावहिं मातु अनंदु ।

भाइन्ह सहित बिआहि घर आए रघुकुलचंदु ॥ ३५० (क) ॥
 लोक रीति जननीं करहिं बर दुलहिनि सकुचाहिं ।

मोदु बिनोदु बिलोकि बड़ रामु मनहिं मुसुकाहिं ॥ ३५० (ख) ॥
 देव पितर पूजे बिधि नीकी । पूजौ सकल बासना जी की ॥
 सबहि बंदि मागहिं बरदाना । भाइन्ह सहित राम कल्याणा ॥
 अंतरहित सुर आसिष देहीं । मुदित मानु अंचल भरि लेहीं ॥
 भूपति बोलि बराती लीन्हे । जान बसन मनि भूषन दीन्हे ॥
 आयसु पाइ राखि उर रामहि । मुदित गए सब निज निज धामहि ॥
 पुर नर नारि सकल पहिराए । घर घर बाजन लगे बधाए ।

जाचक जन जाचहिं जोइ जोई । प्रमुदित राउ देहिं सोइ सोई ॥
 सेवक सकल बजनिआ नाना । पूरन किए दान सनमाना ॥
 दो०— देहिं असीस जोहारि सब गावहिं गुन गन गाथ ।

तब गुर भूसुर सहित गृहं गवनु कीन्ह नरनाथ ॥ ३५१ ॥
 जो बसिष्ट अनुसासन दीन्ही । लोक बेद बिधि सादर कीन्ही ॥
 भूसुर भीर देखि सब रानी । सादर उठीं भाग्य बड़ जानी ॥
 पाव पखारि सकल अन्हवाए । पूजि भली बिधि भूप जेवाँए ॥
 आदर दान प्रेम परिपोषे । देत असीस चले मन तोषे ॥
 बहु बिधि कीन्ह गाधिसुत पूजा । नाथ मोहि सम धन्य न दूजा ॥
 कीन्ह प्रसंसा भूपति भूरी । रानिन्ह सहित लीन्ह पग धूरी ॥
 भीतर भवन दीन्ह बर बासू । मन जोगवत रह नृपु रनिवासू ॥
 पूजे गुर पद कमल बहोरी । कीन्ह बिनय उर प्रीति न थोरी ॥
 दो०— बधुन्ह समेत कुमार सब रानिन्ह सहित महीसु ।

पुनि पुनि बंदत गुर चरन देत असीस मुनीसु ॥ ३५२ ॥
 बिनय कीन्ह उर अति अनुरागें । सुत संपदा राखि सब आगें ॥
 नेगु मागि मुनिनायक लीन्हा । आसिरबादु बहुत बिधि दीन्हा ॥
 उर धरि रामहि सीय समेता । हरषि कीन्ह गुर गवनु निकेता ॥
 बिप्रबधू सब भूप बोलाई । चैल चारु भूषन पहिराई ॥
 बहुरि बोलाइ सुआसिनि लीन्हीं । रुचि बिचारि पहिरावनि दीन्हीं ॥
 नेगी नेग जोग सब लेहीं । रुचि अनुरूप भूपमनि देहीं ॥

प्रिय पाहुने पूज्य जे जाने । भूपति भली भाँति सनमाने ॥
देव देखि रघुबीर बिबाहू । बरषि प्रसून प्रसंसि उछाहू ॥
दो०—चले निमान बजाइ सुर निज निज पुर सुख पाइ ।

कहत परसपर राम जसु प्रेम न हृदयँ समाइ ॥ ३५३ ॥
सब बिधि सबहि समदि नरनाहू । रहा हृदयँ भरि पूरि उछाहू ॥
जहँ रनिवासु तहाँ प्रगु धारे । सहित बहूटिन्ह कुअँर निहारे ॥
लिए गोद करि मोद समेता । को कहि सकइ भयउ सुखु जेता ॥
बधू सप्रेम गोद बैठारी । बार बार हियँ हरषि दुलारी ॥
देखि समाजु मुदित रनिवासू । सब कें उर अनंद कियो बासू ॥
कहेउ भूप जिमि भयउ बिबाहू । सुनि सुनि हरषु होत सब काहू ॥
जनक राज गुन सीलु बड़ाई । प्रीति रीति संपदा सुहाई ॥
बहुबिधि भूप भाट जिमि बरनी । रानी सब प्रमुदित सुनि करनी ॥
दो० सुतन्ह समेत नहाइ नृप बोलि बिप्र गुर ग्याति ।

भोजन कीन्ह अनेक बिधि घरी पंच गइ राति ॥ ३५४ ॥
मंगलगान करहि बर भामिनि । भै सुखमूल मनोहर जामिनि ॥
अँचइ पान सब काहूँ पाए । स्नग सुगंध भूषित छबि छाए ॥
रामहि देखि रजायसु पाई । निज निज भवन चले सिर नाई ॥
प्रेम प्रमोदु बिनोदु बड़ाई । समउ समाजु मनोहरताई ।
कहि न सकहि सत सारद सेसू । बेद बिराँच महेस गनेसू ॥
सो मैं कहौँ कवन बिधि बरनी । भूमिनागु सिर धरइ कि धरनी ॥

नृप सब भाँति सबहि सनमानी । कहि मृदु बचन बोलाई रानी ॥
बधू लरिकनीं पर घर आई । राखेहु नयन पलक की नाई ॥
दो०— लरिका श्रमित उनीद बस सयन करावहु जाइ ।

अस कहि गे बिश्रामगृहँ राम चरन चितु लाइ ॥ ३५५ ॥
भूप बचन सुनि सहज सुहाए । जरित कनक मनि पलँग डसाए ॥
सुभग सुरभि पय फेन समाना । कोमल कलित सुपेतीं नाना ॥
उपबरहन बर बरनि न जाहीं । स्नग सुगंध मनिमंदिर माहीं ॥
रतनदीप सुठि चारु चँदोवा । कहत न बनइ जान जेहिं जोवा ॥
सेज रुचिर रचि रामु उठाए । प्रेम समेत पलँग पौढ़ाए ॥
अग्या पुनि पुनि भाइन्ह दीन्ही । निज निज सेज सयन तिन्ह कीन्ही ॥
देखि स्याम मृदु मंजुल गाता । कहहिं सप्रेम बचन सब माता ॥
मारग जात भयावनि भारी । केहि बिधि तात ताड़का मारी ॥
दो०— घोर निसाचर बिकट भट समर गनहिं नहिं काहु ।

मारे सहित सहाय किमि खल मारीच सुबाहु ॥ ३५६ ॥
मुनि प्रसाद बलि तात तुम्हारी । ईस अनेक करवरें टारी ॥
मख रखवारी करि दुहुँ भाई । गुरु प्रसाद सब बिद्या पाई ॥
मुनि तिय तरी लगत पग धूरी । कीरति रही भुवन भरि पूरी ॥
कमठ पीठि पबि कूट कठोरा । नृप समाज महुँ सिव धनु तोरा ॥
बिस्व बिजय जसु जानकि पाई । आए भवन ब्याहि सब भाई ॥
सकल अमानुष करम तुम्हारे । केवल कौंसिक कृपाँ सुधारे ॥

आजु सुफल जग जनमु हमारा । देखि तात बिभुबदन तुम्हारा ॥
जे दिन गए तुम्हहि बिनु देखैं । ते बिरंचि जनि पारहि लेखैं ॥
दो०— राम प्रतोषीं मातु सब कहि विनीत बर बैन ।

सुमिरि संभु गुर बिप्र पद किए नीदबस नैन ॥ ३५७ ॥
नीदउँ बदन सोह सुठि लोना । मनहुँ साँझ सरसीरुह सोना ।
घर घर करहिं जागरन नारीं । देहिं परसपर मंगल गारीं ॥
पुरी बिराजति राजति रजनी । रानीं कहहि बिलोकहु सजनी ॥
सुंदर बधुन्ह सामु लै सोई । फनिकन्ह जनु सिरमनि उर गोई ।
प्रात पुनीत काल प्रभु जागे । अरुनचूड बर बोलन लागे ॥
बंदि मागधन्हि गुनगन गाए । पुरजन द्वार जोहारन आए ॥
बंदि बिप्र सुर गुर पितु माता । पाइ असीस मुदित सब भ्राता ॥
जननिन्ह सादर बदन निहारे । भूपति संग द्वार पगु धारे ॥
दो०— कीन्हि सौच सब सहज सुचि सरित पुनीत नहाइ ।

प्रातक्रिया करि तात पहिं आए चारिउ भाइ ॥ ३५८ ॥

नवाह्नपारायण, तीसरा विश्राम

भूप बिलोकि लिए उर लाई । बैठे हरषि रजायसु पाई ॥
देखि रामु सब सभा जुड़ानी । लोचन लाभ अर्वाध अनुमानी ॥
पुनि बसिष्ट मुनि कौसिकु आए । सुभग आसनन्हि मुनि बैठाए ॥
सुतन्ह समेत पूजि पद लागे । निरखि रामु दोउ गुर अनुरागे ॥
कहहिं बसिष्ट धरम इतिहासा । सुनिहिं महीसु सहित रनिवासा ॥

मुनि मन अगम गाधिसुत करनी । मुदित बसिष्ट बिपुल बिधि बरनी ॥
 बोले बामदेउ सब साँची । कीरति कलित लोक तिहुँ माची ॥
 सुनि आनंदु भयउ सब काहू । राम लखन उर अधिक उछाहू ॥
 दो०— मंगल मोद उछाह नित जाहिं दिवस एहि भाँति ।

उमगी अवध अनंद भरि अधिक अधिक अधिकाति ॥ ३५९ ॥
 सुदिन सोधि कल कंकन छोरे । मंगल मोद बिनोद न थोरे ॥
 नित नव सुखु सुर देखि सिहाहीं । अवध जन्म जाचहिं बिधि पाहीं ॥
 बिस्वामित्रु चलन नित चहहीं । राम सप्रेम बिनय बस रहहीं ॥
 दिन दिन सयगुन भूपति भाऊ । देखि सराह महामुनिराऊ ॥
 मागत बिदा राउ अनुरागे । सुतन्ह समेत ठाढ़ भे आगे ॥
 नाथ सकल संपदा तुम्हारी । मैं सेवकु समेत सुत नारी ॥
 करब सदा लरिकन्ह पर छोहू । दरसनु देत रहब मुनि मोहू ॥
 अस कहि राउ सहित सुत रानी । परेउ चरन मुख आव न बानी ॥
 दीन्हि असीस बिप्र बहु भाँती । चले न प्रीति रीति कहि जाती ॥
 रामु सप्रेम संग सब भाई । आयसु पाइ फिरे पहुँचाई ॥
 दो०— राम रूपु भूपति भगति ब्याहु उछाहु अनंदु ।

जात सराहत मनहिं मन मुदित गाधिकुलचंदु ॥ ३६० ॥
 बामदेव रघुकुल गुर ग्यानी । बहुरि गाधिसुत कथा बखानी ॥
 सुनि मुनि सुजसु मनहिं मन राऊ । बरनत आपन पुन्य प्रभाऊ ॥
 बहुरे लोग रजायसु भयऊ । सुतन्ह समेत नृपति गृहँ गयऊ ॥

जहँ तहँ राम ब्याहु सबु गावा । सुजसु पुनीत लोक तिहुँ छावा ॥
 आए ब्याहि रामु घर जब तैं । बसइ अनद अवध सब तब तैं ॥
 प्रभु बिबाहँ जस भयउ उछाहू । सकहिँ न बरनि गिरा अहिनाहू ॥
 कबिकुल जीवनु पावन जानी । राम सीय जसु मंगल खानी ॥
 तेहि ते मैं कहू कहा बखानी । करन पुनीत हेतु निज बानी ॥
 छ०— निज गिरा पावनि करन कारन राम जसु तुलसी कह्यो ।

रघुबीर चरित अपार बारिधि पारु कवि कौनै लह्यो ॥

उपवीत ब्याह उछाह मंगल सुनि जे सादर गावहीं ।

बैदेहि राम प्रसाद ते जन सर्वदा सुखु पावहीं ॥

सो०—सिय रघुबीर बिबाहु जे सप्रम गावहिँ सुनिहि ।

तिन्ह कहूँ मदा उछाहु मंगलायतन राम जसु ॥ ३६१ ॥

मासपारायण, बारहवाँ विश्राम

इति श्रीमद्रामचरितमानसे सकलकलिकलुषविध्वंसने

प्रथमः सोपानः समाप्तः ।

(बालकाण्ड समाप्त)



राम भक्त मिलन



शत्रुघ्न लीला उठाई उस लीला कृपाविधान।
भक्त राम की भिन्नानि लीला विमो मन्त्राह अपान॥

। श्रीगणेशाय नमः॥

श्रीजानकीवल्लभो विजयते

श्रीरामचरितमानस

द्वितीय सोपान

अयोध्याकाण्ड

श्लोक

यस्याङ्गे च विभाति भूधरसुता देवापगा मस्तके
भाले बालविधुर्गले च गरलं यस्योरसि व्यालराट्।
सोऽयं भूतिविभूषणः सुरवरः सर्वाधिपः सर्वदा
शर्वः सर्वगतः शिवः शशिनिभः श्रीशङ्करः पातु माम्॥ १ ॥
प्रसन्नतां या न गताभिषेकतस्तथा न मम्ले वनवासदुःखतः।
मुखाम्बुजश्री रघुनन्दनस्य मे सदास्तु सा मञ्जुलमङ्गलप्रदा॥ २ ॥
नीलाम्बुजश्यामलकोमलाङ्गं सीतासमारोपितवामभागम्।
पाणौ महासायकचारुचापं नमामि रामं रघुवंशनाथम्॥ ३ ॥

दो०—श्रीगुरु चरन सरोज रज निज मनु मुकुरु सुधारि।

बरनउँ रघुबर बिमल जसु जो दायकु फल चारि॥

जब तैं रामु ब्याहि घर आए । नित नव मंगल मोद बधाए ॥

भुवन चारिदस भूधर भारी । सुकृत मेघ बरषहिं सुख बारी ॥

रिधि सिधि संपति नदीं सुहाई । उमगि अवध अंबुधि कहूँ आई ॥

मनिगन पुर नर नारि सुजाती । सुचि अमोल सुंदर सब भाँती ॥

कहि न जाइ कछु नगर बिभूती । जनु एतनिअ बिरंचि करतूती ॥

सब बिधि सब पुर लोग सुखारी । रामचंद मुख चंदु निहारी ॥

मुदित मातु सब सखीं सहेली । फलित बिलोकि मनोरथ बेली ॥

राम रूपु गुन सीलु सुभाऊ । प्रमुदित होइ देखि सुनि राऊ ॥

दो० — सब केँ उर अभिलाषु अस कहहिं मनाइ महेसु।

आप अछत जुबराज षड रामहि देउ नरेसु॥१॥

एक समय सब सहित समाजा । राजसभाँ रघुराजु बिराजा ॥

सकल सुकृत मूरति नरनाहू । राम सुजसु सुनि अतिहि उछाहू ॥

नृप सब रहहिं कृपा अभिलाषेँ । लोकप करहिं प्रीति रुख राखेँ ॥

तिभुवन तीनि काल जग माहीं । भूरिभाग दसरथ सम नाहीं ॥

मंगलमूल रामु सुत जासू । जो कछु कहिअ थोर सबु तासू ।

रायँ सुभायँ मुकुरु कर लीन्हा । बदनु बिलोकि मुकुटु सम कीन्हा ॥

श्रवन समीप भए सित केसा । मनहुँ जरठपनु अस उपदेसा ॥

नृप जुबराजु राम कहूँ देहू । जीवन जनम लाहु किन लेहू ॥

दो०— वह बिचारु उर आनि नृप सुदिनु सुअवसरु पाइ ।

प्रेम पुलकि तन मुदित मन गुरहि सुनायउ जाइ ॥ २ ॥
 कहइ भुआलु सुनिअ मुनिनायक भाए राम सब बिधि सब लायक ॥
 सेवक सचिव सकल पुरबासी । जे हमारे अरि मित्र उदासी ॥
 सबहि रामु प्रिय जेहि बिधि मोही प्रभु असीस जनु तनु धरि सोही ॥
 बिप्र सहित परिवार गोसाईं करहिं छोहु सब रौरहि नाई ।
 जे गुर चरन रेनु सिर धरहीं । ते जनु सकल बिभव बस करहीं ॥
 मोहि सम यहु अनुभयउ न दूजैं । सबु पायउँ रज पावनि पूजैं ॥
 अब अभिलाषु एकु मन मोरें पूजिहि नाथ अनुग्रह तोरें ।
 मुनि प्रसन्न लिखि सहज सनेहू । कहेउ नरेस रजायसु देहू ।
 दो०— राजन राउर नामु जसु सब अभिमत दातार ।

फल अनुगामी भहिप मनि मन अभिलाषु तुम्हार ॥ ३ ॥
 सब बिधि गुरु प्रसन्न जियैं जानी । बोलेउ राउ रहँसि मृदु बानी ।
 नाथ रामु करिअहिं जुबराजू । कहिअ कृपा करिकरिअ समाजू ॥
 मोहि अछत यहु होइ उछाहू । लहहिं लोग सब लोचन लाहू ॥
 प्रभु प्रसाद सिब सबइ निबाहीं । यह लालसा एक मन माहीं ॥
 पुनि न सोच तनु रहउ कि जाऊ । जेहिं न होइ पाछें पछिताऊ ॥
 सुनि मुनि दसरथ बचन सुहाए । मंगल मोद मूल मन भाए ।
 सुनु नृप जासु बिमुख पछिताहीं जासु भजन बिनु जरनि न जाहीं ॥
 भयउ तुम्हार तनय सोइ स्वामी । रामु पुनीत प्रेम अनुगामी ।

दो०— बेगि बिलंबु न करिअ नृप साजिअ सबुइ समाजु।

सुदिन सुमंगलु तबहिं जब रामु होहिं जुबराजु ॥ ४ ॥
मुदित महीपति मंदिर आए । सेवक सचिव सुमंत्रु बोलाए ॥
कहि जयजीव सीस तिन्ह नाए । भूप सुमंगल बचन सुनाए ॥
जौ पाँचहि मत लागै नीका । करहु हरषि हियँ रामहि टीका ॥
मंत्री मुदित सुनत प्रिय बानी । अभिमत बिरवै परेउ जनु पानी ॥
बिनती सचिव करहिं कर जोरी । जिअहु जगतपति बरिस करोरी ॥
जग मंगल भल काजु बिचारा । बेगिअ नाथ न लाइअ बारा ॥
नृपहि मोदु सुनि सचिव सुभाषा । बद्धत बाँड़ जनु लही सुसाखा ॥
दो०— कहेउ भूप मुनिराज कर जोड़ जोड़ आयसु होइ।

राम राज अभिषेक हित बेगि करहु सोइ सोइ ॥ ५ ॥
हरषि मुनीस कहेउ मृदु बानी । आनहु सकल सुतीरथ पानी ॥
औषध मूल फूल फल पाना । कहे नाम गनि मंगल नाना ॥
चामर चरम बसन बहु भाँती । रोम पाट पट अगनित जाती ॥
मनिगन मंगल बस्तु अनेका । जो जग जोगु भूप अभिषेका ॥
बेद बिदित कहि सकल बिधाना । कहेउ रचहु पुर बिबिध बिताना ॥
सफल रसाल पूगफल केरा । रोपहु बीथिन्ह पुर चहुँ फेरा ॥
रचहु मंजु मनि चौकै चारू । कहहु बनावन बेगि बजारू ॥
पूजहु गनपति गुर कुलदेवा । सब बिधि करहु भूमिसुर सेवा ॥
दो०— ध्वज पताक तोरन कलस सजहु तुरग रथ नाग।

सिर धरि मुनिबर बचन सबु निज निज काजहिं लाग ॥ ६ ॥

जो सुनीस जेहि आयसु दीन्हा । सो तेहि काजु प्रथम जनु कीन्हा ।
 बिप्र साधु सुर पूजत राजा करत राम हित मंगल काजा ।
 सुन्त राम अभिषेक सुहावा । बाज गहागह अवध बधावा ।
 राम सीय तन सगुन जनाए फरकहिं मंगल अंग सुहाए ।
 पुलकि सप्रेम परसपर कहहीं । भरत आगमनु सूचक अहहीं ।
 भए बहुत दिन अति अवसेरी । सगुन प्रतीति भेंट प्रिय केरी ।
 भरत सरिस प्रिय को जग माहीं । इहइ सगुन फलु दूसर नाहीं ।
 रामहि बंधु सोच दिन राती । अर्झन्ह कमठ हृदउ जेहि भाँती ॥
 दो०— एहि अवसर मंगलु परम सुनि रहँसेउ रनिवासु ।

सोभत लखि बिधु बढत जनु बारिधि बीचि बिलासु ॥ ७ ॥
 प्रथम जाइ जिन्ह बचन सुनाए । भूषन बसन भूरि तिन्ह पाए ॥
 प्रेम पुलकि तन मन अनुसारी मंगल कलस सजन सब लागीं ॥
 चौकें चारु सुमित्राँ पूरी मनिमय बिबिध भाँति अति रूरी ।
 आनँद मगन राम महतारी दिए दान बहु बिप्र हँकारी ॥
 पूजोँ ग्रामदेवि सुर नागा । कहेउ बहोरि देन बलिभाग ॥
 जेहि बिधि होइ राम कल्याण । देहु दया करि सो बरदान ॥
 गावहिं मंगल कोकिलबयनीं । बिभुबदनीं मृगसावकनयनीं ॥
 दो०— राम राज अभिषेकु सुनि हियँ हरषे नर नारि ।

लगे सुमंगल सजन सब बिधि अनुकूल बिचारि ॥ ८ ॥
 तब नरनाहँ बसिष्ठ बोलाए । रामधाम सिख्र देन पठाए ॥

गुर आगमनु सुनत रघुनाथा । द्वार आइ पद नाथउ माथा ॥
 सादर अरघ देइ घर आने । सोरह भाँति पूजि सनमाने ॥
 गहे चरन सिय सहित बहोरी । बोले रामु कमल कर जोरी ॥
 सेवक सदन स्वामि आगमनू । मंगल मूल अमंगल दमनू ॥
 तदपि उचित जनु बोलि सप्रीती । पठइअ काज नाथ असि नीती ॥
 प्रभुता तजि प्रभु कीन्ह सनेहू । भयउ पुनीत आजु यहु गेहू ॥
 आयसु होइ सो करौ गोसाई । सेवकु लहइ स्वामि सेवकाई ॥
 दो०— सुनि सनेह साने बचन मुनि रघुबरहि प्रसंस ।

राम कस न तुम्ह कहहु अस हंस बंस अवतंस ॥ ९ ॥
 बरनि राम गुन सीलु सुभाऊ । बोले प्रेम पुलकि मुनिराऊ ॥
 भूप सत्रेउ अभिषेक समाजू । चाहत देन तुम्हहि जुबराजू ॥
 राम करहु सब संजम आजू । जौ बिधि कुसल निबाहै काजू ॥
 गुरु सिख देइ राय पहिं गयऊ । राम हृदयँ अस बिसमउ भयऊ ॥
 जनमे एक संग सब भाई । भोजन सयन केलि लरिकाई ।
 करनबेध उपबीत बिआहा । संग संग सब भए उछाहा ॥
 बिमल बंस यहु अनुचित एकू । बंधु बिहाइ बड़ेहि अभिषेकू ॥
 प्रभु सप्रेम पछितानि सुहाई । हरउ भगत मन कै कुटिलाई ॥
 दो०— तेहि अवसर आए लखन मगन प्रेम आनंद ।

सनमाने प्रिय बचन कहि रघुकुल कैरव चंद ॥ १० ॥
 बाजहिं बाजने बिबिध बिधाना । पुर प्रमोदु नहिं जाइ बखाना ।

भरत आगमनु सकल मनावहिं । आवहुँ बेगि नयन फलु पावहिं ॥
 हाट बाट घर गलीं अथाई । कहहिं परसपर लोग लोगई ॥
 कालि लगन भालि केतक बारा । पूजिह बिधि अभिलाषु हमारा ॥
 कनक सिंघासन सीय समेता । बैठहि रामु होइ चित चेता ॥
 सकल कहहि कब होइहि काली । बिघन मनावहिं देव कुचाली ॥
 तिन्हहि सोहइ न अवध बधावा । चोरहि चंदिनि राति न भावा ॥
 सारद बोलि बिनय सुर करहौं । बारहि बार पाय लै परहौं ॥
 दो० बिपति हमारि बिलोकि बड़ि मानु करिअ सोइ आजु ।

रामु जाहिं बन राजु तजि होइ सकल सुरकाजु ॥ ११ ॥
 सुनि सुर बिनय ठाढ़ि पछिताती । भइउँ सरोज बिपिन हिमराती ।
 देखि देव पुनि कहहिं निहोरी । मातु तोहि नहिं थोरिउ खोरी
 बिसमय हरष रहित रघुराऊ । तुम्ह जानहु सब राम प्रभाऊ ।
 जीव करम बस सुख दुख भागी । जाइअ अवध देव हित लागी ॥
 बार बार गहि चरन सँकोची । चली बिचारि बिबुध मति पोची ॥
 ऊँच निवासु नीचि करनूती । देखि न सकहिं पराइ बिभूती ॥
 आगिल काजु बिचारि बहोरी । करिहहिं चाह कुसल कबि मोरी ।
 हरषि हृदयँ दमरथ पुर आई । जनु ग्रह दसा दुसह दुखदाई ॥
 दो०— नामु मंथरा मंदमति चेरी कैकड़ केरि ।

अजस पेदारी ताहि करि गई गिरा मति फेरि ॥ १२ ॥
 दीख मंथरा नगरु बनाव्वा । मंजुल मंगल बाज बधावा ॥

पूछेसि लोगन्ह काह उछाहू । राम तिलकु सुनि भा उर दाहू ॥
 करइ बिचारु कुबुद्धि कुजाती । होइ अकाजु कवनि बिधि राती ।
 देखि लागि मधु कुटिल किराती । जिमि गवँ तकइ लेउँ केहि भाँती ॥
 भरत मातु पहिँ गइ बिलखानी । का अनमनि हसि कह हँसि रानी ॥
 ऊतरु देइ न लेइ उसासू । नारि चरित करि दारइ आँसू ॥
 हँसि कह रानि गालु बड़ तोरें । दीन्ह लखन सिख अस मन मोरें ॥
 तबहुँ न बोल चेरि बड़ि पापिनि । छाड़ि स्वास कारि जनु साँपिनि ॥
 दो०—सभय रानि कह कहसि किन कुसल रामु महिपालु ।

लखनु भरतु रिपुदमनु सुनि भा कुबरी उर सालु ॥ १३ ॥
 कत सिख देइ हमहि कोउ माई । गालु करब केहि कर बलु पाई ॥
 रामहि छाड़ि कुमल केहि आजू । जेहि जनेसु देइ जुबराजू ॥
 भयउ कौसिलहि बिधि अति दाहिन । देखत गरब रहत उर नाहिन ॥
 देखहु कस न जाइ सब सोभा । जो अवलोकि मोर मनु छोभा ॥
 पूतु बिदेस न सोचु तुम्हारे । जानति हहु बस नाहु हमारे ॥
 नीद बहुत प्रिय सेज तुराई । लखहु न भूप कपट चतुराई ॥
 सुनि प्रिय बचन मलिन मनु जानी । झुकी रानि अब रहु अरगानी ॥
 पुनि अस कबहुँ कहसि घरफोरी । तब धरि जीभ कढ़ावउँ तोरी ॥
 दो०—काने खरे कूबरे कुटिल कुचाली जानि ।

तिय बिसेषि पुनि चेरि कहि भरतमातु मुमुकानि ॥ १४ ॥
 प्रियबादिनि सिख दीन्हउँ तोही । सपनेहुँ तो पर कोपु न मोही ॥

सुदिनु सुमंगल दायकु सोई तोर कहा फुर जेहि दिन होई ॥
 जेठ स्वामि सेवक लघु भाई । यह दिनकर कुल रीति सुहई ॥
 राम तिलकु जौँ साँचेहुँ काली । देउँ मागु मन भावत आली ॥
 कौसल्या सम मब महतारी । रामहि सहज सुभायँ पिआरी ॥
 भो पर करहिं सनेहु बिसेपी । मैं करि प्रीति परोछा देखी ॥
 जौँ बिधि जनमु देइ करि छोहू । होहुँ राम सिय पूत पुतोहू ॥
 प्रान तैं अधिक रामु प्रिय मोरें । तिन्ह केँ तिलक छोभु कस तोरें ।
 दो०—भरत सपथ तोहि सत्य कहु परिहरी कपट दुराड।

हरष समय बिसमड करमि कारन मोहि सुनाउ ॥ १५ ॥
 एकहिं बार आस सब पूजी । अब कछु कहब जीभ करि दूजी ।
 फोरै जोगु कषारु अभाग । भलेउ कहत दुख रउरेहि लागा ।
 कहहिं झूठि फुरि बात बनाई । ते प्रिय तुम्हहि करुइ मैं माई ।
 हमहुँ कहाबि अब ठकुरसोहाती । नाहिं त मौन रहब दिनु राती ।
 करि कुरूप बिधि परबस कीन्हा । बवा सो लुनिअ लहिअ जो दीन्हा ।
 कोउ नृप होउ हमहि का हानी । चेरि छाड़ि अब होब कि रानी ।
 जारै जोगु सुभाउ हमारा । अनभल देखि न जाइ तुम्हारा ।
 तातें कछुक बात अनुसारी । छमिअ देखि बड़ि चूक हमारी ।
 दो०—गूढ़ कपट प्रिय बचन सुनि तीय अधरबुधि रानि।

सुरमाया बस बैरिनिहि सुहृद जानि पतिआनि ॥ १६ ॥
 सादर पुनि पुनि पूँछति ओही । सबरी गान मृगी जनु मोही ।

तसि मति फिरी अहइ जसि भाबी । रहसी चेरि घात जनु फाबी ॥
 तुम्ह पूँछहु मैं कहत डेराऊँ । धरेहु मोर घरफोरी नाऊँ ॥
 सजि प्रतीति बहुविधि गढ़ि छोली । अवध साढ़साती तब बोली ॥
 प्रिय सिय रामु कहा तुम्ह रानी । रामहि तुम्ह प्रिय सो फुरि बानी ॥
 रहा प्रथम अब ते दिन बीते । समउ फिरे रिपु होहिं पिरीते ॥
 भानु कमल कुल पोषनिहारा । बिनु जल जारि करइ सोइ छारा ।
 जरि तुम्हारि चह सवति उखारी । रूँधहु करि उपाउ बर बारी ॥
 दो०— तुम्हहि न सोचु सोहाग बल निज बस जानहु राउ ।

मन मलीन मुह मीठ नृपु राउर सरल सुभाउ ॥ १७ ॥
 चतुर गँभीर राम महतारी । बीचु पाइ निज बात सँवारी ॥
 पठए भरतु भूप ननिअउरें । राम मातु मत जानब रउरें ॥
 सेवहिं सकल सवति मोहि नीकें । गरबित भरत मातु बल पी कें ॥
 सालु तुम्हार कौंसिलहि माई । कपट चतुर नाहं होइ जनाई ।
 राजहि तुम्ह पर प्रेमु बिसेषी । सवति सुभाउ सकइ नहिं देखी ॥
 रचि प्रपंचु भूपहि अपनाई । राम तिलक हित लगन धराई ॥
 यह कुल उचित राम कहूँ टीका । सर्बाह सोहाइ मोहि सुठि नीका ॥
 आगिलि बात समुझि डरु मोही । देउ दैउ फिरि सो फलु ओही ॥
 दो०— रचि पचि कोटिक कुटिलपन कीन्हैसि कपट प्रबोधु ।

कहिसि कथा सत सवति कै जेहि बिधि बाढ़ बिरोधु ॥ १८ ॥
 भावी बस प्रतीति उर आई । पूँछ रानि पुनि सपथ देवाई ।

का पूँछहु तुम्ह अबहुँ न जाना । निज हित अनहित पमु पहिचाना ।
 भयउ पाखु दिन सज्जत समाजू । तुम्ह पाई सुधि मोहि सन आजू ।
 खाइअ पहिरिअ राज तुम्हारे । सत्य कहें नाहं दोषु हमारे ।
 जौ असत्य कछु कहब बनाई । तौ बिधि देइहि हमहि सजाई ।
 रामहि तिलक कालि जौ भयऊ । तुम्ह कहै बिपति बीजु बिधि बयऊ ।
 रेख खँचाइ कहउँ बलु भाषी । भामिनि भइहु दूध कइ माखी ।
 जौ सुत सहित करहु सेवकाई । तौ घर रहहु न आन उपाई ।
 दो०— कद्रू बिनतहि दीन्ह दुखु तुम्हहि कौसिलाँ देब ।

भरतु बंदिगृह सेइहहि लखनु राम के नेब ॥ १९ ॥
 कैकयसुता सुनत कटु बानी । कहि न सकइ कछुसहमि सुखानी ।
 तन पमेउ कदली जिमि काँपी । कुबरीं दसन जीभ तब चाँपी ॥
 कहि कहि कोटिक कपट कहानी । धीरजु धरहु प्रबोधिसि रानी ॥
 फिरा करमु प्रिय लागि कुचाली । बिकाहि सराहइ मानि मराली ॥
 सुनु मंथरा बात फुरि तोरी । दहिनि आँखि नित फरकइ मोरी ॥
 दिन प्रति देखउँ राति कुसपने । कहउँ न तोहि मोह बस अपने ॥
 काह करौं मखि मूथ मुभाऊ । दाहिन बाम न जानउँ काऊ ।
 दो०— अपने चलत न आजु लागि अनभल काहुक कीन्ह ।

केहि अघ एकहि बार मोहि दैअँ दुमह दुखु दीन्ह ॥ २० ॥
 नैहर जनमु भरब बर जाई । जिअत न करबि सवति सेवकाई ॥
 अरि बस दैउ जिआवत जाही । मरनु नीक तेहि जीवन चाही ॥

दीन बचन कह बहुबिधि रानी । सुनि कुबरीं तिथमाया ठानी ॥
 अस कस कहहु मानि मन ऊना । सुखु सोहागु तुम्ह कहँ दिन दूना ॥
 जेहि राउर अति अनभल ताका । सोइ पाइहि यहु फलु परिपाका ॥
 जब तैं कुमत सुना मैं स्वामिनि । भूख न बासर नीद न जामिनि ।
 पूँछेउँ गुनिन्ह रेख तिन्ह खाँची । भरत भुआल होहिं यह साँची ॥
 भामिनि करहु त कहँ उपाऊ । है तुम्हरीं सेवा बस राऊ ॥
 दो०— परउँ कूप तुअ बचन पर सकउँ पृत पति त्यागि ।

कहसि मोर दुखु देखि बड़ कस न करब हित लागि ॥ २१ ॥
 कुबरीं करि कबुली कैकेई । कपट छुरी उर पाहन टेई ॥
 लखइ न रानि निकट दुखु कैसैं । चरइ हरित तिन बलिपसु जैसैं ॥
 सुनत बात मृदु अंत कठोरी । देति मनहुँ मधु माहुर घोरी ॥
 कहइ चेरि सुधि अहइ कि नाहीं । स्वामिनि कहिहु कथा मोहि पाहीं ॥
 दुइ बरदान भूप सन थाती । मागहु आजु जुड़ावहु छाती ॥
 सुतहि राजु रामहि बनबासू । देहु लेहु सब सवति हुलासू ॥
 भूपति राम सपथ जब करई । तब मागेहु जेहि बचनु न टरई ॥
 होइ अकाजु आजु निसि बीतैं । बचनु मोर प्रिय मानेहु जी तैं ॥
 दो०— बड़ कुचातु करि पातकिनि कहेसि कोपगृहँ जाहु ।

काजु सँवारेहु सजग सब सहसा जनि पतिआहु ॥ २२ ॥
 कुबरिहि रानि प्रानाप्रिय जानी । बार बार बड़ि बुद्धि बखानी ॥
 तोहि सम हित न मोर संसारा । बहे जात कइ भइसि अधारा ।

जौं बिधि पुरब मनोरथु काली । करौं तोहि चख पूतरि आली ।
 बहुबिधि चेरिहि आदरु देई कोपभवन गवनी कैकेई ।
 बिपति बीजु बरषा रितु चेरी । भुइँ भइ कुमति कैकेई केरी ।
 पाइ कपट जलु अंकुर जामा । बर दोउ दल दुख फल परिनामा ।
 कोप समाजु साजि सबु सोई राजु करत निज कुमति बिगोई ॥
 राउर नगर कोलाहलु होई यह कुचालि कह्यु जान न कोई ॥
 दो०— प्रमूदित पुर नर नारि सब सजहिं सुमंगलचार ।

एक प्रबिसहिं एक निर्गमहिं भीर भूष दरबार ॥ २३ ॥
 बाल सखा सुनि हियँ हरषाहीं , मिलि दस पाँच राम पहि जाहीं ॥
 प्रभु आदरहिं प्रेमु पहिचानी । पूँछहिं कुसल खेम मृदु बानी ॥
 फिरहिं भवन प्रिय आयसु पाई । करत परसपर राम बड़ाई ॥
 को रघुबीर सरिस समारा । सोलु सनेहु निबाहनिहारा ।
 जेहिं जेहिं जोनि करम बस भ्रमहीं । तहँ तहँ ईसु देउ यह हमहीं ॥
 सेवक हम स्वामी सियनाहू । होउ नात यह ओर निबाहू ॥
 अस अभिलाषु नगर सब काहू । कैकयसुता हृदयँ अति दाहू ॥
 को न कुसगति पाइ नसाई । रहइ न नीच मतेँ चतुराई ॥
 दो० साँझ समय सानंद नृपु गयउ कैकेई गेहँ ।

गवनु निठुरता निकट किय जनु धरि देह सनेहँ ॥ २४ ॥
 कोपभवन सुनि सकुचेउ राऊ । भय बस अगहुड़ परइ न पाऊ ।
 सुरपति बसइ बाहँबल जाकेँ । नरपति सकल रहाहँ रुख ताकेँ ॥

सो सुनि तिय रिस गयउ सुखाई । देखहु काम प्रताप बढ़ाई ॥
 सूल कुलिस असि अँगवनिहारे । ते रतिनाथ सुमन सर मारे ॥
 सभय नरेसु प्रिया पहिं गयऊ । देखि दसा दुखु दारुन भयऊ ॥
 भूमि सयन पटु मोट पुराना । दिए डारि तन भूषन नाना ।
 कुमतिहि कसि कुबेष्टता फाबी । अनअहिवातु सूच जनु भाबी ॥
 जाइ निकट नृपु कह मृदु बानी । प्रानप्रिया केहि हेतु रिसानी ॥
 छं०— केहि हेतु रानि रिसानि परसत पानि पतिहि नेवारई ।

मानहुँ सरोष भुअंग भामिनि बिषम भाँति निहारई ॥

दोउ बासना रसना दसन बर मरम ठाहरु देखई ।

तुलसी नृपति भक्तव्यता बस काम कौतुक लेखई ॥

सो० बार बार कह राउ सुमुखि सुलोचनि पिकबचनि ।

कारन मोहि सुनाउ गजगामिनि निज कोष कर ॥ २५ ॥

अनहित तोर प्रिया केई कीन्हा । केहि दुइ सिर केहि जमु चह लीन्हा ।

कहु केहि रंकहि करौं नरेसू । कहु केहि नृपहि निकासौं देसू ।

सकउँ तोर अरि अमरउ मारी । काह कीट बपुरे नर नारी ॥

जानसि मोर सुभाउ बरोरु । मनु तव आनन चंद चकोरु ॥

प्रिया प्रान सुत सरबसु मोरें । परिजन प्रजा सकल बस तोरें ॥

जौं कलु कहौं कपटु कारि तोही । भामिनि राम सपथ सत मोही ।

बिहसि मागु मनभावति बाता । भूषन सर्जहि मनोहर गाता ॥

घरी कुधरी समुझि जियै देखू । बेगि प्रिया परिहरहि कुबेषू ॥

दो० — यह सुनि मन गुनि सपथ बड़ि बिहसि उठी मतिपंद ।

भूषन सजति बिलोकि मृगु मनहुँ किरातिनि फंद ॥ १६ ॥
 पुनि कह राउ सुहृद जियँ जानी । प्रेम पुर्लाक मृदु मंजुल बानी ॥
 भामिनि भयउ तोर मनभावा । घर घर नगर अनंद बधावा ॥
 रामहि देउँ कालि जुबराजू । सर्जहि सुलोचनि मंगल साजू ॥
 दलाकि उठेउ सुनि हृदउ कठोरु । जनु छुड़ गयउ पाक बरतोरु ।
 ऐसिउ पीर बिहसि तेहिं गोई । चोर नारि जिमि प्रगटि न रोई ॥
 लाखहि न भूष कपट चतुराई । कोटि कुटिल मनि गुरू पढ़ाई ॥
 जद्याप नीति निपुन नरनाहू । नारिचरित जलनार्थ अवगाहू ।
 कपट सनेहु बड़ाइ बहोरी बोली बिहसि नयन मूहु मोरी ।
 दो० — मागु मागु पै कहहु पिय कबहुँ न देहु न लेहु ।

देन कहेहु बरदान दुइ तेउ फवत संदेहु ॥ १७ ॥
 जानेउँ मरमु राउ हौंस कहई । तुम्हाहि कोहाब परम प्रिय अहई ।
 थाती राखि न मागिहु काऊ । बिसरि गयउ मोहि भोर सुभाऊ ॥
 झूठेहुँ हमहि दोषु जनि देहु । दुइ कै चारि मागि मकु लेहु ।
 रघुकुल रीति सदा चलि आई । प्राण जाहुँ बरु बचनु न जाई ।
 नहिं असत्य सम पातक पुंजा । गिरि सम होहिं कि कोटिक गुंजा ।
 सत्यमूल सब सुकृत सुहाए । बेद पुरान बिदित मनु गाए ।
 तेहि पर राम सपथ करि आई । सुकृत सनेह अवधि रघुराई ।
 बात दृढ़ाइ कुमति हौंस बोली । कुमत् कुबिहग कुलह जनु खाली ।

दो०— भूप मनोरथ सुभग बन सुख सुबिहंग समाजु।

भिल्लिनि जिमि छाड़न चहति बचनु भयंकरु बाजु ॥ २८ ॥

मासपारायण, तेरहवाँ विश्राम

सुनहु प्रानप्रिय भावत जी का । देहु एक बर भरतहि टीका ॥

मागउँ दूसर बर कर जोरी । पुरवहु नाथ मनोरथ मोरी ॥

तापस बेष बिसेषि उदासी । चौदह बरिस रामु बनबासी ॥

सुनि मृदु बचन भूप हियँ सोकू । ससि कर छुअत बिकल जिमि कोकू ॥

गयउ सहमि नहिं कलु कहि आवा । जनु सचान बन झपटेउ लावा ॥

बिबरन भयउ निपट नरपालू । दामिनि हनेउ मनहुँ तरु तालू ॥

माथें हाथ मूदि दोउ लोचन । तनु धरि सोचु लाग जनु सोचन ॥

मोर मनोरथु सुरतरु फूला । फरत करिनि जिमि हतेउ समूला ॥

अवध उजारि कीन्हि कैकेई । दीन्हिसि अचल बिपति कै नेई ।

दो०— कवने अवसर का भयउ गयउँ नारि बिस्वास ।

जोग सिद्धि फल समय जिमि जतिहि अबिद्या नास ॥ २९ ॥

एहि बिधि राउ मनहिं मन झाँखा । देखि कुभाँति कुमति मन माखा ॥

भरतु कि राउर पूत न होही । आनेहु मोल बेसाहि कि मोही ॥

जो सुनि सरु अस लाग तुम्हारे । काहे न बोलहु बचनु सँभारे ॥

देहु उतरु अनु करहु कि नाहीं । सत्यसंध तुम्ह रघुकुल माहीं ॥

देन कहेहु अब जनि बरु देहू । तजहु सत्य जग अपजसु लेहू ॥

सत्य सराहि कहेहु बरु देना । जानेहु लेइहि मागि चबेना ॥

सिबि दधीचि बलि जो कछु भाषा । तनु धनु तजेउ बचन पनु राखा ।
अति कटु बचन कहति कैकेई । मानहुँ लोन जरे पर देई ।
दो०— धरम धुरंधर धीर धरि नयन उघारे राखै ।

सिरु घुनि लीन्हि उसास असि मारेसि मोहि कुठायँ । ३० ॥
आगेँ दीखि जरत रिस भारी । मनहुँ रोष तरवारि उघारी ।
मूठि कुबुद्धि धार निठुराई । घरी कूबरीं सान बनाई ।
लखी महीप कराल कठोर । सत्य कि जीवनु लेइहि मोरा ।
बोले राठ कठिन करि छाती । बानी सबिनय तासु सोहाती ।
प्रिया बचन कस कहसि कुभाँती । भीर प्रतीति प्रीति कारि हाँती ।
मोरें भरतु रामु दुइ आँखी । सत्य कहउँ करि संकरु साखी ।
अवसि दूतु मैं पठइव प्राता । ऐहहिं बेगि सुनत दोउ भ्राता ।
सुदिन सोधि सबु साजु सजाई । देउँ भरत कहुँ राजु बजाई ।
दो०—लोभु न रामहि राजु कर बहुत भरत पर प्रीति ।

मैं बड़ छोट बिचागि जियँ करत रहेउँ नृपनीति ॥ ३१ ॥
राम सपथ सत कहउँ सुभाऊ । राममातु कछु कहैठ न काऊ ।
मैं सबु कीन्ह तोहि बिनु पहुँछै । तेहि तैं परेउ मनोरथु छूँछै ।
रिस परिहर अब भंगल साजू । कछु दिन गएँ भरत जुबराजू ॥
एकहि बात मोहि दुखु लागा । बर दूसर असमंजस मागा ॥
अजहूँ हृदउ जरत तेह आँचा । रिस परिहास कि साँचेहुँ साँचा ॥
कहु तजि रोषु राम अपराधु । सबु कोउ कहइ रामु सुठि साधु ॥

तुहूँ सराहसि करसि सनेहू । अब सुनि मोहि भयउ संदेहू ॥
 जासु सुभाउ अरिहि अनुकूला । सो किमि करिहि मातु प्रतिकूला ।
 दो०— प्रिया हास रिस परिहरहि मागु बिचारि बिबेकु ।

जेहि देखौं अब नयन भरि भरत राज अभिषेकु ॥ ३२ ॥
 जिऐ मीन बरु बारि बिहीना । मनि बिनु फनिकु जिऐ दुख दीना ।
 कहउँ सुभाउ न छलु मन माहीं । जीवनु मोर राम बिनु नाहीं ॥
 समुझि देखु जियँ प्रिया प्रबीना । जीवनु राम दरस आधीना ॥
 सुनि मृदु बचन कुमति अति जरई । मनहुँ अनल आहुति घृत परई ॥
 कहइ करहु किन कोटि उपाया । इहाँ न लागिहि राउरि माया ।
 देहु कि लेहु अजसु करि नाहीं । मोहि न बहुत प्रपंच सोहाहीं ॥
 रामु साधु तुम्ह साधु सयाने । राममातु भलि सब पहिचाने ॥
 जस कौसिलाँ मोर भल ताका । तस फलु उन्हाहि देउँ करि साका ॥
 दो०— होत प्रातु मुनिबेष धरि जौं न रामु बन जाहिं ।

मोर मरनु राउर अजस नृप समुझिअ मन माहिं ॥ ३३ ॥
 अस कहि कुटिल भई उठि ठाढ़ी । मानहुँ रोष तरंगिनि बाढ़ी ॥
 पाप पहार प्रगट भइ सोई । भरी क्रोध जल जाइ न जोई ॥
 दोड बर कूल कठिन हठ धारा । भवैरू कूबरी बचन प्रचारा ॥
 द्वाहत भूपरूप तरु मृला । चली बिपति बारिधि अनुकूला ॥
 लखी नरेस बात फुरि साँची । तिय मिस मीनु सीस पर नाची ॥
 गहि पद बिनय कीन्ह बैठारी । जनि दिनकर कुल होसि कुठारी ॥

मागु माथ अबहीं देखँ तोही राम बिरहँ अनि मारसि मोही ॥
 राखु राम कहँ जेहि तेहि भाँती । नाहिं त जरिह जनम भरि छाती ॥
 दो०— देखो ब्याधि अमाध नृपु परेउ धरनि धुनि माथ ।

कहन परम आस्त बचन राम राम रघुनाथ ॥ ३४ ॥
 ब्याकुल राउ सिथिल सब गाता । करिनि कलपतरु मनहुँ निपाता ॥
 कंटु सूख मुख आव न बानी अनु पाठीनु दीन बिनु पानी ।
 पुनि कह कटु कठोर कैकेई मनहुँ घाय महँ माहुर देई ।
 जौ अंतहुँ अस करतबु रहेऊ मागु मागु तुम्ह केहि बल कहेऊ ॥
 दुइ कि होइ एक समय भुआला हँसब ठठाइ फुलाउब गाला ॥
 दानि कहाउब अरु कृपनाई । होइ कि खेम कुसल रौताई ।
 छाड़हु बचनु कि धीरजु धरहू । अनि अबला जिमि करुना करहू ॥
 तनु तिय तनय धामु धनु धरनी । सत्यसध कहँ तन सम बरनी ॥
 दो०— मरम बचन सुनि राउ कह कहु कहु दोषु न तोर ।

लागेउ तोहि पिसाच जिमि कालु कहावत मोर ॥ ३५ ॥
 चहत न भरत भूपतिह भोरें । बिधि बस कुमति बसी जिय तोरें ।
 सो सबु मोर पाप परिनामू । भयउ कृठाहर जेहिं बिधि बामू ।
 सुबस बसिहि फिरि अवध सुहई । सब गून धाम राम प्रभुताई ।
 करिहहि भाइ सकल सेवकाई । होइहि तिहुँ पुर राम बड़ाई ।
 तोर कलंकु मोर पछिताऊ । मुएहुँ न मिटिहि न जाइहि काऊ ।
 अब तोहि नीक लाग करु सोई । लोचन ओट बैटु मुहु गोई ।

जब लागि जिऔं कहउँ कर जोरी । तब लागि जनि कछु कहसि बहोरी ॥
 फिरि पछितैहसि अंत अभागी । मारसि गाइ नहारू लागी ॥
 दो०— परेउ राउ कहि कोटि बिधि काहे करसि निदानु ।

कपट सयानि न कहति कछु जागति मनहुँ मसानु ॥ ३६ ॥
 राम राम रट बिकल भुआलू । जनु बिनु पंख बिहंग बेहालू ॥
 हृदयँ मनाव भोरु जनि होई । रामहि जाइ कहै जनि कोई ॥
 उदउ करहु जनि रबि रघुकुल गुर । अवध बिलोकि सूल होइहि उर ॥
 भूप प्रीति कैकइ कठिनाई । उभय अवधि बिधि रची बनाई ॥
 बिलपत नृपहि भयउ भिनुसारा । बीना बेनु संख धुनि द्वारा ॥
 षडहं भाट गुन गावहिं गायक । सुनत नृपहि जनु लागहिं सायक ।
 मंगल सकल सोहाहिं न कैसैं । सहगामिनिहि बिभूषन जैसैं ॥
 तेहि निसि नीद परी नहिं काहू । राम दरस लालसा उछाहू ॥
 दो०— द्वार भीर सेवक सचिव कहहिं उदित रवि देखि ।

जागेउ अजहुँ न अवधपति कारनु कवनु बिसेषि ॥ ३७ ॥
 पछिले पहर भूपु नित जागा । आजु हमहि बड़ अचरजु लागा ॥
 जाहु सुमंत्र जगावहु जाई । कीजिअ काजु रजायसु पाई ॥
 गए सुमंत्रु तब राउर माहीं । देखि भयावन जात डेराहीं ॥
 धाइ खाइ जनु जाइ न हेरा । मानहुँ बिपति बिषाद बसेरा ॥
 पूछैं कोउ न ऊतरु देई । गए जेहिं भवन भूप कैकेई ॥
 कहि जयजीव बैठ सिरु नाई । देखि भूप गति गयउ सुखाई ॥

सोच बिकल बिबरन महि परैऊ । मानहुँ कमल मूल परिहरेऊ ।
सचिउ सभौत सकइ नहिं पूँछी । बोली असुभ भरी सुभ छूँछी ॥
दो० - परी न राजहि नीद निमि हेतु जान जगदीसु ।

रामु रामु रटि थोरु किय कहइ न मरमु महीसु ॥ ३८ ॥
आनहु रामहि बेगि बोलाई समाचार तब पूँछेहु आई ॥
चलेउ सुमंत्रु राय रुख जानी लखी कुचालि कीन्हि कछु रानी ॥
सोच बिकल मग परइ न पारु रामहि बोलि कहिहि का रऊ ॥
उर धरि धीरजु गयउ दुआरें पूँछहिं सकल देखि मनु मारें ।
समाधानु करि सो सबही का । गयउ जहाँ दिनकर कुल टीका ॥
राम सुमंत्रहि आवत देखा आदरु कीन्ह पिता सम लेखा ॥
निरखि बदनु कहि भूप रजाई रघुकुलदीपहि चलेउ लेवाई ॥
रामु कुभाँति सचिव सँग जाहीं । देखि लोग जहँ तहँ बिलखाहीं ॥
दो० जाइ दीख रघुबंमनि नरपति निषट कुसाजु ।

सहस्रि परेउ लखि सिंधिनिहि मनहुँ बृद्ध गजराजु ॥ ३९ ॥
सूखहिं अधर जरइ सबु अंगू । मनहुँ दीन मनिहीन भुअंगू ।
सरुष समीप दीखि कैकेई । मानहुँ मीचु घरीं गनि लेई ।
करुनामय मृदु राम सुभाऊ । प्रथम दीख दुखु सुना न काऊ ।
तदपि धीर धरि समउ बिचारी । पूँछी मधुर बचन महतारी ।
मोहि कहु मातु तात दुख कारन । करिअ जतन जेहिं होइ निवारन ।
सुनहु राम सब कारनु एहू । राजहि तुम्ह पर बहुत सनेहू ॥

देन कहेन्हि मोहि दुइ बरदाना । मागेउँ जो कह्यु मोहि सोहाना ॥
 सो सुनि भयउ भूप उर सोचू । छाड़ि न सकहिं तुम्हार सँकोचू ।
 दो०—सुत सनेहु इत बचनु उत संकट परेउ नरेसु ।

सकहु त आयसु धरहु सिर घेटहु कठिन कलेसु ॥ ४० ॥
 निधरक बैठि कहइ कटु बानी । सुनत कठिनता अति अकुलानी ॥
 जीभ कमान बचन सर नाना । मनहुँ महिष मृदु लच्छ समाना ॥
 जनु कठोरपनु धरें सरीरु । सिखइ धनुषबिद्या बर बीरु ॥
 सब प्रसंगु रघुपतिहि सुनाई । बैठि मनहुँ तनु धरि निटुराई ।
 मन मुसुकाइ भानुकुल भानू । रामु सहज आनंद निधानू ॥
 बोले बचन बिगत सब दूषन । मृदु मंजुल जनु बाग बिभूषन ॥
 सुनु जननी सोइ सुतु बड़भागी । जो पितु मातु बचन अनुरागी ॥
 तनय मातु पितु तोषनिहारा । दुर्लभ जननि सकल संसारा ॥
 दो०—मुनिगन मिलनु बिसेषि बन सबहि भाँति हित मोर ।

तेहि महँ पितु आयसु बहुरि संमत जननी तोर ॥ ४१ ॥
 भरतु प्रानप्रिय पावहिं राजू । बिधि सब बिधि मोहि सनमुख आजू ॥
 जौं न जाउँ बन ऐसेहु काजा । प्रथम गनिअ मोहि मूढ़ समाजा ॥
 सेवहिं अरँडु कलपतरु त्यागी । परिहरि अमृत लेहिं बिषु मागी ।
 तेउ न पाइ अस समउ चुकाहीं । देखु बिचारि मातु मन माहीं ॥
 अंब एक दुखु मोहि बिसेषी । निपट बिकल नरनायकु देखी ।
 धोरिहिं बात पिताह दुख भारी । होति प्रतीति न मोहि महतारी ॥

राउ धीर गुन उदधि अगाधू । भा मोहि तें कछु बड़ अपराधू ॥
जातें मोहि न कहत कछु राऊ । मोरि सपथ तोहि कहु सतिभाऊ ॥
दो० सहज सरल रघुबर बचन कुमति कुटिल करि जान ।

चलइ जोंक जल बक्रगति जद्यपि सलिलु समान ॥ ४२ ॥
रहसी रानि राम रुख पाई । बोली कपट सनेहु जनाई ॥
सपथ तुम्हार भरत कै आना । हेतु न दूसर में कछु जाना ॥
तुम्ह अपराध जोगु नहि ताता । जननी जनक बंधु सुखदाता ।
राम सत्य सबु जो कछु कहू । तुम्ह पितु मातु बचन रत अहू ॥
पितहि बुझाइ कहहु बलि सोई । चौथेंपन जेहिं अजसु न होई ॥
तुम्ह सम सुअन सुकृत जेहिं दीन्हे । उचित न तासु निरादरु कीन्हे ॥
लागहिं कुमुख बचन सुभ कैसे । मगहँ गयादिक तीरथ जैसे ॥
रामहि मातु बचन सब भाए । जिमि सुरसरि गत सलिल सुहाए ।
दो०— गड़ मुरुछा रामहि सुमिरि नृप फिरि करवट लीन्ह ।

सचिव राम आगमन कहि बिनय समय सम कीन्ह ॥ ४३ ॥
अवनिप अकनि रामु पगु धारे । धरि धीरजु तब नयन उधारे ।
सचिवैं सँभारि राउ बैठारे । चरन परत नृप रामु निहारे ।
लिए सनेह बिकल ठर लाई । गै मनि मनहुँ फनिक फिरि पाई ।
रामहि चितइ रहेउ नरनाहू । चला बिलोचन बारि प्रबाहू ।
सोक बिबस कछु कहै न पारा हृदयें लगावत बारहिं बारा ॥
बिधिहि मनाव राउ मन माहीं जेहिं रघुनाथ न कानन जाहीं ॥

सुमिरि महेसहि कहइ निहोरी । बिनती सुनहु सदासिव मोरी ॥
 आसुतोष तुम्ह अवढर दानी । आरति हरहु दीन जनु जानी ॥
 दो०— तुम्ह प्रेरक सब के हृदयँ सो मति रामहि देहु ।

बचनु मोर तजि रहहिं घर परिहरि सीलु सनेहु ॥ ४४ ॥
 अजसु होउ जग सुजसु नसाऊ । नरक परौं बरु सुरपुरु जाऊ ॥
 सब दुख दुसह सहावहु मोही । लोचन ओट रामु जनि होंही ॥
 अस मन गुनइ राउ नहिं बोला । पीपर पात सरिस मनु डोला ॥
 रघुपति पितहि प्रेमबस जानी । पुनि कछु कहिहि मातु अनुमानी ॥
 देस काल अवसर अनुसारी । बोले बचन बिनीत बिचारी ॥
 तात कहउँ कछु करउँ ढिठाई । अनुचितु छमब जानि लरिकाई ॥
 अति लघु बात लागि दुखु पावा । काहुँ न मोहि कहि प्रथम जनावा ॥
 देखि गोसाईँहि पूँछिउँ माता । सुनि प्रसंगु भए सीतल गाता ॥
 दो०— मंगल समय सनेह बस सोच परिहरिअ तात ।

आयसु देइअ हरषि हियँ कहि पुलके प्रभु गात ॥ ४५ ॥
 धन्य जनमु जगतीतल तामू । पितहि प्रमोदु चरित सुनि जासू ॥
 चारि पदारथ करतल ताकैं । प्रिय पितु मातु प्रान सम जाकैं ॥
 आयसु पालि जनम फलु पाई । ऐहउँ बेगिहिं होउ रजाई ॥
 बिदा मातु सन आवउँ मागी । चलिहउँ बनहि बहुरि पग लागी ॥
 अस कहि राम गवनु तब कीन्हा । भूप सोक बस उतरु न दीन्हा ॥
 नगर ब्यापि गइ बात सुतीछी । छुअत चढ़ी जनु सब तन बीछी ॥

सुनि भए बिकल सकल नर नारी । बेलि बिटप जिमि दोख दवारी ॥
जो जहँ सुनइ धुनइ सिरु सोई । बड़ बिषादु नहिं धीरजु होई ॥
दो०— मुख सुखाहिं लोचन खरबहिं सोकु न हृदयै समाइ ।

मनहुँ करुन रस कटकई उतरी अवध बजाइ ॥ ४६ ॥
मिलेहि माझ बिधि बात बेगारी । जहँ तहँ दोहं कैकईह गारी ॥
एहि पापिनिहि बूझि का परेऊ । छाइ भवन पर पावकु धरेऊ ॥
निज कर नयन काढ़ि चह दोखा । डारि सुधा बिषु चाहत चीखा ॥
कुटिल कठोर कुबुद्धि अभागी । भइ रघुबंस बेनु बन आगी ॥
पालव बैठि पेड़ एहि काटा । सुख महुँ सोक ठाटु धरि ठाटा ॥
सदा रामु एहि प्रान सम्माना । कारन कवन कुटिलपनु ठाना ॥
सत्य कहहि कवि नारि सुभाऊ । सब बिधि अगहु अगाध दुराऊ ॥
निज प्रतिबिंबु बरुकु गहि जाई । जानि न जाइ नारि गति भाई ॥
दो० — काह न पावकु जारि सक का न समुद्र समाइ ।

का न करै अबला प्रबल केहि जग कालु न खाइ ॥ ४७ ॥
का सुनाइ बिधि काह सुनावा । का देखाइ चह काह देखावा ॥
एक कहहिं भल भूप न कीन्हा । बरु बिचारि नहिं कुमतिहि दीन्हा ॥
जो हठि भयउ सकल दुख भाजनु । अबला बिबस ग्यानु ग्नु गाजनु ॥
एक धरम परमिति पहिचाने । नृपाहि दोसु नहिं दोहं सयाने ॥
सिबि दधीचि हरिचंद कहानी । एक एक सन कहहिं बखानी ॥
एक भरत कर समत कहहीं । एक उदास भायँ सुनि रहहीं ॥

कान मूदि कर रद गहि जीहा । एक कहहिं यह बात अलीहा ॥
 सुकृत जाहिं अस कहत तुम्हारे । रामु भरत कहूँ प्रानपिआरे ॥
 दो०— चंदु चवै बरु अनल कन सुधा होइ बिषतूल ।

सपनेहुँ कबहुँ न करहिं किछु भरतु राम प्रतिकूल ॥ ४८ ॥
 एक बिधातहि दूषनु देहीं । सुधा देखाइ दीन्ह बिषु जेहीं ।
 खरभरु नगर सोचु सब काहू । दुसह दाहु उर मिटा उछाहू ॥
 बिप्रबधू कुलमान्य जठेरी । जे प्रिय परम कैकई केरी ॥
 लगौं देन सिख सीलु सराही । बचन बानसम लागहिं ताही ॥
 भरतु न मोहि प्रिय राम समाना । सदा कहहु यह सबु जगु जाना ॥
 करहु राम पर सहज सनेहू । केहिं अपराध आजु बनु देहू ॥
 कबहुँ न कियहु सवति आरेसू । प्रीति प्रतीति जान सबु देसू ॥
 कौसल्याँ अब काह बिगारा । तुम्ह जेहि लागि बज्र पुर पारा ।
 दो०— सीय कि पिय सँगु परिहरिहि लखनु कि रहिहहिं धाम ।

राजु कि भूँजब भरत पुर नृपु कि जिइहि बिनु राम ॥ ४९ ॥
 अस बिचारि उर छाड़हु कोहू । सोक कलंक कोठि जनि होहू ॥
 भरतहि अवसि देहु जुबराजू । कानन काह राम कर काजू ॥
 नाहिन रामु राज के भूखे । धरम धुरीन बिषय रस रूखे ॥
 गुर गृह बसहुँ रामु तजि गेहू । नृप सन अस बरु दूसर लेहू ॥
 जौं नहिं लगिहहु कहें हमारे । नहिं लागिहि कछु हाथ तुम्हारे ।
 जौं परिहास कीन्हि कछु होई । तौ कहि प्रगट जनावहु सोई ॥

राम सरिस सुत कानन जोगू । काह कहिहि सुनि तुम्ह कहूँ लोगू ॥
उठहु बेग सोइ करहु उपाई । जेहि बिधि सोकु कलंकु नसाई ॥
छं० — जेहि भाँति सोकु कलंकु जाइ उपाय करि कुल पालही ।

हठि फेरु रामहि जात बन जनि बात दूसरि चालही ॥

जिमि भानु बिनु दिनु प्रान बिनु तनु चंद बिनु जिमि जामिनी ।

तिमि अवध तुलसीदास प्रभु बिनु समुझि धौं जियँ भामिनी ॥

सो० सखिन्ह सिखावनु दीन्ह सुनत मधुर परिनाम हित ।

तेईं कछु कान न कीन्ह कटिल प्रबोधी कूबरी ॥५०॥

उतरु न देइ दुसह रिस रूखी । मृगिन्हचितव जनु बाधनि भूखी ॥

ब्याधि असाधि जानि तिन्ह त्यागी । चलीं कहत मतिमंद अभागी ॥

राजु करत यह दैअँ बिगोई । कीन्हेसि अस जस कइ न कोई ॥

एहि बिधि बिलपहिं पुर नर नारीं । देहि कुचालिहि बोटिक गारीं ॥

जरहिं बिषम जर लोहि उसासा । कवनि राम बिनु जीवन आसा ॥

बिपुल बियोग प्रजा अकुलानी । जनु जलचर गन सूखत पानी ॥

अति बिषाद बस लोग लोगई । गए मातु पहिं राम गोसाईं ॥

मुख प्रसन्न चित चौगुन चाऊ मिटा सोनु जनि राखै राऊ ।

दो० नव गयंदु रघुबीर मनु राजु अलान समान ।

छूट जानि बन गवनु सुनि उर अननु अधिकान ॥५१॥

रघुकुलतिलक जोरि दोउ हाथा । मुदित मातु पद नायउ माथा ॥

दीन्ह असीस लाइ उर लीन्हे । भूषन बसन निछावरि कीन्हे ॥

बार बार मुख चुंबति माता । नयन नेह जलु पुलकित गाता ॥
 गोद राखि पुनि हृदयँ लगाए । स्रवत प्रेमरस पयद सुहाए ॥
 प्रेमु प्रमोदु न कछु कहि जाई । रंक धनद पदबी जनु पाई ॥
 सादर सुंदर बदनु निहारी । बोली मधुर बचन महतारी ॥
 कहहु तात जननी बलिहारी । कबहिं लगन मुद मंगलकारी ॥
 सुकृत सील सुख सीवँ सुहाई । जनम लाभ कइ अवधि अधाई ॥
 दो०— जेहि चाहत नर नारि सब अति आस्त एहि भाँति ।

जिमि चातक चातकि तृषित बृष्टि सरद रितु स्वाति ॥ ५२ ॥
 तात जाउँ बाल बेगि नहाहू । जो मन भाव मधुर कछु खाहू ॥
 पितु समीप तब जाएहु भैया । भइ बड़ि बार जाइ बलि मैआ ॥
 मातु बचन सुनि अति अनुकूला । जनु सनेह सुरतरु के फूला ॥
 सुख मकरंद भरे श्रियमूला । निरखि राम मनु भवँरु न भूला ॥
 धरम धुरीन धरम गति जानी । कहेउ मातु सन अति मृदु बानी ॥
 पिताँ दीन्ह मोहि कानन राजू । जहाँ सब भाँति मोर बड़ काजू ॥
 आयसु देहि मुदित मन माता । जेहिं मुद मंगल कानन जाता ॥
 जनि सनेह बस डरपसि भोरें । आनँदु अंब अनुग्रह तोरें ॥
 दो०— बरष चारिदस बिपिन बसि करि पितु बचन प्रमान ।

आइ पाय पुनि देखिहउँ मनु जनि करसि मलान ॥ ५३ ॥
 बचन बिनीत मधुर रघुबर के । सर सम लगे मातु उर करके ॥
 सहमि सुखि सुनि सीतलि बानी । जिमि जवास परें पावस पानी ॥

कहि न जाइ कछु हृदय बिषादू । मनहुँ मृगौ सुनि केहरि नादू ॥
नयन सजल तन थर थर काँपी । माजहि खाइ मीन जनु मापी ॥
धरि धीरजु सुत बदन न्हारी । गदगद बचन कहति महतारी ॥
तात पितहि तुम्ह प्रान पिआरे । देखि मुदित नित चरित तुम्हारे ॥
राजु देन कहूँ सुभ दिन साधा । कहेउ जान बन केहिं अपराधा ॥
तात सुनावहु मोहि निदानू । को दिनकर कुल भयउ कृसानू ॥
दो०— निरखि राम रुख सचिवसुत कारनु कहेउ बुझाइ ।

सुनि प्रसंगु रहि मूक जिमि दसा बरनि नहि जाइ ॥ ५४ ॥
रखि न सकइ न कहि सक जाहू । दुहूँ भाँति उर दारुन दाहू ।
लिखत सुधाकर गा लिखि राहू । बिधि गति बाम सदा सब काहू ॥
धरम सनेह उभयँ मति घेरी । भइ गति साँप छुछुंदरि केरी ॥
राखउँ सुतहि करउँ अनुरोधू । धरमु जाइ अरु बंधु बिरोधू ॥
कहउँ जान बन तौ बडि हानी । संकट सोच बिबस भइ रानी ॥
बहुरि समुझि तिय धरमु सयानी । रामु भरतु दोउ सुत सम जानी ॥
सरल सुभाउ राम महतारी । बोली बचन धीर धरि भारी ।
तात जाउँ बलि कीन्हहु नीका । पितु आयसु सब धरमक टीका ।
दो०— राजु देन कहि दीन्ह बन मोहि न सो दुख लेसु ।

तुम्ह बिनु भरतहि भूपतिहि प्रजहि प्रचंड कलेसु ॥ ५५ ॥
जौं केवल पितु आयसु ताता । तौ जनि जाहु जानि बडि माता ॥
जौं पितु मातु कहेउ बन जाना । तौ कानन सत अवध समाना ॥

पितु बनदेव मातु बनदेवी । खग मृग चरन सरोरुह सेवी ॥
 अंतहुँ उचित नृपहि बनबासू । बय बिलोकि हियँ होइ हराँसू ॥
 बड़भागी बन अविध अभागी । जो रघुवंसतिलक तुम्ह त्यागी ।
 जौं सुत कहौं संग मोहि तेह । तुम्हरे हृदयँ होइ संदेहू ॥
 पूत परम प्रिय तुम्ह सबही के । प्रान प्रान के जीवन जी के ॥
 ते तुम्ह कहहु मातु बन जाऊँ । मैं सुनि बचन बैठि पछिताऊँ ॥
 दो०— यह बिचारि नहिँ करउँ हठ झूठ सनेहु बड़ाइ ।

मानि मातु कर नात बलि सुरति बिसरि जनि जाइ ॥ ५६ ॥
 देव पितर सब तुम्हहि गोसाईं । राखहुँ पलक नयन की नाई ॥
 अविध अंबु प्रिय परिजन मीना । तुम्ह करुनाकर धरम धुरीना ।
 अस बिचारि सोइ करहु उपाई । सबहि जिअत जेहिँ भेंटहु आई ॥
 जाहु सुखेन बनहि बलि जाऊँ । करि अनाथ जन परिजन गाऊँ ॥
 सब कर आजु सुकृत फल बीता । भयउ कराल कालु बिपरीता ॥
 बहुबिधि बिलपि चरन लपटानी । परम अभागिनि आपुहि जानी ॥
 दारुन दुसह दाहु उर व्यापा । बरनि न जाहिँ बिलाप कलापा ॥
 राम उठाइ मातु उर लाई । कहि मृदु बचन बहुरि समुझाई ॥
 दो०— समाचार तेहि समय सुनि सीय उठी अकुलाइ ।

जाइ सासु पद कमल जुग बंदि बैठि सिरु नाइ ॥ ५७ ॥
 दोन्हि असीस सासु मृदु बानी । अति सुकुमारि देखि अकुलानी ॥
 बैठि नमितमुख सोचति सीता । रूप रासि पति प्रेम पुनीता ॥

चलन चहत बन जीवन नाथू । केहि सुकृती सन होइहि साथू ॥
 की तनु प्रान कि केवल प्राना । बिधि करतवु कछु जाइ न जाना ॥
 चारु चरन नख लेखति धरनी । नूपुर मुखर मथुर कर्ब बरनी ॥
 मनहुँ प्रेम बस बिनती करहीं । हमह सीय पद जानि परिहरहीं ॥
 मंजु बिलोचन मोचति बारी । बोली देखि राम महतारी ॥
 तात सुनहु सिय अति सुकुमारी । सास ससुर परिजनहि पिआरी ॥
 दो०— पिता जनक भूपाल पनि ससुर भानुकुल भानु ।

पति रबिकुल कैरव बिपिन बिधु गुन रूप निधानु ॥ २८ ॥
 मैं पुनि पृत्रबधू प्रिय पाई । रूप रासि गुन सील सुहाई ॥
 नयन पुतरि करि प्रीति बढ़ाई । राखेउँ प्रान जानकिहिं लाई ।
 क्लृपनेल जिमि बहुबिधि लाली । सींचि सनेह सलिल प्रतिपाली ॥
 फूलत फलत भयउ बिधि बामा । जानि न जाइ काह परिनामा ॥
 पलंग पीठ तजि गोद हिंडोरा । सियै न दीन्ह पगु अवनि कठारा ॥
 जिअनमूरि जिमि जोगवत रहऊँ दीप बाति नहि टारन कहऊँ ॥
 सोइ सिय चलन चहति बन साथ । आयसु काह होइ रघुनाथा ।
 चंद किरन रस रसिक चकोरी । रबि रुख नयन सकइ किमि जोरी ॥
 दो०— करि केहरि निसिचर चरहिं दुष्ट जंतु बन भूरि ।

बिष बाटिकाँ कि सोह सुत सुभग सजीवनि मूरि ॥ ५९ ॥
 बन हित कोल किरात किसोरी । रचीं बिरंचि बिषय सुख भोरी ॥
 पाहन कर्म जिमि कठिन सुभाऊ । तिन्हहि कलेसु न कानन काऊ ॥

कै तापस तिय कानन जोगू । जिन्ह तप हेतु तजा सब भोगू ॥
 सिय बन बसिहि तात केहि भाँती । चित्रलिखित कपि देखि डैराती ॥
 सुरसर मुभग बनज बन चारी । डाबर जोगु कि हंसकुमारी ॥
 अस बिचारि जस आयसु होई । मैं सिख देउँ जानकिहि सोई ॥
 जौं सिय भवन रहै कह अंबा । मोहि कहँ होइ बहुत अवलंबा ॥
 सुनि रघुबीर मातु प्रिय बानी । सील सनेह सुधौं जनु सानी ॥
 दो०— कहि प्रिय बचन बिबेकमय कीन्हि मातु परितोष ।

लगे प्रबोधन जानकिहि प्रगटि बिषिन गुन दोष ॥ ६० ॥

मासपारायण, चौदहवाँ विश्राम

मातु समीप कहत सकुचाहीं । बोले सभउ समुझि मन माहीं ॥
 राजकुमारि सिखावनु सुनहू । आन भाँत जियँ जनि कछु गुनहू ॥
 आपन मोर नीक जौं चहहू । बचनु हमार मानि गृह रहहू ॥
 आयसु मोर सासु सेवकाई । सब बिधि भामिनि भवन भलाई ॥
 एहि ते अधिक धरमु नहिं दूजा । सादर सासु ससुर पद पूजा ॥
 जब जब मातु करिहि सुधि मोरी । होइहि प्रेम बिकल मति भोरी ॥
 तब तब तुम्ह कहि कथा पुरानी । सुंदरि समुझाएहु मृदु बानी ।
 कहउँ सुभायँ सपथ सत मोही । सुमुखि मातु हित राखउँ तोही ॥
 दो०— गुर श्रुति संमत धरम फलु पाइअ बिनहिं कलेस ।

हठ बस सब संकट सहे गालव नहुष नरेस ॥ ६१ ॥

मैं पुनि करि प्रवान पितु बानी । बेगि फिरब सुनु सुमुखि सयानी ॥

दिवस जात नहिं लगिहि बारा । सुंदरि सिखवतु सुनहु हमारा ॥
 जौं हठ करहु प्रेम बस बामा । तौ तुम्ह दुखु पाउब परिनामा ॥
 काननु कठिन भयंकरु भारी । घोर घामु हिम बारि बयारी ॥
 कुस कंटक मग काँकर नाना । चलब पयादेहिं बिनु पदत्रना ॥
 चरन कमल मृदु मंजु तुम्हारे । मारग अगम भूमिधर भारे ॥
 कदर खोह नदीं नद नारे । अगम अगाध न जाहिं निहारे ॥
 भालु बाघ बृक केहरि नागा । करहिं नाद सुनि धीरजु भागा ॥
 दो०— भूमि सयन बलकल बसन असनु कंद फल मूल ।

ते कि सदा सब दिन मिलहिं सबहु समय अनुकूल ॥ ६२ ॥
 नर अहार रजनीचर चरहीं । कपट बेष बिधि कोटिक करहीं ॥
 लागइ अति पहार कर पानी । बिपिन बिपति नहिं जाइ बखानी ॥
 ब्याल कराल बिहग बन घोरा । निसिचर निकर नारि नर चोरा ॥
 डरपहिं धीर गहन सुधि आएँ । मृगलोचनि तुम्ह भोरु सुभाएँ ॥
 हंसगवनि तुम्ह नहिं बन जोगू । सुनि अपजसु मोहि देइहि लोगू ॥
 मानस सलिल सुधौं प्रतिपाली । जिअइ कि लवन पयोधि मसाली ॥
 नव रसाल बन बिहरनसीला । सोहकि कोकिल बिपिन करीला ॥
 रहहु भवन अस हृदयँ बिचारी । चंदबदनि दुखु कानन भारी ॥
 दो० — सहज सुहृद गुर स्वाधि सिख जो न करइ सिर मानि ।

सो पछिताइ अघाइ उर अवसि होइ हित हानि ॥ ६३ ॥
 सुनि मृदु बचन मनोहर पिय के । लोचन ललित भरे जल सिय के ॥

सीतल सिख दाहक भइ कैसैं । चकइहि सरद चंद निसि जैसैं ॥
 उतरु न आव बिकल बैदेही । तजन चहत सुचि स्वामि सनेही ।
 बरबस रोकि बिलोचन बारी । धरि धीरजु उर अवनिकुमारी ॥
 लागि सासु पग कह कर जोरी । छमबि देबि बड़ि अबिनय मोरी ॥
 दीन्हि प्रानपति मोहि सिख सोई । जेहि बिधि मोर परम हित होई ॥
 मैं पुनि समुझि दोखि मन माहीं । पिय बियोग सम दुखु जग नाहीं ॥
 दो०— प्राननाथ करुनायतन सुंदर सुखद सुजान ।

तुम्ह बिनु रघुकुल कुमुद बिधु सुरपुर नरक समान ॥ ६४ ॥
 मातु पिता भगिनी प्रिय भाई । प्रिय परिवारु सुहृद समुदाई ॥
 सासु ससुर गुर सजन सहाई । सुत सुंदर सुसील सुखदाई ॥
 जहँ लागि नाथ नेह अरु नाते । पिय बिनु तियहि तरनिहु ते ताते ॥
 तनु धनु धामु धरनि पुर राजू । पति बिहीन सबु सोक समाजू ॥
 भोग रोगसम भूषन भारू । जम जातना सरिस संसारू ॥
 प्राननाथ तुम्ह बिनु जग माहीं । मो कहूँ सुखद कतहुँ कछु नाहीं ॥
 जिय बिनु देह नदी बिनु बारी । तैसिअ नाथ पुरुष बिनु नारी ॥
 नाथ सकल सुख साथ तुम्हारे । सरद बिमल बिधु बदनु निहारे ॥
 दो०— खग मृग परिजन नगरु बनु बलकल बिमल दुकूल ।

नाथ साथ सुसदन सम परनसाल सुख मूल ॥ ६५ ॥
 बनदेबी बनदेव उदारा । करिहाहिं सासु ससुर सम सारा ॥
 कुस किसलय साथरी सुहाई । प्रभु सँग मंजु मनोज तुराई ॥

कंद मूल फल अमिअ अहारू । अवध सौध सत सरिस पहारू ॥
छिनु छिनु प्रभु पद कमल बिलोकी । रहिहउं मुदित दिवस जिमि कोकी ॥
बन दुख नाथ कहे बहुतेरे । भय बिषाद परिताप घनेरे ॥
प्रभु बियोग लवलेस समाना । सब निराल होहि न कृपानिधाना ॥
अस जियै जानि सुजान सिरोमनि । लेइअ संग मोहि छाड़िअ जनि ॥
बिनती बहुत करौं का स्वामी । करुनामय उर अंतरजामी ॥
दा०— राखिअ अवध जो अर्वाध लागि रहत न जनिअहिं प्रान ।

दीनबंधु सुंदर सुखद मील सनेह निधान ॥ ६६ ॥
मोहि मग चलत न होइहि हारी । छिनु छिनु चरन सरोज निहारी ॥
सबहि भौंति पिय सेवा करिहौं । मारग जनित सकल श्रम हरिहौं ॥
पाय पखारि बैठि तरु छाहीं , करिहउं बाउ मुदित मन माहीं ।
श्रम कन सहित स्याम तनु देखैं । कहैं दुख समउ प्रानपति पेखैं ॥
सम महि तृन तरुपल्लव डासी । पाय पलोतिहि सब निसि दासी ॥
बार बार मृदु मूरति जाही । लागिहि तात बयारि न मोही ॥
को प्रभु संग मोहि चितवनिहार । सिंधवधुहि जिमि ससक सिआण ।
मैं सुकुमारि नाथ बन जोगू । तुम्हहि अचित तप मो कहूँ भोगू ॥
दो०— ऐसेउ बचन कठोर सुनि जौं न हृदय बिलगान ।

तौ प्रभु बिषम बियोग दुख सहिहहिं पावैर प्रान ॥ ६७ ॥
अस कहि सीय बिकल भइ भारी । बचन बियोगु न सकी सँभारी ॥
देखि दसा रघुपति जियै जाना । हठि राखैं नहिं राखिहि प्राना ॥

कहेउ कृपाल भानुकुलनाथा । परिहरि सोचु चलहु बन साथा ॥
 नहिं बिषाद कर अवसरु आजू । बेगि करहु बन गवन समाजू ॥
 कहि प्रिय बचन प्रिया समुझाई । लगे मातु पद आसिष पाई ॥
 बेगि प्रजा दुख मेटव आई । जननी निठुर बिसरि जनि जाई ॥
 फिरिहि दसा बिधि बहुरि कि मोरी । देखिहउँ नयन मनोहर जोरी ॥
 सुदिन सुघरी तात कब होइहि । जननी जिअत बदन बिधु जोइहि ॥
 दो०— बहुरि बच्छ कहि लालु कहि रघुपति रघुबर तात ।

कबहिं बोलाइ लगाइ हियँ हरषि निरखिहउँ गात ॥ ६८ ॥
 लखि सनेह कातरि महतारी । बचनु न आव बिकल भइ भारी ॥
 राम प्रबोधु कीन्ह बिधि नाना । समउ सनेहु न जाइ बखाना ॥
 तब जानकी सासु पग लागी । सुनिअ माय मैं परम अभागी ॥
 सेवा समय दैअँ बन दीन्हा । मोर मनोरथु सफल न कीन्हा ॥
 तजब छोभु जनि छाड़िअ छोहू । करमु कठिन कछु दोसु न मोहू ॥
 सुनि सिय बचन सासु अकुलानी । दसा कवनि बिधि कहौ बखानी ।
 बारहिं बार लाइ उर लीन्ही । धरि धीरजु सिख आसिष दीन्ही ॥
 अचल होउ अहिवातु तुम्हारा । जब लगि गंग जमुन जल धारा ॥
 दो०— सीतहि सासु असीस सिख दीन्हि अनेक प्रकार ।

चली नाइ पद पदुम सिरु अति हित बारहिं बार ॥ ६९ ॥
 समाचार जब लछिमन पाए । ब्याकुल बिलख बदन उठि धाए ॥
 कंप पुलक तन नयन सनीरा । गहे चरन अति प्रेम अधीरा ॥

कहि न सकत कछु चितवत टाढ़ । मोनु दीन जनु जल तैं काढ़े ।
 सोचु हृदयैं बिधि का होनिहारा । सबु सुखु सुकृतु सिरान हमारा ।
 मो कहूँ काह कहब रघुनाथा । रखहिं भवन कि लेहिं साथा ।
 राम बिलोकि बंधु कर जोरैं । देह गेह सब सन तृनु तोरैं ॥
 बोले बचनु राम नय नागर सील सनेह सरल सुख सागर ॥
 तात प्रेम बस अनि कदराहू । ममुझि हृदयैं परिनाम उछाहू ॥
 दो०— मातु पिता गुरु स्वामि सिख सिर धरि करहिं सुभायैं ।

लहेउ लाभु लिह जनम कर नतरु जनमु जग जायैं ॥ ७० ॥
 अस जियैं जानि सुनहु सिख भाई । करहु मातु पितु पद सेवकाई ॥
 भवन भरनु रिपुसूदन नार्हीं । राउ बृद्ध मम दुखु मन मारहीं ॥
 मैं बन जाउँ तुम्हाह लेइ साथा । होइ सबहि बिधि अवध अनाथा ॥
 गुरु पितु मातु प्रजा परिवारू । सब कहूँ परइ दुसह दुख भारू ॥
 रहहु करहु सब कर परितोषू । नतरु तात होइहि बड़ दोषू ॥
 जासु राज प्रिय प्रजा दखारी । सो नृपु अवासि नरक अधिकारी ॥
 रहहु तात असि नीति बिचारी । मुनत लखनु भए ब्याकुल भारी ॥
 सिअरें बचन सूख गए कैसें । परसत तुहिन तामरसु जैसें ॥
 दो० उतरु न आवत प्रेम बस गहे चरन अकुलाइ ।

नाथ दासु मैं स्वामि तुम्ह तजहु त काह बसाइ ॥ ७१ ॥
 दीन्ह मोहि सिख नीकि गोसाई । लागि अगम अपनी कदराई ॥
 नरबर धीर धरम धुर धारी । निगम नीति कहूँ ते अधिकारी ॥

मैं सिसु प्रभु सनेहैं प्रतिपाला । मंदरु मेरु कि लेहिं मराला ॥
 गुर पितु मातु न जानउँ काहू । कहउँ सुभाउ नाथ पतिआहू ॥
 जहैं लगि जगत सनेह सगाई । प्रीति प्रतीति निगम निजु गाई ।
 मोरें सबइ एक तुम्ह स्वामी । दीनबंधु उर अंतरजामी ।
 धरम नीति उपदेसिअ ताही । कीरति भूति सुगति प्रिय जाही ॥
 मन क्रम बचन चरन रत होई । कृपासिंधु परिहरिअ कि सोई ॥
 दो०— करुनासिंधु सुबंधु के सुनि मृदु बचन बिनीत ।

समुझाए उर लाइ प्रभु जानि सनेहैं सभीत ॥ ७२ ॥
 मागहु बिदा मातु सन जाई । आवहु बेगि चलहु बन भाई ॥
 मुदित भए सुनि रघुबर बानी । भयउ लाभ बड़ गइ बड़ि हानी ।
 हरषित हृदयँ मातु पहिं आए । मनहुँ अंध फिरि लोचन पाए ॥
 जाइ जननि पग नायउ माथा । मनु रघुनंदन जानकि साथी ।
 पूँछे मातु मलिन मन देखी । लखन कह्यो सब कथा बिसेषी ॥
 गई सहमि सुनि बचन कठोरा । मृगी देखि दव जनु चहु ओरा ॥
 लखन लखेउ भा अनरथ आजू । एहिं सनेह बस करब अकाजू ॥
 मागत बिदा सभय सकुचाहीं । जाइ संग बिधि कहिहि कि नाहीं ॥
 दो०— समुझि सुमित्राँ राम सिय रूपु सुसीलु सुभाउ ।

नृप सनेहु लखि धुनेउ सिरु पाषिनि दीन्ह कुदाउ ॥ ७३ ॥
 धीरजु धरेउ कुअवसर जानी । सहज सुहृद बोली मृदु बानी ॥
 तात तुम्हारि मातु बैदेही । पिता रामु सब भाँति सनेही ॥

अवध तहाँ जहँ राम निवासू । तहँई दिवसु जहँ भानु प्रकासू ।
जौ पै सीय रामु बन जाहीं । अवध तुम्हार काजु कछु नाहीं ।
गुर पितृ मातृ बंधु सुर साई । सइअहिं सकल प्रान की नाई ।
रामु प्रानप्रिय जीवन जी के । स्वारथ रहित सखा सबही के ॥
पूजनीय प्रिय परम जहाँ तैं । सब भानिअहिं राम के नातैं ॥
अस जियँ जानि संग बन जाहू । लेहु तात जग जीवन लाहू ॥
दो० - भूरि भाग भाजनु भयहु मोहि समेत बलि जाउँ ।

जौं तुम्हरे मन छाड़ि छलु कीन्ह राम पद ठाउँ ॥ ७४ ॥
पुत्रवती जुबती जग सोई रघुपति भगतु जासु सुतु होई ॥
नतरु बाँझ भलि बादि बिआनी । राम बिमुख सुत तैं हित जानी ॥
तुम्हरेहिं भाग रामु बन जाहीं । दूसर हेतु तात कछु नाहीं ॥
सकल सुकृत कर बड फलु एहू । राम सीय पद सहज सनेहू ॥
रागु रोषु इरिषा मदु मोहू । जनि सपनेहुँ इन्ह के बस होहू ।
सकल प्रकार बिकार बिहाई । मन क्रम बचन करेहु सेवकाई ।
तुम्ह कहँ बन सब भाँति सुपासू । सँग पितृ मातृ रामु सिय जासू ॥
जेहिं न रामु बन लहाहिं कलेसू । सुत सोइ करेहु इहइ उपदेसू ॥
छं० - उपदेसु यहु जेहिं तात तुम्हरे राम सिय सुख पावहीं ।

पितृ मातृ प्रिय परिवार पुर सुख सुरति बन बिसरावहीं ॥
तुलसी प्रभुहि निख देइ आयसु दीन्ह पुनि आसिष दई ।
रति होउ अबिरल अमल सिय रघुबीर पद नित नित नई ।

सो०—मातु चरन सिरु नाइ चले तुरत संकित हृदयै।

आगुर बिषम तोराइ मनहुं भाग मृगु भाग बस॥ ७५ ॥
 गए लखनु जहँ जानकिनाथू। भे मन मुदित पाइ प्रिय साथू॥
 बंदि राम सिय चरन सुहाए। चले संग नृपमंदिर आए॥
 कहहिं परसपर पुर नर नारी। भलि बनाइ बिधि ब्यात बिगारी॥
 तन कृस मन दुखु बदन मलीने। बिकल मनहुं माखी मधु छीने॥
 कर मीजहिं सिरु धुनि पछिताहीं। जनु बिनु पंख बिहग अकुलाहीं॥
 भइ बड़ि भीर भूप दरबारा। बरनि न जाइ बिषादु अपारा॥
 सचिवँ उठाइ राउ बैठारे। कहि प्रिय बचन रामु पगु धारे॥
 सिय समेत दोउ तनय निहारी। व्याकुल भयउ भूमिपति भारी॥
 दो०—सीय सहित सुत सुभग दोउ देखि देखि अकुलाइ।

बारहि बार सनेह बस राउ लेइ उर लाइ॥ ७६ ॥
 सकइ न बोलि बिकल नरनाहू। सोक जनित उर दारुन दाहू॥
 नाइ सीसु पद अति अनुरागा। उठि रघुबीर बिदा तब मागा॥
 पितु असीस आयसु मोहि दीजै। हरष समय बिसमउ कत कीजै॥
 तात किएँ प्रिय प्रेम प्रमादू। जसु जग जाइ होइ अपबादू॥
 सुनि सनेह बस उठि नरनाहाँ। बैठारे रघुपति गहि बाहाँ॥
 सुनहु तात तुम्ह कहूँ मुनि कहहीं। रामु चराचर नायक अहहीं॥
 सुभ अरु असुभ करम अनुहारी। ईसु देइ फलु हृदयै बिचारी॥
 करइ जो करम पाव फल सोई। निगम नीति असि कह सबु कोई॥

दो०— और करै अपराधु कोउ और पाव फल भोगु।

अति बिचित्र भगवंत गति को जग जानै जांगु। ७७॥
 रायँ राम रखन हित लागी । बहुत उपाय किए छलु त्यागी ॥
 लखी राम रुख रहत न जाने । धरम धुरंधर धीर सयाने ॥
 तब नृप मीय लाइ उर लीन्ही । अति हित बहुत भौति सिख दीन्ही ॥
 कहि बन के दुख दुसह सुनाए । सासु ससुर पिनु सुख समुझाए ॥
 सिय मनु राम चरन अनुरागा । घरु न सुगमु बनु बिपमु न लागा ॥
 औरउ सबहिं साँय समुझाई । कहि कहि बिपनि बिपनि अधिकाई ॥
 सचिव नारि गुर नारि सयानी । सहित सनेह कहाँहं मृदु बानी ॥
 तुम्ह कहँ तौ न दीह बनबासू । करहु जो कहहिं ससुर गुर सासू ।
 दो०— सिख सीतलि हित मधुर मृदु सुनि सीतहि न सोझनि ।

सरद बंद चदिनि लगत जनु चकई अकुलानि ॥ ७८ ॥
 सीय सकुच बस उतरु न देई । सो सुनि तमाकि उठी कैकेई ॥
 मुनि पट भूषन भाजन आनी । आगँ धरि बोली मृदु बानी ॥
 नृपहि प्रानप्रिय तुम्ह रघुबीरा । सील सनेह न छाड़िहि भोरा ॥
 सुकृतु सुजसु परलोकु नसाऊ । तुम्हहि जान बन कहिहि न काऊ ॥
 अस बिचारि सोइ करहु जो भावा । राम जननि सिख सुनि मुख पावा ॥
 भूपहि बचन बानसम लागे । करहिं न प्रान पयान अभागे ॥
 लोग बिकल मुरुछित नरनाहू । काह करिअ कछु सूझ न काहू ॥
 रामु तुरत मुनि बेषु बनाई । चले जनक जननिहि सिरु नाई ॥

दो० — सजि बन साजु सपाजु सबु बनिता बंधु समेत ।

बंदि बिप्र गुर चरन प्रभु चले करि सबहि अचेत ॥ ७९ ॥
 निकसि बसिष्ठ द्वार भए ठाढ़े । देखे लोग बिरह दव दाढ़े ॥
 कहि प्रिय बचन सकल समुझाए । बिप्र बृंद रघुबीर बोलाए ॥
 गुर सन कहि बरषासन दीन्हे । आदर दान बिनय बस कीन्हे ॥
 जाचक दान मान संतोषे । मीत पुनीत प्रेम परितोषे ॥
 दासीं दास बोलाइ बहोरी । गुरहि सौंपि बोले कर जोरी ॥
 सब कै सार सँभार गोसाईं । करबि जनक जननी की नाई ॥
 बारहिं बार जोरि जुग पानी । कहत रामु सब सन मृदु बानी ॥
 सोइ सब भाँति मोर हितकारी । जेहि तैं रहै भुआल सुखारी ॥
 दो० — मातु सकल मोरे बिरहैं जेहिं न होहिं दुख दीन ।

सोइ उपाउ तुम्ह करेहु सब पुर जन परम प्रवीन ॥ ८० ॥
 एहि बिधि राम सबहि समुझावा । गुर पद पदुम हरषि सिरु नावा ॥
 गनपति गौरि गिरीसु मनाई । चले असीस पाइ रघुराई ॥
 राम चलत अति भयउ बिषादू । सुनि न जाइ पुर आरत नादू ॥
 कुसगुन लंक अवध अति सोकू । हरष बिषाद बिबस सुरलोकू ॥
 गइ मुरुछा तब भूपति जागे । बोलि सुमंत्रु कहन अस लागे ॥
 रामु चले बन प्रान न जाहीं । केहि सुख लागि रहत तन माहीं ॥
 एहि तैं कवन व्यथा बलवाना । जो दुखु पाइ तजहिं तनु प्राना ॥
 पुनि धरि धीर कहइ नरनाहू । लै रथु संग सखा तुम्ह जाहू ॥

दो०— सुठि सुकुमार कुमार दोउ जनकसुता सुकुमारि।

रथ चढ़ाइ देखराइ बनु फिरेहु गएँ दिन चारि॥८१॥
जौं नहि फिरहिं धीर दोउ भाई । सत्यसंध दृढ़व्रत रघुराई ॥
तौ तुम्ह बिनय करेहु कर जोरी । फेरिअ प्रभु मिथिलेसकिसोरी ॥
जब सिय कानन देखि डेराई । कहेहु मोरि सिख अवसरु पाई ॥
सासु ससुर अस कहेउ सँदेसू । पुत्रि फिरिअ बन बहुत कलेसू ॥
पितुगृह कबहुँ कबहुँ ससुरारी । रहेहु जहाँ रुचि होइ तुम्हारी ॥
एहि बिधि करेहु उपाय कदंबा । फिरइ त होइ प्राण अवलंबा ॥
नाहिं त मोर मरनु परिनामा । कछु न बसाइ भएँ बिधि बामा ॥
अस कहि मुरछि परा महि राऊ । रामु लखनु सिय आनि देखाऊ ॥
दो० — पाइ रजायसु नाइ सिरु रथु अति बेग बनाइ।

गयउ जहाँ बाहेर नगर सीय सहित दोउ भाइ॥८२॥
तब सुमंत्र नृप बचन सुनाए । करि बिनती रथ रामु चढ़ाए ॥
चढ़ि रथ सीय सहित दोउ भाई । चले हृदयँ अवध्राहि सिरु नाई ॥
चलत रामु लाख अवध अनाथा । चिकल लोग सब लागे साथी ।
कृपासिंधु बहुबिधि समुझावाहिं । फिरहिं प्रेम अस पुनि फिरि आवहिं ।
लागति अवध भयावनि भारी । मानहुँ कालराति औंधिआरी ॥
घोर जंतु सम पुर नर नारी डरपाहिं एकाहि एक निहारी ॥
घर मसान परिजन अनु भूला । सुत हित भीत मनहुँ जमदूता ॥
बागन्ह बिटप बेलि कुम्हिलाहीं । सरित सरोवर देखि न जाहीं ॥

दो०—हय गय कोटिन्ह केलिमृग पुरपसु चातक मोर।

पिक रथांग सुक सारिका सारस हंस चकोर॥८३॥
 राम बियोग बिकल सब ठाढ़े । जहँ तहँ मनहुँ चित्र लिखि काढ़े ॥
 नगरु सफल बनु गहबर भारी । खग मृग बिपुल सकल नर नारी ॥
 बिधि कैकई किरातिनि कीन्ही । जेहिं दब दुसह दसहुँ दिसि दीन्ही ॥
 सहि न सके रघुबर बिरहागी । चले लोग सब ब्याकुल भागी ॥
 सबहिं बिचारु कीन्ह मन माहीं । राम लखन सिय बिनु सुखु नाहीं ॥
 जहाँ रामु तहँ सबुइ समाजू । बिनु रघुबीर अवध नहिं काजू ॥
 चले साथ अस मंत्रु दृढ़ाई । सुर दुर्लभ सुख सदन बिहाई ॥
 राम चरन पंकज प्रिय जिन्हही । बिषय भोग बस करहिं कि तिन्हही ॥
 दो०—बालक बृद्ध बिहाइ गृहँ लगे लोग सब साथ ।

तमसा तीर निवासु किय प्रथम दिवस रघुनाथ॥८४॥
 रघुपति प्रजा प्रेमबस देखी । सदय हृदयँ दुखु भयउ बिसेषी ॥
 करुनामय रघुनाथ गोसाँई । बेगि पाइअहिं पीर पराई ॥
 कहि सप्रेम मृदु बचन सुहाए । ब्रहुर्बिध राम लोग समुझाए ॥
 किए धरम उपदेस घनेरे । लोग प्रेम बस फिरहिं न फेरे ॥
 सीलु सनेहु छाड़ि नहिं जाई । असमंजस बस भे रघुराई ॥
 लोग सोग श्रम बस गए सोई । कछुक देवमायाँ मति मोई ॥
 जबहिं जाम जुग जामिनि बीती । राम सचिव सन कहेउ सप्रीती ॥
 खोज मारि रथु हाँकहु ताता । आन उपायँ बनिहि नहिं बाता ॥

दो०— राम लखन सिय जान चढ़ि संभु चरन मित्र नाइ ।

सचिवँ चलायउ तुरत रथु इत उत खोज दुराइ ॥ ८५ ॥
जागे सकल लोग भएँ भोरू । गे रघुनाथ भयउ अति सोरू ॥
रथ कर खोज कतहुँ नहिँ पावहिँ । राम राम कहि चहुँदिसि धावहिँ ॥
मनहुँ बारिनिधि बूड जहाजू । भयउ बिकल बड़ बनिक समाजू ॥
एकहिँ एक देहिँ उपदेसू । तजे राम हम जानि कलेसू ॥
निंदहिँ आपु सराहहिँ मीना । धिग जीवनु रघुबीर बिहीना ॥
जौँ पै प्रिय बियोगु बिधि कीन्हा । तौ कस मरनु न मार्गे दीन्हा ॥
एहि बिधि करत प्रलाप कलापा । आए अवध भरे परितापा ॥
बिषम बियोगु न जाइ बखाना । अवधि आस सब राखहिँ प्राणा ॥
दो०— राम दरस हित नेम छत लगे करन नर नारि ।

मनहुँ कोक कोकी कमल दीन बिहीन तमारि ॥ ८६ ॥
सौता सचिव सहित दोड भाई । सृंगबेरपुर पहुँचे जाई ।
उतरे राम देवसरि देखी । कीन्ह दडवत हरषु बिसेषी ।
लखन सचिवँ सियँ किए प्रनामा । सबहि सहित सुखु पायउ रामा ॥
गंग सकल मुद मंगल मूला । सब सुख करनि हरनि सब सुला ॥
कहि कहि कोटिक कथा प्रसंगा । रामु बिलोकहिँ गंग तरंगा ॥
सचिवहि अनुजहि प्रियहि सुनाई । बिबुध नदी महिमा अधिकाई ॥
मज्जनु कीन्ह पंथ श्रम गयऊ । सुचि जलु पिअत मुदित मन भयऊ ॥
सुमिरत जाहि मिटइ श्रम भारू । तेहि श्रम यह लौकिक व्यवहारू ॥

दो०— सुद्ध सच्चिदानंदमय कंद भानुकुल केतु।

चरित करत नर अनुहरत संमृति सागर सेतु ॥ ८७ ॥
 यह सुधि गुहँ निषाद जब पाई । मुदित लिए प्रिय बंधु बोलाई ॥
 लिए फल मूल भेंट भरि भारा । मिलन चलेउ हियँ हरषु अपारा ॥
 करि दडवत भेंट धरि आगें । प्रभुहि बिलोकत अति अनुरागें ॥
 सहज सनेह बिबस रघुराई । पूँछी कुसल निकट बैठाई ॥
 नाथ कुसल पद पंकज देखें । भयउँ भागभाजन जन लेखें ॥
 देव धरनि धनु धामु तुम्हारा । मैं जनु नीचु सहित परिवारा ॥
 कृपा करिअ पुर धारिअ पाऊ । थापिय जनु सबु लोगु सिहाऊ ॥
 कहेहु सत्य सब सखा सुजाना । मोहि दीन्ह पितु आयसु आना ॥
 दो०— वरष चारिदस बासु बन मुनि ब्रत बेषु अहारु ।

ग्राम बासु नहिँ उचित सुनि गुहहिँ भयउ दुखु भारु ॥ ८८ ॥
 राम लखन सिय रूप निहारी । कहाँहं सप्रेम ग्राम नर नारी ॥
 ते पितु मातु कहहु सखि कैसे । जिन्ह पटए बन बालक ऐसे ॥
 एक कहहिँ भल भूपति कीन्हा । लोयन लाहु हमहिँ बिधि दीन्हा ॥
 तब निषादपति उर अनुमाना । तरु सिसुपा मनोहर जाना ॥
 लैं रघुनार्थहिँ ठाउँ देखावा । कहेउ राम सब भाँति सुहावा ॥
 पुरजन करि जोहारु घर आए । रघुबर संध्या करन सिधाए ॥
 गुहँ सँवारि साँथरी डसाई । कुस किसलयमय मृदुल सुहाई ॥
 सुचि फल मूल मधुर मृदु जानी । दोना भारि भरि राखेसि पानी ॥

दो० मिय सुमंत्र भ्राता सहित कद मूल फल खाइ।

सयन कीन्ह रघुबसमनि पाय पलोतत भाइ॥८९॥
उठे लाखन प्रभु सोवत जानी । कहि सनिवाहि सोवन मृदु बनी ।
कछुक दूरि सजि बान सरासन । जागन लगे बैठि श्रीरासन ।
गुहँ बोलाइ पाहरू प्रतीनी ठावँ ठावँ राखे अति प्रीती॥
आपु लाखन पहि बैठेउ जाई । काटि भाथी सर चाप चढ़ाई॥
सोवत प्रभुहि निहारि निपादू । भयउ प्रेम बस हृदयँ बिषादू॥
तनु पुलकित जलु लोचन बहई । बचन सप्रेम लाखन सन कहई ।
भूपति भवन सुभायँ सुहावा । सुरपति सदनु न पटतर पावा ।
मनिमय रचित चारु चौबारे जनु रतिपति निज हाथ सँवारे॥
दो०— सुचि सुबिचित्र सुभोगमय सुभन सुगंध सुवास।

पलंग मंत्रु मनि दीप जहँ सब बिधि सकल सुपास॥ ९०॥
बिबिध बसन उपधान तुराई । छीर फेन मृदु बिसद सहाई॥
तहँ सिय राम सयन निसि करहीं । निज छबि रति मनोज मदु हरहीं ।
ते सिय राम साथरीं सोए । श्रमित बसन बिनु जाहि न जोए ।
मातु पिता परिजन पुरबासी सखा मुसील दास अरु दामी॥
जोगवहिं जिन्हहि प्रान की नाई । महि सोवत तेड राम गोसाई ।
पिता जनक जग बिदित प्रभाऊ । मसुर सुरेस मग्वा रघुराऊ॥
रामचंदु पति सा बैदेही । सोवत माह बिधि बाम न केही ।
सिय रघुबीर कि कानन जोगु । करम प्रधान सत्य कह लोगु ।

दो०— कैकयनंदिनि मंदमति कठिन कुटिलपनु कीन्ह।

जोहिं रघुनंदन जानकिहि सुख अवसर दुखु दीन्ह ॥ ११ ॥
 भइ दिनकर कुल बिटप कुठारी । कुमति कीन्ह सब बिस्व दुखारो ॥
 भयउ बिषादु निषादहि भारी । राम सीय महि सयन निहारी ॥
 बोले लखन मधुर मृदु बानी । ग्यान बिराग भगति रस सानी ॥
 काहु न कोउ सुख दुख कर दाता । निज कृत करम भोग सबु भ्राता ॥
 जोग बियोग भोग भल मंदा । हित अनहित मध्यम भ्रम फंदा ॥
 जनमु भरनु जहँ लागि जग जालू । संपति बिपति करमु अरु कालू ॥
 धरनि धामु धनु पुर परिवारू । सरगु नरकु जहँ लागि व्यवहारू ॥
 देखिअ सुनिअ गुनिअ मन माहीं । मोह मूल परमारथु नाहीं ॥
 दो० - सपनें होइ भिखारि नृपु रंकु नाकपति होइ ।

जागै लाभु न हानि कछु तिमि प्रपंच जियँ जोइ ॥ १२ ॥
 अस बिचारि नहिं कीजिअ रोसू । काहुहि बादि न देइअ दोसू ॥
 मोह निसाँ सबु सोवनिहारा । देखिअ सपन अनेक प्रकारा ॥
 एहिं जग जामिनि जागहिं जोगी । परमारथी प्रपंच बियोगी ॥
 जानिअ तबहिं जीव जग जागा । जब सब बिषय बिलास बिरगा ॥
 होइ बिबेकु मोह भ्रम भागा । तब रघुनाथ चरन अनुरागा ॥
 सखा परम परमारथु एहू । मन क्रम बचन राम पद नेहू ॥
 राम ब्रह्म परमारथ रूपा । अबिगत अलख अनादि अनूपा ॥
 सकल बिकार रहित गतभेदा । कहि नित नेति निरूपहिं बेदा ॥

दो०— भगत भूमि भूसुर सुगभि सुर हित लागि कृपाल।

करत चरित धरि मनुज तनु सुनत मिटहि जग जाल ॥ ९३ ॥

मासपासयण, पंद्रहवाँ विश्राम

सखा समुझि अस परिहरि मोहू । सिय रघुबीर चरन रत होहू ॥

कहत राम गुन भा भिनुसारा । जागे जग मंगल सुखदारा ॥

सकल सौच करि राम नहावा । सुचि सुजान बट छीर मगावा ॥

अनुज सहित सिर जटा बनाए । देखि सुमंत्र नयन जल छाए ॥

हृदयँ दाहु अति बदन मलीना । कह कर जोरि बचन अति दीना ॥

नाथ कहेउ अस कोसलनाथा । लै रथु जाहु राम केँ साथा ॥

बनु देखाइ सुरसरि अन्हवाई । आनेहु फेरि बेगि दोउ भाई ॥

लखनु राम सिय आनेहु फेरी । संसय सकल सँकोच निबेरी ॥

दो०— नृप अस कहेउ गोसाइँ जम कहइ करीं बलि सोइ ।

करि बिनती पायन्ह परेउ दीन्ह बाल जिमि रोइ ॥ ९४ ॥

तात कृपा करि कीजिअ सोई । जातैं अवध अनाथ न होई ॥

मंत्रिहि राम उठाइ प्रबोधा । तात धरम मतु तुम्ह सबु सोधा ॥

सिबि दधीच हरिचंद नरेसा । सहे धरम हित कोटि कलेसा ॥

रंतिदेव बलि भूप सुजाना । धरमु धरेउ सहि संकट नाना ॥

धरमु न दूसर सत्य समाना । आगम निगम पुरान बखाना ॥

मैं सोइ धरमु सुलभ करि पावा । तजैं तिहूँ पुर अपजसु छावा ॥

संभावित कहूँ अपजस लाहू । मरन कोटि सम दारुन दाहू ॥

तुम्ह सन तात बहुत का कहऊँ । दिऐँ उतरु फिरि पातकु लहऊँ ॥

दो० — पितु पद गहि कहि कोटि नति बिनय करब कर जोरि ।

चिंता कवनिहु खात कै तात करिअ जनि मोरि ॥ ९५ ॥
 तुम्ह पुनि पितु सम अति हित मोरें । बिनती करउँ तात कर जोरें ॥
 सब बिधि सोइ करतब्य तुम्हारे । दुख न पाव पितु सोच हमारे ॥
 सुनि रघुनाथ सचिव संबाद्र । भयउ सपरिजन बिकल निषाद्र ॥
 पुनि कळु लखन कही कटु बानी । प्रभु बरजे बड़ अनुचित जानी ॥
 सकुचि राम निज सपथ देवाई । लखन सँदेसु कहिअ जनि जाई ॥
 कह सुमंत्रु पुनि भूप सँदेसु । सहि न सकहि सिय बिपिन कलेसु ॥
 जेहि बिधि अवध आव्र फिरि सीया । सोइ रघुबरहि तुम्हहि करनीया ॥
 नतरु निपट अवलंब बिहीना । मैं न जिअब जिमि जल बिनु मीना ॥
 दो० — भइकैं ससुरें सकल सुख जबहि जहाँ मनु मान ।

तहँ तब रहिहि सुखेन सिय जब लागि बिपति बिहान ॥ ९६ ॥
 बिनती भूप कीन्ह जेहि भाँती । आरति प्रीति न सो कहि जाती ॥
 पितु सँदेसु सुनि कृपानिधाना । सियहि दीन्ह सिख कोटि बिधाना ॥
 सामु ससुर गुर प्रिय परिवारु । फिरहु त सब कर मिटै खभारु ॥
 सुनि पति बचन कहति बैदेही । सुनहु प्रानपति परम सनेही ॥
 प्रभु करुनामय परम बिबेकी । तनु तज रहति छाँह किमि छँकी ॥
 प्रभा जाइ कहँ भानु बिहाई । कहँ चंद्रिका चंदु तजि जाई ॥
 पतिहि प्रेममय बिनय सुनाई । कहति सचिव सन गिरा सुहाई ॥

तुम्ह पितु ससुर सरिस हितकारी । उतर देउँ फिरि अनुचित भारी ।
दो०— आरति बस सनमुख भइउँ बिलगु न मानब तात ।

आरजसुत पद कमल बिनु बादि जह्यँ लगि नात ॥ ९७ ॥
पितु बैभव बिलास मैं डीठा नृप मनि मुकुट मिलित पद पीठा ॥
सुखनिधान अस पितृ गृह मोरें । प्रिय बिहीन मन भाव न भोरें ॥
ससुर चक्कवइ कोसलराऊ । भुवन चारिदस प्रगट प्रभाऊ ॥
आगें होइ जेहि सुरपति लेई । अरध सिधामन आसनु देई ।
ससुर एतादृस अवध निचासू । प्रिय परिवारु मातृ सम सासू ।
बिनु रघुपति पद पदुम परागा । मोहि केउ सपनेहुँ सुखद न लागा ।
अगम पंथ बनभूमि पहारा । करि केहरि सर सरित अपारा ।
कोल किरात कुरंग बिहंगा । माहि सब सुखद प्रानपति सगा ।
दो०— सासु ससुर सन मोरि हुँनि बिनय करब परि पायँ ।

मोर सोचु जानि करिअ कछु मैं बन सुखी सुभायँ ॥ ९८ ॥
प्राननाथ प्रिय देवर साथ । बीर धुरीन धरें धनु भाथा ॥
नहिं मग श्रमु भ्रमु दुख मन मोरें । मोहि लागि सोचु करिअ जानि भारें ॥
सुनि सुमंत्रु सिय सीतलि बानी । भयउ बिकल जनु फनि मनि हानी ॥
नयन सूझ नहिं सुनइ न काना । कहि न सकइ कछु अति अकुलाना ॥
राम प्रबोधु कीन्ह बहु भाँती । तदपि होति नहिं सीतलि छाती ।
जतन अनेक साथ हित कीन्हे । उचित उतर रघुनंदन दीन्हे ।
मेदि जाइ नहिं राम रजाई । कठिन करम गति कछु न बसाई ॥

राम लखन सिय पद सिरु नाई । फिरेउ बनिक जिमि मूर गवाँई ॥

दो०—रथु हाँकेउ हय राम तन हेरि हेरि हिहिनाहिं ।

देखि निषाद बिषादबस धुनहिं सीस पछिताहिं ॥ ९९ ॥

जासु बियोग बिकल पसु ऐसैं । प्रजा मातु पितु जिइहहिं कैसैं ॥

बरबस राम सुमंत्रु पठाए । सुरसरि तीर आपु तब आए ॥

मागी नाव न केवटु आना । कहइ तुम्हार मरमु मैं जाना ॥

चरन कमल रज कहूँ सबु कहई । मानुष करनि मूरि कछु अहई ॥

छुअत सिला भइ नारि सुहाई । पाहन तैं न काठ कठिनाई ॥

तरनिउ मुनि घरिनी होइ जाई । बाट परइ मोरि नाव उड़ाई ॥

एहिं प्रतिपालउँ सबु परिवारू । नहिं जानउँ कछु अउर कबारू ॥

जौ प्रभु पार अवसि गा वहहू । मोहि पद पदुम पखारन कहहू ॥

छं०—पद कमल धोइ चढ़ाइ नाव न नाथ उतराई चहौं ।

मोहि राम राउरि आन दसरथ सपथ सब साची कहौं ॥

वरु तीर मारहुँ लखनु पै जब लगि न पाय पखारिहौं ।

तब लगि न तुलसीदास नाथ कृपाल पारु उतारिहौं ॥

सो०—सुनि केवट के बैन प्रेम लपेटे अटपटे ।

बिहसे करुनाएन चितइ जानकी लखन तन ॥ १०० ॥

कृपासिंधु बोले मुसुकाई । सोइ करु जेहिं तब नाव न जाई ॥

बेगि आनु जल पाय पखारू । होत बिलंबु उतारहि पारू ॥

जासु नाम सुमिरत एक बारा । उतरहिं नर भवसिंधु अपारा ॥

सोइ कृपालु केवटहि निहोरा । जेहि जगु किय निहु पगहु ते थोरा ॥
 पद नख निरखि देवसरि हरषी । सुनि प्रभु बचन मोहैं मति करषी ॥
 केवट राम रजायसु पावा । पानि कटवता भरि लेइ आवा ॥
 अति आनंद उमगि अनुरागा । चरन सरोज पखारन लागा ॥
 बरषि सुमन सुर सकल सिंहाही । एहि सम पुन्यपुंज कोउ नाही ।
 दो० — पद पखारि जल पान करि आपु सहित परिवार ।

पितर पारु करि प्रभुहि पुनि मुदित गयउ लेइ पार ॥ १०१ ॥
 उतरि अढ़ भए सुरसरि रेता । सोय रामु गृह लखन समेता ॥
 केवट उतरि दडवत कोन्हा प्रभुहि सकुच एहि नहिं कछु दीन्हा ।
 पिय हिय की सिय जाननिहारी मन मुदरी मन मुदित उतारी ॥
 कहेउ कृपालु लेहि उतराई केवट चरन गह अकुलाई ॥
 नाथ आजु मैं काह न पावा । मिटे दोष दुख दारिद दावा ॥
 बहुत काल मैं कीन्ह मजूरी आजु दीन्ह बिधि बनि भलि भूरी ।
 अब कछु नाथ न चाहिअ मोरैं । दीनदयाल अनुग्रह तोरैं ॥
 फिरती बार मोहि जो देबा । सो प्रसादु मैं सिर धरि लेबा ॥
 दो० — बहुत कीन्ह प्रभु लखन सियैं नहिं कछु केवटु लेइ ।

विदा कीन्ह करुनायतन भगति बिमल बरु देइ ॥ १०२ ॥
 तब मज्जनु करि रघुकुलनाथा । पूजि पारथिव नायउ माथा ॥
 सियैं सुरसरिहि कहेउ कर जोरी । मातु मनोरथ पुरउनि मोरी ॥
 पति देवर सँग कसल बहोरी । आइ करौं जेहिं पूजा तोरी ॥

सुनि सिय बिनय प्रेम रस सानी । भइ तब बिमल बारि बर बानी ॥
 सुनु रघुबीर प्रिया बैदेही । तब प्रभाउ जग बिदित न केही ॥
 लोकप होहि बिलांकत तोरें । तोहि सेवाहि सब सिधि कर जोरें ॥
 तुम्ह जो हमहि बाँड़ बिनय मुनाई । कृपा कीन्ह मोहि दीन्ह बड़ाई ॥
 तदाप देबि मैं देबि असीसा । सफल होन हित निज बागीसा ॥
 दो० — प्राननाथ देवर सहित कुसल कोमला आइ ।

पूजिहि सब मनकामना सुजसु रहिहि जग छाड़ि ॥ १०३ ॥
 गंग बचन सुनि मंगल मूला । मुदित सीय सुरसरि अनुकूला ॥
 तब प्रभु गुहहि कहेउ घर जाहू । सुनत सूख मुखु भा उर दाहू ॥
 दीन बचन गुह कह कर जोरी । बिनय सुनहु रघुकुलमनि मोरी ॥
 नाथ साथ रहि पंथु देखाई । करि दिन चारि चरन सेवकाई ॥
 जेहिं बन जाइ रहब रघुराई । परनकुटी मैं कराबि सुहाई ॥
 तब मोहि कहैं जसि देल रजाई । सोइ करिहउँ रघुबीर दोहाई ॥
 सहज सनेह राम लखि ताम् । संग लीन्ह गुह हृदयँ हुलासू ॥
 पुनि गुहँ ग्याति बोलि सब लीन्हें । करि परितोषु बिदा तब कीन्हें ॥
 दो० — तब गनपति सिव सुमिरि प्रभु नाइ सुरसरिहि माथ ।

सखा अनुज सिय सहित बन गवनु कीन्ह रघुनाथ ॥ १०४ ॥
 तेहि दिन भयउ न्हिटप तर बागू । लखन सखाँ सब कीन्ह सुपासू ॥
 प्रात प्रातकृत करि रघुराई । तीरथराजु दीख प्रभु जाई ॥
 सचिव सत्य श्रद्धा प्रिय नारी । माधव सरिस मीतु हितकारी ॥

चारि पदारथ भरा भँडारू । पुन्य प्रदेस देस अति चारू ॥
छेत्रु अगम गढु गाढ मुहावा । सपनेहुँ नहिं प्रतिपच्छिन्ह पावा ॥
सेन सकल तीरथ बर बौरा । कलुष अनीक दलन रनधीरा ॥
संगमु सिंहासनु सुठि सोहा । छत्रु अखयबटु मुनि मन मोहा ॥
चवैर जमुन अरु गंग तरंगा । देखि होहि दुख दारिद भगा ॥
दो० — सेवहिं सुकृती साधु सुचि पावहिं सब मनकाम ।

बंदी बेद पुरान गन कहहिं बिमल गुन ग्राम ॥ १०५ ॥
को कहि सकइ प्रयाग प्रभाऊ । कलुष पुंज कुंजर मृगराऊ ॥
अस तीरथपति देखि सुहावा । सुख सागर रघुबर सुख पावा ॥
कहि सिय लखनहि सखहि सुनाई । श्रीमुख तीरथराज बड़ाई ॥
करि प्रनामु देखत बन बागा । कहत महातम अति अनुरागा ॥
एहि बिधि आइ बिलोकी बेनी । सुमिरत सकल सुमंगल देनी ॥
मुदित नहाइ कीन्हि सिव सेवा । पूजि जथाबिधि तीरथ देवा ॥
तब प्रभु भरद्वाज पहिं आए । करत दडवत मुनि उर लाए ॥
मुनि मन मोद न कछु कहि जाई । ब्रह्मानंद रासि जनु पाई ॥
दो० — दीन्हि असीस मुनीस उर अति अनंदु अस जानि ।

लोचन गोचर सुकृत फल मनहुँ किए बिधि आनि ॥ १०६ ॥
कुसल प्रसन्न करि आसन दीन्हे । पूजि प्रेम परिपूरन कीन्हे ॥
कंद मूल फल अंकुर नीके । दिए आनि मुनि मनहुँ अमी के ॥
सीय लखन जन सहित सुहाए । अति रुचि राम मूल फल खाए ॥

भए बिगतश्रम रामु सुखारे । भरद्वाज मृदु बचन उचारे ॥
 आजु सुफल तपु तीरथ त्यागू । आजु सुफल जप जोग बिरागू ॥
 सफल सकल सुभ साधन साजू । राम तुम्हहि अवलोकत आजू ॥
 लाभ अवधि सुख अवधि न दूजी । तुम्हरेँ दरस आस सब पूजी ॥
 अब करि कृपा देहु बर एहू । निज पद सरसिज सहज सनेहू ॥
 दो०— करम बचन मन छाड़ि छत्तु जब लगि जनु न तुम्हार ।

तब लगि सुखु सपनेहुँ नहीं किएँ कोटि उपचार ॥ १०७ ॥
 सुनि मुनि बचन रामु सकुचाने । भाव भगति आनंद अघाने ॥
 तब रघुबर मुनि सृजसु सुहावा । कोटि भौति कहि सबहि सुनावा ॥
 सो बड़ सो सब गुन गन गेहू । जेहि मुनीस तुम्ह आदर देहू ॥
 मुनि रघुबीर परसपर नवहीं । बचन अगोचर सुख अनुभवहीं ॥
 यह सुधि पाइ प्रयाग निवासी । बटु तापस मुनि सिद्ध उदासी ॥
 भरद्वाज आश्रम सब आए । देखन दसरथ सुअन सुहाए ॥
 राम प्रनाम कीन्ह सब काहू । मुदित भए लहि लोयन लाहू ॥
 देहिं असीस परम सुखु पाई । फिरे सराहत सुंदरताई ॥
 दो०— राम कीन्ह बिश्राम निसि प्रात प्रयाग नहाइ ।

बले सहित सिय लखन जन मुदित मुनिहि सिरु नाइ ॥ १०८ ॥
 राम सप्रेम कहेउ मुनि पाहीं । नाथ कहिअ हम केहि मग जाहीं ॥
 मुनि मन बिहसि राम सन कहहीं । सुगम सकल मग तुम्ह कहूँ अहहीं ॥
 साथ लागि मुनि सिष्य बोलाए । सुनि मन मुदित पचासक आए ॥

सबन्हि राम पर प्रेम अपारा । सकल कहहिं मगु दीख हमारा ॥
मुनि बटु चारि संग तब दीन्हे । जिन्ह बहुजनम सुकृत सब कीन्हे ।
करि प्रनाम रिषि आयसु पाई । प्रमुदित हृदयँ चले रघुआई ।
ग्राम निकट जब निकसहिं जाई । देखहिं दरसु नारि नर धाई ।
होहिं सनाथ जनम फलु पाई । फिरहिं दुखित मनु संग पठाई ॥
दो०— बिदा किए बटु बिनय करि फिरे पाइ मन काम ।

उतरि नहाए जम्पन जल जो सरीर सम स्याम । १०१ ॥
सुनत तीरबासी नर नारी । धाए निज निज काज बिसारी ॥
लाखन राम सिय सुंदरताई । देखि करहिं निज भाग्य बडाई ॥
अति लालसा बसहिं मन माहीं । नाउँ गाउँ बूझत सकुचाहीं ।
जे तिन्ह महुँ बयबिरिध सयाने । तिन्ह करि जुगुति रामु पहिचाने ।
सकल कथा तिन्ह सबहि सुनाई । बनहि चले पितु आयसु पाई ।
सुनि सबिषाद सकल पछिछाहीं । रानी रायँ कीन्ह भल नाहीं
तैहि अवसर एक तापसु आवा । तेज पुंज लघुबयस सुहावा ॥
कबि अलखित गति बेषु बिरागी । मन क्रम बचन राम अनुरागी ॥
दो०— सजल नयन तन पुलकि निज इष्टदेउ पहिचानि ।

परेउ दंड जिमि धरनित्तल दस्मा न जाइ बखानि ॥ ११० ॥
राम सप्रेम पुलकि उर लावा परम रक जनु पारसु पावा ।
मनहुँ प्रेमु परमारथु दोऊ । मिलत धरें तन कह सबु कोऊ ॥
बहुरि लखन पायन्ह सोद लाग । लीन्ह उठाइ उमगि अनुराग ।

पुनि सिय चरन धूरि धरि सीसा । जननि जानि सिसु दीन्ह असीसा ॥
 कीन्ह निषाद दंडवत तेही । मिलेउ मुदित लखि राम सनेही ॥
 पिअत नयन पुट रूपु पियूषा । मुदित सुअसनु पाइ जिमि भूखा ॥
 ते पितु मातु कहहु सखि कैसे । जिन्ह पठए बन बालक ऐसे ॥
 राम लखन सिय रूपु निहारी । होहिं सनेह बिकल नर नारी ॥
 दो०— तब रघुबीर अनेक बिधि सखहि सिखावनु दीन्ह ।

राम रजायसु सीस धरि भवन गवनु तेई कीन्ह ॥ १११ ॥
 पुनि सियँ राम लखन कर जोरी । जमुनहि कीन्ह प्रनामु बहोरी ॥
 चले ससीय मुदित दोउ भाई । रबितनुजा कइ करत बड़ाई ॥
 पथिक अनेक मिलहिं मग जाता । कहहिं सप्रेम देखि दोउ आता ॥
 राज लखन सब अंग तुम्हारे । देखि सोचु अति हृदय हमारे ॥
 मारग चलहु पयादेहि पाएँ । ज्योतिषु झूठ हमारे भाएँ ॥
 अगमु पंथु गिरि कानन भारी । तेहि महँ साथ नारि सुकुमारी ॥
 करि केहरि बन जाइ न जोई । हम सँग चलहिं जो आयसु होई ॥
 जाब जहाँ लगि तहँ पहुँचाई । फिरब बहोरि तुम्हहि सिरु नाई ॥
 दो०— एहि बिधि पूँछहिं प्रेम बस पुलक गात जलु नैन ।

कृपासिंधु फेरहिं तिन्हहि कहि बिनीत मृदु बैन ॥ ११२ ॥
 जे पुर गाँव बसहिं मग माहीं । तिन्हहि नाग सुर नगर सिहाहीं ॥
 केहि सुकृतीं केहि घरीं बसाए । धन्य पुन्यमय परम सुहाए ॥
 जहँ जहँ राम चरन चलि जाहीं । तिन्ह समान अमरावति नाहीं ॥

पुन्यपुंज मग निकट निवासी । तिन्हहि सराहहिं सुरपुरबासी ॥
 जे भरि नयन बिलोकहिं रामहि । सीता लखन सहित घनस्यामहि ॥
 जे सर सरित राम अवगाहहिं । तिन्हहि देव सर सरित सराहहि ॥
 जेहि तरु तर प्रभु बैठहिं जाई । करहिं कलपतरु तासु बड़ाई ॥
 परसि राम पद पदुम परागा । मानति भूमि भूरि निज भागा ॥
 दो०— छाँह करहिं घन बिबुधगन बरषहिं सुमन सिहाहिं ।

देखत गिरि बन बिहग मृग रामु चले मग जाहिं ॥ ११३ ॥
 सीता लखन सहित रघुराई । गाँव निकट जब निकसहिं जाई ॥
 सुनि सब बाल बृद्ध नर नारी । चलाहिं तुरत गृह काजु बिसारी ।
 राम लखन मिय रूप निहारी । पाइ नयन फलु होहि सुखारी ।
 सजल बिलोचन पुलक सरीरा । सब भए मगन देखि दोउ बीरा ।
 बरनि न जाइ दसा तिन्ह केरी । लहि जनु रंकन्ह सुरमनि ठेरी ॥
 एकन्ह एक बोलि सिख देहीं । लोचन लाहु लेहु छन एहीं ।
 रामहि देखि एक अनुरागे चितवत चले जाहिं सँग लागे ॥
 एक नयन मग छ्रिबि ठर आनी । होहिं सिथिल तन मन बर बानी ॥
 दो०— एक देखि बट छाँह भलि डासि मृदुल तन पात ।

कहहिं गवाँइअ छिनुकु श्रमु गवनब अबहिं कि प्रात ॥ ११४ ॥
 एक कलस भरि आनहिं पानी । अँचइअ नाथ कहहिं मृदु बानी ।
 सुनि प्रिय बचन प्रीति अति देखी । राम कृपाल सुमील बिसेषी ॥
 जानी श्रमित सीय मन माहीं । घरिक बिलांबु कीन्ह बट छाहीं ।

मुदित नारि नर देखहिं सोभा । रूप अनूप नयन मनु लोभा ॥
 एकटक सब सोहहिं चहुँ ओरा । रामचंद्र मुख चंद चकोरा ॥
 तरुन तमाल बरन तनु सोहा । देखत कोटि मदन मनु मोहा ॥
 दामिनि बरन लखन सुठि नीके । नख सिख सुभग भावते जी के ॥
 मुनिपट कटिन्ह कसैं तूनीरा । सोहहिं कर कमलनि धनु तीरा ॥
 दो० — जटा मुकुट सीसनि सुभग उर भुज नयन बिसाल ।

सरद परब बिधु बदन बर लसत स्वेद कन जाल ॥ ११५ ॥
 बरनि न जाड मनोहर जोरी । सोभा बहुत थोरि मति मोरी ॥
 राम लखन सिय सुंदरताई । सब चित्तवहिं चित मन मति लाई ॥
 थके नारि नर प्रेम पिआसे । मनहुँ मृगी मृग देखि दिआ से ॥
 सीय समीप ग्रामतिथ जाहीं । पूँछत अति सनेहँ सकुचाहीं ॥
 बार बार सब लागहिं पाएँ । कहहिं बचन मृदु सरल सुभाएँ ॥
 राजकुमारि बिनय हम करहीं । तिय सुभायँ कछु पूँछत डरहीं ॥
 स्वामिनि अबिनय छपबि हमारी । बिलगु न मानब जानि गवाँरी ॥
 राजकुअँर दोउ सहज सलोने । इन्ह तें लही दुति मरकत सोने ॥
 दो० — स्यामल गौर किसोर बर सुंदर सुषमा ऐन ।

सरद सबरीनाथ मुखु सरद सरोरुह नैन ॥ ११६ ॥

भासपारायण, सोलहवाँ विश्राम
 नवाह्नपारायण, चौथा विश्राम

कोटि मनोज लजावनिहारे । सुमुखि कहहु को आहिं तुम्हारे ॥
 सुनि सनेहमय मंजुल बानी । सकुची सिय मन महुँ मुसुकानी ॥
 तिन्हहि बिलोकि बिलोकति धरनी । दुहुँ सकोच सकुचति बरबरी ॥
 सकुचि सप्रेम बाल मृग नयनी । बोली मधुर बचन पिकबयनी ॥
 सहज सुभाय सुभग तन गोरे । नामु लखनु लघु देवर मोरे ॥
 बहुरि बदनु बिभु अंचल ढाँकी । पिय तन चितइ भौंह करि बाँकी ॥
 खंजन मंजु त्रिरीछे नयननि । निज पति कहैतिन्हहि सिय सयननि ॥
 भई मुदित सब ग्रामबधूटी । रक्न्ह राय रासि जनु लूटी ॥
 दो० — अति सप्रेम सिय पावै परि बहुबिधि देहिं असीस ।

सदा सोहागिनि होहु तुम्ह जब लगि महि अहि सौंस ॥ ११७ ॥
 पारबती सम पतिप्रिय होहु । दीब न हम पर छाड़ब छोहु ॥
 पुनि पुनि बिनय करिअ कर जोरी । जौं एहि मारग फिरिअ बहोरी ॥
 दरसन देब जानि निज दासो । लखीं सीयँ सब प्रेम पिआसी ॥
 मधुर बचन कहि कहि परितोषी । जनु कुमुदिनीं कौमुदीं पोषी ॥
 तबहिं लखन रघुवर रुख जानी । पूँछेउ मगु लोगन्हि मृदु बानी ॥
 सुनत नारि नर भए दुखारी । पुलकित गात बिलोचन बारी ॥
 मिटा मोदु मन भए मलीने । बिधि निधि दीन्ह लेत जनु छीने ॥
 समुझि करम गति धीरजु कीन्हा । सोधि सुगम मगु तिन्ह कहि दीन्हा ॥
 दो० - लखन जानकी सहित तब गवनु कीन्ह रघुनाथ ।

फेरे सब प्रिय बचन कहि लिए लाइ मन साथ ॥ ११८ ॥

फिरत नारि नर अति पछिताहीं । दैअहिं दोषु देहिं मन माहीं ॥
 सहित बिषाद परसपर कहहीं । बिधि करतब उलटे सब अहहीं ॥
 निपट निरंकुस निदुर निसंकू । जेहिं ससि कीन्ह सरुज सकलंकू ॥
 रूख कलपतरु सागरु खारा । तेहिं पठए बन राजकुमारा ॥
 जौं पै इन्हहि दीन्ह बनबासू । कीन्ह बादि बिधि भोग बिलासू ॥
 ए बिचरहिं मग बिनु पदत्राना । रचे बादि बिधि बाहन नाना ॥
 ए महि परहिं डासि कुस पाता । सुभग सेज कत सृजत बिधाता ॥
 तरुवर बास इन्हहि बिधि दीन्हा । धवल धाम रचि रचि श्रम कीन्हा ॥
 दो० — जौं ए मुनि षट धर जटिल सुंदर सुठि सुकुमार ।

बिबिध भाँति भूषन बसन बादि किए करतार ॥ ११९ ॥
 जौं ए कंद मूल फल खाहीं । बादि सुधादि असन जग माहीं ॥
 एक कहहि ए सहज सुहाए । आपु प्रगट भए बिधि न बनाए ॥
 जहँ लगि बेद कही बिधि करनी । श्रवन नयन मन गोचर बरनी ॥
 देखहु खोजि भुअन दस चारी । कहँ अस पुरुष कहाँ असि नारी ॥
 इन्हहि देखि बिधि मनु अनुगण ॥ पटतर जोग बनावै लागा ॥
 कीन्ह बहुत श्रम ऐक न आए । तेहिं इरिपा बन आनि दुराए ॥
 एक कहहिं हम बहुत न जानहिं । आपुहि परम धन्य करि मानहिं ॥
 ते पुनि पुन्यपुंज हम लेखे । जे देखहिं देखिहहिं जिन्ह देखे ॥
 दो० — एहि बिधि कहि कहि बचन प्रिय लेहिं नयन भरि नीर ।

किमि चलिहहिं मारग अगम सुठि सुकुमार सरीर ॥ १२० ॥

नारि सनेह बिकल बस होहीं । चकई साँझ समय जनु सोहीं ।
 मृदु पद कमल कठिन मगु जानी । गहबारे हृदय कहहिं बर बानी ॥
 परसत मृदुल चरन अरुनारे । सकुचति माहि जिमि हृदय हमारे ।
 जौं जगदीस इन्हहिं बनु दीन्हा । कम न सुमनमय मारगु कीन्हा ॥
 जौं मागा पाइअ बिधि पाहीं । ए रखिअहिं सखि आँखिन्ह माहीं ॥
 जे नर नारि न अवसर आए । तिन्ह सिय रामु न देखन पाए ।
 सुनि सुरूप बूझहिं अकुलाई । अब लागि गए कहाँ लागि भाई ॥
 समरथ थाइ बिलांकाहिं जाई । प्रमुदित फिरहिं जनमफलु पाई ॥
 दो० अबला बालक बृद्ध जन कर मीजहिं पछिताहिं ।

होहिं प्रेमबस लोग इमि रामु जहाँ जहाँ जाहिं ॥ १२१ ॥
 गावँ गावँ अस होइ अनदु । देखि भानुकुल कैरव चंदू ॥
 जे कछु समाचार सुनि पावहिं । ते नृप रानिहि दोसु लगावहिं ॥
 कहहिं एक अति भल नरनाहू । दीन्ह हमहिं जोइ लोचन लाहू ॥
 कहहिं परसपर लोग लोगाई । बातें सरल सनेह सुहाई ॥
 ते पितु मातु धन्य जिन्ह जाए । धन्य सो नगरु जहाँ तें आए ॥
 धन्य सो देसु सैलु बन गाऊँ । जहाँ जहाँ जाहिं धन्य सोइ ठाऊँ ॥
 सुखु पायउ बिरांच रचि तेही । ए जेहि के सब भाँति सनेही ।
 राम लखन पथि कथा सुहाई । रही सकल मग कानन छाई ।
 दो० - एहि बिधि रघुकुल कमल रवि मग लोगन्ह सुख देत ।

जाहिं चले देखत बिपिन सिय सौमित्रि समेत ॥ १२२ ॥

आगेँ रामु लखनु बने पाछेँ । तापस ब्रेश बिराजत काछेँ ॥
 उभय बीच सिय सोहति कैसैं । ब्रह्म जीव बिच माया जैसैं ॥
 बहुरि कहउँ छबि जसि मन बसई । जनु मधु मदन मध्य रति लसई ॥
 उपमा बहुरि कहउँ जियँ जोही । जनु बुध बिधु बिच रोहिनि सोही ॥
 प्रभु पद रेख बीच बिच सीता । धरति चरन मग चलति सभीता ॥
 सीय राम पद अंक बराएँ । लखन चलहिं मगु दाहिन लाएँ ॥
 राम लखन सिय प्रीति सुहाई । बचन अगोचर किमि कहि जाई ॥
 खग मृग मगन देखि छबि होहीं । लिए चोरि चित राम बटोहीं ॥
 दो०— जिन्ह जिन्ह देखे पथिक प्रिय सिय समेत दोउ भाइ ।

भव मगु अगमु अनंद तेइ बिनु श्रम रहे सिराइ ॥ १२३ ॥
 अजहुँ जासु उर सपनेहुँ काऊ । बसहुँ लखनु सिय रामु बटाऊ ॥
 राम धाम पथ पाइहि सोई । जो पथ पाव कबहुँ मुनि कोई ।
 तब रघुबीर श्रमित सिय जानी । देखि निकट बटु सीतल पानी ॥
 तहँ बसि कंद मूल फल खाई । प्रात नहाइ चले रघुराई ॥
 देखत बन सर सैल सुहाए । बालमीकि आश्रम प्रभु आए ॥
 राम दीख मुनि बासु सुहावन । सुंदर गिरि काननु जलु पावन ॥
 सरनि सरोज बिटप बन फूले । गुंजत मंजु मधुष रस भूले ॥
 खग मृग बिपुल कोलाहल करहीं । बिरहित बैर मुदित मन चरहीं ॥
 दो०— सुचि सुंदर आश्रमु निगखि हरषे राजिवनेन ।

सुनि रघुबर आगमनु मुनि आगेँ आवड लेन ॥ १२४ ॥

मुनि कहूँ राम दंडवत कीन्हा । आसिरबादु बिप्रबर दीन्हा ॥
 देखि राम छबि नयन जुड़ाने । करि सनमानु आश्रमहिं आने ॥
 मुनिबर अतिथि प्रानप्रिय पाए । कंद मूल फल मधुर मगाए ॥
 सिय सौमित्रि राम फल खाए । तब मुनि आश्रम दिए सुहाए ॥
 बालमीकि मन आनँदु भारी । मंगल मूरति नयन निहारी ॥
 तब कर कमल जारि रघुराई । बोले बचन श्रवन सुखदाई ॥
 तुम्ह त्रिकाल दरसी मुनिनाथा । बिस्व बदर जिमि तुम्हरे हाथा ॥
 अस कहि प्रभु सब कथा बखानी । जेहि जहि भाँति दीन्ह बनू रानी ॥
 दो० तात बचन पुनि मातु हित भाइ भरत अस राउ ।

मो कहूँ दस तुम्हार प्रभु सब मम पुन्य प्रभाउ ॥ १२५ ॥
 देखि पाय मुनिराय तुम्हारे । भए सुकृत सब सुफल हमारे ॥
 अब जहँ राउर आयसु होई । मुनि उदबेगु न पावै कोई ॥
 मुनि तापस जिन्ह तैं दुखु लहहीं । ते नरेस बिनु पावक दहहीं ॥
 मंगल मूल बिप्र परितोषु दहइ कोटि कुल भूसुर रोषु ।
 अस जियँ जानि कहिअ सोइ ठाऊँ । सिय सौमित्रि सहित जहँ जाऊँ ।
 तहँ रचि रचिर परत तून साला । बासु करौं कछु काल कृपाला ॥
 सहज सरल मुनि रघुबर बानी । साधु साधु बोले मुनि ग्यानी ।
 कस न कहहु अस रघुकुलकेतू । तुम्ह पालक संतत श्रुति सेतू ॥
 छ०— श्रुति सेतु पालक राम तुम्ह जगदीस माया जानकी ।
 जो सृजति जगु पालति हरति रुख पाइ कृपानिधान की ॥

जो सहससीसु अहीसु महिधरु लखनु सचराचर धनी ।
सुर काज धरि नरराज तनु चले दलन खल निसिचर अनी ॥

सो०—राम सरूप तुम्हार बचन अगोचर बुद्धिपर ।

अबिगत अकथ अपार नेति नेति नित निगम कह ॥ १२६ ॥
जगु पेखन तुम्ह देखनिहारे । बिधि हरि संभु नचावनिहारे ॥
तेउ न जानहिं मरमु तुम्हारा । और तुम्हहि को जाननिहारा ॥
सोइ जानइ जेहि देहु जनाई । जानत तुम्हहि तुम्हइ होइ जाई ॥
तुम्हरिहि कृपाँ तुम्हहि रघुनंदन । जानहिं भगत भगत उर चंदन ॥
चिदानंदमय देह तुम्हारी । बिगत बिकार जान अधिकारी ॥
नर तनु धरेहु संत सुर काजा । कहहु करहु जस प्राकृत राजा ॥
राम देखि सुनि चरित तुम्हारे । जइ मोहहिं बुध होहिं सुखारे ॥
तुम्ह जो कहहु करहु सबु साँचा । जस काछिअ तस चाहिअ नाचा ॥
दो०—पूँछेहु मोहि कि रहौ कहँ मैं पूँछत सकुचाउँ ।

जहँ न होहु तहँ देहु कहि तुम्हहि देखावौं ठाउँ ॥ १२७ ॥
सुनि मुनि बचन प्रेम रस साने । सकुचि राम मन महुँ मुसुकाने ॥
बालमीकि हँसि कहहिं बहोरी । बानी मधुर अमिअ रस बोरी ॥
सुनहु राम अब कहउँ निकेता । जहाँ बसहु सिय लखन समेता ॥
जिन्ह के श्रवन समुद्र समाना । कथा तुम्हारि सुभग सरि नाना ॥
भरहिं निरंतर होहिं न पूरे । तिन्ह के हिय तुम्ह कहूँ गृह रूरे ॥
लोचन चातक जिन्ह करि राखे । रहहिं दरस जलधर अभिलाषे ॥

निदरहिं सरित सिंधु सर भारी । रूप बिंदु जल होहिं सुखारी ॥
तिन्ह के हृदय सदन सुखदायक । बसहु बंधु सिय सह रघुनायक ॥
दो० - जम् तुम्हार मानस बिमल हंसिनि जीहा जासु ।

मुक्ताहल गुन गन चुनइ राम बसहु हियँ तासु ॥ १२८ ॥
प्रभु प्रसाद सुचि सुभग सुबासा । सादर जासु लहइ नित नासा ॥
तुम्हहि निबेदित भोजन करहीं प्रभु प्रसाद पट भूषन धरहीं ॥
सीस नवहिं सुर गुरु द्विज देखी । प्रीति सहित करि बिनय बिसेषी ॥
कर नित करहिं राम पद पूजा राम भरोस हृदयँ नहिं दूजा ॥
चरन राम तीरथ चलि जाहीं । राम बसहु तिन्ह के मन माहीं ॥
मंत्रराजु नित जपहिं तुम्हारा । पूजहिं तुम्हहि सहित परिवारा ॥
तरपन होम करहिं बिधि नाना । बिप्र जेवाँइ देहिं बहु दाना ॥
तुम्ह तँ अधिक गुरहि जियँ जानी सकल भायँ सेवहिं सनमानी ॥
दो०— सबु करि भागहिं एक फलु राम चरन रति होउ ।

तिन्ह के मन मंदिर बसहु सिय रघुनंदन दोउ ॥ १२९ ॥
काम कोह मद मान न मोहा । लोभ न छोभ न राग न द्रोहा ॥
जिन्ह के कपट दंभ नहिं माया । तिन्ह के हृदय बसहु रघुराया ॥
सब के प्रिय सब के हितकारी । दुख सुख सरिस प्रसंसा गारी ॥
कहहिं सत्य प्रिय बचन बिचारी । जागत सोवन सरन तुम्हारी ॥
तुम्हहि छाड़ि गति दूसरि नाहीं । राम बसहु तिन्ह के मन माहीं ॥
जननी सम जानहिं परनारी । धनु पराव बिष तें बिष भारी ।

जे हरषहिं पर संपति देखी । दुखित होहिं पर बिपति बिसेषी ॥
जिन्हहि राम तुम्ह प्रानपिआरे । तिन्ह के मन सुभ सदन तुम्हारे ॥
दो० — स्वामि सखा पितु मानु गुर जिन्ह के सब तुम्ह तात ।

मन मंदिर तिन्ह के बसहु सीय सहित दोड भात ॥ १३० ॥
अवगुन तजि सब के गुन गहरीं । बिप्र धेनु हित संकट सहरीं ॥
नीति निपुन जिन्ह कइ जग लीका । घर तुम्हार तिन्ह कर मनु नीका ॥
गुन तुम्हार समुझइ निज दोसा । जेहि सब भाँति तुम्हार भरोसा ॥
राम भगत प्रिय लागहिं जेही । तेहि उर बसहु सहित बैदेही ॥
जाति पाँति धनु धरमु बड़ाई । प्रिय परिवार सदन मुखदाई ॥
सब तजि तुम्हहि रहइ उर लाई । तेहि के हृदयँ रहहु रघुराई ।
सरगु नरकु अपबरगु समाना । जहाँ तहाँ देख धरें धनु बाना ॥
करम बचन मन राउर चेरा । राम करहु तेहि के उर डेरा ॥
दो० — जाहि न चाहिअ कबहुँ कछु तुम्ह सन सहज सनेहु ।

बसहु निरंतर तासु मन सो राउर निज गेहु ॥ १३१ ॥
एहि बिधि मुनिबर भवन देखाए । बचन सप्रेम राम मन भाए ॥
कह मुनि सुनहु भानुकुलनायक । आश्रम कहउँ समय सुखदायक ॥
चित्रकूट गिरि करहु निवासू । तहाँ तुम्हार सब भाँति सुपासू ॥
सैलु सुहावन कानन चारू । करि केहरि मृग बिहग बिहारू ॥
नदी पुनीत पुरान बखानी । अत्रिप्रिया निज तप बल आनी ॥
सुरसरि धार नाउँ मंदाकिनि । जो सब पातक पोतक डाकिनि ॥

अत्रि आदि मुनिबर बहु बसहीं । करहिं जोग जप तप तन कसहीं ॥
चलहु सफल श्रम सब कर कहू । राम देहु गौरव गिरिबरहू ।
दो०— चित्रकूट महिमा अमित कह्यो महामुनि गाड़ ।

आइ नह्यए सरित बर मिय समेत दोउ भाड़ ॥ १३२ ॥
रघुबर कहेउ लखन भल घाटू । करहु कतहुँ अब ठाहर ठाटू ।
लखन दीख पय उतर करारा । चहुँदिसि फिरेउ धनुष जिमि नाय ।
नदी पनच सर सम दम दाना । सकल कलुष काल साउज नाना ॥
चित्रकूट जनु अचल अहेरी नुकड़ न घात मार मुठभेरी ॥
अस कहि लखन ठाउँ देखरावा । थलु बिलोकि रघुबर सुखु पावा ।
रमेउ राम मनु देवन्ह जाना । चले सहित सुर थपति प्रधाना ॥
कोल किरात बेष सब आए । रचे परन तन सदन सुहाए ॥
बरनि न जाहिं मंजु दुइ साला । एक ललित लघु एक बिसाला ।
दो०— लखन जानकी सहित प्रभु राजत रुचिर निकेत ।

सोह मदन मुनि बेष जनु रति रितुराज समेत ॥ १३३ ॥

मासपारायण, सत्रहवाँ विश्राम

अमर नाग किनर दिसिपाला । चित्रकूट आए तेहि काला ॥
राम प्रनामु कीन्ह सब काहू । मुदित देव लहि लोचन लाहू ॥
बरषि सुमन कह देव समाजू । नाथ सनाथ भए हम आजू ।
करि बिनती दुख दुसह सुनाए हर्षित निज निज सदन सिधाए ॥
चित्रकूट रघुनंदनु छाए समाचार सुनि सुनि मुनि आए ॥

आवत देखि मुदित मुनिबृन्दा । कीन्ह दंडवत रघुकुल चंदा ।
 मुनि रघुबरहि लाइ उर लेहीं । सुफल होन हित आसिष देहीं ॥
 सिय सौमित्रि राम छबि देखहिं । साधन सकल सफल करि लेखहिं ॥
 दो०—जथाजोग सनमानि प्रभु बिदा किए मुनिबृन्दा ।

करहिं जोग जप जाग तप निज आश्रमन्हि सुछंद ॥ १३४ ॥
 यह सुधि कोल किरातन्ह पाई । हरषे जनु नव निधि घर आई ॥
 कंद मूल फल भरि भरि दोना । चले रंक जनु लूटन सोना ॥
 तिन्ह महँ जिन्ह देखे दोठ भ्राता । अपर तिन्हहि पूँछहिं मगु जाता ॥
 कहत सुनत रघुबीर निकाई । आइ सबन्हि देखे रघुराई ॥
 करहिं जोहारु भेंट धरि आगे । प्रभुहि बिलोकहिं अति अनुरागे ॥
 चित्र लिखे जनु जहँ तहँ ठाढ़े । पुलक सरीर नयन जल बाढ़े ॥
 राम सनेह मगन सब जाने । कहि प्रिय बचन सकल सनमाने ॥
 प्रभुहि जोहारि बहोरि बहोरी । बचन बिनीत कहहिं कर जोरी ।
 दो०—अब हम नाथ सनाथ सब भए देखि प्रभु पाय ।

भाग हमारें आगमनु राउर कोसलराय ॥ १३५ ॥
 धन्य भूमि बन पंथ पहारा । जहँ जहँ नाथ पाउ तुम्ह धारा ॥
 धन्य बिहग मृग काननचारी । सफल जनम भए तुम्हहि निहारी ॥
 हम सब धन्य सहित परिवारा । दीख दरसु भरि नयन तुम्हारा ॥
 कीन्ह बासु भल ठाउँ बिचारी । इहाँ सकल रितु रहब सुखारी ॥
 हम सब भाँति करब सेवकाई । करि केहरि अहि बाध बराई ॥

बन बेहड गिरि कंदर खोहा सब हमार प्रभु पग पग जोहा ॥
तहँ तहँ तुम्हहि अहेर खेलाउब । सर निरझर जलठाउँ देखाउब ।
हम सेवक परिवार समेता नाथ न सकुचब आयसु देता ॥
दो० बेद बचन मुनि मन अगम ते प्रभु करुना ऐन ।

बचन किरातन्ह के सुनत जिमि पितु बालक बैन ॥ १३६ ॥
रामहि केवल प्रेमु पिआरा । जानि लेउ जो जाननिहारा ।
राम सकल बनचर तब तोपे । कहि मृदु बचन प्रेम परिपोषे ॥
बिदा किए सिर नाइ सिधाए । प्रभु गुन कहत सुनत घर आए ।
एहि बिधि सिय समेत दोउ भाई । बसहिं बिपिन सुर मुनि सुखदाई ॥
जब तें आइ रहे रघुनायकु । तब तें भयउ बन मंगलदायकु ।
फूलहिं फलहिं बिटप बिधि नाना । मंजु बलित बर बेलि बित्ताना ।
सुरतरु सरिस सुभायँ सुहाए । मनहुँ बिबुध बन परिहरि आए ।
गुज मंजुतर मधुकर श्रेनी । त्रिविध बयारि बहइ सुख देनी ॥
दो० — नीलकंठ कलकंठ सुक चातक चक्र चकोर ।

भाँति भाँति बोलहिं बिहग श्रवन सुखद चित चोर ॥ १३७ ॥
करि केहरि कपि कोल कुरंगा । बिगतबैर बिचरहिं सब संग्गा ॥
फिरत अहेर राम छबि देखी । होहिं मुदित मृग बृंद बिसेषी ।
बिबुध बिपिन जहँ लगि जग माहीं । देखि रामबनु सकल सिहाहीं ॥
सुरसरि सरसइ दिनकर कन्या मेकलसुता गोदावरि धन्या ।
सब सर सिंधु नदी नद नाना । मंदाकिनि कर करहिं बखाना ।

उदय अस्त गिरि अरु कैलासू । मंदर मेरु सकल सुरबासू ॥
 सैल हिमाचल आदिक जेते । चित्रकूट जसु गावहिं तेते ॥
 बिंधि मुदित मन सुखु न समाई । श्रम बिनु बिपुल बड़ाई पाई ॥
 दो०— चित्रकूट के बिहग भृगु बेलि बिटप तन जाति ।

पुन्य पुंज सब धन्य अस कहहिं देव दिन राति ॥ १३८ ॥
 नयनवंत रघुबरहि बिलोकी । पाइ जनम फल होहिं बिसोकी ॥
 परसि चरन रज अचर सुखारी । भए परम पद के अधिकारी ॥
 सो बन सैलु सुभायँ सुहावन । मंगलमय अति पावन पावन ।
 महिमा कहिअ कविनि बिधि तासू । सुखसागर जहँ कीन्ह निवासू ॥
 पय पयोधि तजि अवध बिहाई । जहँ सिय लखनु रामु रहे आई ॥
 कहि न सकहिं सुषमा जसि कानन । जौं सत सहस होहिं सहसानन ॥
 सो मैं बरनि कहौं बिधि केहीं । डाबर कमठ कि मंदर लेहीं ॥
 सेवहिं लखनु करम मन बानी । जाइ न सीलु सनेहु बखानी ॥
 दो०— छिनु छिनु लखि सिय राम पद जानि आयु पर नेहु ।

करत न सपनेहुँ लखनु चितु बंधु भातु पितु गेहु ॥ १३९ ॥
 राम संग सिय रहति सुखारी । पुर परिजन गृह सुरति बिसारी ।
 छिनु छिनु पिय बिधु बदनु निहारी । प्रमुदित मनहुँ चकोर कुमारी ।
 नाह नेहु नित बद्ध बिलोकी । हरषित रहति दिवस जिमि कोकी ॥
 सिय मनु राम चरन अनुरागा । अवध सहस सम बनु प्रिय लागा ॥
 परनकुटी प्रिय प्रियतम संगी । प्रिय परिवारु कुरंग बिहंगा ॥

सासु समर सम मुनितय मुनिबर । असनु अमिअ सम कंद मूल फर ॥
नाथ साथ साँथरी सुहाई । मयन सयन सय सम सुखदाई ॥
लोकप होंहि बिलोकत जासू । तोहि कि मोहि सक बिषय बिलासू ॥
दो० सुमिरत रामहि तजहिं जन तून सम बिषय बिलामु ।

रामप्रिया जग जननि सिय कछु न आचरजू तासु ॥ १४० ॥
सौय लखन जेहि बिधि सुखु लहली । सोइ रघुनाथ करहिं सोइ कहली ॥
कहहिं पुरातन कथा कहानी । सुनिहिं लखनु सिय अति सुखु मानी ।
जब जब रामु अवध सुधि कही । तब तब बारि बिलोचन भरही ॥
सुमिरि मातु पितु परिजन भाई । भरत सनेहु सीलु सेवकाई ॥
कृपासिधु प्रभु होहिं दुखारी धीरजू धरहिं कुसमउ बिचारी ॥
लखिसिय लखनु बिकल होइ जाही । जिमि पुरुषहि अनुसर परिछाही ॥
प्रिया बंधु गति लखि रघुनदनु । धीर कृपाल भगत उर चंदनु ॥
लागे कहन कछु कथा पुनीता । मुनि सुबु लहहिं लखनु अरु सीता ॥
दो०—रामु लखन सीता सहित सोहत परन निकेत ।

जिमि बासव बस अमरपुर सची जयंत समेत ॥ १४१ ॥
जोगवहिं प्रभु सिय लखनहि कैसे । पलक बिलोचन गोलक जैसे ॥
सेवहिं लखनु सौय रघुबीरहि । जिमि अबिबेकी पुरुष सरीरहि ॥
एहि बिधि प्रभु बन बमहिं सुखारी खग मृग सुर तापस हितकारी ।
कहेउँ राम बन गवनु मुहावा सुनहु सुमंत्र अवध जिमि आवा ॥
फिरेउ निषादु प्रभुहि पहुँचाई । साँचव सहित रथ देखेसि आई ॥

मंत्री बिकल बिलोकि निषादू । कहि न जाइ जस भयउ बिषादू ।
 राम राम सिय लखन पुकारी । परेउ धरनितल ब्याकुल भारी ॥
 देखि दखिन दिसि हय हिहिनाहीं । जनु बिनु पंख बिहग अकुलाहीं ॥
 दो०— नहिं तन चरहिं न पिअहिं जलु मोचहिं लोचन बारि ।

ब्याकुल भए निषाद सब रघुबर बाजि निहारि ॥ १४२ ॥
 धरि धीरजु तब कहइ निषादू । अब सुमंत्र परिहरहु बिषादू ॥
 तुम्ह पंडित परमारथ ग्याता । धरहु धीर लाखि बिमुख बिधाता ॥
 बिबिधि कथा कहि कहि मृदु बानी । रथ बैठा रेउ बरबस आनी ॥
 सोक सिथिल रथु सकइ न हाँकी । रघुबर बिरह पीर उर बाँकी ॥
 चरफराहिं मग चलहिं न घोरे । बन मृग मनहुँ आनि रथ जोरे ।
 अहुंकि परहिं फिरि हेरहिं पीछे । राम बियोगि बिकल दुख तीछे ॥
 जो कह रामु लखनु बैदेही । हिंकरि हिंकरि हित हेरहिं तेही ॥
 बाजि बिरह गति कहि किमि जाती । बिनु मन फनिक बिकल जेहि भाँती ॥
 दो०— भयउ निषादु बिषादबस देखत सचिव तुरंग ।

बोलि सुसेवक चारि तब दिए सारथी संग ॥ १४३ ॥
 गुह सारथिहि फिरेउ पहुँचाई । बिरहु बिषादु बरनि नहिं जाई ॥
 चले अवध लेइ रथहि निषादा । होहिं छनहिं छन मगन बिषादा ॥
 सोच सुमंत्र बिकल दुख दीना । धिग जीवन रघुबीर बिहीना ॥
 रहिहि न अंतहुँ अधम सरीरु । जसु न लहेउ बिछुरत रघुबीरु ॥
 भए अजस अघ भाजन प्राणा । कवन हेतु नहिं करत पयाना ॥

अहह मंद मनु अवसर चूका । अजहूँ न हृदय होत दुइ टूका ॥
 मीजि हाथ स्मिरु धुनि पछिताई । मनहुँ कृपन धन रासि गवाँई ॥
 बिरिद बाँधि बर बीरु कहाई । चलेउ समर जनु सुभट पराई ॥
 दो०— बिप्र बिबेकी ब्रदबिद संमत साधु सुजाति ।

जिमि धोखें मदपान कर सचिव सोच तेहि भाँति । १४४ ॥
 जिमि कुलीन तिय साधु सयानी । पतिदेवता करम मन बानी ॥
 रहै करम बस परिहरि नाहू । सचिव हृदयँ तिमि दारुन दाहू ।
 लोचन सजल डीठ भइ थोरी । मुनइ न श्रवन बिकल माँत भोरी ॥
 सूखहिँ अधर लागि मुहँ लाटी । जिउ न जाइ उर अवधि कपाटी ॥
 बिबरन भयउ न जाइ निहारी । मारेसि मनहुँ पिता महतारी ॥
 हानि गलानि बिपुल मन व्यापी । जमपुर पंथ सोच जिमि पापी ॥
 बचनु न आव हृदयँ पछिताई । अवध काह मैं देखब जाई ॥
 राम रहित रथ देखहिँ जोई । सकुचिहि मोहि बिलोकत सोई ॥
 दो०— धाइ पूँछिहिँ मोहि जब बिकल नगर नर नारि ।

उतरु देब मैं सबहि तब हृदयँ बज्रु बैठारि ॥ १४५ ॥
 पुछिहहिँ दीन दुखित सब माता । कहब काह मैं तिन्हहिँ बिधाता ।
 पूछिहिँ जबहि लखन महतारी । काहहउँ कवन सँदेस सुखारी ॥
 राम जननि जब आइहि धाई । सुमिरि बच्छु जिमि धेनु लवाई ॥
 पूँछत उतरु देब मैं तेही गे बनु राम लखनु बैदेही ॥
 जोइ पूँछिहि तेहि उतरु देवा । जाइ अवध अब यहु सुखु लेबा ॥

पूँछिहि जबहिं राउ दुख दीना । जिवनु जासु रघुनाथ अधीना ॥
 देहउँ उतरु कौनु मुहु लाई । आयउँ कुसल कुअँर पहुँचाई ॥
 सुनत लखन सिय राम सँदेसू । तन जिमि तनु परिहरिहि नरेसू ॥
 दो०— हृदउ न बिदरेउ पंक जिमि बिछुरत प्रीतमु नीरु ।

जानत हौं मोहि दीन्ह बिधि यहु जातना सरीरु ॥ १४६ ॥
 एहि बिधि करत पंथ पछितावा । तमसा तीर तुरत रथु आवा ॥
 बिदा किए करि बिनय निषादा । फिरे पायँ पार बिकल बिषादा ॥
 पैठत नगर सचिव सकुचाई । जनु मारेसि गुर बाँभन गाई ॥
 बैठि बिटप तर दिवसु गवाँवा । साँझ समय तब अवसरु पावा ॥
 अवध प्रबेसु कीन्ह औँधआरें । पैठ भवन रथु राखि दुआरें ॥
 जिन्ह जिन्ह समाचार सुनि पाए । भूप द्वार रथु देखन आए ॥
 रथु पहिचानि बिकल लखि घोरे । गरहं गात जिमि आतप ओरे ॥
 नगर नारि नर ब्याकुल कैसें । निबटत नीर मीनगन जैसें ॥
 दो०— सचिव आगमनु सुनत सबु बिकल भयउ रनिवासु ।

भवनु भयंकरु लाग तेहि मानहुँ प्रेत निवासु ॥ १४७ ॥
 अति आरति सब पूँछिहिं रानी । उतरु न आव बिकल भइ बानी ॥
 सुनइ न श्रवन नयन नहिं सूझा । कहहु कहाँ नृपु तेहि तेहि बूझा ।
 दासिन्ह दीख सचिव बिकलाई । कौसल्या गृहँ गई लवाई ॥
 जाइ सुमंत्र दीख कस राजा । आँमअ रँहत जनु चंदु बिराजा ॥
 आसन सयन बिभूषन हीना । परेउ भूमितल निपट मलीना ॥

लेइ उसासु सोच एहि भाँती । सुरपुर ते जनु खँसेउ जजाती ॥
लेत सोच भरि छिनु छिनु छाती । जनु जरि पंख परेउ संपाती ॥
राम राम कह राम सनेही । पुनि कह राम लखन बैदेही ॥
दो०— देखि सचिवँ जय जीव कहि कीन्हैउ दंड प्रनाम् ।

सुनत उठैउ ब्याकुल नृपति कहु सुमत्र कहँ रामु ॥ १४८ ॥
भूप सुमंत्रु लीन्ह उर लाई । बूड़त कछु अधार जनु पाई ॥
सहित सनेह निकट बैठारी । पूँछत राउ नयन भरि बारी ॥
राम कुसल कहु सखा सनेही । कहँ रघुनाथु लखनु बैदेही ॥
आने फेरि कि बनहि सिधाए । सुनत सचिव लोचन जल छाए ॥
सोक बिकल पुनि पूँछ नरेसू । कहु सिय राम लखन संदेसू ।
राम रूप गुन सील सुभाऊ । सुमिरि सुमिरि उर सोचत राऊ ।
राउ सुनाइ दीन्ह बनबासू । सुनि मन भयउ न हरषु हराँसू ॥
सो सुत बिछुरत गए न प्राना । को पापी बड़ मोहि समाना ॥
दो० सखा रामु सिय लखनु जहँ तहाँ मोहि पहुँचाउ ।

नाहि त चाहत चलन अब प्रान कहउँ सतिभाउ ॥ १४९ ॥
पुनि पुनि पूँछत मंत्रिहि राऊ प्रियतम सुअन सँदेस सुनाऊ ॥
करहि सखा सोइ बेगि उपाऊ । राम लखनु सिय नयन देखेराऊ ॥
सचिव धीर धरि कह मृदु बानी । महाराज तुम्ह पंडित ग्यानी ।
बीर सुधीर धुरंधर देवा । साधु समाजु सदा तुम्ह सेवा ।
जनम मरन सब दुख सुख भोगा । हानि लाभु प्रिय मिलन वियोगा ॥

काल करम बस होहि गोसाईं । बरबस राति दिवस की नाई ॥
 सुख हरषहि जड़ दुख बिलखाहीं । दोउ सम धीर धरहिं मन माहीं ॥
 धीरज धरहु बिबेकु बिचारी । छाड़िअ सोच सकल हितकारी ।
 दो०— प्रथम बासु तपसा भयउ दूसर सुरसरि तीर ।

न्हाइ रहे जलपानु करि सिय समेत दोउ बीर ॥ १५० ॥
 केवट कीन्हि बहुत सेवकाई । सो जामिनि सिंगरौ गवाँई ॥
 होत प्रात बट छोरु मगावा । जटा मुकुट निज सीस बनावा ॥
 राम सखाँ तब नाव मगाई । प्रिया चढ़ाइ चढ़े रघुगई ॥
 लखन बान धनु धरे बनाई । आपु चढ़े प्रभु आयसु पाई ॥
 बिकल बिलोकि मोहि रघुबीरा । बोले मधुर बचन धरि धीरा ॥
 तात प्रनामु तात सन कहेहु । बार बार पद पंकज गहेहु ॥
 करबि पायँ परि बिनय बहोरी । तात करिअ जनि चिंता मोरी ॥
 बन मग मंगल कुसल हमारें । कृपा अनुग्रह पुन्य तुम्हारें ॥

छं०— तुम्हरेँ अनुग्रह तात कानन जात सब सुखु पाइहौं ।
 प्रतिपालि आयमु कुसल देखन पाय पुनि फिरि आइहौं ॥
 जननीं सकल परितोषि परि परि पायँ करि बिनती घनी ।
 तुलसी करहु सोइ जतनु जेहिं कुसली रहहिं कोसलधनी ॥
 सो०— गुर सन कहब सँदेसु बार बार पद पदुम गहि ।

करब सोइ उपदेसु जेहिं न सोच मोहि अवधपति ॥ १५१ ॥
 पुरजन परिजन सकल निहोरी । तात सुनाएहु बिनती मोरी ॥

सोइ सब भाँति मोर हितकारी । जातें रह नरनाहु सुखारी ॥
 कहब सँदेसु भरत के आएँ । नीति न तजिअ राजपदु पाएँ ॥
 पालेहु प्रजहि करम मन बानी । सेणहु मातु सकल सम जानी ॥
 ओर निबाहेहु भायप भाई । करि पितु मातु सुजन सेवकाई ॥
 तात भाँति तेहि राखब राज सोच मोर जोहिं करै न काऊ ।
 लखन कहे कछु बचन कठोरा । बरजि राम पुनि मोहि निहोरा ॥
 बार बार निज सपथ देवाई । कहाब न तात लखन लारिकाई ॥
 दो०— कहि प्रनासु कछु कहन लिय सिध भइ सिथिल सनेह ।

थकित बचन लोचन सजल पुलक पल्लवित दह । १५१ ॥
 तेहि अवसर रघुबर रुख पाई केवट पारहि नाव चलाई ॥
 रघुकुलातिलक चले एहि भाँती । देखउँ ठाढ़ कुलिस धरि छती ॥
 मैं आपन किमि कहौं कलेसू । त्रिअत फिरेउँ लेइ राम सँदेसू ॥
 अस कहि सचिव बचन रहि गयऊ । हानि गलानि सोच बस भयऊ ।
 सूत बचन सुनतहि नरनाहु । परेउ धरनि उर दारुन दाहु ।
 तलफत बिषम मोह मन मापा । माजा मनहुँ मीन कहँ व्यापा ॥
 करि बिलाप सब रोवाहिं रानी । महा बिपति किमि जाइ बखानी ।
 मुनि बिलाप दुखहु दुख लागा । भीरजहुँ कर भीरजु भागा ॥
 दो० भयउ कोलाहल अवध अति सुनि नृप राउर सोरु ।

बिपुल बिहग बन परेउ निसि मानहुँ कुलिस कठोरु ॥ १५३ ॥
 ग्रान कटगत भयउ भूआलू । मनि बिहीन जनु व्याकुल व्यालू ।

इंद्रौ सकल बिकल भई भारी । जनु सर सरसिज वनु बिनु बारी ॥
 कौसल्याँ नृपु दीख मलाना । रबिकुल रबि अँथयउ जियँ जाना ।
 उर धरि धीर राम महतारी । बोली बचन समय अनुसारी ॥
 नाथ समुझि मन करिअ बिचारू । राम बियोग पयोधि अपारू ।
 करनधार तुम्ह अवध जहाजू । चढ़ेउ सकल प्रिय पथिक समाजू ।
 धीरजु धरिअ त पाइअ पारू । नाहिं त बूढ़िहि सन्नु परिवारू ॥
 जौ जियँ धरिअ बिनय पिय मोरी । रामु लखनु सिय मिलहिं बहोरी ।
 दो०— प्रिया बचन मृदु सुनत नृपु चितयउ आँख उघारि ।

तलफत मीन मलीन जनु सींचत सीतल बारि ॥ १५४ ॥
 धरि धीरजु उठि बैठ भुआलू । कहु सुमंत्र कहँ राम कृपालू ॥
 कहाँ लखनु कहँ रामु सनेही । कहँ प्रिय पुत्रबधू बैदेही ॥
 बिलपत राउ बिकल बहु भाँती । भइ जुग सरिस सिराति न राती ॥
 तापस अंध साप सुधि आई । कौसल्याहि सब कथा सुनाई ॥
 भयउ बिकल बरनत इतिहासा । राम रहित धिग जीवन आसा ॥
 सो तनु राखि करब मैं काहा । जेहिं न प्रेम पनु मोर निबाहा ॥
 हा रघुनंदन प्रान पिरीते । तुम्ह बिनु जिअत बहुत दिन बीते ॥
 हा जानकी लखन हा रघुबर । हा पितु हित चित चातक जलधर ॥
 दो०— राम राम कहि राम कहि राम राम कहि राम ।

तनु परिहरि रघुबर बिरहँ राउ गयउ सुरधाम ॥ १५५ ॥
 जिअन मरन फलु दसरथ पावा । अंड अनेक अमल जसु छावा ॥

जिअत राम बिधु बदन नु निहारा । राम बिरह करि मरनु सँवारा ॥
 सोक बिकल सब रोवहिं रानी । रूपु सीलु बलु तेजु बखानी ॥
 करहिं बिलाप अनेक प्रकारा । परहिं भूमतल बारहि बारा ।
 बिलपहि बिकल दास अरु दासी । घर घर रुदनु करहिं पुरबासी ॥
 अँथयउ आजु भानुकुल भानू । धरम अवधि गुन रूप निधानू ॥
 गारी सकल कैकइहि देहीं । नयन बिहीन कीन्ह जग जेहीं ॥
 एहि बिधि बिलपत रैन बिहानी । आए सकल महामुनि ग्यानी ॥
 दो०— तब बसिष्ठ मुनि समय सम कहि अनेक इतिहास ।

सोक नेवारेउ सबहि कर निज बिग्यान प्रकास ॥ १५६ ॥
 तेल नावँ भरि नृप तनु राखा । दूत बोलाइ बहुरि अस भाषा ।
 धावहु बेग भरत पहिं जाहू । नृप सुधि कतहुँ कहहुँ अनि काहू ॥
 एतनेइ कहैहु भरत सन जाई । गुर बोलाइ पठयउ दोउ भाई ॥
 सुनि मुनि आयसु धावन धाए । चले बेग बर बाजि लजाए ॥
 अनरथु अवध अरभेउ जब तैं । कुसगुन होहिं भरत कहूँ तब तैं ॥
 देखहिं राति भयानक सपना । जगि करहिं कटु काँट कलपना ॥
 बिप्र जेवाँइ देहिं दिन दाना । सिव अभिषेक करहिं बिधि नाना ॥
 मागहिं हृदयँ महेस मनाई । कुसल मातु पितु परिजन भाई ॥
 दो०— एहि बिधि सोचत भरत मन धावन पहुँचे आइ ।

गुर अनुमासन श्रवन सुनि चले गनेसु मनाइ ॥ १५७ ॥
 चले समोर बेग हय हाँके । नाघत सारत सैल बन बाँके ॥

हृदयँ सोनु बड़ कछु न सोहाई । अस जानहिं जियँ जाउँ उड़ाई ।
 एक निमेष बरष सम जाई । एहि बिधि भरत नगर निअराई ॥
 असगुन होहिं नगर पैठारा । रटहिं कुभाँति कुखेत करारा ।
 खर सिआर बोलहिं प्रतिकूला । सुनि सुनि होइ भरत मन सूला ।
 श्रीहत सर सरिता बन बागा । नगरु बिसेषि भयावनु लागा ।
 खग मृग हय गय जाहिं न जोए । राम बियोग कुरोग बिगोए ॥
 नगर नारि नर निपट दुखारी । मनहुँ सबन्हि सब संपति हारी ॥
 दो० पुरजन मिलहिं न कहहिं कछु गर्वहिं जोहारहिं जाहिं ।

भरत कुसल पूँछि न सकहिं भय बिषाद मन माहिं ॥ १५८ ॥
 हाट बाट नहिं जाइ निहारी । जनु पुर दहँ दिसि लागि दवारी ॥
 आवत सुत सुनि कैकयनंदिनि । हरषी रबिकुल जलरुह चंदिनि ।
 सजि आरती मुदित उठि धाई । द्वारेहिं भेंटि भवन लेइ आई ॥
 भरत दुखित परिवारु निहारा । मानहुँ तुहिन बनज बनु मारा ॥
 कैकेई हरषत एहि भाँती । मनहुँ मुदित दव लाइ किराती ॥
 सुतहि ससोच देखि मनु मारें । पूँछति नैहर कुसल हमारें ॥
 सकल कुसल कहि भरत सुनाई । पूँछी निज कुल कुसल भलाई ॥
 कहु कहँ तात कहाँ सब माता । कहँसिय राम लखन प्रिय भ्राता ॥
 दो० — सुनि सुत बचन सनेहमय कपट नीर भरि नैन ।

भरत श्रवन मन सूल सम पापिनि बोली बैन ॥ १५९ ॥
 तात बात मैं सकल सँवारी । भै मंथरा सहाय बिचारी ॥

कछुक काज बिधि बीच बिगारेउ । भूपति सरपति पुर पगु धारेउ ।
 सुनत भरतु भाए बिबस्म बिषादा । जनु सहमेउ करि केहरि नादा ।
 तात तात हा तात पुकारी । परे भूमितल व्याकुल भारी ॥
 चलत न देखन पायउँ तोही । तात न रामाह सौँणहु माही ॥
 बहुरि धीर धरि उठे सँभारी । कहु पितु मरन हेतु महतारी ॥
 सुनि सुत बचन कर्हात कैकेई । मरमु पाँछ जनु माहर देई ।
 आदिहु ते सब आगनि करनी । कुटिल कठोर मुदित मन बरनी ।
 दो०— भर्ताह बिसरेउ पितु मरन सुनत राम बन गौनु ।

हेतु अपनपड जानि जियँ शक्ति रहे धरि मौनु ॥ १६० ॥
 बिकल बिलोकि सुतहि समुझावति मनहुँ जरे पर लोनु लगावति ॥
 तात राउ नहिं सोचै जोगू । बिढ़इ सुकृत जसु कीन्हैउ भोगू ।
 जीवत सकल जनम फल पाए । अंत अमरपति सदन सिधाए ।
 अस अनुमानि सोच परिहरहू । सहित समाज राज पुर करहू ।
 सुनि सुति सहमेउ राजकुमारू । पाकें छन जनु लाग अँगारू ॥
 धीरज धरि भरि लेहिं उसासा पापनि सर्बाहि भाँनि कुल नासा ।
 जौं पै कुरुचि रही अति तोही । जनमत काहे न मारे मोही ॥
 पेड काटि तैं पालउ सौँचा मीन जिअन निर्ति बारि उलीचा ।
 दो०— हंमबंसु दमरघु जनकु राम लखन से भाइ ।

जननी तूँ जननी भई बिधि सन कछु न बसाइ ॥ १६१ ॥
 जब तैं कुमति कुमति जियँ ठयऊ । खंड खंड होइ हृदउ न गयऊ ॥

बर मागत मन भइ नहिं पीरा । गरि न जीह मुहँ परेउ न कीरा ॥
 भूपँ प्रतीति तोरि किमि कीन्ही । मस्र कल बिधि मति हरि लीन्ही ॥
 बिधिहुँ न नारि हृदय गति जानी । सकल कपट अघ अवगुन खानी ॥
 सरल सुसील धरम रत राऊ । सो किमि जानै तीय सुभाऊ ॥
 अस को जीव जंतु जग माहीं । जेहि रघुनाथ प्रानप्रिय नाहीं ॥
 भे अति अहित रामु तेउ तोही । को तू अहसि सत्य कहु मोही ।
 जो हसि सो हसि मुहँ मसि लाई । आँख ओट उठि बैठहि जाई ॥
 दो०— राम बिरोधी हृदय तें प्रगट कीन्ह बिधि मोहि ।

मो समान को पातकी बादि कहउँ कछु तोहि ॥ १६२ ॥
 सुनि सत्रुधुन मातु कुटिलाई । जरहिं गात रिस कछु न बसाई ।
 तेहि अवसर कुबरी तहँ आई । बसन बिभूषन बिबिध बनाई ॥
 लखि रिस भरेउ लखन लघु भाई । बरत अनल घृत आहुति पाई ।
 हुमगि लात तकि कूबर मारा । परि मुह भर महि करत पुकारा ॥
 कूबर दूटेउ फूट कपारू । दलित दसन मुख रुधिर प्रचारू ॥
 आह दइअ मैं काह नसावा । करत नीक फलु अनइस पावा ॥
 सुनि रिपुहन लखि नख सिख खोटी । लगे घसीटन धरि धरि झोटी ॥
 भरत दयानिधि दीन्ह छड़ाई । कौसल्या पहिं गे दोउ भाई ॥
 दो०— मलिन बसन बिबरन बिकल कृस सरीर दुख भार ।

कनक कलष बर बेलि बन मानहुँ हनी तुसार ॥ १६३ ॥
 भरतहि देखि मातु उठि धाई । मरुछित अवनि परी झड़ै आई ॥

देखत भरतु बिकल भए भारी । परे चरन तन दसा बिसारी ॥
मातु तात कहँ देहि देखाई । कहँ सिय रामु लखनु दोउ भाई ॥
कैकई कत जनमी जग माझा । जौं जनमि त भइ काहे न बाँझा ॥
कृत्न कलंकु जेहिं जनमेउ मोही । अपजस भाजन प्रियजन द्रोही ॥
को तिभुवन मोहि सरिस अभागी । गति असि तोरि मातु जेहि लागी ॥
पितु सुरपुर बन रघुबर केतू । मैं केवल सब अनरथ हेतू ॥
भ्रिग मोहि भयउँ बेनु बन आगी । दुसह दाह दुख दूषन भागी ॥
दो०— मातु भरत के बचन मृदु सुनि पुनि उठी सँभारि ।

लिए उठाइ लगाइ उर लोचन मोचति बारि ॥ १६४ ॥
मरल सुभाय मायँ हियँ लाए । अति हित मनहुँ राम फिरि आए ॥
भेंटेउ बहुरि लखन लघु भाई । सोकु सनेहु न हृदयँ समाई ॥
देखि सुभाउ कहत सबु कोई । राम मातु अस काहे न होई ॥
माताँ भरतु गोद बैठारे । आँसु पोंछि मृदु बचन ठावारे ॥
अजहुँ बच्छ बलि धीरज धरहू । कुसमउ समुझि सोक परिहरहू ॥
जनि ममनहु हियँ हानि गलानी । काल करम गति अघटित जानी ॥
कहुहि दोसु देहु जनि ताता । भा मोहि सब बिधि बाम बिथाता ॥
जो एतेहुँ दुख मोहि जिआवा । अजहुँ को जानइ का तेहि भात्रा ॥
दो० पितु आयस भूषन बसन तात तजे रघुबीर ।

बिसमउ हरषु न हृदयँ कछु पहिने बलकल चीर ॥ १६५ ॥
गुन प्रसन्न मन रंग न रोषू । सब कर सब बिधि करि परितोषू ॥

चले बिपिन सुनि सिय सँग लागी । रहइ न राम चरन अनुरागी ॥
 सुनतहिं लखनु चले उठि साथा । रहहिं न जतन किए रघुनाथा ॥
 तब रघुपति सबही सिरु नाई । चले संग सिय अरु लघु भाई ॥
 रामु लखनु सिय बनहि सिधाए । गइउँ न संग न प्रान पठाए ॥
 यहु सबु भा इन्ह औखिन्ह आगें । तउ न तजा तनु जीव अभागें ।
 मोहि न लाज निज नेहु निहारी । राम सरिस सुत में महतारी ।
 जिए मरै भल भूपति जाना । मोर हृदय सत कुलिस समाना ।
 दो०— कौसल्या के बचन सुनि भरत सहित रनिवासु ।

ब्याकुल बिलषत राजगृह मानहुँ सोक नेवासु ॥ १६६ ॥
 बिलर्पाहिं बिकल भरत दोउ भाई । कौसल्याँ लिए हृदयँ लगाई ॥
 भाँति अनेक भरतु समझाए । कहि बिबेकमय बचन सुनाए ॥
 भरतहुँ मातु सकल समझाई । कहि पुरान श्रुति कथा सुहाई ॥
 छल बिहीन सुचि सरल सुबानी । बोले भरत जोरि जुग पानी ॥
 जे अघ मातु पिता सुत मारें । गाइ गोठ महिसुर पुर जारें ।
 जे अघ तिय बालक बध कीन्हें । मोत महीपति माहुर दीन्हें ॥
 जे पातक उपपातक अहहीं । करम बचन मन भव कबि कहहीं ॥
 ते पातक मोहि होहुँ बिधाता । जाँ यहु होइ मोर मत माता ॥
 दो०— जे परिहरि हरि हर चरन भजहिं भूतगन घोर ।

तेहि कइ गति मोहि देउ बिधि जाँ जननी मत मोर ॥ १६७ ॥
 बेचहिं बेदु धरमु दुहि लेहीं । पिसुन पराय पाप कहि देहीं ॥

कपटी कुटिल कलहप्रिय क्रोधी बेद बिदूषक बिस्व बिरोधी ॥
 लाभी लपट लोलुपचारा जे तार्काहिं परधनु परदारा ॥
 पावौं मैं तिन्ह कै गति घोरा जौं जननी यहु संमत मोरा ॥
 जे नहिं साश्रुसंग अनुरागे परमारथ पथ बिमुख अभागे ॥
 जे न भजहिं हरि नरतनु पाई जिन्हहि न हरि हर सुजसु सोहई ॥
 तजि श्रुतिपंथु बाम पथ चलहीं बंचक बिरचि बेष जगु छलहीं ॥
 तिन्ह कै गति मोहि संकर देऊ । जननी जौं यहु जानौं भेऊ ।
 दो०— मातु भरत क बचन सुनि साँचे सरल सुभायँ ।

कहनि राम प्रिय तात तुम्ह सदा बचन मन कार्यँ ॥ १६८ ॥
 राम प्रानहु तैं प्रान तुम्हारे । तुम्ह रघुपतिहि प्रानहु तैं प्यारे ॥
 बिधु बिष चवै सवै हिमु आगी । होइ बारिचर बारि बिरागी ।
 भएँ ग्यानु बरु मिटै न मोहू । तुम्ह रामहि प्रतिकूल न होहू ॥
 मत तुम्हार यहु जा जग कहहीं । सो सपनेहुँ सुख सुगति न लहहीं ॥
 अस कहि मातु भरतु हियँ लाए थन पय सखहिं नयन जल छाए ॥
 करत बिलाप बहुत एहि भाँती । बैठेहिं बीति गई सब राती ॥
 बामदेउ बसिष्ठ तब आए । सचिव महाजन सकल बोलाए ॥
 मुनि बहु भाँति भरत उपदेसे । कहि परमारथ बचन सुदेसे ॥
 दो०— तात हृदयँ धीरजु धरहु करहु जो अवसर आजु ।

उठे भरत गुर बचन सुनि करन कहेउ सबु साजु ॥ १६९ ॥
 नृपतनु बेद बिदित अन्हवावा । परम बिचित्र बिमानु बनावा ।

गहि पद भरत मातु सब राखी । रहीं रानि दरसन अभिलाषी ॥
 चंदन अगर भार बहु आए । अमित अनेक सुगंध सुहाए ॥
 सरजु तीर रचि चिता बनाई । जनु सुरपुर सोपान सुहाई ॥
 एहि बिधि दाह क्रिया सब कीन्ही । बिधिवत न्हाइ तिलांजुलि दीन्ही ॥
 सोधि सुमृति सब बेद पुराना । कीन्ह भरत दसगात बिधाना ॥
 जहँ जस मुनिबर आयसु दोन्हा । तहँ तस सहस भौँत सबु कीन्हा ॥
 भए बिसुद्ध दिए सब दाना । धेनु बाजि गज बाहन नाना ॥
 दो०— सिंघासन भूषन बसन अन्न धरनि धन धाम ।

दिए भरत लहि भूमिसुर भे परिपूरन काम ॥ १७० ॥
 पितु हित भरत कीन्ह जसि करनी । सो मुख लाख जाइ नहिं बरनी ॥
 सुदिनु सोधि मुनिबर तब आए । सचिव महाजन सकल बोलाए ॥
 बैठे राजसभाँ सब जाई । पठए बोलि भरत दोउ भाई ॥
 भरतु बसिष्ठ निकट बैठारे । नीति धरममय बचन उचारे ॥
 प्रथम कथा सब मुनिबर बरनी । कैकड़ कुटिल कीन्ह जसि करनी ॥
 भूप धरमुब्रतु सत्य सराहा । जेहिं तनु परिहरि प्रेमु निबाहा ॥
 कहत राम गुन सील सुभाऊ । सजल नयन पुलकेउ मुनिराऊ ॥
 बहुरि लखन सिय प्रीति बखानी । सोक सनेह मगन मुनि ग्यानी ॥
 दो०— सुनहु भरत भावी प्रबल बिलखि कहेउ मुनिनाथ ।

हानि लाभु जीवनु मरनु जसु अपजसु बिधि हाथ ॥ १७१ ॥
 अस बिचारि केहि देइअ दोसू । व्यरथ काहि पर कीजिअ रोसू ॥

तात बिचारु करहु मन माहीं । सोच जोगु दसरथु नृपु नाहीं ॥
 सोचिअ बिप्र जो बेद बिहीना । तर्जनिज धरमु बिषय लयलीन ॥
 सोचिअ नृपति जो नीति न जाना । जेहि न प्रजा प्रिय प्रान समाना ॥
 सोचिअ बयसु कृपन धनवानू । जो न अतिथि सिव भगति सुजानू ॥
 सोचिअ सूद्रु बिप्र अवमानी । मुखर मानप्रिय ग्यान गुमानी ॥
 सोचिअ पुनि पति बंचक नारी । कुटिल कलहप्रिय इच्छाचारी ॥
 सोचिअ बटु निज ब्रतु परिहरई । जो नहिं गुर आयसु अनुसरई ॥
 दो०— सोचिअ गृही जो मोह बस करइ करम पथ त्याग ।

सोचिअ जती प्रपंच रत बिगत बिबेक बिराग ॥ १७२ ॥
 बैखानस सोइ सोचै जोगू । तपु बिहाइ जेहि भावइ भोगू ॥
 सोचिअ पिसुन अकारन क्रोधी । जननि जनक गुर बंधु बिरोधी ॥
 सब बिधि सोचिअ पर अपकारी । निज तनु पोषक निरदय भारी ॥
 सोचनीय सबहीं बिधि सोई । जो न छाड़ि छलु हरि जन होई ।
 सोचनीय नहिं कोसलराऊ । भुवन चारिदस प्रगट प्रभाऊ ॥
 भयउ न अहइ न अब होनिहारा । भूप भरत जस पिता तुम्हारा ॥
 बिधि हरि हरु सुरपति दिसिनाथा । बरनहिं सब दसरथ गुन गाथा ॥
 दो०— कहहु तात केहि भाँति कोउ करिहि बड़ाई तासु ।

राम लखन तुम्ह सत्रुहन सरिस सुअन सुचि जासु ॥ १७३ ॥
 सब प्रकार भूपति बड़भागी । बादि बिषादु करिअ तेहि लागी ।
 यह सुनि समुझि सोचु परिहरहु । सिर धरि राज रजायसु करहु ।

रायँ राजपदु तुम्ह कहँ दीन्हा । पिता बचनु फुर चाहिअ कीन्हा ॥
 तजे रामु जेहिं बचनहि लागी । तनु परिहरेउ राम बिरहागी ॥
 नृपहि बचन प्रिय नहिं प्रिय प्राना । करहु तात पितु बचन प्रवाना ॥
 करहु सीस धरि भूप रजाई । हइ तुम्ह कहँ सब भाँति भलाई ॥
 परसुराम पितु अग्या राखी । मारी मातु लोक सब साखी ॥
 तनय जजातिहि जौबनु दयऊ । पितु अग्याँ अघ अजसु न भयऊ ॥
 दो० — अनुचित उचित बिचारु तजि जे पालहिं पितु बैन ।

ते भाजन सुख सुजस के बसहिं अमरपाति ऐन ॥ १७४ ॥
 अवसि नरेस बचन फुर करहु । पालहु प्रजा सोकु परिहरहु ॥
 सुरपुर नृपु पाइहि परितोषू । तुम्ह कहँ सुकृतु सजसु नहिं दोषू ॥
 बेद बिदित संमत सबही का । जेहि पितु देइ सो पावइ टीका ॥
 करहु राजु परिहरहु गलानी । मानहु मोर बचन हित जानी ॥
 सुनि सुखु लहब राम बैदेहीं । अनुचित कहब न पंडित केहीं ॥
 कौसल्यादि सकल महतारों । तेउ प्रजा सुख होहिं सुखारों ॥
 परम तुम्हार राम कर जानिहि । सो सब बिधि तुम्ह सन भल मानिहि ॥
 सौँपेहु राजु राम के आएँ । सेवा करेहु सनेह सुहाएँ ॥
 दो० — कीजिअ गुर आयसु अवसि कहहिं सचिव कर जोरि ।

रघुपति आएँ उचित जस तस तब करब बहोरि ॥ १७५ ॥
 कौसल्या धरि धीरजु कहई । पूत पथ्य गुर आयसु अहई ॥
 सो आदरिअ करिअ हित मानी । तजिअ बिषादु काल गति जानी ॥

बन रघुपति सुरपुर नरनाहू । तुम्ह एहि भौंति तात कदराहू ॥
परिजन प्रजा सचिव सब अंबा । तुम्हही सुत सब कहँ अवलंबा ॥
लखि बिधि बाम कालु कठिनाई । धीरजु धरहु मातु बलि जाई ॥
सिर धरि गुर आयसु अनुसरहू । प्रजा पालि परिजन दुखु हरहू ॥
गुर के बचन सचिव अभिनदनु सुने भरत हिय हित जनु चंदनु ॥
सुनी बहोरि मातु मृदु बानी सौल सनेह सरल रस सानी ॥

छं० सानी सरल रस मातु बानी सुनि भरतु व्याकुल भए ।
लोचन सरोरुह स्रवत सौंचत बिरह उर अंकुर नए ॥
सो दसा देखत समय तेहि बिसरी सबहि सुधि देह की ।
तुलसी सराहत सकल सादर सीवै सहज सनेह की ॥

सो०— भरतु कमल कर जोरि धीर धुंधर धीर धरि ।

बचन अमिअँ जनु बोरि देत उचित उत्तर सबहि ॥ १७६ ॥

मासपारायण, अठारहवाँ विश्राम

मोहि उपदेसु दीन्ह गुर नीका प्रजा सचिव संमत सबही का ॥
मातु उचित धरि आयसु दीन्हा अर्वास सीस धरि चाहउँ कोन्हा ॥
गुर पितु मातु स्वामि हित बानी । सुनि मन मुदित करिअ भलि जानी ॥
उचित कि अनुचित किएँ बिचारू । धरमु जाइ सिर पातक भारू ॥
तुम्ह तौ देहु सरल सिख सोई जो आचरत मोर भल होई ॥
जद्यपि यह समुझत हउँ नीकै । तदपि होत परितोषु न जी कै ॥
अब तुम्ह बिनय मोरि सुनि लेहू । मोहि अनुहरत सिखावनु देहू ॥

ऊतरु देउँ छमब अपराधू । दुखित दोष गुन गनहिं न साधू ॥

दो०—पितु सुरपुर सिय रामु बन करन कहहु मोहि राजु ।

एहि तैं जानहु मोर हित कै आपन बड़ काजु ॥ १७७ ॥

हित हमार सियपति सेवकाई । सो हरि लीन्ह मातु कुटिलाई ॥

मैं अनुमानि दीख मन माहीं । आन उपायँ मोर हित नाहीं ॥

सोक समाजु राजु केहि लेखें । लखन राम सिय बिनु पद देखें ॥

बादि बसन बिनु भूषन भारू । बादि बिरति बिनु ब्रह्म बिचारू ॥

सरजु सरीर बादि बहु भोगा । बिनु हरिभगति जायँ जप जोगा ॥

जायँ जीव बिनु देह सुहाई । बादि मोर सबु बिनु रघुराई ॥

जाउँ राम पहिं आयसु देहू । एकहिं आँक मोर हित एहू ॥

मोहि नृप करि भल आपन चहहू । सोउ सनेह जड़ता बस कहहू ॥

दो०—कैकेई सुअ कुटिलमति राम बिमुख गतलाज ।

तुम्ह चाहत सुख मोहबस मोहि से अधम कै राज ॥ १७८ ॥

कहउँ साँचु सब सुनि पतिआहू । चाहिअ धरमसील नरनाहू ॥

मोहि राजु हठि देइहहु जबहीं । रसा रसातल जाइहि तबहीं ॥

मोहि समान को पाप निवासू । जेहि लगि सीय राम बनबासू ॥

रायँ राम कहूँ काननु दीन्हा । बिछुरत गमनु अमरपुर कीन्हा ॥

मैं सटु सब अनरथ कर हेतू । बैठ बात सब सुनउँ सचेतू ॥

बिनु रघुबीर बिलोकि अब्बासू । रहे प्राण सहि जग उपहासू ॥

राम पुनीत बिषय रस रूखे । लोलुप भूमि भोग के भूखे ॥

कहँ लगि कहौँ हृदय कठिनाई । निदरि कुलिसु जेहि लही बडाई ॥

दो०—कागन तें कारजु कठिन होइ दोसु नहिं मोर ।

कुलिस अस्थि तें उपल तें लोह कराल कठोर ॥ १७९ ॥

कैकेई भव तनु अनुरागे । पावँर प्राण अघाइ अभागे ॥

जौं प्रिय बिरहँ प्राण प्रिय लागे । देखब सुनब बहुत अब आगे ॥

लखन राम सिय कहूँ बनू दीन्हा । पठइ अमरपुर पति हित कीन्हा ॥

लीन्ह बिधवपन अपजसु आपू । दीन्हैउ प्रजहि सोकु संतापू ॥

मोहि दीन्ह सुखु सुजसु सुराजू । कीन्ह कैकई सब कर काजू ।

एहि तें मोर काह अब नीका । तेहि पर देन कहहु तुम्ह टीका ।

कैकइ जठर जनमि जग माहीं । यह मोहि कहँ कह्यु अनुचित नाहीं

मोरि बात सब बिधिहिं बनाई । प्रजा पाँच कत करहु सहाई ॥

दो०—ग्रह ग्रहीत पुनि बात बस तेहि पुनि बीछी मार ।

तेहि पिआइअ बारुनी कहहु काह उपचार ॥ १८० ॥

कैकइ सुअन जोगु जग जोई । चतुर बिरंचि दीन्ह मोहि सोई ॥

दसरथ तनय राम लघु भाई । दीन्ह मोहि बिधि बादि बडाई ॥

तुम्ह सब कहहु कढ़ावन टीका । राय रजायसु सब कहँ नीका ॥

ठतरु देउँ केहि बिधि केहि केही । कहहु सुखेन जथा रुचि जेही ।

मोहि कुमातु समेत बिहाई । कहहु कहिहि के कीन्ह भलाई ॥

मो बिनु को सचराचर माहीं । जेहि सिय रामु प्राणप्रिय नाहीं ॥

परम हानि सब कहँ बड़ लाहू । अदिनु मोर नहिं दूषन काहू ।

संसय सील प्रेम बस अहहू । सबुइ उचित सब जो कहू कहहू ॥

दो०— राम मातु सुठि सरलचित मो पर प्रेमु बिसेषि ।

कहइ सुभाय सनेह बस मोरि दीनता देखि ॥ १८१ ॥

गुर बिबेक सागर जगु जाना । जिन्हहि बिस्व कर बदर समाना ॥

मो कहँ तिलक साज सज सोऊ । भएँ बिधि बिमुख बिमुख सबु कोऊ ।

परिहरि रामु सीय जग माहीं । कोउ न कहिहि मोर मत नाहीं ॥

सो मैं सुनब सहब सुखु मानी । अंतहुँ कीच तहाँ जहँ पानी ॥

छरु न मोहि जग कहिहि कि पोचू । परलोकहु कर नाहिन सोचू ॥

एकइ उर बस दुसह दवारी । मोहि लागि भे सिय रामु दुखारी ॥

जीवन लाहु लखन भल पावा । सबु तजि राम चरन मनु लावा ॥

मोर जनम रघुबर बन लागी । झूठ काह पछिताउँ अभागी ॥

दो०— आपनि दारुन दीनता कहउँ सबहि सिरु नाइ ।

देखें बिनु रघुनाथ पद जिय कै जरनि न जाइ ॥ १८२ ॥

आन उपाठ मोहि नहिं सूझा । को जिय कै रघुबर बिनु बूझा ॥

एकहिं आँक इहइ मन माहीं । प्रातकाल चलिहउँ प्रभु पाहीं ॥

जद्यपि मैं अनभल अपराधी । भै मोहि कारन सकल उपाधी ॥

तदपि सरन सनमुख मोहि देखी । छामि सब कारहिं कृपा बिसेषी ॥

सील सकुच सुठि सरल सुभाऊ । कृपा सनेह सदन रघुराऊ ॥

अरिहुक अनभल कीन्ह न रामा । मैं सिसु सेवक जद्यपि बामा ॥

तुम्ह पै पाँच मोर भल मानी । आयसु आसिष देहु सुबानी ॥

जेहिं सुनि बिनय मोहि जनु जानी । आवहिं बहुरि रामु रजधानी ॥
दो०— जद्यपि जनमु कुमानु ते मैं सहु सदा सदोम ।

आपन जानि न त्यागिहहिं मोहि रघुबीर भरोस ॥ १८३ ॥
भरत बचन सब कहैं प्रिय लागे । राम सनेह सृधौं जनु पागे ॥
लोग बियोग बिषम बिष दागे । मंत्र सबीज सुनत जनु जागे ॥
मातु सचिव गुर पुर नर नारी । सकल सनेहैं बिकल भए भारी ॥
भरतहि कहहिं सराहि सराही । राम प्रेम मूरति तनु आही ॥
तात भरत अस काहे न कहहू । प्रान समान राम प्रिय अहहू ॥
जो पावैरु अपनी जड़ताई । तुम्हहि सुगाइ मातु कुटिलाई ॥
सो सहु कोटिक पुरुष समेता । बसिहि कलप सत नरकनिक्ता ॥
अहि अध अवगुन नहिं मनि गहई । हरइ गरल दुख दारिद दहई ।
दो० अवसि चलिअ बन रामु जहै भरत मंत्रु भल कीन्ह ।

सोक सिंधु बूझत सबहि तुम्ह अवलंबनु दीन्ह ॥ १८४ ॥
भा सब के मन मोदु न थोरा । जनु घन धुनि सुनि चातक मोरा ।
चलत प्रात लखि निरनउ नीके । भरतु प्रानप्रिय भे सबही के ।
मुनिहि बंदि भरतहि सिरु नाई । चले सकल घर बिदा कराई ॥
धन्य भरत जीवनु जग माहीं । सीलु सनेहु सराहत जाहीं ।
कहहिं परसपर भा बड़ काजू । सकल चलै कर साजहिं साजू ॥
जेहि राखाहिं रहु घर रखत्रारी । सो जानइ जनु गरदनि मारी ।
कोउ कह रहन काहिअ नहिं काहू । को न चहइ जग जीवन लाहू ॥

दो०— जरउ सो संपति सदन सुखु सुहृद मातु पितु भाइ ।

सनमुख होत जो राम पद करै न सहस सहाइ ॥ १८५ ॥
 घर घर साजहिं बाहन नाना । हरषु हृदयँ परभात पयाना ॥
 भरत जाइ घर कीन्ह बिचारू । नगरु बाजि गज भवन भँडारू ॥
 संपति सब रघुपति कै आही । जौं बिनु जतन चलौं तजि ताही ॥
 तौ परिनाम न मोरि भलाई । पाप सिरोमनि साईँ दोहाई ॥
 करइ स्वामि हित सेवकु सोई । दूषन कोटि देइ किन कोई ॥
 अस बिचारि सुचि सेवक बोले । जे सपनेहुँ निज धरम न डोले ॥
 कहि सबु मरमु धरमु भल भाषा । जो जेहि लायक सो तेहिं राखा ॥
 करि सबु जतनु राखि रखवारे । राम मातु पहिं भरतु सिधारे ॥
 दो०— आरत जननी जानि सब भरत सनेह सुजान ।

कहेउ बनावन पालकीं सजन सुखासन जान ॥ १८६ ॥
 चक्क चक्कि जिमि पुर नर नारी । चहत प्रात उर आरत भारी ।
 जागत सब निसि भयउ बिहाना । भरत बोलाए सचिव सुजाना ॥
 कहेउ लेहु सबु तिलक समाजू । बनहिं देब मुनि रामहिं राजू ॥
 बेगि चलहु सुनि सचिव जोहारे । तुरत तुरग रथ नाग सँवारे ॥
 अरुंधती अरु अग्निनि समाऊ । रथ चढ़ि चले प्रथम मुनिराऊ ॥
 बिप्र बृंद चढ़ि बाहन नाना । चले सकल तप तेज निधाना ।
 नगर लोग सब सजि सजि जाना । चित्रकूट कहँ कीन्ह पयाना ॥
 सिबिका सुभग न जाहिं बखानी । चढ़ि चढ़ि चलत भई सब रानी ॥

दो०— सौंषि नगर सुचि सेवकनि सादर सकल चलाइ।

सुमिरि राम सिय चरन तब चले भरत दोड भाइ॥ १८७॥
 राम दरस बस सब नर नारी। अनु करि करिनि चले तकि बारी॥
 बन सिय रामु समुझि मन माहीं। सानुज भरत पयादेहिं जाही॥
 देखि सनेहु लोग अनुगगे। उतरि चले हय गय रथ त्यागे॥
 जाइ समीप राखि निज डोली। राम मातु मृदु बानी बोली॥
 तात चढ़हु रथ बलि महतारी। होइहि प्रिय परिवार दुखारी॥
 तुम्हरे चलत चलिहि सबु लोगू। सकल सोक कस नहिं मग जोगू॥
 सिर धरि बचन चरन सिरु नाई। रथ चढ़ि चलत भए दोड भाई॥
 तमसा प्रथम दिवस करि बासू। दूसर गोमति तीर निवासू॥
 दो०— पय अहार फल असन एक निसि भोजन एक लोग।

करत राम हित नेम ब्रत परिहरि भूषन भोग॥ १८८॥
 सई तीर बसि चले बिहाने। संगबेरपुर सब निअराने॥
 समाचार सब सुने निषादा। हृदयँ बिचार करइ सबिषादा॥
 कारन कवन भरतु बन जाहीं। है कछु कपट भाउ मन माहीं॥
 जाँ पै जियँ न होति कुटिलाई। तौ कत लीन्ह संग कटकाई॥
 जानहिं सानुज रामहि मारी। करउँ अकंटक राजु सुखारी॥
 भरत न राजनीति उर आनी। तब कलंकु अब जीवन हानी॥
 सकल सुरासुर जुरहिं जुझारा। रामहि समर न जीतनिहारा॥
 का आचरजु भरतु अस करहीं। नहिं बिष बेलि अमिअ फल फरहीं॥

दो०— अस बिचारि गुहँ ग्याति सन कहेउ सजग सब होहु।

हथबाँसहु बोगहु तरनि कीजिअ घाटारोहु॥१८९॥
 होहु सँजोइल रोकहु घाटा। ठाटहु सकल मरै के ठाटा॥
 सनमुख लोह भरत सन लेऊँ। जिअत न सुरसरि उतरन देऊँ॥
 समर मरनु पुनि सुरसरि तीरा। राम काजु छनभंगु सरीरा॥
 भरत भाइ नृपु मै जन नीचू। बड़ै भाग असि पाइअ मीचू॥
 स्वामि काज करिहउँ रन रारी। जस धवलिहउँ भुवन दस चारी॥
 तजउँ प्रान रघुनाथ निहोरें। दुहँ हाथ मुद मोदक मोरें॥
 साधु समाज न जाकर लेखा। राम भगत महुँ जामु न रेखा॥
 जायँ जिअत जग सो महि भारू। जननी जौबन बिटप कुठारू॥
 दो०— बिगत बिषाद निषादपति सबहि बढाइ उछाहु।

सुमिरि राम मागेउ तुरत तरकस धनुष सनाहु॥१९०॥
 बेगहु भाइहु सजहु सँजोऊ। सुनि रजाइ कदराइ न कोऊ॥
 भलेहिं नाथ सब कहहिं सहारषा। एकाहिं एक बढावइ करषा॥
 चले निषाद जोहारि जोहारी। सूर सकल रन रूचइ रारी॥
 सुमिरि राम पद पंकज पनहीं। भार्थी बाँधि चढ़ाइन्हि धनहीं॥
 अँगरी पहिरि कूँड़ि सिर धरहीं। फरसा बाँस सेल सम करहीं॥
 एक कुसल अति ओड़न खाँड़े। कूदाहिं गगन मनहुँ छिति छाँड़े॥
 निज निज साजु समाजु बनाई। गुह राउताहि जोहारे जाई॥
 देखि सुभट सब लायक जाने। लै लै नाम सकल सनमाने॥

दो०— भाइहु लावहु धोख जनि आजु काज बड़ मोहि ।

सुनि सरोष बोले सुभट बीर अधीर न होहि ॥ १९१ ॥

राम प्रताप नाथ बल तोरे करहि कटक बिनु भट बिनु धोरे ॥

जीवत पाउ न पाछें धरहीं । रुंड मुंडमय मेदिनि करहीं ॥

दीख निषादनाथ भल टोलू । कहेउ बजाउ जुझाऊ ढोलू ॥

एतना कहत छींक भइ बाँए । कहेउ सगुनि अन्ह खेत सुहाए ॥

बूढ़ एक कह सगुन बिचारी । भरतहि मिलिअ न होइहि रारी ॥

रामहि भरतु मनावन जाहीं । सगुन कहइ अस बिग्रहु नाहीं ॥

सुनि गुह कहइ नीक कह बूढ़ा । सहसा करि पछिताहिं बिमूढ़ा ॥

भरत सुभाउ सीलु बिनु बूझें । बडि हित हानि जानि बिनु जूझें ॥

दो०— गहहु घाट भट समिटि सब लेउँ मरम मिलि जाइ ।

बूझि मित्र अरि मध्य गति तस तब करिहउँ आइ ॥ १९२ ॥

लखब सनेहु सुभायँ सुहाएँ । बैरु प्रीति नाहिं दुरइँ दुराएँ ॥

अस कहि भेंट सँजोवन लागे । कद मूल फल खग भृग मागे ॥

मीन पीन पाठीन पुराने । भरि भरि भार कहारन्ह आने ॥

मिलन साजु सजि मिलन सिधाए । मंगल मूल सगुन सुभ पाए ॥

देखि दूरि तँ कहि निज नामू । कीन्ह मुनीसहि दंड प्रनमू ॥

जानि रामप्रिय दीन्हि असीसा । भरतहि कहेउ बुझाइ मुनीसा ॥

राम सखा सुनि संदनु त्यागा । चले उत्तरि उमगत अनुरागा ॥

गाउँ जाति गृहँ नाउँ सुनाई । कीन्ह जोहारु माथ महि लाई ॥

दो०— करत दंडवत देखि तेहि भरत लीन्ह उर लाइ ।

मनहुँ लखन सन भेंट भइ प्रेमु न हृदयँ समाइ ॥ १९३ ॥
 भेंटत भरतु ताहि अति प्रीती । लोग सिहाहिं प्रेम कै रीती ॥
 धन्य धन्य धुनि मंगल मूला । सुर सराहि तेहि बरिसहिं फूला ॥
 लोक बेद सब भाँतिहिं नीचा । जासु छाँह छुइ लेइअ सींचा ॥
 तेहि भरि अंक राम लघु भ्राता । मिलत पुलक परिपूरित गाता ॥
 राम राम कहि जे जमुहाहीं । तिन्हहि न पाप पुंज समुहाहीं ॥
 यह तौ राम लाइ उर लीन्हा । कुल समेत जगु पावन कीन्हा ॥
 करमनास जलु सुरसरि परई । तेहि को कहहु सीस नहिं धरई ॥
 उलटा नामु जपत जगु जाना । बालमीकि भए ब्रह्म समाना ॥
 दो०— स्वपच सबर खस जमन जइ पावैं कोल किरात ।

रामु कहत पावन परम होत भुवन बिख्यात ॥ १९४ ॥
 नहिं अचिरिजु जुग जुग चलि आई । केहि न दीन्ह रघुबीर बड़ाई ॥
 राम नाम महिमा सुर कहहीं । सुनि सुनि अवध लोग सुखु लहहीं ॥
 रामसखाहि मिलि भरत सप्रेमा । पूँछी कुसल सुमंगल खेमा ॥
 देखि भरत कर सीलु सनेहु । भा निषाद तेहि समय बिदेहु ॥
 सकुच सनेहु मोदु मन बाढ़ा । भरतहि चितवत एकटक ठाढ़ा ॥
 धरि धीरजु पद बंदि बहोरी । बिनय सप्रेम करत कर जोरी ॥
 कुसल मूल पद पंकज पेखी । मैं तिहुँ काल कुसल निज लेखी ॥
 अब प्रभु परम अनुग्रह तोरें । सहित कोटि कुल मंगल मोरें ॥

दो० — समुझि मोरि करतूति कुलु प्रभु महिमा जियँ जोड़ ।

जो न भजइ रघुबीर पद जग बिधि बंचित सोइ ॥ १९५ ॥
 कपटी कायर कुमति कुजाती । लोक बेद बाहेर सब भाँती ॥
 राम कीन्ह आपन जबही तैं । भयउँ भुवन भूषन तबही तैं ॥
 देखि प्रीति सुनि बिनय सुहाई । मिलेउ बहोरि भरत लघु भाई ॥
 कहि निषाद निज नाम सुबानी । सादर सकल जोहारि रानी ॥
 जानि लखन सम देहिं असीसा । जिअहु सुखी सय लाख बरीसा ॥
 निरखि निषादु नगर नर नारी । भए सुखी जनु लखनु निहारी ॥
 कहहिं लहेउ एहिं जीवन लाहू । भेंटेउ रामभद्र भरि बाहू ॥
 सुनि निषादु निज भाग बड़ाई । प्रमुदित मन लइ चलेउ लेवाई ॥
 दो० — सनकारे सेवक सकल चले स्वामि रुख पाइ ।

घर तरु तर सर बाग बन बास बनाएहि जाइ ॥ १९६ ॥
 सृंगबेरपुर भरत दीख जब । भे सनेहँ सब अंग सिथिल तब ॥
 सोहत दिऐँ निषादहि लागू । जनु तनु धरें बिनय अनुरागू ॥
 एहि बिधि भरत सेनु सबु संग्गा । दीखि जाइ जग पावनि गंगा ॥
 रामघाट कहैं कीन्ह प्रनामू । भा मनु मगनु मिले जनु रामू ।
 करहिं प्रनाम नगर नर नारी । मुदित ब्रह्ममय बारि निहारी ।
 करि मज्जन् मार्गहिं कर जोरी । रामचंद्र पद प्रीति न थोरी ॥
 भरत कहेउ सुरसरि तव रेनू । सकल सुखद सेवक सुरधेनू ॥
 जोरि पानि बर मागउँ एहू । सीय राम पद सहज सनेहू ॥

दो० — एहि बिधि मज्जनु भरतु करि गुर अनुसासन पाइ ।

मातु नहानीं जानि सब डेरा चले लवाइ ॥ ११७ ॥
 जहँ तहँ लोगन्ह डेरा कीन्हा । भरत सोधु सबही कर लीन्हा ॥
 सुर सेवा करि आयसु पाई । राम मातु पहिं गे दोउ भाई ॥
 चरन चौंपि कहि कहि मृदु बानी । जननीं सकल भरत सनमानी ॥
 भाइहि सौंपि मातु सेवकाई । आपु निषादाहि लीन्ह बोलाई ॥
 चले सखा कर सों कर जोरें । सिथिल सरीरु सनेह न थोरें ॥
 पूँछत सखहि सो ठाउँ देखारु । नेकु नयन मन जरनि जुड़ारु ॥
 जहँ सिय रामु लखनु निसि सोए । कहत भरे जल लोचन कोए ॥
 भरत बचन सुनि भयउ बिषादू । तुरत तहाँ लइ गयउ निषादू ॥
 दो० — जहँ सिंसुषा पुनीत तर रघुबर किय बिश्रामु ।

अति सनेहँ सादर भरत कीन्हेउ दंड प्रनामु ॥ ११८ ॥
 कुस साँथरी निहारि सुहाई । कीन्ह प्रनामु प्रदच्छिन जाई ॥
 चरन रेख रज ओंखिन्ह लाई । बनइ न कहत प्रीति अधिकाई ॥
 कनक बिंदु दुइ चारिक देखे । राखे सीस सीय सम लेखे ॥
 सजल बिलोचन हृदयँ गलानी । कहत सखा सन बचन सुबानी ॥
 श्रीहत सीय बिरहँ दुतिहीना । जथा अवध नर नारि बिलीना ॥
 पिता जनक देउँ पटतर केही । करतल भोगु जोगु जग जेही ॥
 ससुर भानुकुल भानु भुआलू । जेहि सिंहात अमरावतिपालू ॥
 प्राननाथ रघुनाथ गोसाईं । जो बड़ होत सो राम बड़ाई ॥

दो०— पति देवता सुतीय मनि सीथ साँथरी देखि ।

बिहरत हृदउ न हहरि हर पबि तैं कठिन बिमेषि ॥ १९९ ॥
लालन जोगु लखन लघु लोने भे न भाइ अस अर्हाहं न होने ।
पुरजन प्रिय पितु मातु दुलारे मिथ रघुबीरहि प्रानपिआरे ।
मृदु मूरति सुकुमार सुभाऊ तात बाउ तन लाग न काऊ ।
ते बन सहहिं बिपति सब भाँती निदरे कोटि कुलिस एहिं छाती ॥
राम जर्नाम जगु कीन्ह उजागर । रूप सील सुख सब गुन सागर ॥
पुरजन परिजन गुर पितु माता । राम सुभाउ सबहि सुखदाना ॥
बैरिउ राम बड़ाई करहीं । बोलनि मिलनि बिनय मन हरहीं ॥
सारद कोटि कोटि सत सेवा । करिन सकहिं प्रभु गुन गन लेखा ।
दो०— सुखस्वरूप रघुबंसमनि मंगल भोद निधान ।

ते सोवत कृस ड़ासि महि बिधि गति अति बलवान ॥ २०० ॥
राम सुना दुखु कान न काऊ । जीवनतरु जमि जोगवइ राऊ ॥
पलक नयन फनि मनि जेहि भाँती । जोगवहिं जननि सकल दिन राती ॥
ते अब फिरत बिपिन पदचारी । कंद मूल फल फूल अहारी ।
धिग कैकई अमंगल मूला । भईस प्रान प्रियतम प्रतकूला ॥
मैं धिग धिग अध उदधि अभागी । सबु उतपातु भयउ जेहि लागी ॥
कुल कलकु करि सृजेउ बिधाताँ । साईंदोह मोहि कीन्ह कुमाताँ ॥
सुनि सप्रेम समुझाव निषादू । नाथ करिअ कत बादि बिषादू ॥
राम तुम्हहि प्रिय तुम्ह प्रिय गमहि । यह निरजोसु दोसु बिधि बामहि ॥

छं०— बिधि बाम की करनी कठिन जेहिं मातु कीन्ही बावरी ।
 तेहि राति पुनि पुनि करहिं प्रभु सादर सहना रावरी ॥
 तुलसी न तुम्ह सो राम प्रीतमु कहतु हों सौंहें किएँ ।
 परिनाम मंगल जानि अपने आनिए धीरजु हिएँ ॥

सो०— अंतरजामी रामु सकुच सप्रेम कृपायतन ।

चलिअ करिअ विश्रामु यह बिचारि दृढ़ आनि मन ॥ २०१ ॥
 सखा बचन सुनि उर धरि धीरा । बास चले सुमिरत रघुबीरा ॥
 यह सुधि पाइ नगर नर नारी । चले बिलोकन आरत भारी ॥
 परदखिना करि करहिं प्रनामा । देहिं कैकइहि खोरि निकामा ॥
 भरि भरि बारि बिलोचन लेहीं । बाम बिधातहि दूषन देहीं ॥
 एक सराहिं भरत सनेहू । कोउ कह नृपति निबाहेउ नेहू ॥
 निंदहिं आपु सराहि निषादहि । को कहि सकइ बिमोह बिषादहि ॥
 एहि बिधि राति लोगु सबु जागा । भा भिनुसार गुदारा लागा ॥
 गुरहि सुनावैं चढ़ाइ सुहाई । नई नाव सब मातु चढ़ाई ॥
 दंड चारि महँ भा सबु पारा । उतरि भरत तब सबहि सँभारा ॥
 दो०— प्रातक्रिया करि मातु पद यदि गुरहि सिरु नाइ ।

आगें किए निषाद गन दीन्हेउ कटकु चलाइ ॥ २०२ ॥
 कियउ निषादनाथु अगुआई । मातु पालकीं सकल चलाई ॥
 साथ बोलाइ भाइ लघु दीन्हा । बिप्रन्ह सहित गवनु गुर कीन्हा ॥
 आपु सुरसरिहि कीन्ह प्रनामू । सुमिरे लखन सहित सिय रामू ॥

गवने भरत पयादेहिं पाए । कोतल संग जाहिं डोरिआए ॥
 कहहिं सुसेवक बारहिं बारा । होइअ नाथ अस्व असवारा ॥
 रामु पयादेहिं पायँ सिधाए । हम कहँ रथ गज बाजि बनाए ॥
 सिर भर जाउँ उचित अस मोरा । सब तँ सेवक धरमु कठोरा ॥
 देखि भरत गति सुनि मृदु बानी । सब सेवक गन गरहिं गलानी ॥
 दो०— भरत तीसरे पहर कहँ कीन्ह प्रबेसु प्रयाग ।

कहत राम सिथ राम सिथ उमगि उमगि अनुराग ॥ २०३ ॥
 झलका झलकत पायन्ह कैसें । पंकज कोस ओस कन जैसें ॥
 भरत पयादेहिं आए आजू । भयउ दुखित सुनि सकल समाजू ॥
 खबरि लीन्ह सब लोग नहाए । कीन्ह प्रनामु त्रिबेनिहिं आए ॥
 सबिधि सितासित नीर नहाने । दिए दान महिसुर सनमाने ॥
 देखत स्यामल धवल हलोरे । पुलकि सरीर भरत कर जोरे ॥
 सकल काम प्रद तीरधराऊ । बेद बिदित जग प्रगट प्रभाऊ ॥
 मागउँ भीख त्यागि निज धरमू । आरत काह न करइ कुकरमू ॥
 अस जियँ जानि सुजान सुदानी । सफल करहिं जग जाचक बानी ॥
 दो०— अरथ न धरम न काम रुचि गति न चहउँ निरबान ।

जनम जनम रति राम पद यह बरदानु न आन ॥ २०४ ॥
 जानहुँ रामु कुटिल करि मोही । लोग कहउ गुर साहिब द्रोही ॥
 सीता राम चरन रति मोरें । अनुदिन बढ़उ अनुग्रह तोरें ॥
 जलदु जनम भरि सुरति बिसारउ । जाचत जलु पबि पाहन डारउ ॥

चातकु रटनि घटें धाटि जाई । बढें प्रेमु सब भाँति भलाई ॥
 कनकहिं बान चढ़इ जिमि दाहें । तिमि प्रियतम पद नेम निबाहें ॥
 भरत बचन सुनि माझ त्रिबेनी । भइ मृदु बानि सुमंगल देनी ॥
 तात भरत तुम्ह सब बिधि साधू । राम चरन अनुराग अगाधू ॥
 बादि गलानि करहु मन माहीं । तुम्ह सम रामहि कोउ प्रिय नाहीं ॥
 दो०— तनु पुलकेउ हियँ हरषु सुनि बेनि बचन अनुकूल ।

भरत धन्य कहि धन्य सुर हरषित वरषहिं फूल ॥ २०५ ॥
 प्रमुदित तीरथराज निवासी । बैखानस बटु गृही उदासी ॥
 कहहिं परसपर मिलि दस पाँचा । भरत सनेहु सीलु सुचि साँचा ।
 सुनत राम गुन ग्राम सुहाए । भरद्वाज मुनिबर पहिं आए ॥
 दंड प्रनामु करत मुनि देखे । मूरतिमंत भाग्य निज लेखे ॥
 धाइ उटाइ लाइ उर लीन्हे । दीन्ह असीस कृतारथ कीन्हे ॥
 आसनु दीन्ह नाइ सिरु बैठे । चहत सकुच गृहँ जनु भजि पैठे ॥
 मुनि पूँछब कछु यह बड़ सोचू । बोले रिषि लखि सीलु सँकोचू ॥
 सुनहु भरत हम सब सुधि पाई । बिधि करतन पर किछु न बसाई ।
 दो०— तुम्ह गलानि जियँ जनि करहु समुझि भातु करतूति ।

तात कैकइहि दोसु नहिं गई गिरा मति धूति ॥ २०६ ॥
 यहउ कहत भल कहिहि न कोऊ । लोकु बेदु बुध संमत दोऊ ॥
 तात तुम्हार बिमल जसु गाई । पाइहि लोकउ बेदु बड़ाई ॥
 लोक बेद संमत सबु कहई । जेहि पितु देइ राजु सो लहई ॥

राउ सत्यव्रत तुम्हहि बोलाई देत राजु सुख धरमु बड़ाई ॥
 राम गवनु बन अनरथ मूला । जो सुनि सकल बिस्व भइ सूला ॥
 सो भावी बस रानि अयानी करि कृचालि अंतहुँ पछितानी ॥
 तहँउँ तुम्हार अलप अपराधू । कहै सो अधम अयान असाधू ॥
 करतेहु राजु त तुम्हहि न दोषू । रामहि होत सुनत सतोषू ॥
 दो० अब अति कीन्हेहु भरत भल तुम्हहि उचित मत एह ।

सकल सुमंगल मूल जग रघुबर चरन सनेहु ॥ २०७ ॥
 सो तुम्हार धनु जीवनु प्राणा । भूरिभाग को तुम्हहि समाना ॥
 यह तुम्हार आचरजु न ताता । दसरथ सुअन राम प्रिय भ्राता ॥
 सुनहु भरत रघुबर मन माहीं । पेम पात्रु तुम्ह सम कोठ नाही ॥
 लखन राम सीतहि अति प्रीती । निसि सब तुम्हहि सराहत बीती ।
 जाना भरमु नहात प्रयाग । मगन होहिं तुम्हरे अनुरागा ॥
 तुम्ह पर अस सनेहु रघुबर कै । सुख जीवन जग जस जड़नर कै ।
 यह न अधिक रघुबीर बड़ाई । प्रनत कुटुंब पाल रघुराई ॥
 तुम्ह तौ भरत मोर मत एहू । धरे देह जनु राम सनेहू ।
 दो०—तुम्ह कहँ भरत कलंक यह हम सब कहँ उपदेसु ।

राम भगति रस सिद्धि हित भा यह समउ गनेसु ॥ २०८ ॥
 नव बिधु बिमल तात जसु तोरा । रघुबर किकर कुमुद चकोरा ॥
 उदित सदा अँथइहि कबहूँ ना । घटिह न जग नभ दिन दिन दूना ॥
 कोक तिलोक प्रीति अति कारही । प्रभु प्रताप रबि छर्बाहि न हरिही ॥

निसि दिन सुखद सदा सब काहू । ग्रसिहि न कैकइ करतबु राहू ॥
 पूरन राम सुपेम पियूषा । गुर अवमान दोष नहिं दूषा ॥
 राम भंगत अब अमिअँ अघाहूँ । कीन्हहु सुलभ सुधा बसुधाहूँ ॥
 भूप भगीरथ सुरसरि आनी । सुमिरत सकल सुमंगल खानी ॥
 दसरथ गुन गन बरनि न जाहीं । अधिकु कह्य जेहि सम जग नाहीं ॥
 दो०— जासु सनेह सकोच बस राम प्रगट भए आइ ।

जे हर हिय नयननि कबहुँ निरखे नहीं अघाइ ॥ २०९ ॥
 कौरति बिधु तुम्ह कीन्ह अनूपा । जहँ बस राम पेम मृगरूपा ॥
 तात गलानि करहु जियँ जाएँ । डरहु दरिद्रहि पारसु पाएँ ॥
 सुनहु भरत हम झूठ न कहहीं । उदासीन तापस बन रहहीं ॥
 सब साधन कर सुफल सुहावा । लखन राम सिय दरसन पावा ॥
 तेहि फल कर फलु दरस तुम्हाए । सहित पयाग सुभाग हमारा ॥
 भरत धन्य तुम्ह जसु जगु जयऊ । कहि अस पेम मगन मुनि भयऊ ॥
 सुनि मुनि बचन सभासद हरषे । साधु सराहि सुमन सुर बरषे ॥
 धन्य धन्य धुनि गगन पयागा । सुनि सुनि भरतु मगन अनुरागा ॥
 दो०— पुलक गात हियँ रामु सिय सजल सरोरुह नैन ।

करि प्रनामु मुनि मंडलिहि बोले गदगद बैन ॥ २१० ॥
 मुनि समाजु अरु तीरथराजू । साँचिहुँ सपथ अघाइ अकाजू ॥
 एहिं थल जौं किछु कहिअ बनाई । एहिं सम अधिक न अघ अधमाई ।
 तुम्ह सर्बग्य कहउँ सतिभाऊ । उर अंतरजामी रघुराऊ ॥

मोहि न मातु करतब कर सोचू । नहिं दुखु जियँ जगु जानिहि पोचू ।
 नाहिन डरु बिगारिहि परलोकू । पितहु मरन कर मोहि न सोचू ।
 सुकृत सुजस भरि भुअन सुहाए लछिमन राम सरिम सुत पाए
 राम बिरहँ तजि तनु छनभंगू । भूप सोच कर कवन प्रसंगू ।
 राम लखन सिय विनु पग पनहीं । करि मुनि बेष फिरिहं बन बनहीं ।
 दो० - अजिन बसन फल असन यहि सयन डसि कुस पात ।

बसि तरु तर नित सहत हिम आतप बरषा बात ॥ २११ ॥
 एहि दुख दाहँ दहइ दिन छाती । भूख न बासर नीद न राती ।
 एहि कुरोग कर औषधु नाहीं । साधेउँ सकल बिस्व मन माहीं ॥
 मातु कुमत बढ़ई अब मूला । तेहि हमार हित कीन्ह बैसूला ।
 कलि कृकाठ कर कीन्ह कुजंत्रू । गाड़ि अवाध पाढ़ि कठिन कुमंत्रू ॥
 मोहि लागि यहु कृठाद तेहिं ठाय । घालेसि सब जगु बारहबाटा ॥
 मिटइ कुजोगु राम फिरि आएँ । बसइ अवध नहिं आन उपाएँ ॥
 भरत बचन मुनि मुनि सुखु पाई । सबहिं कीन्हि बहु भौति बड़ाई ॥
 तात करहु जनि सोचु बिसेषी । सब दुखु मिटिहि राम पग देखी ॥
 दो०— करि प्रबोधु मुनिबर कहेउ अतिथि पेमप्रिय होहु ।

कंद मूल फल फूल हम देहिं लेहु करि छेहु ॥ २१२ ॥
 मुनि मुनि बचन भरत हियँ सोचू । भयउ कुअवसर कठिन सँकोचू ॥
 जानि गरुड़ गुर गिरा बहोरी । चरन बंदि बोले कर जोरी ॥
 सिर धरि आयसु करिअ तुम्हारा । परम धरम यहु नथ हमारा ॥

भरत बचन मुनिबर मन भाए । सुचि सेवक सिष निकट बोलाए ॥
 चाहिअ कीन्ह भरत पहुनाई । कंद मूल फल आनहु जाई ॥
 भलोहिं नाथ कहि तिन्ह सिर नाए । प्रमुदित निज निज काज सिधाए ॥
 मुनिहिं सोच पाहुन बड़ नेवता । तसि पूजा चाहिअ जस देवता ॥
 सुनि रिधि सिधि अनिमादिक आई । आयसु होइ सो करहिं गोसाईं ।
 दो०— राम बिरह ब्याकुल भरतु मानुज सहित समाज ।

पहुनाई करि हरहु श्रम कह मुदित मुनिराज ॥ २१३ ॥
 रिधि सिधि सिर धरि मुनिबर बानी । बड़भार्गवि आपुहि अनुमानी ॥
 कहहिं परसपर सिधि समुदाई । अतुलित अतिथि राम लघु भाई ॥
 मुनि पद बंदि करिअ सोइ आजू । होइ सुखी सब राज समाजू ॥
 अस कहि रचेउ रुचिर गृह नाना । जेहि बिलोकि बिलखाहिं बिमाना ॥
 भोग बिभूति भूरि भरि राखे । देखत जिन्हहिं अमर अभिलाषे ॥
 दासीं दास साजु सब लीन्हें । जोगवत रहहिं मनहि मनु दीन्हें ॥
 सब समाजु सर्ज सिधि पल माहीं । जे सुख सुरपुर सपनेहुं नाहीं ॥
 प्रथमहिं बास दिए सब केही । मुंदर सुखद जथा रुचि जेही ॥
 दो०— बहुरि सपरिजन भरत कहूँ रिषि अस आयसु दीन्ह ।

बिधि बिसमय दायकु बिभव मुनिबर तपबल कीन्ह ॥ २१४ ॥
 मुनि प्रभाउ जब भरत बिलोका । सब लघु लगे लोकपति लोका ॥
 सुख समाजु नहिं जाइ बखानी । देखत बिरति बिसारहि ग्यानी ॥
 आसन सयन सुबसन बिताना । बन बाटिका बिहग भृग नाना ॥

सुरभि फूल फल अमिअ समाना । बिमल जलासय बिबिध बिधाना ।
 असन पान सुचि अमिअ अमी से । देखि लोग सकुचात जमी से ।
 सुर सुरभी सुरतरु सबही केँ लग्न अम्भलाषु सुरेस सची केँ ॥
 रितु बसंत बह त्रिबिध बयारी सब कहँ सुलभ पदारथ चारी ।
 सक चंदन बनितादिक भांगा । देखि हरष बिसमय बस लोगा ॥
 दो०— सपनि चकई भरतु चक मुनि आयस खेलवार ।

तेहि निसि आश्रम पिंजगँ राखे था भिनुसार ॥ २१५ ॥

मासपारायण, उन्नीसवाँ विश्राम

कीन्ह निमज्जनु तीरथराजा । नाइ मुनिहि स्मिर सहित समाजा ।
 रिषि आयसु असीस सिर राखी । करि दंडवत बिनय बहु भाषी ॥
 पथ गति कुसल साथ सब लीन्हें चले चित्रकूटहिं चितु दीन्हें ॥
 रामसखा कर दीन्हें लागू । चलत देह धरि जनु अनुरागू ।
 नहि पद त्रान सीस नहिं छाया । पेमु नेमु ब्रतु धरमु अमाया ॥
 लखन राम सिय पंथ कहानी । पूँछत सखाहिं कहत मृदु बानी ॥
 राम बास थल बिटप बिलोकें । उर अनुराग रहत नहि राकें ।
 देखि दसा सुर बरिसाहिं फूला । भइ मृदु महि मगु मंगल मूला ॥
 दो०— किएँ जाहिं छाया जलद सुखद बहइ बर बात ।

तस मगु भयउ न राम कहँ जस था भरतहि जात ॥ २१६ ॥

जइ चेतन मग जीव घनेरे । जे चितए प्रभु जिन्ह प्रभु हेरे ॥
 ते सब भए परम पद जोगू । भरत दरस मेटा भव रोगू ।

यह बड़ि बात भरत कइ नाहीं । सुमिरत जिनहि रामु मन माहीं ॥
 बारक राम कहत जग जेऊ । होत तरन तारन नर तेऊ ॥
 भरतु राम प्रिय पुनि लघु भ्राता । कस न होइ मगु मंगलदाता ॥
 सिद्ध साधु मुनिबर अस कहहीं । भरतहि निरखि हरषु हियँ लहहीं ॥
 देखि प्रभाउ सुरेसहि सोचू । जगु भल भलेहि पोच कहूँ पोचू ॥
 गुर सन कहेउ करिअ प्रभु सोई । रामहि भरतहि भेट न होई ॥
 दो०—रामु सँकोची प्रेम बस भरत सपेम पयोधि ।

बनी बात बेगरन चहति करिअ जतनु छलु सोधि ॥ २१७ ॥
 बचन सुनत सुरगुरु मुसुकाने । सहसनयन बिनु लोचन जाने ॥
 मायापति सेवक सन माया । करइ त उलटि परइ सुरराया ॥
 तब किछु कीन्ह राम रुख जानी । अब कुचालि करि होइहि हानी ॥
 सुनु सुरेस रघुनाथ सुभाऊ । निज अपराध रिसाहिं न काऊ ॥
 जो अपराधु भगत कर करई । राम रोष पावक सो जरई ॥
 लोकहुँ बेद बिदित इतिहासा । यह महिमा जानहिं दुरबासा ॥
 भरत सरिस को राम सनेहीं । जगु जप राम रामु जप जेही ॥
 दो०—मनहुँ न आनिअ अमरपति रघुबर भगत अकाजु ।

अजसु लोक परलोक दुख दिन दिन सोक समाजु ॥ २१८ ॥
 सुनु सुरेस उपदेसु हमारा । रामहि सेवकु परम पिआरा ॥
 मानत सुखु सेवक सेवकाई । सेवक बैर बैरु अधिकाई ॥
 जद्यपि सम नहिं राग न रोषू । गहहिं न पाप पूनु गुन दोषू ॥

करम प्रधान बिस्व करि राखा । जो जस करइ सो तस फलु चाखा ॥
तदपि करहिं सम बिषम बिहारा । भगत अभगत हृदय अनुसारा ॥
अगुन अलेप अमान एकरस । रामु सगुन भए भगत पेम बस ॥
राम सदा सेवक रुचि राखी । बेद पुरान साधु सूर साखी ॥
अस जियँ जानि तजहु कुटिलाई । करहु भरत पद प्रीति सुहाई ॥
दो०— राम भगत परहित निरत पर दुख दुखी दयाल ।

भगत सिरोमनि भरत तैं जनि छपहु सुरपाल ॥ २१९ ॥
सत्यसंध प्रभु सूर हितकारी । भरत राम आयस अनुसारी ॥
स्वारथ बिबस बिकल तुम्ह होहू । भरत दोसु नहिं राउर मोहू ॥
सुनि सुरबर सुरगुर बर बानी । भा प्रमोदु मन मिटी गलानी ॥
बरषि प्रसून हरषि सुरराऊ । लगे सराहन भरत सुभाऊ ।
एहि बिधि भरत चले मग जाहीं । दसा देखि मुनि सिद्ध सिहाहीं ॥
जबहिं रामु कहि लेहिं उसासा । उमगत पेमु मनहुँ चहु पासा ॥
द्रवहिं बचन सुनि कुलिस पषाना । पुरजन पेमु न जाइ बखाना ॥
बीच बास करि जमुनहि आए । निरखि नीरु लोचन जल छाए ॥
दो०— रघुबर बरन बिलोकि बर बारि समेत समाज ।

होत मगन बारिधि बिरह चढ़े बिबेक जह्वाज ॥ २२० ॥
जमुन तीर तेहि दिन करि बासू । भयउ समय सम सर्बाहि सुपासू ॥
रातिहिं घाट घाट की तरनी । आई अर्गनत जाहिं न बरनी ॥
प्रात पार भए एकहि खेवाँ । तोषे रामसखा की सेवाँ ॥

चले नहाइ नदिहि सिर नाई । साथ निपादनाथ दोउ भाई ॥
 आगे मुनिवर बाहन आछें । राजसमाज जाइ सबु पाछें ॥
 तेहि पाछें दोउ बंधु पयादें । भूषन बसन बेष सुठि सादें ॥
 सेवक सुहृद मचिवसुत साथी । सुमिरत लखनु सीय रघुनाथा ॥
 जहँ जहँ राम बास बिश्रामा । तहँ तहँ करहि सप्रेम प्रनामा ॥
 दो० — मगब्रामी नर नारि सुनि धाम काप तजि धाइ ।

देखि सरूप सनेह सब मुदित जनम फलु भाइ ॥ २२१ ॥
 कहहि सपेम एक एक पाहीं । राम लखनु सखि होहि कि नाहीं ॥
 बय बपु बरन रूपु सोइ आली । सीलु सनेहु सरिस सम चाली ॥
 बेष न सो सखि सीय न संगी । आगे अनी चली चतुरंगी ॥
 नहिं प्रसन्न मुख मानस खेदा । सखि संदेहु होइ एहिं भेदा ॥
 तामु तरक तियगन मन मानी । कहहिं सकल तेहि सम न सयानी ॥
 तेहि सराहि बानी फुरि पृजी । बोली मधुर बचन तिय दूजी ॥
 कहि सपेम सब कथाप्रसंगू । जेहि बिधि राम राज रस भंगू ।
 भरतहि बहुरि सराहन लागी । सील सनेह सुभाय सुभागी ॥
 दो० — चलत पयादें खात फल पिता दीन्ह तजि राजु ।

जात मनावन रघुबरहि भरत सरिस को आजु ॥ २२२ ॥
 भायप भगति भरत आचरनू । कहत सुनत दुख दूषन हरनू ॥
 जो किछु कहब थोर सखि सोई । राम बंधु अस काहे न होई ।
 हम सब सानुज भरतहि देखें । भइन्ह धन्य जुबती जन लेखें ॥

मृगन गुन देखि दसा पछिताहीं । कैकइ जननि जोगु सुतु नाहीं ।
कोउ कह दूषनु रनिहि नाहिन । बिधि सबु कीन्ह हमहि जो दाहिन ॥
कहँ हम लोक बेद बिधि हीनी लघु तिय कुल करतूति मलीनी ॥
बसहिं कुदेस कुगाँव कुबामा । कहँ यह दरसु पुन्य परिनामा ॥
अस अनंदु अचिरजु प्रति ग्रामा । जनु मरुभूमि कलपतरु जामा ॥
दो०— भरत दरसु देखत खुलेउ मग लोगन्ह कर भागु ।

जनु सिंधलबासिन्ह भयउ बिधि बस सुलभ प्रयागु ॥ २२३ ॥
निज गुन सहित राम गुन गाथा । सुनत जाहिं सुमिरत रघुनाथा ॥
तीरथ मुनि आश्रम सुरधामा । निरखि निमज्जहिं करहिं प्रनामा ॥
मनहीं मन मागहिं बरु एहू । सीय राम पद पदुम सनेहू ॥
मिलहिं किरात कोल बनबासी । बैखानस बटु जती उदासी ॥
करि प्रनाम पुँछहिं जेहि तेही । केहि बन लखनु रामु बैदेही ।
ते प्रभु समाचार सब कहहीं । भरतहि देखि जनम फलु लहहीं ॥
जे जन कहहिं कुसल हम देखे । ते प्रिय राम लखन सम लेखे ।
एहि बिधि बृजत सबहि सुबानी । सुनत राम बनबास कहानी ॥
दो०— तेहि ब्यसर बसि प्रातहीं चले सुमिरि रघुनाथ ।

राम दरस की लालसा भरत सरिस सब साथ ॥ २२४ ॥
मंगल सगुन होहिं सब काहू । फरकहिं सुखद बिलोचन बाहू ।
भरतहि सहित समाज उछाहू । मिलिहहिं रामु मिटिहि दुख दाहू ॥
करत मनोरथ जस जियँ जाके । जाहिं सनेह सुरौ सब छाके ।

सिथिल अंग पग मग डगि डोलहिं । बिहबल बचन पेम बस बोलहिं ॥
 रामसखाँ तेहि समय देखावा । सैल सिरोमनि सहज सुहावा ॥
 जासु समीप सरित पय तीरा । सीय समेत बसहिं दोउ बीरा ॥
 देखि करहिं सब दंड प्रनामा । कहि जय जानकि जीवन रामा ॥
 प्रेम मगन अस राज समाजू । जनु फिरि अवध चले रघुराजू ॥
 दो०— भरत प्रेमु तेहि समय जस तस कहि सकइ न सेषु ।

कबिहि अगम जिमि ब्रह्मसुख अह मम मलिन जनेषु ॥ २२५ ॥
 सकल सनेह सिथिल रघुबर केँ । गए कोस दड़ दिनकर ढरकेँ ॥
 जलु थलु देखि बसे निसि नीतें । कीन्ह गवन रघुनाथ पिरीतें ॥
 उहाँ रामु रजनी अवसेषा । जागे सीयँ सपन अस देखा ॥
 सहित समाज भरत जनु आए । नाथ बियोग ताप तन ताए ॥
 सकल मलिन मन दीन दुखारी । देखीं सासु आन अनुहारी ॥
 सुनि सिय सपन भरे जल लोचन । भए सोचबस सोच बिमोचन ॥
 लखन सपन यह नीक न होई । कठिन कुचाह सुनाइहि कोई ॥
 अस कहि बंधु समेत नहाने । पूजि पुरारि साधु सनमाने ॥
 छं०— सनमानि सुर मुनि बंदि बैठे उतर दिसि देखत भए ।

नभ धूरि खग मृग भूरि भागे बिकल प्रभु आश्रम गए ॥
 तुलसी उठे अवलोकि कारनु काह चित सचकित रहे ।
 सब सपाचार किरात कोलन्हि आइ तेहि अवसर कहे ॥
 सो०— सुनत सुमंगल बैन मन प्रमोद तन पुलक भर ।
 सरद सरोरुह नैन तुलसी भरे सनेह जल ॥ २२६ ॥

बहुरि सोचबस भे सियरवनू । कारन कवन भरत आगवनू ॥
 एक आइ अस कहा बहोरी । सेन संग चतुरंग न थोरी ॥
 सो सुनि रामहि भा अति सोचू । इत पितु बच इत बंधु सकोचू ॥
 भरत सुभाउ समुझि मन माहीं । प्रभु चित हित थिति पावत नाहीं ॥
 समाधान तब भा यह जाने । भरतु कहे महुँ साधु सयाने ॥
 लखन लखेउ प्रभु हृदयँ खभारू । कहत समय सम नीति बिचारू ॥
 बिनु पूछेँ कछु कहउँ गोसाईं । सेवकु समयँ न ढीठ ढिठाईं ॥
 तुम्ह सर्वस्य सिरोमनि स्वामी । आपनि समुझि कहउँ अनुगामी ॥
 दो०— नाथ सुहृद सुठि सरल चित सील सनेह निधान ।

सब पर प्रीति प्रतीति जियँ जानिअ आपु समान ॥ २२७ ॥
 बिषई जीव पाइ प्रभुताई । मूढ़ मोह बस होहिं जनाई ॥
 भरतु नीति रत साधु सुजाना । प्रभु पद प्रेमु सकल जगु जाना ॥
 तेऊ आजु राम पदु पाई । चले धरम मरजाद मेटाई ॥
 कुटिल कुबंशु कुअवसरु ताकी । जानि राम बनबास एकाकी ॥
 करि कुमंत्रु मन साजि समाजू । आए करै अकंटक राजू ॥
 कोटि प्रकार कलपि कुटिलाई । आए दल बटोरि दोउ भाई ॥
 जौं जियँ होति न कपट कुचाली । केहि सोहाति रथ बाजि गजाली ॥
 भरतहि दोसु देइ को जाएँ । जग बौराइ राज पदु पाएँ ॥
 दो०— ससि गुर तिय गामी नघुषु चढ़ेउ भूमिसुर जान ।

लोक बेद तेँ बिमुख भा अधम न बेन समान ॥ २२८ ॥

सहसबाहु सुरनाथु त्रिसंकू । केहि न राजमद दीन्ह कलंकू ॥
 भरत कीन्ह यह उचित उपाऊ । रिपु रिन रंच न राखब काऊ ॥
 एक कीन्ह नहिं भरत भलाई । निदरे रामु जानि असहाई ॥
 समुझि परिहि सोउ आजु विसेषी । समर सरोष राम मुखु पेखी ॥
 एतना कहत नीति रस भूला । रन रस बिटपु पुलक मिस फूला ॥
 प्रभु पद बंदि सीम रज राखी । बोलै सत्य सहज बलु भाषी ।
 अनुचित नाथ न मानब मोरा । भरत हमहि उपचार न थोरा ॥
 कहँ लागि सहिअ रहिअ मनु मारें । नाथ साथ धनु हाथ हमारें ॥
 दो०— छत्रि जाति रघुकुल जनमु राम अनुग जगु जान ।

लातहुँ मारें चढ़ति सिर नीच को धूरि समान ॥ २२९ ॥
 उठि कर जोरि रजायसु मागा । मनहुँ बीर रस सोवत जागा ॥
 बौध जटा सिर किसि काटि भाथा । साजि सरासनु सायकु हाथा ॥
 आजु राम सेवक जसु लेऊँ । भरतहि समर सिखावन देऊँ ॥
 राम निशदर कर फलु पाई । सोवहुँ समर सेज दोउ भाई ॥
 आइ बना भल सकल समाजू । प्रगट करउँ रिस पाछिल आजू ॥
 जिमि करि निकर दलइ मृगशजू । लेइ लपेटि लवा जिमि बाजू ॥
 तैसेहिं भरतहि सेन समेता । सानुज निदरि निपातउँ खेता ॥
 जौं सहाय कर संकरु आई । तौ मारउँ रन राम दोहाई ।
 दो०— अति सरोष भाखे लखनु लखि सुनि सपथ प्रवान ।

सभय लोक सब लोकपति चाहत भभरि भगान ॥ २३० ॥

जगु भय मगन गगन भइ बानी । लखन बाहुबलु बिपुल बखानी ॥
 तात प्रताप प्रभाउ तुम्हारा । को कहि सकइ को जाननिहाय ।
 अनुचित उचित काजु किछु होऊ समुझि करिअ भल कह सबु कोऊ ॥
 सहसा करि पाछें पछिताहीं । कहहिं बेद बुध ते बुध नाहीं ॥
 सुनि सुर बचन लखन सकुचाने । राम सीयँ सादर सनमाने ॥
 कही तात तुम्ह नीति सुहाई । सब तैं कठिन राजमदु भाई ॥
 जो अचबँत नृप मातहिं तेई नाहिन साधुसभा जेहिं सेई ॥
 सुनहु लखन भल भरत सरीसा । बिधि प्रपंच महँ सुना न दीसा ॥
 दो०— भरतहि होइ न राजमदु बिधि हरि हर पद पाइ ।

कबहुँ कि काँजी सीकरनि छीरसिंधु बिनसाइ ॥ २३१ ॥
 तिमिरु तरुन तरनिहिं मकु गिलई गगनु मगन मकु मेघहिं मिलई ॥
 गोपद जल बूझिं घटजोनी । सहज छमा बरु छाड़ै छोनी ॥
 मसक फूँक मकु मेरु उड़ाई । होइ न नृपमदु भरतहि भाई ॥
 लखन तुम्हार सपथ पितु आना । सुचि सुबंधु नहिं भरत समाना ॥
 सगुनु खीरु अवगुन जलु ताता । मिलइ रचइ परपंचु बिधाता ॥
 भरतु हंस रबिबंस तड़ागा । जनमि कीन्ह गुन दोष बिभागा ॥
 गहि गुन पय तजि अवगुन बारी । निज जस जगत कीन्ह उजिआरी ॥
 कहत भरत गुन सीलु सुभाऊ । पेम पयोधि मगन रघुराऊ ॥
 दो०— सुनि रघुबर बानी बिबुध देखि भरत पर हेतु ।

सकल सराहत राम सो प्रभु को कृपानिकेतु ॥ २३२ ॥

जौं न होत जग जनम भरत को । सकल धरम धुर धरनि धरत को ।
 कबि कुल अगम भरत गुन गाथा । को जानइ तुम्ह बिनु रघुनाथा ॥
 लखन राम सियँ सुनि सुर बानी । अति सुख लहेउ न जाइ बखानी ॥
 इहाँ भरतु सब सहित सहाए । मंदाकिनी पुनीत नहाए ॥
 सरित समीप राखि सब लोगा । मागि मातु गुर सचिव नियोगा ॥
 चले भरतु जहँ सिय रघुराई । साथ निषादनाथु लघु भाई ॥
 समुझि मातु करतब सकुचाहीं । करत कुतरक कोटि मन माहीं ॥
 रामु लखनु सिय सुनि मम नाऊँ । उठि जनि अनत जहिं तजि ठाऊँ ॥
 दो०— मातु मते महुँ मानि मोहि जो कछु करहिं सो थोर ।

अघ अवगुन छमि आदरहिं समुझि आपनी ओर ॥ २३३ ॥
 जौं परिहरहिं मलिन मन जानी । जौं सनमानहिं सेवकु मानी ॥
 मोरें सरन रामहि की पनही । राम सुस्वामि दोसु सब जनही ॥
 जग जस भाजन चातक मीना । नेम पेम निज निपुन नबीना ॥
 अस मन गुनत चले भग जाता । सकुच सनेहँ सिथिल सब गाता ॥
 फेरति मनहुँ मातु कृत खोरी । चलत भगति बल धोरज धोरी ॥
 जब समुझत रघुनाथ सुभाऊ । तब पथ परत उताइल पाऊ ॥
 भरत दसा तेहि अवसर कैसी । जल प्रवाहँ जल अलि गति जैसी ।
 देखि भरत कर सोचु सनेहु । भा निषाद तेहि समयँ बिदेहु ॥
 दो०— लगे होन मंगल सगुन सुनि गुनि कहत निषाद ।

मिटिहि सोचु होइहि हरषु पुनि परिनाम बिषादु ॥ २३४ ॥
 सेवक बचन सत्य सब जाने । आश्रम निकट जाइ निअराने ॥

भरत दोख बन सैल समाजू । मुदित धुधित जनु पाइ सुनाजू ॥
 ईति भीति जनु प्रजा दुखारी । त्रिविध ताप पीड़ित ग्रह मारी ॥
 जाइ सुराज सुदेस सुखारी होहिं भरत गति तेहि अनुहारी ॥
 राम बास बन संपति भ्राजा सुखी प्रजा जनु पाइ सुराजा ॥
 सचिव बिरागु बिबेकु नरेसू । बिपिन सुहावन पावन देसू ॥
 भट जम नियम सैल रजधानी । सांति सुमति सुचि सुंदर रानी ।
 सकल अंग संपन्न सुराऊ राम चरन आश्रित चित चाऊ ॥
 दो०— जीति मोह महिपालु दल सहित बिबेक भुआलु ।

करत अकंटक राजु पुरै सुख संपदा सुकालु ॥ २३५ ॥
 बन प्रदेस मुनि बास घनेरे । जनु पुर नगर गाउँ गन खेरे ।
 बिपुल बिचित्र बिहग मृग नाना । प्रजा समाजु न जाइ बखाना
 खगहा करि हरि बाघ बराहा । देखि महिष बृष साजु सराहा ॥
 बयरु बिहाइ चरहिं एक संगी । जहाँ तहाँ मनहुँ सेन चतुरंगा ॥
 झरना झरहिं मत्त गज गाजहिं । मनहुँ निसान बिबिधि बिधि बाजहिं
 चक चकोर चातक सुक पिक गन । कूजत मंजु मराल मुदित मन ॥
 अलिगन गावत नाचत मोरा । जनु सुराज मंगल चहु ओरा ॥
 बेलि ब्रिटप तृन सफल सफूला । सब समाजु मुद मंगल मूला ॥
 दो०— राम सैल सोधा निरखि भरत हृदयँ अति पेमु ।

तापस तप फलु पाइ जिमि सुखी स्थितनै नेमु ॥ २३६ ॥

मासपारायण, बीसवाँ विश्राम
 नवाह्नपारायण, पाँचवाँ विश्राम

तब केवट ऊँचें चढ़ि धाई । कहेउ भरत सन भुजा उठाई ॥
 नाथ देखिअहिं बिटप बिसाला । पाकरि जंबु रसाल तमाला ॥
 जिन्ह तरुबरन्ह मध्य बटु सोहा । मंजु बिसाल देखि मनु मोहा ॥
 नील सघन पल्लव फल लाला । अबिरल छाहँ सुखद सब काला ॥
 मानहुँ तिमिर अरुनमय रासी । बिरची बिधि सँकलि सुषमा सी ॥
 ए तरु सरित समीप गोसाँई । रघुबर परनकुटी जहँ छाई ॥
 तुलसी तरुबर बिबिध सुहाए । कहँ कहँ सियँ कहँ लखन लगाए ॥
 बट छायाँ बेदिका बनाई । सियँ निज पानि सरोज सुहाई ॥
 दो०— जहाँ बैठि मुनिगन सहित नित सिय राम सुजान ।

सुनहिं कथा इतिहास सब आगम निगम पुरान ॥ २३७ ॥
 सखा बचन सुनि बिटप निहारी । उमगे भरत बिलोचन बारी ।
 करत प्रनाम चले दोउ भाई । कहत प्रीति सारद सकुचाई ॥
 हरषहिं निरखि राम पद अंका । मानहुँ पारसु पायउ रंका ॥
 रज सिर धरि हियँ नयनन्ह लावहिं । रघुबर मिलन सरिस सुख पावहिं ।
 देखि भरत गति अकथ अतीवा । प्रेम मगन मृग खग जड़ जीवा ॥
 सखहि सनेह बिबस मग भूला । कहि सुपंथ सुर बरषहिं फूला ॥
 निरखि सिद्ध साधक अनुरागे । सहज सनेहु सराहन लागे ॥
 होत न भूतल भाउ भरत को । अचर सचर चर अचर करत को ॥
 दो०— पेम अमिअ मंदरु बिरहु भरतु पयोधि गँभीर ।

मथि प्रगटेउ सुर साथु हित कृपासिंधु रघुबीर ॥ २३८ ॥

सखा समेत मनोहर जोटा । लखेउन लखन सघन बन ओटा ॥
 भरत दीख प्रभु आश्रमु पावन । सकल सुमंगल सदन सुहावन ॥
 करत प्रबेस मिटे दुख दावा । जनु जोगीं परमारथु पावा ॥
 देखे भरत लखन प्रभु आगे । पूँछे बचन कहत अनुरागे ॥
 सीस जटा कटि मुनि पट बाँधें । तून कसैं कर सरु धनु काँधें ॥
 बेदी पर मुनि साधु समाजू । सीय सहित राजत रघुराजू ॥
 बलकल बसन जटिल तनु स्यामा । जनु मुनिबेष कीन्ह रति कामा ॥
 कर कमलनि धनु सायकु फेरत । जिय की जरनि हरत हौंस हेरत ॥
 दो०— लसत मंजु मुनि मंडलीं मध्य सीय रघुचंदु ।

ग्यान सभाँ जनु तनु धरें भगति सच्चिदानंदु ॥ २३९ ॥
 सानुज सखा समेत मगन मन । बिसरे हरष सोक सुख दुख गन ॥
 पाहि नाथ कहि पाहि गोसाईं । भूतल परे लकुट की नाई ॥
 बचन सपेम लखन पहिचाने । करत प्रनाम भरत जियँ जाने ॥
 बंधु सनेह सरस एहि ओरा । उत साहिब सेवा बस जोरा ॥
 मिलि न जाइ नहिं गुदरत बनई सुकबि लखन मन की गति भनई ॥
 रहे राखि सेवा पर भारू । चढ़ी चंग जनु खँच खेलारू ॥
 कहत सप्रेम नाइ महि माथा । भरत प्रनाम करत रघुनाथा ॥
 उठे रामु सुनि पैम अधीरा । कहूँ पट कहूँ निर्घंग धनु तीरा ॥
 दो०— बरबस लिए उठाइ उर लाए कृपानिधान ।

भरत राम की मिलनि लखि बिसरे सबहि अपान ॥ २४० ॥

मिलनि प्रीति किमि जाइ बखानी । कबिकुल अगम करम मन बानी ॥
 परम पेम पूरन दोउ भाई । मन बुधि चित अहमिति बिसराई ॥
 कहहु सुपेम प्रगट को करई । केहि छाया कबि मति अनुसरई ॥
 कबिहि अरथ आखर बलु साँचा । अनुहरि ताल गतिहि नटु नाचा ॥
 अगम सनेह भरत रघुबर को । जहँ न जाइ मनु बिधि हरि हर को ॥
 सो मैं कुमति कहौं केहि भाँती । बाज सुराग कि गाँडर ताँती ॥
 मिलनि बिलोक भरत रघुबर की । सुरागन सभय धकधकी धरकी ॥
 समुझाए सुरगुरु जड़ जागे । बरषि प्रसून प्रसंसन लागे ॥
 दो०— मिलि सपेम रिपुसूदनहि केवटु भेंटउ राम ।

भूरि भायँ भेंट भरत लछिमन करत प्रनाम ॥ २४१ ॥
 भेंटउ लखन ललकि लघु भाई । बहुरि निषादु लीन्ह उर लाई ॥
 पुनि मुनिगन दुहुँ भाइन्ह बंदे । अभमत आसिष पाइ अनंदे ॥
 सानुज भरत उमगि अनुरागा । धरि सिर सिय पद पदुम परागा ॥
 पुनि पुनि करत प्रनाम उठाए । सिर कर कमल परसि बैठाए ॥
 सीयँ असीस दीन्ह मन माहीं । मगन सनेहँ देह सुधि नाहीं ॥
 सब बिधि सानुकूल लखि सीता । भे निसोच उर अपडर बीता ॥
 कोउ किछु कहइ न कोउ किछु पूँछा । प्रेम भरा मन निज गति छूँछा ॥
 तेहि अवसर केवटु धीरजु धरि । जोरि पानि बिनवत प्रनामु करि ॥
 दो०— नाथ साथ मुनिनाथ के मातु सकल पुर लोग ।

सेवक सेनप सचिव सब आए बिकल बियोग ॥ २४२ ॥

सीलसिंधु सुनि गुर आगवनू । सिय समीप राखे रिपुदवनू ॥
चले सबेग रामु तेहि काला । धीर धरम धुर दीनदयाला ॥
गुराह देखि सानुज अनुरागे । दंड प्रनाम करन प्रभु लागे ॥
मुनिबर धाइ लिए उर लाई । प्रेम उमगि भेंटे दोउ भाई ॥
प्रेम पुलकि केवट कहि नामू । कीन्ह दूरि तें दंड प्रनामू ॥
रामसखा रिषि बरबस भेंटा । जनु माहि लुठत सनेह समेटा ॥
रघुपति भगति सुमंगल मूला । नभ सराहि सुर बरिसहिं फूला ॥
एहि सम निपट नीच कोउ नाहीं । बड़ बसिष्ठ सम को जग माहीं ॥
दो०— जेहि लखि लखनहु तें अधिक मिले मुदित मुनिराउ ।

सो सीतापति भजन को प्रगट प्रताप प्रभाउ ॥ २४३ ॥
आरत लोग राम सबु जाना । करुनाकर सुजान भगवाना ॥
जो जेहि भायँ रहा आभलाषी । तेहि तेहि कैतस तसि रुख रखी ॥
सानुज मिलि पल महँ सब काहू । कीन्ह दूरि दुखु दारुन दाहू ॥
यह बड़ि बात राम कै नाहीं । जिमि घट कोटि एक रबि छाहीं ॥
मिलि केवटाहि उमगि अनुरागा । पुरजन सकल सराहिं भगा ॥
देखीं राम दुखित महतारीं । जनु सुबेलि अवलीं हिम मारीं ॥
प्रथम राम भेंटी कैकेई । सरल सुभायँ भगति मति भेई ॥
पग परि कीन्ह प्रबोधु बहोरी । काल करम बिधि सिर धरि खोरी ॥
दो०— भेटीं रघुबर मातु सब करि प्रबोधु परितोषु ।

अंब ईस आधीन जगु काहु न देइअ दोषु ॥ २४४ ॥

गुरतिय पद बंदे दुहु भाई । सहित बिप्रतिय जे सँग आई ।
 गंग गौरि सम सब सनमानों । देहिं असीस मुदित मृदु बानीं ।
 गहि पद लगे सुमित्रा अंका । जनु भेंटी संपति अति रंका ॥
 पुनि जननी चरननि दोउ भ्राता । परे पेम ब्याकुल सब गाता ॥
 अति अनुराग अंब उर लाए । नयन सनेह सलिल अन्हवाए ॥
 तेहि अवसर कर हरष बिषादू । किमि कबि कहै मूक जिमि स्वादू ॥
 मिलि जननिहि सानुज रघुराऊ । गुर सन कहेउ कि धारिअ पाऊ ॥
 पुरजन षाड़ मुनीस नियोगू । जल थल तकि तकि उतरेउ लोगू ॥
 दो०— महिसुर मंत्री प्रातु गुर गने लोग लिए साथ ।

पावन आश्रम गवनु किय भरत लखन रघुनाथ ॥ २४५ ॥
 सीय आइ मुनिबर पग लागी । उचित असीस लही मन मागी ॥
 गुरपतिनिहि मुनितियन्ह समेता । मिली पेमु कहि जाइ न जेता ॥
 बंदि बंदि पग सिय सबही के । आसिरबचन लहे प्रिय जी के ।
 सासु सकल जब सीयै निहारीं । मूदे नयन सहमि सुकुमारीं ॥
 परीं बधिक बस मनहुँ मरालीं । काह कीन्ह करतार कुचालीं ॥
 तिन्ह सिय निरखि निपट दुखु पावा । सो सबु सहिअ जो दैउ सहावा ॥
 जनकसुता तब उर धरि धीरा । नील नलिन लोयन भरि नीरा ॥
 मिली सकल सासुन्ह सिय जाई । तेहि अवसर करुना महि छाई ॥
 दो०— लागि लागि पग सबनि सिय भेंटति अति अनुराग ।

हृदयँ असीसहिं पेम बस रहिअहु भरी सोहाग ॥ २४६ ॥

बिकल सनेहँ सीय सब रानी । बैठन सबहि कहेउ गुर ग्यानी ।
 कहि जग गति मायिक मुनिनाथ । कहे कछुक परमारथ गाथा ॥
 नृप कर सुरपुर गवनु सुनावा । सुनि रघुनाथ दुसह दुखु पावा ।
 मरन हेतु निज नेहु बिचारी । भे अति बिकल धीर धुर धारी ।
 कुलिस कठोर सुनत कटु बानी । बिलपत लखन सीय सब रानी ॥
 सोक बिकल अति सकल समाज मानहुँ राजु अकाजेउ आजू ॥
 मुनिबर बहुरि राम समुझाए । सहित समाज सुसरित नहाए ।
 ब्रत निरंबु तेहि दिन प्रभु कीन्हा । मुनिहु कहै जलु काहुँ न लीन्हा ॥
 दो० थोरु भएँ रघुनंदनहि जो मुनि आयसु दीन्ह ।

श्रद्धा भगति समेत प्रभु सो सबु सादरु कीन्ह ॥ २४७ ॥
 करि पितु क्रिया बेद जसि बरनी , भे पुनीत पातक तम तरनी ॥
 जासु नाम पावक अघ तूला । सुमिरत सकल सुमंगल मूला ॥
 सुद्ध सो भयउ साधु संमत अस । तीरथ आवाहन सुरसरि जस ॥
 सुद्ध भएँ दुइ बासर बीते । बोले गुर सन राम पिरीते ॥
 नाथ लोग सब निपट दुखारी । कंद मूल फल अंबु अहारी ॥
 सानुज भरतु सचिव सब माता । देखि मोहि पल जिमि जुग जाता ॥
 सब समेत पुर धारिअ पाऊ । आपु इहाँ अमरावति राऊ ॥
 बहुत कहेउँ सब कियउँ द्विठाई । उचित होइ तस करिअ गोसाँई ।
 दो०— धर्म सेतु करुनायतन कस न कहहु अस राम ।

लोग दुखित दिन दुइ दरस देखि लहहुँ बिश्राम ॥ २४८ ॥

राम बचन सुनि सभय समाजू । अनु जलनिधि महुँ बिकल जहाजू ॥
 सुनि गुर गिरा सुमंगल मृला । भयउ मनहुँ मारुत अनुकूला ॥
 पावन पयँ तिहुँ काल नहाहीं । जो बिलोकि अघ ओघ नसाहीं ॥
 मंगलमूरति लोचन भरि भरि । निरखहिं हरषि दंडवत करि करि ॥
 राम सैल बन देखन जाहीं । जहँ सुख सकल सकल दुख नाहीं ।
 झरना झरहिं सुधासम बारी । त्रिबिध तापहर त्रिबिध बयारी ॥
 बिटप बेलि तृन अगनित जाती । फल प्रसून पल्लव बहु भाँती ।
 सुंदर सिला सुखद तरु छाहीं । जाइ बरनि बन छबि केहि पाहीं ।
 दो० सरनि सरोरुह जल बिहग कूजत गुंजत भृंग ।

बैर बिगत बिहरत बिपिन पृग बिहंग बहुरंग ॥ २४९ ॥
 कोल किरात भिल्ल बनबासी । मधु सुचि सुंदर स्वादु सुधा सी ॥
 भरि भरि परन पुटीं रचि रूरी । कंद मूल फल अंकुर जूरी ॥
 सबहि देहिं करि बिनय प्रनामा । कहि कहि स्वाद भेद गुन नामा ।
 देहिं लोग बहु मोल न लेहीं । फेरत राम दोहाई देहीं ।
 कहहिं सनेह मगन मृदु बानी । मानत साधु पेम पहिचानी ॥
 तुम्ह सुकृती हम नीच निषादा । पावा दरसनु राम प्रसादा ॥
 हमहि अगम अति दरसु तुम्हारा । जस मरु धरनि देवधुनि धारा ॥
 राम कृपाल निषाद नैवाजा । परिजन प्रजउ चहिअ जस राजा ॥
 दो० — यह जियँ जानि सँकोचु तजि करिअ छोहु लखि नेहु ।

हमहि कृतार्थ करन लागि फल तृन अंकुर लेहु ॥ २५० ॥

तुम्ह प्रिय पाहुने बन पगु धारे । सेवा जोगु न भाग हमारे ॥
 देब काह हम तुम्हहि गोसाँई । ईधनु पात किरात मिताई ॥
 यह हमारि अति बड़ि सेवकाई । लेहिं न बासन बसन चोराई ॥
 हम जड़ जीव जीव गन घाती । कुटिल कुचाली कुमति कुजाती ॥
 पाप करत निसि बासर जाहीं । नहिं पट कटि नहिं पेट अघाहीं ॥
 सपनेहुँ धरमबुद्धि कस काऊ । यह रघुनंदन दरस प्रभाऊ ॥
 जब तैं प्रभु पद पदुम निहारे । मिटे दुसह दुख दोष हमारे ॥
 बचन सुनत पुरजन अनुरागे । तिन्ह के भाग सराहन लागे ॥
 छं०— लागे सराहन भाग सब अनुराग बचन सुनावहीं ।

बोलनि मिलनि सिय राम चरन सनेहु लखि सुखु पावहीं ॥
 नर नारि निदरहिं नेहु निज सुनि कोल भिल्लनि की गिरा ।
 तुलसी कृपा रघुबंसमनि की लोह लै लौका तिरा ॥

सो०— बिहरहि बन चहु ओर प्रतिदिन प्रमुदित लोग सब ।

जल ज्यों दादुर भोर भए पीन पावस प्रथम ॥ २५१ ॥
 पुर जन नारि मगन अति प्रीती । बासर जाहिं पलक सम बीती ॥
 सीय सासु प्रति बेष बनाई । सादर करइ सरिस सेवकाई ।
 लखा न मरमु राम बिनु काहूँ । माया सब सिय माया माहूँ ॥
 सीयँ सासु सेवा बस कीन्हीं । तिन्हलहि सुख सिख आसिष दीन्हीं ॥
 लखि सिय सहित सरल दोउ भाई । कुटिल रानि पछितानि अघाई ॥
 अवनि जमहि जाचति कैकेई । महि न बीचु बिधि मीचु न देई ॥

लोकहुँ बेद बिदित कबि कहहीं । राम बिमुख थलु नरक न लहहीं ॥
 यहु संसउ सब के मन माहीं । राम गवनु बिधि अवध कि नाहीं ॥
 दो०— निमि न नीद नहिं भूख दिन भरतु बिकल सुचि सोच ।

नीच कीच बिच मगन जस पीनहि सलिल सँकोच ॥ २५२ ॥
 कीन्हि मातु मिस काल कुचाली । ईति भीति जस पाकत साली ॥
 केहि बिधि होइ राम अभिषेकू । मोहि अवकलत उपाउ न एकू ॥
 अवसि फिरहिं गुर आयसु मानी । मुनि पुनि कहब राम रुचि जानी ।
 मातु कहेहुँ बहुरहिं रघुराऊ । राम जननि हठ करबि कि काऊ ।
 मोहि अनुचर कर केतिक बाता । तेहि महुँ कुसमउ बाम बिधाता ।
 जौं हठ करउँ त निपट कुकरमू । हरगिरि तेँ गुरु सेवक धरमू ॥
 एकउ जुगुति न मन ठहरानी । सोचत भरतहि रैन बिहानी ।
 प्रात नहाइ प्रभुहि सिर नाई । बैठत पठए रिषयँ बोलाई ॥
 दो०— गुर पद कमल प्रनामू करि बैठे आयसु पाइ ।

बिप्र महाजन सचिव सब जुरे सभासद आइ ॥ २५३ ॥
 बोले मुनिबरु समय समाना । सुनहु सभासद भरत सुजाना ॥
 धरम धुरीन भानुकुल भानू । राजा रामु स्वबस भगवानू ।
 सत्यसंध पालक श्रुति सेतू । राम जनमु जग मंगल हेतू ॥
 गुर पितु मातु बचन अनुसारी । खल दलु दलन देव हितकारी ।
 नीति प्रीति परमारथ स्वारथु । कोउ न राम सम जान जथारथु ।
 बिधि हरि हरु सासि रबि दिम्पिता । माया जीव करम कुलि काला ॥

अहिष महिष जहँ लगि प्रभुताई । जोग सिद्धि निगमागम गाई ॥
करि बिचार जियँ देखहु नीकें राम रजाइ सीस सब ही कें ॥
दो०— राखें राम रजाइ रुख हम सब कर हित होइ ।

समुझि सयाने करहु अब सब मिलि संमत सोइ ॥ २५४ ॥
सब कहूँ सुखद राम अभिषेकू मंगल मोद मूल मग एकू ।
केहि बिधि अवध चलहिं रघुराऊ । कहहु समुझि सोइ करिअ उपाऊ ॥
सब सादर सुनि मुनिबर बानी । नय परमारथ स्वारथ सानी ॥
उतरु न आव लोग भए भोरे । तब सिरु नाइ भरत कर जोरे ॥
भानुबंस भए भूप घनेरे । अधिक एक तें एक बड़ेरे ॥
जनम हेतु सब कहँ पितृ माता । करम सुभासुभ देइ बिधाता ॥
दलि दुख सजइ सकल कल्याना । अस असीस राउरि जगु जाना ॥
सो गोसाईं बिधि गति जेहिं छेकी । सकइ को टारि टेक जो टेकी ॥
दो०— बूझिअ मोहि उपाउ अब सो सब मोर अभागु ।

सुनि सनेहमय बचन गुर उर उपगु अनुरागु ॥ २५५ ॥
तात बात फुरि राम कृपाहीं । राम बिमुख सिधि सपनेहुँ नाहीं ॥
सकुचउँ तात कहत एक बाता । अरध तजहिं बुध सरबस जाता ॥
तुम्ह कानन गवनहु दोउ भाई । फेरिअहिं लखन सीय रघुराई ॥
सुनि सुबचन हरषे दोउ भ्राता । भे प्रमोद परिपूरन गाता ॥
मन प्रसन्न तन तेजु बिराजा । जनु जिय राउ रामु भए राजा ॥
बहुत लाभ लोगन्ह लघु हानी । सम दुख सुख सब रोवहिं रानी ॥

कहहिं भरतु मुनि कहा सो कीन्हे । फलु जग जीवन्ह अभिमत दीन्हे ॥
 कानन करउँ जनम भरि बासू । एहि तैं अधिक न मोर सुपासू ॥
 दो०— अंतरजामी रामु सिय तुम्ह सरबग्य सुजान ।

जौं फुर कहहु त नाथ निज कीजिअ बचनु प्रमान ॥ २५६ ॥
 भरत बचन सुनि देखि सनेहू । सभा सहित मुनि भए बिदेहू ॥
 भरत महा महिमा जलरासी । मुनि मति ठाढ़ि तीर अबला सी ॥
 गा चह पार जतनु हियँ हेरा । पावति नाव न बोहितु बेरा ॥
 औरु करिहि को भरत बड़ाई । सरसी सीपि कि सिधु समाई ॥
 भरतु मुनिहि मन भीतर भाए । सहित समाज राम पहिं आए ।
 प्रभु प्रनामु करि दीन्ह सुआसनु । बैठे सब सुनि मुनि अनुसासनु ॥
 बोले मुनिवरु बचन बिचारी । देस काल अवसर अनुहारी ॥
 सुनहु राम सरबग्य सुजाना । धरम नीति गुन ग्यान निधाना ॥
 दो०— सब के उर अंतर बसहु जानहु भाउ कुभाउ ।

पुरजन जननी भरत हित होइ सो कहिअ उपाउ ॥ २५७ ॥
 आरत कहहिं बिचारि न काऊ । सूझ जुआरिहि आपन दाऊ ॥
 सुनि मुनि बचन कहत रघुराऊ । नाथ तुम्हारेहि हाथ उपाऊ ॥
 सब कर हित रुख राउरि राखें । आयसु किएँ मुदित फुर भाषें ॥
 प्रथम जो आयसु मो कहूँ होई । माथें मानि करौं सिख सोई ॥
 पुनि जेहि कहँ जस कहब गोसाई । सो सब भाँति घटिहि सेवकाई ।
 कह मुनि राम सत्य तुम्ह भाषा । भरत सनेहँ बिचारु न राखा ॥

तेहि तैं कहउँ बहोरि बहोरी । भरत भगति बस भइ मति मोरी ॥
मोरैं जान भरत रुचि राखी । जो कीजिअ सो सुभ सिव साखी ॥
दो०— भरत बिनय सादर सुनिअ करिअ बिचारु बहोरि ।

करब साधुमत लोकमत नृपनय निगम निचोरि ॥ २५८ ॥
गुर अनुरागु भरत पर देखी । राम हृदयँ आनंदु बिसेषी ।
भरतहि धरम धुरंधर जानी । निज सेवक तन मानस बानी ।
बोले गुर आयस अनुकूला । बचन मंजु मृदु मंगल मूला ॥
नाथ सपथ पितु चरन दोहाई । भयउ न भुअन भरत सम भाई ।
जे गुर पद अंबुज अनुरागी । ते लोकहुँ बेदहुँ बड़भागी ।
राउर जा पर अस अनुरागू । को कहि सकइ भरत कर भागू ।
लखि लघु बंधु बुद्धि सकुचाई । करत बदन पर भरत बड़ाई ॥
भरतु कहहिं सोइ किऐं भलाई । अस कहि राम रहे अरगाई ॥
दो०— तब मुनि बोले भरत सन सब सँकोचु तजि तात ।

कृपासिधु प्रिय बंधु सन कहहु हृदय कै बात ॥ २५९ ॥
सुनि मुनि बचन राम रुख पाई । गुरु साहिब अनुकूल अघाई ।
लखि अपने सिर सनु छरु भारू । कहि न सकहिं कछु करहिं बिचारू ।
पुलकि सरीर सभाँ भए ठाढ़े । नीरज नयन नेह जल बाढ़े ॥
कहब मोर मुनिनाथ निबाहा । एहि तैं अधिक कहौं मैं काहा ॥
मैं जानउँ निज नाथ सुभाऊ । अपराधिहु पर कोह न काऊ ॥
मो पर कृपा सनेह बिसेषी । खेलत खुनिस न कबहूँ देखी ॥

सिसुपन तेँ परिहरेउँ न संगू । कबहुँ न कीन्ह मोर मन भंगू ॥
 मैं प्रभु कृपा रीति जियँ जोही । हारेहुँ खेल जितावहिं मोही ॥
 दो०— महुँ सनेह सकोच बस सनमुख कही न बैन ।

दरसन तृपित न आजु लागि पेम पिआसे नैन ॥ २६० ॥
 बिधि न सकेउ सहि मोर दुलारा । नीच बीचु जननी मिस पारा ॥
 यहउ कहत मोहि आजु न सोभा । अपनी समुझि साधु सुचि को भा ॥
 मातु मंदि मैं साधु सुचाली । उर अस आनत कोटि कुचाली ॥
 फरइ कि कोदव बालि सुसाली । मुक्ता प्रसव कि संब्रुक काली ॥
 सपनेहुँ दोसक लेसु न काहू । मोर अभाग उदधि अवगाहू ॥
 बिनु समुझै निज अघ परिपाकू । जारिउँ जायँ जर्नानि कहि काकू ॥
 हृदयँ हेरि हारेउँ सब ओरा । एकहि भौँत भलोहिं भल मोरा ॥
 गुर गोसाईँ साहिब सिय रामू । लागत मोहि नीक परिनामू ॥
 दो०— साधु सभाँ गुर प्रभु निकट कहउँ सुथल सतिभाउ ।

प्रेम प्रपंचु कि झूठ फुर जानहिं मुनि रघुराउ ॥ २६१ ॥
 भूपति मरन पेम पनु राखी । जननी कुमति जगतु सबु साखी ॥
 देखि न जाहिं बिकल महतारीं । जरहिं दुसह जर पुर नर नारीं ॥
 महीं सकल अनरथ कर मूला । सो सुनि समुझि सहिउँ सब सुला ॥
 सुनि बन गवनु कीन्ह रघुनाथा । करि मुनि बेष लखन सिय साथा ॥
 बिनु पानहिन्ह पयादेहि पाएँ । संकरु साखि रहेउँ एहि घाएँ ॥
 बहुरि निहारि निषाद सनेहू । कुलिस कठिन उर भयउ न बेहू ॥

अब सबु आँखिन्ह देखेउँ आई । जिअत जीव जड़ सबइ सहाई ॥
जिन्हहि निराख भग साँपनि बीछी । तजहिं बिषम बिषु तामस तीछी ॥
दो०— तेइ रघुनंदनु लखनु सिय अनहित लागे जाहि ।

तामु तनय तजि दुसह दुख दैउ सहावड़ काहि ॥ २६२ ॥
सुनि अति बिकल भरत बर बानी । आरति प्रीति बिनय नय सानी ॥
सोक मगन सब सभाँ खभारू । मनहुँ कमल बन परेउ तुसारू ॥
कहि अनेक बिधि कथा पुरानी । भरत प्रबोधु कीन्ह मुनि ग्यानी ॥
बोले उचित बचन रघुनंदू । दिनकर कुल कैरव बन चंदू ॥
तात जायँ जियँ करहु गलानी । ईस अधीन जीव गति जानी ॥
तीनि काल तिभुअन मत मोरें । पुन्यसिलोक तात तर तोरें ॥
उर आनत तुम्ह पर कुटिलाई । जाइ लौक परलोक नसाई ॥
दोसु देहिं जननिहि जड़ तेई । जिन्ह गुर साधु सभा नहिं सेई ॥
दो०— मिटिहहि पाप प्रपंच सब अखिल अमंगल भार ।

लोक सुजसु परलोक सुखु सुमिरत नामु तुम्हार ॥ २६३ ॥
कहउँ सुभाउ सत्य सिव साखी । भरत भूमि रह राउरि राखी ॥
तात कुतरक करहु जनि जाएँ । बैर पेम नहिं दुरइ दुराएँ ॥
मुनिगन निकट बिहग मृग जाहीं । बाधक बधिक बिलोकि पराहीं ॥
हित अनहित पसु पच्छिउ जाना । मानुष तनु गुन ग्यान निधाना ॥
तात तुम्हहि मैं जानउँ नीकें । करौं काह असमंजस जीकें ॥
राखेउ रायँ सत्य मोहि त्यागी । तनु परिहरेउ पेम पन लागी ॥

तासु बचन मेढत मन सोचू । तेहि तें अधिक तुम्हार सँकोचू ॥
 ता पर गुर मोहि आयसु दीन्हा । अर्वासि जो कहहु चहउँ सोइ कीन्हा ॥
 दो०— मनु प्रसन्न करि सकुच तजि कहहु करौं सोइ आजु ।

मत्त्यसंध रघुबर बचन सुनि भा सुखी समाजु ॥ २६४ ॥
 सुर गन सहित सभय सुरराजू । सोचहिं चाहत होन अकाजू ॥
 बनत उपाउ करत कह्यु नाहीं । राम सरन सब गे मन माहीं ॥
 बहुरि बिचारि परस्पर कहहीं । स्पर्पत भगत भगति बस अहहीं ॥
 सुधि करि अंबरीष दुरबासा । भे सुर सुरपति निपट निरासा ॥
 सहे सुरन्ह बहु काल बिषादा । नरहरि किए प्रगट प्रह्लादा ।
 लगि लगि कान कहहिं धुनि माथा । अब सुर काज भरत के हाथा ।
 आन उपाउ न देखिअ देवा । मानत रामु सुसेवक सेवा ॥
 हियँ सपेम मुमिरहु सब भरतहि । निज गुन सील राम बस करतहि ॥
 दो०— सुनि सुर मत सुरगुर कहेउ भल तुम्हार बड़ भागु ।

सकल सुमंगल मूल जग भरत चरन अनुरागु ॥ २६५ ॥
 सीतापति सेवक सेवकाई । कामधेनु सय सरिस सुहाई ॥
 भरत भगति तुम्हरेँ मन आई । तजहु सोचु बिधि बात बनाई ॥
 देखु देवपति भरत प्रभाऊ । सहज सुभायँ बिबस रघुराऊ ॥
 मन थिर करहु देव डरु नाहीं । भरतहि जानि राम परिछाहीं ॥
 सुनि सुरगुर सुर संमत सोचू । अंतरजामी प्रभुहि सकोचू ॥
 निज सिर भारु भरत जियँ जाना । करत कोटि बिधि उर अनुमाना ॥

करि बिचारु मन दोन्ही ठीका । राम रजायस आपन नीका ॥
निज पन तजि राखेउ पनु मोरा । छोहु सनेहु कीन्ह नहिं थोरा ॥
दो० — कीन्ह अनुग्रह अमित अति सब बिधि सीतानाथ ।

करि प्रनामु छोले भरतु जोरि जलज जुग हाथ ॥ २६५ ॥
कहाँ कहावौं का अब स्वामी । कृपा अंबुनिधि अंतरजामी ॥
गुर प्रसन्न साहिब अनुकूला । मिटी मलिन मन कलपित सूला ॥
अपडर डरेउँ न सोच समूलें । रबिह न दोसु देव दिसि भूलें ॥
मोर अभागु मातु कुटिलाई । बिधि गति बिषम काल कठिनाई ॥
पाउ रोपि सब मिलि मोहि घाला । प्रनतपाल पन आपन पाला ॥
यह नइ रीति न राउरि होई । लोकहुँ बेद बिदित नहिं गोई ॥
जगु अनभल भल एकु गोसाई । कहिअ होइ भल कासु भलाई ॥
देउ देवतरु सरिस सुभाऊ । सनमुख बिमुख न काहुहि काऊ ॥
दो० — जाइ निकट पहिचानि तरु छाहँ समनि सब सोच ।

मागत अभिमत पाव जग राउ रंकु भल पोच ॥ २६७ ॥
लखि सब बिधि गुर स्वामि सनेहू । मिटेउ छोभु नहिं मन संदेहू ।
अब करुनाकर कीजिअ सोई । जन हित प्रभु चित छोभु न होई ॥
जो सेवकु साहिबहि सँकोची । निज हित चहइ तामु मति पोची ॥
सेवक हित साहिब सेवकाई । करै सकल सुख लोभ बिहाई ॥
स्वारथु नाथ फिरें सबही का । किएँ रजाइ कोटि बिधि नीका ॥
यह स्वारथ परमारथ सारू । सकल सुकृत फल सुगति सिंगारू

देव एक बिनती सुनि मोरी । उचित होइ तस करब बहोरी ।
तिलक समाजु साजि सबु आना । करिअ सुफल प्रभु जौ मनु माना ।
दो०—सानुज पठइअ मोहि बन कीजिअ सबहि सनाथ ।

नतरु फेरिअहि बंधु दोउ नाथ चलीं मैं साथ ॥ २६८ ॥
नतरु जाहिं बन तीनिउ भाई । बहुरिअ सीय सहित रघुराई ॥
जेहि बिधि प्रभु प्रसन्न मन होई । करुना सागर कीजिअ सोई ॥
देव दीन्ह सबु मोहि अभाऊ । मोरें नीति न धरम बिचारू ।
कहउँ बचन सब स्वारथ हेतू । रहत न आरत कै चित चेतू ॥
उतरु देइ सुनि स्वामि रजाई । सो सेवकु लखि लाज लजाई ॥
अस मैं अवगुन उदधि अगाधू । स्वामि सनेहँ सराहत साधू ॥
अब कृपाल मोहि सो मत भावा । सकुच स्वामि मन जाई न पावा ॥
प्रभु पद सपथ कहउँ सति भाऊ । जग मंगल हित एक उपाऊ ॥
दो०— प्रभु प्रसन्न मन सकुच तजि जो जेहि आयसु देव ।

सो सिर धरि धरि करिहि सबु मिटिहि अनट अवरोध ॥ २६९ ॥
भरत बचन सुचि सुनि सुर हरषे । साधु सराहि सुमन सुर बरषे ॥
असमंजस बस अवध नेवासी । प्रमुदित मन तापस बनबासी ॥
चुपहिं रहे रघुनाथ सँकोची । प्रभु गति देखि सभा सब सोची ॥
जनक दूत तेहि अवसर आए । मुनि बसिष्ठ सुनि बेगि बोलाए ।
करि प्रनाम तिन्ह रामु निहारे । बेषु देखि भए निपट दुखारे ॥
दूतन्ह मुनिबर बूझी बाता । कहहु बिदेह भूप कुसलाता ।

सुनि सकुचाइ नाइ महि माथा । बोले चरबर जोरें हाथा ॥
 बूझब राउर सादर साई । कुसल हेतु सो भयउ गोसाई ।
 दो०— नाहिं त कोसलनाथ के साथ कुसल गइ नाथ ।

मिथिला अवध बिसेष तैं जगु सब भयउ अनाथ ॥ २७० ॥
 कोसलपति गति सुनि जनकौरा । भे सब लोक सोकबस बौरा ॥
 जेहिं देखे तेहि समय बिदेहू । नामु सत्य अस लाग न केहू ॥
 रानि कुचालि सुनत नरपालहि । सूझ न कछु जस मनि बिनु ब्यालहि ॥
 भरत राज रघुबर बनबामू । भा मिथिलेसहि हृदयँ हराँसू ॥
 नृप बूझे बुध सचिव समाजू । कहहु बिचारि उचित का आजू ॥
 समुझि अवध असमंजस दोऊ । चलिअ कि रहिअ न कह कछु कोऊ ॥
 नृपहिं धीर धरि हृदयँ बिचारी । पठए अवध चतुर चर चारी ॥
 बूझि भरत सति भाउ कुभाऊ । आएहु बेगि न होइ लखाऊ ॥
 दो०— गए अवध चर भरत गति बूझि देखि करतूति ।

चले चित्रकूटहि भरतु चार चले तेरहुति ॥ २७१ ॥
 दूतन्ह आइ भरत कइ करनी । जनक समाज जथामति बरनी ॥
 सुनि गुर परिजन सचिव महीपति । भे सब सोच सनेहँ बिकल अति ॥
 धरि धीरजु करि भरत बड़ाई । लिए सुभट साहनी बोलाई ॥
 घर पुर देस राखि रखवारे । हय गय रथ बहु जान सँवारे ॥
 दुधरी साधि चले ततकाला । किए बिश्रामु न भग महिपाला ॥
 भोरहिं आजु नहाइ प्रयागा । चले जमुन उतरन सबु लाग्गा ॥

खबरि लेन हम पठए नाथा । तिन्ह कहि अस महि नायउ माथा ॥
साथ किरात छ सातक दीन्हे । मुनिबर तुरत बिदा चर कीन्हे ॥
दो०— सुनत जनक आगवनु सबु हरषेउ अवध समाजु ।

रघुनंदनहि सकोचु बड़ सोच बिबस सुराजु ॥ २७२ ॥
गरइ गलानि कुटिल कैकेई । काहि कहै केहि दूषनु देई ॥
अस मन आनि मुदित नर नारी । भयउ बहोरि रहब दिन चारी ॥
एहि प्रकार गत बासर सोऊ । प्रात नहान लाग सबु कोऊ ॥
करि मज्जन पूजहिं नर नारी । गनप गौरि तिपुरारि तमारी ॥
रमा रमन पद बंदि बहोरी । बिनवहिं अंजुलि अंचल जोरी ।
राजा रामु जानकी रानी । आनंद अवधि अवध रजधानी ॥
सुबस बसउ फिरि सहित समाजा । भरतहि रामु करहुं जुबराजा ॥
एहि सुख सुधाँ सींचि सब कहू । देव देहु जग जीवन लाहू ।
दो०— गुर समाज भाइन्ह सहित राम राजु पुर होउ ।

अछत राम राजा अवध मरिअ माग सबु कोउ ॥ २७३ ॥
सुनि सनेहमय पुरजन बानी । निदहिं जोग बिरति मुनि ग्यानी ॥
एहि बिधि नित्यकरम करि पुरजन । रामहिं करहिं प्रनाम पुलकि तन ।
ऊँच नीच मध्यम नर नारी । लहहिं दरसु निज निज अनुहारी ॥
सावधान सबही सनमानहिं । सकल सराहत कृपानिधानहिं ॥
लरिकाइहि तें रघुबर बानी । पालत नीति प्रीति पहिचानी ॥
सील सकोच सिधु रघुराऊ । सुमुख सुलोचन सरल सुभाऊ ॥

कहत राम गुन गन अनुरागे । सब निज भाग सराहन लागे ॥
राम सम पुन्य पुंज जग थोरे । जिन्हहि रामु जानत करि मोरे ।
दो०— प्रेम मगन तेहि समय सब सुनि आवत मिथिलेसु ।

सहित सभा संभ्रम उठेउ रबिकुल कमल दिनेसु ॥ २७४ ॥
शाइ सचिव गुर पुरजन साथा । आगैं गवनु कीन्ह रघुनाथा ॥
गिरिबरु दीख जनकपति जबहीं । करि प्रनामु रथ त्यागेउ तबहीं ॥
राम दरस लालसा उछाहू । पथ श्रम लेसु कलेसु न काहू ॥
मन तहँ जहँ रघुबर बैदेही । बिनु मन तन दुख सुख सुधि केही ॥
आवत जनकु चले एहि भाँती । सहित समाज प्रेम भति माती ॥
आए निकट देखि अनुरागे । सादर मिलन परसपर लागे ॥
नगे जनक मुनिजन पद बंदन । रिषिन्ह प्रनामु कीन्ह रघुनंदन ॥
शाइन्ह सहित रामु मिलि राजहि । चले लवाइ समेत समाजहि ॥
दो०— आश्रम सागर सांत रस पूरन पावन पाथु ।

सेन मनहुँ करुना सरित लिएँ जाहि रघुनाथु ॥ २७५ ॥
बोरति ग्यान बिराग करारे । बचन ससोक मिलत नद नारे ॥
सांच उसास समीर तरंगा । धीरज तट तरुबर कर भंगा ॥
बिषम बिषाद तोरावति धारा । भय भ्रम भवैँ अबर्त अपारा ॥
केवट बुध बिद्या बड़ि नावा । सकहिं न खेइ ऐक नहिं आवा ॥
वनचर कोल किरात बिचारे । थके बिलोकि पथिक हियै हारे ॥
आश्रम उदधि मिली जब जाई । मनहुँ उठेउ अंबुधि अकुलाई ॥

सोक बिकल दोउ राज समाजा । रहा न ग्यानु न धीरजु लाजा ॥
 भूप रूप गुन सील सराही । रोवहिं सोक सिंधु अवगाही ॥
 छ०— अवगाहि सोक समुद्र सोचहिं नारि नर ब्याकुल महा ।

दै दोष सकल सगेष बोलहिं ब्राम बिधि कीन्हों कहा ॥
 सुर सिद्ध तापस जोगिजन मुनि देखि दसा बिदेह की ।
 तुलसी न समरथु कोउ जो तरि सकै सरित सनेह की ॥

सो०— किए अमित उपदेस जहँ तहँ लोगन्ह मुनिबरन्ह ।

धीरजु धरिअ नरेस कहेउ बसिष्ठ बिदेह सन ॥ २७६ ॥
 जासु ग्यानु रबि भव निसि नासा । बचन किरन मुनि कमल बिकासा ॥
 तेहि कि मोह ममता निअराई । यह सिय राम सनेह बड़ाई ॥
 बिषई साधक सिद्ध सयाने । त्रिबिध जीव जग बेद बखाने ॥
 राम सनेह सरस मन जासू । साधु सभाँ बड़ आदर तासू ॥
 सोह न राम पेम बिनु ग्यानू । करनधार बिनु जिमि जलजानू ॥
 मुनि बहुबिधि बिदेहु समुझाए । रामघाट सब लोग नहाए ॥
 सकल सोक संकुल नर नारी । सो बासरु बीतेउ बिनु बारी ॥
 पसु खग मृगन्ह न कीन्ह अहारु । प्रिय परिजन कर कौन बिचारु ।
 दो०— दोउ समाज निमिराजु रघुगजु नहाने प्रात ।

बैठे सब बट बिटप तर मन मलीन कृस गात ॥ २७७ ॥
 जे महिसुर दसरथ पुर बासी । जे मिथिलार्पति नगर निवासी ।
 हंस बंस गुर जनक पुरोध । जिन्ह जग मगु परमारथु सोधा ॥

लगे कहन उपदेस अनेका । सहित धरम नय बिरति बिबेका ।
कौंसिक कहि कहि कथा पुरानी । समुझाई सब सभा सुब्रानी ।
तब रघुनाथ कौंसिकहि कहेऊ नाथ कालि जल बिनु सवु रहेऊ ।
मुनि कह उचित कहत रघुराई गयउ ब्रीति दिन पहर अढ़ाई ।
रिषि रख लखि कह तेरहुतिराजू । इहाँ उचित नहिं असन अनाजू ।
कहा भूप भल सबहि सोहाना । पाइ रजायसु चले नहाना ।
दो०— तेहि अवसर फल फूल दल मूल अनेक प्रकार ।

लइ आए बनचर बिपुल भरि भरि काँवरि भार ॥ २७८ ॥
कामद भे गिरि राम प्रसादा अवलोकत अपहरत बिषादा ।
सर सरिता बन भूमि बिभागा । जनु उमगत आनंद अनुरागा ।
बेलि बिटप सब सफल सफूला । बोलत खग मृग अलि अनुकूला ।
तेहि अवसर बन अधिक उछाहू । त्रिविध समीर सुखद सब काहू ।
जाइ न बरनि मनोहरताई । जनु महि करति जनक पहनाई ।
तब सब लोग नहाइ नहाई । राम जनक मुनि आयसु पाई ॥
देखि देखि तरुबर अनुरागे । जहँ तहँ पुरजन उतरन लागे ।
दल फल मूल कंद बिधि नाना । पावन सुंदर सुधा समाना ॥
दो०— सादर सब कहैं रामगुर पठए भरि भरि भार ।

पूजि पितर सुर अतिथि गुर लगे करन फरहार ॥ २७९ ॥
एहि बिधि बासर बीते चारी । रामु निरखि नर नारि सुखारी ॥
दुहु समाज असि रूच मन माहीं बिनु सिध राम फिरब भल नाहीं ॥

सीता राम संग बनबासू । कोटि अमरपुर सरिस सुपासू ॥
 परिहरि लखन रामु बैदेही । जेहि घरु भाव बाध बिधि तेही ॥
 दाहिन दइउ होइ जब सबही । राम समीप बसिअ बन तबही ॥
 मंदाकिनि मज्जनु तिहु काला । राम दरसु भुद मंगल माला ॥
 अटनु राम गिरि बन तापस थल । असनु अमिअ सम कंद मूल फल ॥
 सुख समेत संबत दुइ साता । पल सम होहि न जनिअहिं जाता ॥
 दो० — एहि सुख जोग न लोग सब कहहिं कहाँ अस भागु ।

सहज सुभायँ समाज दुहु राम चरन अनुरागु ॥ २८० ॥
 एहि बिधि सकल मनोरथ करहीं । बचन सप्रेम सुनत मन हरहीं ॥
 सीय मातु तेहि समय पठाई । दासी देखि सुभवसरु आई ॥
 सावकास सुनि सब सिय सासू । आयउ जनकराज रनिवासू ॥
 कौसल्याँ सादर सनमानी । आसन दिए समय सम आनी ॥
 सीलु सनेहु सकल दुहु ओरा । द्रवहिं देखि मुनि कुलिस कठोरा ॥
 पुलक सिधिल तन बारि बिलोचन । महि नख लिखन लगि सब सोचन ।
 सब सिय राम प्रीति कि सि मूरति । जनु करुना बहु बेष बिसूरति ।
 सीय मातु कह बिधि बुधि बाँकी । जो पय फेनु फोर पाँचि टाँकी ।
 दो० — सुनिअ सुधा देखिअहिं गरल सब करतूति कराल ।

जहँ तहँ काक उलूक बक मानस सकृत् मराल ॥ २८१ ॥
 सुनि ससोच कह देबि सुमित्रा । बिधि गति बड़ि बिपरीत बिचित्रा ।
 जो सृजि पालइ हरइ बहोरी । बालकेलि सम बिधि मति भोरी ॥

कौसल्या कह दोसु न काहू करम बिबस दुख सुख छति लाहू ॥
 कठिन करम गति जान बिधाता जो सुभ असुभ सकल फल दाता ॥
 ईस रजाइ सीस सबही कैं उतर्पात र्थात लय बिषहु अमी कैं ॥
 देबि मोह बस सोचिअ बादी । बिधि प्रपंचु अस अचल अनादी ॥
 भूपति जिअब भरव उर आनी सोचिअ सखि लखि निज हित हनी ॥
 सीय मातु कह सत्य सुबानी । सुकृती अवधि अवधपति रानी ।
 दो०— लखनु रामु सिय जाहुँ बन भल परिनाम न पोचु ।

गहबरि हियँ कह कौसिला मोहि भरत कर सोचु ॥ २८२ ॥
 ईस प्रसाद असीस तुम्हारी । सुत सुतबधू देवसरि बारी ॥
 राम सपथ मैं कीन्हि न काऊ । सो करि कहउँ सखी सति भाऊ ॥
 भरत सील गुन बिनय बड़ाई । भायप भगति भरोस भलाई ॥
 कहत सारदहु कर मति हीचे । सागर सीप कि जाहिं उलीचे ॥
 जानउँ सदा भरत कुलदीपा । बार बार मोहि कहेउ महीपा ।
 कसैं कनकु मनि पारिखि पाएँ । पुरुष परिखिअहिं समयँ सुभाएँ ॥
 अनुचित आजु कहब अस मोरा सोक सनेहँ सयानप थोरा ॥
 सुनि सुरसरि सम पावनि बानी । भई सनेह बिबल सब रानी ॥
 दो०— कौसल्या कह धीर धरि सुनहु देबि मिथिलेसि ।

को बिबेकनिधि बल्लभहि तुम्हहि सकइ उपदेसि ॥ २८३ ॥
 रानि राय सन अवसरु पाई । अपनी भाँति कहब समुझाई ॥
 रखिअहिं लखनु भरतु गवनहिं बन । जौ यह मत मानै महीप मन ।

तौ भल जतनु करब सुबिचारी । मोरें सोनु भरत कर भारी ॥
 गूढ़ सनेह भरत मन माहीं । रहें नीक मोहि लागत नाहीं ।
 लखि सुभाउ सुनि सरल सुबानी । सब भइ मगन करुन रस रानी ।
 नभ प्रसून झरि धन्य धन्य धुनि । सिथिल सनेहँ सिद्ध जोगी मुनि ॥
 सबु रनिवासु बिथकि लखि रहेऊ । तब धरि धीर सुमित्राँ कहेऊ ।
 देबि दंड जुग जामिनि बीती । राम मातु सुनि उठी सप्रीती ॥
 दो०— बेगि पाउ धारिअ थलहि कह सनेहँ सतिभाय ।

हमरें तौ अब ईस गति कै मिथिलेस सहाय ॥ २८४ ॥
 लखि सनेह सुनि बचन बिनीता । जनकप्रिया गह पाय पृनीता ॥
 देबि अचित असि बिनय तुम्हारी । दसरथ घरिनि राम महतारी ॥
 प्रभु अपने नीचहु आदरहीं । अग्नि धूम गिरि सिरतिनु धरहीं ॥
 सेवकु राउ करम मन बानी । सदा सहाय महेसु भवानी ॥
 रउरे अंग जोगु जग को हैं । दीप सहाय कि दिनकर सोहैं ।
 रामु जाइ बनु करि सुर काजू । अचल अवधपुर करिहहिं राजू ॥
 अमर नाग नर राम बाहुबल । सुख बसिहहिं अपने अपने थल ॥
 यह सब जागबलिक कहि राखा । देबि न होइ मुधा मुनि भाषा ॥
 दो०— अस कहि पग परि पेम अति सिय हित बिनय सुनाइ ।

सिय समेत सियमातु तब चली सुआयसु पाइ ॥ २८५ ॥
 प्रिय परिजनहि मिली बैदेही । जो जेहि जोगु भाँति तेहि तेही ॥
 तापस बेष जानकी देखी । भा सबु बिकल बिषाद बिसेषी ॥

जनक राम गुर आयसु पाई । चले थलहि सिय देखी आई ॥
 लीन्हि लाइ उर जनक जानकी पाहुनि पावन पेम प्रान की ॥
 उर उमगेउ अंबुधि अनुरागू । भयउ भूप मनु मनहुँ पयागू ॥
 सिय सनेह बटु बाढ़त जोहा । ता पर राम पेम सिसु सोहा ।
 चिरजीवी मुनि ग्यान बिकल जनु । बूझत लहेउ बाल अवलंबनु
 मोह मगन मति नहिं बिदेह की । महिमा सिय रघुबर सनेह की ॥
 दो०— सिय पितु मातु सनेह बस बिकल न सकी संभारि ।

धरनिसुताँ धीरजु धरेउ समउ सुधरमु बिचारि ॥ २८६ ॥
 तापस बेष जनक सिय देखी । भयउ पेमु परितोषु बिसेषी ॥
 पुत्रि पबित्र किए कुल दोऊ । मुजस धवल जगु कह सबु कोऊ
 जिति सुरसरि कीरति सरि तोरी गवनु कीन्ह बिधि अंड करोरी ॥
 गंग अवनि थल तीनि बड़ेरे । एहिं किए साधु समाज घनेरे ।
 पितु कह सत्य सनेहँ सुबानी । सीय सकुच महुँ मनहुँ समानी ॥
 पुनि पितु मातु लीन्हि उर लाई । सिख आसिष हित दीन्हि सुहाई ॥
 कहति न सीय सकुचि मन माहीं । इहाँ बसब रजनीं भल नाहीं ॥
 लखि रुख रानि जनायउ राऊ । हृदयँ सराहत सीलु सुभाऊ ॥
 दो०— बार बार मिलि भेंटि सिय बिदा कीन्हि सनमानि ।

कही समय सिर भरत गति रानि सुबानि सयानि ॥ २८७ ॥
 सुनि भूपाल भरत व्यवहारू । सोन सुगंध सुधा ससि सारू ॥
 मूदे सजल नयन पुलके तन । सुजसु सराहन लगे मुदित मन ।

सावधान सुनु सुमुख सुलोचनि । भरत कथा भव बंध बिमोचनि ।
 धरम राजनय ब्रह्माबिचारू । इहाँ जथामति मोर प्रचारू ।
 सो मति मोरि भरत महिमाही । कहै काह छलि छुअति न छाँही ॥
 बिधि गनपति अहिपति सिव सारद । कबि कोंबिद बुध बुद्धि बिसारद ॥
 भरत चरित कीरति करतूती । धरम सील गुन बिमल बिभूती ॥
 समुझत सुनत सुखद सब काहू । सुनि सुरसरि रुचि निदर सुधाहू ॥
 दो०— निरवधि गुन निरुपम पुरुषु भरतु भरत सम जानि ।

कहिअ सुमेरु कि सेर सम कबिकूल मति सकुचानि ॥ २८८ ॥
 अगम सबहि बरनत बरबरनी । जिमि जलहीन मीन गमु धरनी ॥
 भरत अमित महिमा सुनु रानी । जानहिं रामु न सकहिं बखानी ॥
 बरनि सप्रेम भरत अनुभाऊ । तिय जिय की रूचि लखि कह राऊ ।
 बहुरहिं लखनु भरतु बन जाहीं । सब कर भल सब के मन माहीं ।
 देबि परंतु भरत रघुबर की । प्रीति प्रतीति जाइ नहिं तरकी ॥
 भरतु अवधि सनेह ममता की । जद्यपि रामु सीम समता की ॥
 परमारथ स्वारथ सुख सारे । भरत न सपनेहुँ मनहुँ निहारे ॥
 साधन सिद्धि राम पग नेहू । मोहि लखि परत भरत मत एहू ।
 दो०— भोरेहुँ भरत न पेलिहहिं मनसहुँ राम रजाइ ।

करिअ न सोचु सनेह बस कहेउ भूष बिलखाइ ॥ २८९ ॥
 राम भरत गुन मनत सप्रीती । निसि दंपतिहि पलक सम बीती ।
 राज समाज प्रात जुग जागे । न्हाइ न्हाइ सुर पूजन लागे ॥

गे नहाइ गुर पहिं रघुराई । बंदि चरन बोले रुख पाई ॥
 नाथ भरतु पुरजन महतारी । सोक बिकल बनबास दुखारी ॥
 सहित समाज राउ मिथिलेसू । बहुत दिवस भए सहत कलेसू ॥
 उचित होइ सोइ कीजिअ नाथा । हित सबही कर रौरैं हाथा ।
 अस कहि अति सकुचे रघुराऊ । मुनि पुलके लखि सीलु सुभाऊ ॥
 तुम्ह बिनु राम सकल सुख साजा । नरक सरिस दुहु राज समाजा ।
 दो०— प्रान प्रान के जीव के जिव सुख के सुख राम ।

तुम्ह तजि तात सोहात गृह जिन्हहि तिन्हहि बिधि बाम ॥ २९० ॥
 सो सुखु करमु धरमु जरि जाऊ । जहाँ न राम पद पंकज भाऊ ॥
 जोगु कुजोगु ग्यानु अग्यानु । जहाँ नहिं राम पेम परधानू ।
 तुम्ह बिनु दुखी सुखी तुम्ह तेहीं । तुम्ह जानहु जिय जो जेहि केहीं
 राउर आयसु सिर सबही कै । बिदित कृपालहि गति सब नौकै ॥
 आपु आश्रमहि धारिअ पाऊ । भयउ सनेह सिथिल मुनिराऊ ॥
 करि प्रनामु तब रामु सिधाए । रिषि धरि धीर जनक पहिं आए ॥
 राम बचन गुरु नृपहि सुनाए । सील सनेह सुभायँ सुहाए ॥
 महाराज अब कीजिअ सोई । सब कर धरम सहित हित होई ॥
 दो०— ग्यान निधान सुजान सुचि धरम धीर नरपाल ।

तुम्ह बिनु असमंजस समन को समरथ एहि काल ॥ २९१ ॥
 सुनि मुनि बचन जनक अनुरागे । लखि गति ग्यानु बिरागु बिरागे ।
 सिथिल सनेहँ गुनत मन माहीं । आए इहाँ कीन्ह भल नाहीं ॥

रामहि रायँ कहेउ बन जाना । कीन्ह आपु प्रिय प्रेम प्रवाना ॥
 हम अब बन तें बनहि पठाई । प्रमृदित फिरब बिबेक बड़ाई ॥
 तापस मुनि महिसुर सुनि देखीं । भए प्रेम बस बिकल बिसेषी ।
 समउ समुझि धरि धीरजु राजा । चले भरत पहिं सहित समाजा ॥
 भरत आइ आगें भइ लीन्हे । अवसर सरिस सुआसन दीन्हे ॥
 तात भरत कह तेरहुति राऊ । तुम्हहि बिदित रघुबीर सुभाऊ ।
 दो०— राम सत्यव्रत धरम रत सब कर सीलु सनेहु ।

संकट सहत सकोच बस कहिअ जो आयसु देहु ॥ २९२ ॥
 सुनि तन पुलकि नयन भरि बारी । बोले भरतु धीर धरि भारी ।
 प्रभु प्रिय पूज्य पिता सम आपू । कुलगुरु सम हित माय न बापू ॥
 कौंसिकादि मुनि सचिव समाजू । ग्यान अंबुनिधि आपुनु आजू ॥
 सिसु सेवकु आयसु अनुगामी । जानि मोहि सिख देइअ स्वामी ॥
 एहिं समाज थल बूझब राउर । मौन मलिन मैं बोलब बाउर ॥
 छोटे बदन कहउँ बड़ि बाता । छमब तात लखि बाम बिधाता ॥
 आगम निगम प्रसिद्ध पुराना । सेवाधरमु कठिन जगु जाना ॥
 स्वामि धरम स्वारथह बिरोधू । बैरु अंध प्रेमहि न प्रबोधू ॥
 दो०— राखि राम रुख धरमु ब्रतु पराधीन मोहि जानि ।

सब कैं संमत सर्व हित करिअ पेयु पहिचानि ॥ २९३ ॥
 भरत बचन सुनि देखि सुभाऊ । सहित समाज सराहत राऊ ।
 सुगम अगम मृदु मंजु कठोरे । अरथु अमित अति आखर थोरे ॥

ज्यों मुख मुकुर मुकुरु निज पानी । गहि न जाइ अस अदभुत बानी ॥
 भूप भरतु मुनि सहित समाजू । गे जहँ बिबुध कुमुद द्विजराजू ।
 सुनि सुधि सोच बिकल सब लोगा । मनहुँ मीनगन नव जल जोगा
 देवँ प्रथम कुलगुर गति देखी । निरखि बिदेह सनेह बिसेषी ॥
 राम भगतिमय भरतु निहारे । सुर स्वारथी हहरि हियँ हारे ।
 सब कोउ राम पेममय पेखा । भए अलेख सोच बस लेखा ।
 दो०— रामु सनेह सकोच बस कह ससोच सुरराजु ।

रचहु प्रपंचहि पंच मिलि नाहिं त भयउ अकाजु ॥ २९४ ॥
 सुरन्ह सुमिरि सारदा सराही । देबि देव सरनागत पाही ।
 फेरि भरत मति करि निज माया । पालु बिबुध कुल करि छल छाया ॥
 बिबुध बिनय सुनि देबि सयानी । बोली सुर स्वारथ जड़ जानी ॥
 मो सन कहहु भरत मति फेरू । लोचन सहस न सूझ सुमेरू ॥
 बिधि हरि हर माया बड़ि भारी । सोउ न भरत मति सकइ निहारी ॥
 सो मति मोहि कहत करु भोरी । चंदिनि कर कि चंडकर चोरी ॥
 भरत हृदयँ सिय राम निवासू । तहँ कि तिमिर जहँ तरनि प्रकासू ॥
 अस कहि सारद गइ बिधि लोका । बिबुध बिकल निसि पानहुँ कोका ॥
 दो०— सुर स्वारथी मलीन मन कीन्ह कुमंत्र कुठाटु ।

रचि प्रपंच माया प्रबल भय भ्रम अरति उचाटु ॥ २९५ ॥
 करि कुचालि सोचत सुरराजू । भरत हाथ सबु काजु अकाजू ।
 गए जनकु रघुनाथ समीपा । सनमाने सब रबिकुल दीपा ॥

समय समाज धरम अबिरोधा । बोले तब रघुबंस पुरोधा ॥
 जनक भरत संबादु सुनाई । भरत कहाउति कही सुहाई ॥
 तात राम जस आयसु देहू । सो सबु करै मोर मत एहू ॥
 सुनि रघुनाथ जोरि जुग पानी । बोले सत्य सरल मृदु बानी ।
 बिद्यमान आपुनि मिथिलेसू । मोर कहब सब भाँति भदेसू ॥
 राउर राय रजायसु होई । राउरि सपथ सही सिर सोई ॥
 दो०— राम सपथ सुनि मुनि जनक सकुचे सभा समेत ।

सकल बिलोकत भरत मुख बनइ न ऊतरु देत ॥ २९६ ॥
 सभा सकुच बस भरत निहारी । राम बंधु धरि धीरजु भारी ॥
 कुसमउ देखि सनेहु सँभारा । बढ़त बिधि जिमि घटज निवार ॥
 सोक कनकलोचन मति छेनी । हरी बिमल गुन गन जगजोनी ॥
 भरत बिबेक बराहँ बिसाला । अनायास उधरी तेहि काला ॥
 करि प्रनामु सब कहँ कर जोरे । रामु राउ गुर साधु निहोरे ॥
 छमब आजु अति अनुचित मोरा । कहउँ बदन मृदु बचन कठोरा ॥
 हियँ सुमिरी सारदा सुहाई । मानस तँ मुख पंकज आई ॥
 बिमल बिबेक धरम नय साली । भरत भारती मंजु मराली ।
 दो०— निरखि बिबेक बिलोचनहि सिथिल सनेहँ समाजु ।

करि प्रनामु बोले भरतु सुमिरि सीय रघुराजु ॥ २९७ ॥
 प्रभु पितु मातु सुहृद गुर स्वामी । पूज्य परम हित अंतरजामी ॥
 सरल सुसाहिबु सील निधानू । प्रनतपाल सर्वग्य सृजानू ॥

समरथ सरनागत हितकारी । गुनगाहकु अवगुन अध हारी ॥
 स्वामि गोसाँइहि सरिस गोसाँई । मोहि समान मैं साँई दोहाई ॥
 प्रभु पितु बचन मोह बस पेली । आयउँ इहाँ समाजु सकेली ॥
 जग भल पोच ऊँच अरु नीचू । अमिअ अमरपद माहुरु मीचू ॥
 राम रजाइ मेट मन माहीं । देखा सुना कतहुँ कोउ नाहीं ॥
 सो मैं सब बिधि कीन्हि छिटाई । प्रभु मानी सनेह सेवकाई ॥
 दो०— कृपाँ भलाई आपनी नाथ कीन्ह भल मोर।

दूषन भे भूषन सरिस सुजसु चारु चहु ओर ॥ २९८ ॥
 राउरि रीति सुबानि बड़ाई । जगत बिदित निगमागम गाई ॥
 कूर कुटिल खल कुमति कलंकी । नीच निसील निरीस निसंकी ॥
 तेउ सुनि सरन सामुहें आए । सकृत् प्रनामु किहें अपनाए ॥
 देखि दोष कबहुँ न उर आने । सुनि गुन साधु समाज बखाने ॥
 को साहिब सेवकहि नेवाजी । आप समाज साज सब साजी ॥
 निज करतूति न समुझिअ सपनें । सेवक सकुच सोचु उर अपनें ।
 सो गोसाँई नहिं दूसर कोपी । भुजा उठाइ कहउँ पन रोपी ॥
 पसु नाचत सुक पाठ प्रबीना । गुन गति नट पाठक आधीना ॥
 दो०— यों सुधारि सनमानि जन किए साधु सिरमोर।

को कृपाल बिनु पालिहैं बिरिदावलि बरजोर ॥ २९९ ॥
 सोक सनेहैं कि बाल सुभाएँ । आयउँ लाइ रजायसु बाएँ ॥
 तबहुँ कृपाल हेरि निज ओर। सबहि भाँति भल मानेउ मोर ॥

देखेउँ पाय सुमंगल मूला । जानेउँ स्वामि सहज अनुकूला ।
 बड़ें समाज बिलोकेउँ भागू । बड़ों चूक साहिब अनुरागू ।
 कृपा अनुग्रहु अंगु अघाई । कोन्हि कृपानिधि सब अधिकाई ॥
 राखा मोर दुलार गोसाई । अपने सील सुभायँ भलाई ॥
 नाथ निपट मैं कीन्हि ढिठाई । स्वामि समाज सकोच बिहाई ॥
 अबिनय बिनय जथारुचि बानी । छमिहि देउ अति आरति जानी ॥
 दो०— सुहृद सुजान सुसाहिबहि बहुत कहब बड़ि खोरि ।

आयसु देइअ देव अब सबइ सुधारी मोरि ॥ ३०० ॥
 प्रभु पद पदुम पराग दोहाई । सत्य सुकृत सुख सीवै सुहाई ॥
 सो करि कहउँ हिए अपने की । रुचि जागत सोवत सपने की ।
 सहज सनेहँ स्वामि सेवकाई । स्वारथ छल फल चारि बिहाई ॥
 अग्या सम न सुसाहिब सेवा । सो प्रसादु जन पावै देवा ॥
 अस कहि प्रेम बिबस भए भारी । पुलक सरीर बिलोचन भारी ।
 प्रभु पद कमल गहे अकुलाई । समउ सनेहु न सो कहि जाई ।
 कृपासिंधु सनमानि सुबानी । बैठाए समीप गहि पानी ॥
 भरत बिनय सुनि देखि सुभाऊ । सिथिल सनेहँ सभा रघुराऊ ।
 छं०— रघुराउ सिथिल सनेहँ साधु समाज मुनि मिथिला धनी ।

मन महुँ सराहत भरत भायप भगति की महिमा घनी ॥
 भरतहि प्रसंसत बिबुध बरषत सुमन मानस मलिन से ।
 तुलसी बिकल सब लोग सुनि सकुचे निसागम नलिन से ॥

सो०— देखि दुखारी दीन दुहु समाज नर नारि सब।

मधवा महा मलीन मुए मारि मंगल चाहत ॥ ३०१ ॥
 कपट कुचालि सीवैं सुरराजू । पर अकाज प्रिय आपन काजू ॥
 काक समान पाकरिपु रीती । छली मलीन कतहुँ न प्रतीती ॥
 प्रथम कुमत करि कपटु सँकेला । सो उचाटु सब कैं सिर मेला ॥
 सुरमायाँ सब लोग बिमोहे । राम प्रेम अतिसय न बिछोहे ॥
 भय उचाट बस मन धिर नाही । छन बन रुचि छन सदन सोहाहीं ॥
 दुबिध मनोगति प्रजा दुखारी । सरित सिधु संगम अनु बारी ॥
 दुचित कतहुँ परितोषु न लहहीं । एक एक सन मरमु न कहहीं ।
 लखि हियँ हौंस कह कृपानिधानू । सरिस स्वान मधवान जुबानू ।
 दो०— भरतु जनकु मुनिजन सचिव साधु सचेत बिहाइ।

लागि देवमाया सबहि जथाजोगु जनु पाइ ॥ ३०२ ॥
 कृपासिधु लखि लोग दुखारे । निज सनेहँ सुरपति छल भारे ।
 सभा राउ गुर महिसुर मंत्री । भरत भगति सब कै मति जंत्री ।
 रामहि चितवत चित्र लिखे से । सकुचत बोलत बचन सिखे से ॥
 भरत प्रीति नति बिनय बड़ाई । सुनत सुखद बरनत कठिनाई ॥
 जासु बिलोकि भगति लबलेसू । प्रेम मगन मुनिगन मिथिलेसू ।
 महिमा तासु कहै किमि तुलसी । भगति सुभायँ सुमति हियँ हुलसी ॥
 आपु छोटि महिमा बड़ि जानी । कबिकुल कानि मानि सकुचानी ॥
 कहि न सकति गुन रुचि अधिकारै । मति गति बाल बचन को नाई ।

दो०— भरत बिमल जसु बिमल बिधु सुपति चकोरकुमारि ।

उदित बिमल जन हृदय नभ एकटक रही निहारि ॥ ३०३ ॥
 भरत सुभाउ न सुगम निगमहूँ । लघु मति चापलता कबि छम्हूँ ॥
 कहत सुनत सति भाउ भरत को । सीय राम पद होइ न रत को ॥
 सुमिरत भरतहि प्रेमु राम को । जेहि न सुलभु तेहि सरिस बाम को ॥
 देखि दयाल दसा सबही की । राम सुजान जानि जन जी की ॥
 धरम धुरीन श्रीर नय नागर । सत्य सनेह सील सुख सागर ॥
 देसु कालु लखि समउ समाजू । नीति प्रीति पालक रघुराजू ॥
 बोले बचन बानि सरबसु से । हित परिनाम सुनत ससि रसु से ॥
 तात भरत तुम्ह धरम धुरीना । लोक बेद बिद प्रेम प्रबीना ॥
 दो०— करम बचन मानस बिमल तुम्ह समान तुम्ह तात ।

गुर समाज लघु बंधु गुन कुसमयँ किमि कहि जात ॥ ३०४ ॥
 जानहु तात तरनि कुल रीती । सत्यसंध पितु कीरति प्रीती ॥
 समउ समाजु लाज गुरजन की । उदासीन हित अनहित मन की ॥
 तुम्हहि बिदित सबही कर करमू । आपन मोर परम हित धरमू ॥
 मोहि सब भाँति भरोस तुम्हारा । तदपि कहउँ अवसर अनुसार ॥
 तात तात बिनु बात हमारी । केवल गुरकुल कृपाँ सँभारी ।
 नतरु प्रजा परिजन परिवारू । हमहि सहित सबु होत खुआरू ॥
 जौं बिनु अवसर अथवँ दिनेसू । जग केहि कहहु न होइ कलैसू ॥
 तस उतपातु तात बिधि कीन्हा । मुनि मिथिलैस राखि सबु लीन्हा ॥

दो०— राज काज सब लाज पति धरम धरनि धन धाम ।

गुर प्रभाउ पालिहि सबहि भल होइहि परिनाम ॥ ३०५ ॥
 सहित समाज तुम्हार हमारा । घर बन गुर प्रसाद रखवारा ॥
 मातु पिता गुर स्वामि निदेसू । सकल धरम धरनीधर सेसू ॥
 सो तुम्ह करहु करावहु मोहू । तात तरनिकुल पालक होहू ॥
 साधक एक सकल सिधि देनी । कीरति सुगति भूतिमय बेनी ॥
 सो बिचारि सहि संकट भारी । करहु प्रजा परिवारु सुखारी ॥
 बाँटी बिपाति सर्वाहिं मोहि भाई । तुम्हहि अवधि भरि बड़ि कठिनाई ॥
 जानि तुम्हहि मृदु कहउँ कठोरा । कुसमयँ तात न अनुचित मोरा ।
 होहिं कुठायँ सुबन्धु सहाए । ओड़िअहिं हाथ अर्सनिहु के घाए ॥
 दो०— सेवक कर पद नयन से मुख सो साहिबु होइ ।

तुलसी प्रीति कि रीति सुनि सुकबि सराहहिं सोइ ॥ ३०६ ॥
 सभा सकल सुनि रघुबर बानी । प्रेम पयोधि अमिअँ जनु सानी ॥
 सिथिल समाज सनेह समाधी । देखि दसा चुप सारद साधी ॥
 भरतहि भयउ परम संतोषू सनमुख स्वामि बिमुख दुख दोषू ॥
 मुख प्रसन्न मन मिटा बिषादू भा जनु गूँगेहि गिरा प्रसादू ॥
 कीन्ह सप्रेम प्रनामु बहोरी । बोले पानि पंकरुह जोरी ॥
 नाथ भयउ सुखु साथ गए को । लहेउँ लाहु जग जनमु भए को ॥
 अब कृपाल जस आयसु होई । करौं सीस धरि सादर सोई ॥
 सो अवलंब देव मोहि देई । अवधि पारु पावौं जेहि सेई ॥

दो०— देव देव अभिषेक हित गुर अनुसासनु पाइ।

आनेउँ सब तीरथ सलिलु तेहि कहँ काह रजाइ ॥ ३०७ ॥
 एकु मनोरथु बड़ मन माहीं । सभयँ सकोच जात कहि नाहीं ॥
 कहहु तात प्रभु आयसु पाई । बोले बानि सनेह सुहाई ।
 चित्रकूट सुचि थल तीरथ बन । खग मृग सर सरि निर्झर गिरिगन ॥
 प्रभु पद अंकित अवनि बिसेषी । आयसु होइ त आवौं देखी ॥
 अवसि अत्रि आयसु सिर धरहू । तात बिगतभय कानन चरहू ॥
 मुनि प्रसाद बन मंगल दाता । पावन परम सुहावन भ्राता ।
 रिषिनायकु जहँ आयसु देहीं । राखेहु तीरथ बलु थल तेहीं ॥
 सुनि प्रभु बचन भरत सुख पावा । मुनि पद कमल मुदित सिरु नावा
 दो० भरत राम संवादु सुनि सकल सुमंगल मूल ।

सुर स्वारथी सराहि कुल बरषत सुरतरु फूल ॥ ३०८ ॥
 धन्य भरत जय राम गोसाई । कहत देव हरषत बरिआई ॥
 मुनि मिथिलेस सभाँ सब काहू । भरत बचन सुनि भयउ उछाहू ॥
 भरत राम गुन ग्राम सनेहू । पुलकि प्रसंसत राउ बिदेहू ॥
 सेवक स्वामि सुभाउ सुहावन । नेपु पेमु अति पावन पावन ॥
 मति अनुसार सराहन लागे । सचिव सभासद सब अनुरागे ।
 सुनि सुनि राम भरत संवादू । दुहु समाज हियँ हरषु बिषादू ॥
 राम मातु दुखु सुखु सम जानी । कहि गुन राम प्रबोधी रानी ॥
 एक कहहिं रघुबीर बड़ाई । एक सराहत भरत भलाई ॥

दो०—अत्रि कहेउ तब भरत सन सैल समीप सुकूप ।

राखिअ तीरथ तोय तहँ पावन अमिअ अनूप ॥ ३०९ ॥
 भरत अत्रि अनुसासन पाई । जल भाजन सब दिए चलाई ।
 सानुज आपु अत्रि मुनि साधू । सहित गए जहँ कूप अगाधू ।
 पावन पाथ पुन्यथल राखा । प्रमुदित प्रेम अत्रि अस भाषा ।
 तात अनादि सिद्ध थल एहू । लोपेउ काल बिदित नहिं केहू ॥
 तब सेवकन्ह सरस थलु देखा कीन्ह सुजल हित कूप बिसेषा ॥
 बिधि बस भयउ बिस्व उपकारू । सुगम अगम अति धरम बिचारू
 भरतकूप अब कहिहहिं लोगा । अति पावन तीरथ जल जोगा ॥
 प्रेम सनेम निमज्जत प्राणी होइहहिं बिमल करम मन बानी ॥
 दो०—कहत कूप महिमा सकल गए जहाँ रघुराउ ।

अत्रि सुनायउ रघुबरहि तीरथ पुन्य प्रभाउ ॥ ३१० ॥
 कहत धरम इतिहास सप्रीती । भयउ भोरु निसि सो सुख बीती ॥
 नित्य निबाहि भरत दोउ भाई राम अत्रि गुर आयसु पाई ॥
 सहित समाज साज सब सादें । चले राम बन अटन पयादें ॥
 कोमल चरन चलत बिनु पनहीं । भइ मृदु भूमि सकुचि मन मनहीं
 कुस कंटक काँकरीं कुराई । कटुक कठोर कुबस्तु दुराई ॥
 महि मंजुल मृदु मारग कीन्हे । बहत समीर त्रिविध सुख लीन्हे ॥
 सुमन बरषि सुर घन करि छाहीं । बिटप फूल फलि तृन मृदुताहीं ॥
 मृग बिलोकि खग बोलि सुबानी सेवहिं सकल राम प्रिय जानी ॥

दो०— सुलभ सिद्धि सब प्राकृतहु राम कहत जमुहात ।

राम प्रानप्रिय भरत कहँ यह न होइ बड़ि छात ॥ ३११ ॥
 एहि बिधि भरतु फिरत बन माहीं । नेमु प्रेमु लखि मुनि सकुचाहीं ॥
 पुन्य जलाश्रय भूमि बिभागा । खग मृग तरु तृन गिरि बन बागा
 चारु बिचित्र पबित्र बिसेषी । बृद्धत भरतु दिव्य सब देखी ॥
 सुनि मन मुदित कहत रिषिराऊ । हेतु नाम गुन पुन्य प्रभाऊ ।
 कतहुँ निमज्जन कतहुँ प्रनामा । कतहुँ बिलोकत मन अभिरामा ॥
 कतहुँ बैठि मुनि आयसु पाई । सुमिरत सीय सहित दोउ भाई ।
 देखि सुभाउ सनेहु सुसेवा । देहिं असीस मुदित बनदेवा ॥
 फिरहिं गएँ दिनु पहर अढ़ाई । प्रभु पद कमल बिलोकहिं आई ॥
 दो०— देखे थल तीरथ सकल भरत पाँच दिन माझ ।

कहत सुनत हरि हर सुजसु गयउ दिवसु भइ साँझ ॥ ३१२ ॥
 भोर न्हाइ सब जुरा समाजू । भरत भूमिसुर तेरहुति राजू ॥
 भल दिन आजु जानि मन माहीं । रामु कृपाल कहत सकुचाहीं ॥
 गुर नृप भरत सभा अवलोकी । सकुचि राम फिरि अवनि बिलोकी ॥
 सील सराहि सभा सब सोची । कहँ न राम सम स्वामि सँकोची ॥
 भरत सुजान राम रुख देखी । उठि सप्रेम धरि धीर बिसेषी ॥
 करि दंडवत कहत कर जोरी । राखीं नाथ सकल रुचि मोरी ।
 मोहि लागि सहेउ सबहिं संतापू । बहुत भाँत दुख पावा आपू ॥
 अब गोसाईं मोहि देउ रजाई । सेवौं अवध अवधि भरि जाई ॥

दो०— जेहि उपाय पुनि पाय जनु देखै दीनदयाल।

सो सिख देइअ अवधि लागि कोसलपाल कृपाल ॥ ३१३ ॥
 पुरजन परिजन प्रजा गोसाईं । सब सुचि सरस सनेहँ सगाईं ॥
 राउर बदि भल भव दुख दाहू । प्रभु बिनु बादि परम पद लाहू ॥
 स्वामि सुजानु जानि सब ही की । रुचि लालसा रहनि जन जी की ॥
 प्रनतपालु पालिहि सब काहू । देउ दुहू दिसि ओर निबाहू ॥
 अस मोहि सब बिधि भूरि भरोसो किएँ बिचारु न सोचु खरो सो ॥
 आरति मोर नाथ कर छोहू । दुहुँ मिलि कीन्ह छीटु हठि मोहू ॥
 यह बड़ दोषु दूरि करि स्वामी तजि सकोच सिखइअ अनुगामी ॥
 भरत बिनय सुनि सबहिं प्रसंसी । खीर नीर बिबरन गति हंसी ॥
 दो०—दीनबंधु सुनि बंधु के बचन दीन छलहीन।

देस काल अवसर सरिस बोले रामु प्रबीन ॥ ३१४ ॥
 तात तुम्हारि मोरि परिजन की । चिंता गुरहि नृपहि घर बन की ॥
 माथे पर गुर मुनि मिथिलेसू । हमहि तुम्हहि सपनेहुँ न कलेसू ॥
 मोर तुम्हार परम पुरुषारथु । स्वारथु सुजसु धरमु परमारथु ॥
 पितु आयसु पालिहिं दुहु भाई । लोक बेद भल भूप भलाई ॥
 गुर पितु मातु स्वामि सिख पालें चलेहुँ कुमग पग परहिं न खालें ॥
 अस बिचारि सब सोच बिहाई । पालहु अवध अवधि भरि जाई ॥
 देसु कोसु परिजन परिवारू । गुर पद रजहिं लाग छरुभारू ॥
 तुम्ह मुनि मातु सचिव सिख मानी पालेहु पुहुमि प्रजा रजधानी।

दो०— मुखिआ मुखु सो चाहिए खान पान कहूँ एक।

पालइ पोषइ सकल अंग तुलसी सहित बिबेक ॥ ३१५ ॥
 राजधरम सरबसु एतनोई । जिमि मन माहँ मनोरथ गोई ॥
 बंधु प्रबोधु कीन्ह बहु भाँती । बिनु आधार मन तोषु न साँती ।
 भरत सील गुर सन्निव समाजू । सकुच सनेह बिबस रघुराजू ॥
 प्रभु करि कृपा पाँवरीं दीन्हों । सादर भरत सीस धरि लीन्हों ।
 चरनपीठ करुनानिधान के । जनु जुग जामिक प्रजा प्रान के ॥
 संपुट भरत सनेह रतन के । आखर जुग जनु जीव जतन के ।
 कुल कपाट कर कुसल करम के । बिमल नयन सेवा सुधरम के ॥
 भरत मुदित अबलंब लहे तें । अस मुख जस सिय रामु रहे तें ॥
 दो० भागेउ बिदा प्रनामु करि राम लिए उर लाइ।

लोग उचाटे अमरपति कुटिल कुअवसरु पाइ ॥ ३१६ ॥
 सो कुचालि सब कहँ भइ नीकी । अवधि आस सम जीवनि जी की ॥
 नतरु लखन सिय राम बियोगा । हहरि मरत सब लोग कुरोगा ॥
 रामकृपाँ अवरेब सुधारी । बिबुध धारि भइ गुनद गोहारी ।
 भेंटत भुज भरि भाइ भरत सो । राम प्रेम रसु कहि न परत सो ।
 तन मन बचन उमग अनुरागा । धीर धुरंधर धीरजु त्यागा ॥
 बारिज लोचन मोचत बारी । देखि दसा सुर सभा दुखारी ॥
 मुनिगन गुर धुर धीर जनक से । ग्यान अनल मन कसैं कनक से ।
 जे बिरंचि निरलेप उपाए । पदुम पत्र जिमि जग जल जाए ।

दो०—तेउ बिलोकि रघुबर भरत प्रीति अनूप अपार।

भए मगन मन तन बचन सहित बिराग बिचार॥ ३१७॥
जहाँ जनक गुर गति माँति भोरी । प्राकृत प्रीति कहत बड़ि खोरी ॥
बरनत रघुबर भरत बियोगू । सुनि कठोर कवि जानिहि लोगू ॥
सो सकोच रसु अकथ सुबानी । समउ सनेहु सुमिरि सकुचानी ॥
भेंटि भरतु रघुबर समुझाए । पुनि रिपुदवनु हरषि हियँ लाए ॥
सेवक सचिव भरत रुख पाई । निज निज काज लगे सब जाई ॥
सुनि दारुन दुखु दुहँ समाजा । लगे चलन के साजन साजा ॥
प्रभु पद पदुम बंदि दोउ भाई । चले सीस धरि राम रजाई ॥
मुनि तापस बनदेव निहोरी । सब सनमानि बहोरि बहोरी ॥
दो०—लखनहि भेंटि प्रनामु करि सिर धरि सिय पद धूरि।

चले सप्रेम असीस सुनि सकल सुमंगल पूरि॥ ३१८॥
सानुज राम नृपहि सिर नाई कीन्ह बहुत बिधि बिनय बड़ाई ।
देव दया बस बड़ दुखु पायउ । सहित समाज काननहिं आयउ ॥
पुर पगु धारिअ देइ असीसा । कीन्ह धीर धरि गवनु महीसा ॥
मुनि महिदेव साधु सनमाने । बिदा किए हरि हर सम जाने ॥
सासु समीप गए दोउ भाई । फिरे बंदि पग आसिष पाई ॥
कौंसिक बामदेव जाबाली । पुरजन परिजन सचिव सुचाली ॥
जथा जोगु करि बिनय प्रनामा बिदा किए सब सानुज रामा ॥
गारि पुरुष लघु मध्य बड़ेरे । सब सनमानि कृपानिधि फेरे ॥

दो०— भरत मातु पद बंदि प्रभु सुचि सनेहँ मिलि भेंटि ।

बिदा कीन्ह सजि पालकी सकुच सोच सब मेदि ॥ ३१९ ॥
 परिजन मातु पितहि मिलि सीता । फिरी प्रानप्रिय प्रेम पुनीता ॥
 करि प्रनाम भेंटों सब सासू । प्रीति कहत कबि हियँ न हुलासू ।
 सुनि सिख अभिमत आसिष पाई । रही सोय दुहु प्रीति समाई ।
 रघुपति पटु पालकीं मगाई । करि प्रबोधु सब मातु चढ़ाई ॥
 बार बार हिलि मिलि दुहु भाई । सम सनेहँ जननीं पहुँचाई ॥
 साजि बाजि गज बाहन नाना । भरत भूष दल कीन्ह पयाना ।
 हृदयँ रामु सिय लखन समेता । चले जाहिं सब लोग अचेता ।
 बसह बाजि गज पसु हियँ हारें । चले जाहिं परबस मन मारें ॥
 दो०— गुर गुरतिथ पद बंदि प्रभु सीता लखन समेत ।

फिरे हरष बिसमय सहित आए परन निकेत ॥ ३२० ॥
 बिदा कीन्ह सनमानि निषादू । चलेउ हृदयँ बड़ बिरह बिषादू ॥
 कोल किरात भिन्न बनचारी । फेरे फिरे जोहारि जोहारी ॥
 प्रभु सिय लखन बैठि बट छाहीं । प्रिय परिजन बियोग बिलखाहीं ॥
 भरत सनेह सुभाउ सुबानी । प्रिया अनुज सन कहत बखानी ।
 प्रीति प्रतीति बचन मन करनी । श्रीमुख राम प्रेम बस बरनी ॥
 तेहि अवसर खग मृग जल मोना । चित्रकूट चर अचर मलीना ॥
 बिबुध बिलोकि दसा रघुवर की । बरषि सुमन कहि गति घर घर की ॥
 प्रभु प्रनाम करि दीन्ह भरोसो । चले मुदित मन डर न खरो सो ॥

दो०—मानुज सीय समेत प्रभु राजत परन कुटीर।

भगति ग्यानु बैराग्य जनु सोहत धरें सरीर ॥ ३२१ ॥
 पुनि महिसुर गुर भरत भुआलू राम बिरहैं सबु साजु बिहालू ॥
 प्रभु गुन ग्राम गनत मन माहीं । सब चुपचाप चले मग जाहीं ॥
 जमुना उतरि पार सबु भयऊ । सो बासरु बिनु भोजन गयऊ ॥
 उतरि देवसरि दूसर बासू । रामसखाँ सब कीन्ह सुपासू ॥
 मई उतरि गोमती नहाए । चौथें दिवस अवधपुर आए ॥
 जनकु रहे पुर बासर चारी राज काज सब साज सँभारी ॥
 साँपि सचिव गुर भरतहि राजू । तेरहुति चले साजि सबु साजू ॥
 नगर नारि नर गुर सिख मानी । बसे सुखेन राम रजधानी ॥
 दो०—राम दरस लागि लोग सब करत नेम उपवास।

तजि तजि भूषन भोग सुख जित अवधि कीं आस ॥ ३२२ ॥
 सचिव सुसेवक भरत प्रबोधे । निज निज काज पाइ सिख ओधे ॥
 पुनि सिख दीन्ह बोलि लघु भाई साँपी सकल मातु सेवकाई ॥
 भूसुर बोलि भरत कर जोरे । करि प्रनाम बय बिनय निहोरे ॥
 कैच नीच कारजु भल पोचू । आयसु देब न करब सँकोचू ॥
 परिजन पुरजन प्रजा बोलाए । समाधानु करि सुबस बसाए ॥
 मानुज गे गुर गेहँ बहोरी । करि दंडवत कहत कर जोरी ॥
 आयसु होइ त रहौं सनेमा । बोले मुनि तन पुलकि सपेमा ॥
 समुझब कहब करब तुम्ह जोई । धरम सारु जग होइहि सोई ॥

दो०—सुनि सिख पाइ असीस बड़ि गनक बोलि दिनु साधि ।

सिंघासन प्रभु पादुका बैठारे निरुपाधि ॥ ३२३ ॥
 राम मातु गुर पद सिरु नाई । प्रभु पद पीठ रजायसु पाई ॥
 नंदिगावँ करि परन कुटीरा । कीन्ह निवासु धरम धुर धीरा ॥
 जटाजूट सिर मुनिपट धारी । महि खनि कुस साँथरी सँवारी ॥
 असन बसन बासन ब्रत नेमा । करत कठिन रिषिधरम सप्रेमा ।
 भूषन बसन भोग सुख भूरी । मन तन बचन तजे तिन तूरी ॥
 अवध राजु सुर राजु सिहाई । दसरथ धनु सुनि धनदु लजाई ॥
 तैहिं पुर बसत भरत बिनु रागा । चंचरीक जिमि चंपक बागा ।
 रमा बिलासु राम अनुरागी । तजत बमन जिमि जन बड़भागी ।
 दो० - राम पेम भाजन भरतु बड़े न एहिं करतूति ।

चातक हंस सराहिअत टैंक बिबेक बिभूति ॥ ३२४ ॥
 देह दिनहुँ दिन दूबरि होई । घटइ तेजु बलु मुखछवि सोई ॥
 नित नव राम प्रेम पनु पीना । बढ़त धरम दलु मनु न मलीना ॥
 जिमि जलु निघटत सरद प्रकासे । बिलसत बेतस बनज बिकासे ।
 सम दम संजम नियम उपासा । नखत भरत हिय बिमल अकासा ॥
 ध्रुव बिस्वासु अवधि राका सी । स्वामि सुरति सुरबीथि बिकासी ॥
 राम पेम बिधु अचल अदोषा । सहित समाज सोह नित चोखा ॥
 भरत रहनि समुझनि करतूती । भगति बिरति गुन बिमल बिभूती ॥
 बरनत सकल सुकबि सकुचार्ही । सेस गनेस गिरा गमु नाहीं ॥

दो०— नित पूजत प्रभु पाँवरी प्रीति न हृदयँ समाति ।

मागि मागि आयसु करत राज काज बहु भाँति ॥ ३२५ ॥
 पुलक गात हियँ सिय रघुबीरू । जीह नामु जप लोचन नीरू ॥
 लखन राम सिय कानन बसहीं । भरतु भवन बसि तप तनु कसहीं ॥
 दोउ दिसि समुझि कहत सबु लोगू । सब बिधि भरत सराहन जोगू ॥
 सुनि ब्रत नेम साधु सकुचार्हीं । देखि दसा मुनिराज लजार्हीं ॥
 परम पुनीत भरत आचरनू । मधुर मंजु मुद मंगल करनू ।
 हरन कठिन कलि कलुष कलेसू । महामोह निसि दलन दिनेसू ॥
 पाप पुंज कुंजर मृगराजू । समन सकल संताप समाजू ॥
 जन रंजन भंजन भव भारू । राम सनेह सुधाकर सारू ॥

छं०— सिय राम प्रेम पियूष पूरन होत जनमु न भरत को ।
 मुनि मन अगम जम नियम सम दम बिषम ब्रत आचरत को ।
 दुख दाह दारिद दंभ दूषन सुजस मिस अपहरत को ।
 कलिकाल तुलसी से सठन्हि हठि राम सनमुख करत को ॥

सो०— भरत चरित करि नेमु तुलसी जो सादर सुनहिं ।

सीय राम पद पेमु अवसि होइ भव रस बिरति ॥ ३२६ ॥

मासपारायण, इक्कीसवाँ विश्राम


इति श्रीमद्रामचरितमानसे सकलकलिकलुषविध्वंसने

द्वितीयः सोपानः समाप्तः ।

(अयोध्याकाण्ड समाप्त)



सुतीक्ष्णजी रामके ध्यानमें



अतिमय प्रीति देखि रघुबीरा।
प्रगटे हृदयें हरन भव भीरा॥

॥ श्रीगणेशाय नमः ॥

श्रीजानकीवल्लभो विजयते

श्रीरामचरितमानस

तृतीय सोपान

अरण्यकाण्ड

श्लोक

मूलं धर्मतरोर्विवेकजलधेः पूर्णेन्दुमानन्ददं
वैराग्याम्बुजभास्करं ह्यघघनध्वान्तापहं तापहम् ।
मोहाम्बोधरपूगपाटनविधौ स्वःसम्भवं शङ्करं
वन्दे ब्रह्मकुलं कलङ्कशमनं श्रीरामभूप्रियम् ॥ १ ॥
सान्द्रानन्दपयोदसौभगतनुं पीताम्बरं सुन्दरं
पाणौ बाणशरासनं कटिलसत्तूणीरभारं वरम् ।
राजीवायतलोचनं धृतजटाजूटेन संशोभितं
सीतालक्ष्मणसंयुतं पथिगतं रामाभिरामं भजे ॥ २ ॥

सो०—उमा राम गुन गूढ़ पंडित मुनि पावहिं बिरति ।

पावहि मोह बिमूढ़ जे हरि बिमुख न धर्म रति ॥

पुर नर भरत प्रीति मैं गाई । मति अनुरूप अनूप सुहाई ॥

अब प्रभु चरित सुनहु अति पावन । करत जे बन सुर नर मुनि भावन ॥

एक बार चुनि कुसुम सुहाए । निज कर भूषन राम बनाए ॥

सीतहि पहिराए प्रभु सादर । बैठे फटिक सिला पर सुंदर ॥

सुरपति सुत धरि बायस बेषा । सठ चाहत रघुपति बल देखा ॥

जिमि पिपीलिका सागर थाहा । महा मंदमति पावन चाहा ॥

सीता चरन चोंच हति भागा । मूढ़ मंदमति कारन कागा ॥

चला रुधिर रघुनायक जाना । सीक धनुष सायक संधाना ॥

दो०—अति कृपाल रघुनायक सदा दीन पर नेह ।

ता सन आइ कीन्ह छलु मूर्ख अवगुन गेह ॥ १ ॥

प्रेरित मंत्र ब्रह्मसर धावा । चला भाजि बायस भय पावा ॥

धरि निज रूप गयउ पितु पाहीं । राम बिमुख राखा तेहि नाहीं ॥

भा निरास उपजी मन त्रासा । जथा चक्र भय रिषि दुर्बासा ॥

ब्रह्मधाम सिवपुर सब लोका । फिरा श्रमित व्याकुल भय सोका ।

काहूँ बैठन कहा न ओही । राखि को सकइ राम कर द्रोही ।

मातु मृत्यु पितु समन समाना । सुधा होइ बिष सुनु हरिजाना ॥

मित्र करइ सत रिपु कै करनी । ता कहँ बिबुधनदी बैतरनी ॥

सब जगु ताहि अनलहु ते ताता । जो रघुबीर बिमुख सुनु भ्राता ॥

नारद देखा बिकल जयंता । लागि दया कोमल चित संता ।
पठवा तुरत राम पहि ताही । कहेसि पुकारि प्रनत हित पाही ॥
आतुर सभय गहेसि पद जाई । त्राहि त्राहि दयाल रघुसाई ।
अतुलित बल अतुलित प्रभुताई । मैं मतिमंद जानि नहि पाई ॥
निज कृत कर्म जनित फल पायउँ अब प्रभु पाहि सरन तकि आयउँ ॥
सुनि कृपाल अति आरत बानी । एकनयन करि तजा भवानी ॥
सो०—कीन्ह मोह बस द्रोह जद्यपि तेहि कर बध उचित ।

प्रभु छाड़ेउ करि छोह को कृपाल रघुबीर सम ॥ २ ॥
रघुपति चित्रकूट बसि नाना । चरित किए श्रुति सुधा समाना ॥
बहुरि राम अस मन अनुमाना । होइहि भीर सबहिं मोहि जाना ॥
सकल मुनिन्ह सन बिदा कराई । सीता सहित चले द्वौ भाई ॥
अत्रि के आश्रम जब प्रभु गयऊ । सुनत महामुनि हरषित भयऊ ॥
पुलकित गात अत्रि उठि धाए । देखि रामु आतुर चलि आए ॥
करत दंडवत मुनि उर लाए । प्रेम बारि द्वौ जन अन्हवाए ।
देखि राम छबि नयन जुड़ाने । सादर निज आश्रम तब आने ॥
करि पूजा कहि बचन सुहाए । दिए मूल फल प्रभु मन भाए ।
सो०—प्रभु आसन आसीन भरि लोचन सोभा निरखि ।

मुनिबर परम प्रवीन जोरि पानि अस्तुति करत ॥ ३ ॥
छं०—नमामि भक्त वत्सलं । कृपालु शील कोमलं ।
भजामि ते पदांबुजं । अकामिनां स्वधामदं ॥

छन सुख लागि जनम सत कोटी । दुख न समुझ तेहि सम को खोटी ।
 बिनु श्रम नारि परम गति लहई । पतिव्रत धर्म छाड़ि छल गहई ॥
 पति प्रतिकूल जनम जहँ जाई । बिधवा होइ पाइ तरुनाई ॥
 सो०— सहज अपावनि नारि पति सेवत सुभ गति लहइ ।

जमु गावत श्रुति चारि अजहुँ तुलसिका हरिहि प्रिय ॥ ५ (क) ॥

सुनु सीता तब नाम सुमिरि नारि पतिव्रत करहिं ।

तोहि प्रानप्रिय राम कहिउँ कथा संसार हित ॥ ५ (ख) ॥

सुनि जानकी परम सुखु पावा । सादर तासु चरन सिरु नावा ॥
 तब मुनि सन कह कृपानिधाना । आयसु होइ जाउँ बन आना ॥
 संतत मो पर कृपा करेहू । सेवक जानि तजेहु जनि नेहू ॥
 धर्म धुरंधर प्रभु कै बानी । सुनि सप्रेम बोले मुनि ग्यानी ॥
 जासु कृपा अज सिव सनकादी । चहत सकल परमारथ बादी ।
 ते तुम्ह राम अकाम पिआरे । दीन बंधु मृदु बचन उचारे ।
 अब जानी मैं श्री चतुराई । भजी तुम्हहि सब देव बिहाई ॥
 जेहि समान अतिसय नहिं कोई । ता कर सील कस न अस होई ॥
 केहि बिधि कहौ जाहु अब स्वामी । कहहु नाथ तुम्ह अंतरजामी ।
 अस कहि प्रभु बिलोकि मुनि धीरा । लोचन जल बह पुलक सरीरा ॥
 छं०— तन पुलक निर्भर प्रेम पूरन नयन मुख पंकज दिए ।

मन ग्यान गुन गोतीत प्रभु मैं दीख जप तप का किए ॥

जप जोग धर्म समूह ते नर भगति अनुपम पावई ।
रघुबीर चरित पुनीत निसि दिन दास तुलसी गावई ॥

दो०— कलिमल समन दमन मन राम मुजस सुखमूल ।

सादर सुनहिं जे तिन्ह पर राम रहहिं अनुकूल ॥ ६ (क) ॥

सो०— कठिन काल मल कोस धर्म न ग्यान न जोग जप ।

परिहरि सकल भरोस रामहि भजहिं ते चतुर नर ॥ ६ (ख) ॥

मुनि पद कमल नाइ करि सीसा चले बनाहि सुर नर मुनि ईसा
आगे राम अनुज पुनि पाछे । मुनि बर बेध बने अति काछे ।
उभय बीच श्री सोहइ कैसी । ब्रह्म जीव बिच माया जैसी ॥
सरिता बन गिरि अवधट घाटा । पति पहिचानि देहिं बर बाटा ॥
जहँ जहँ जाहिं देव रघुराया । करहिं मेघ तहँ तहँ नभ छाया ।
मिला असुर बिराध मग जाता । आवतहों रघुबीर निपाता ॥
तुरतहि रुचिर रूप तेहि पावा । देखि दुखी निज धाम पठावा ।
पुनि आए जहँ मुनि सरभंगा । सुंदर अनुज जानकी संग ॥
दो०— देखि राम मुख पंकज मुनिबर लोचन भृंग ।

सादर पान करत अति धन्य जन्म सरभंग ॥ ७ ॥

कह मुनि सुनु रघुबीर कृपाला । संकर मानस राजमराला ॥
जात रहेउँ बिरंचि के धामा । सुनेउँ श्रवण बन ऐहहिं रामा ।
चितवत पंथ रहेउँ दिन राती । अब प्रभु देखि जुड़ानी छाती ॥
नाथ सकल साधन मैं हीना । कीन्ही कृपा जानि जन दीना ॥

सो कछु देव न मोहि निहोरा । निज पन राखेउ जन मन चोरा ॥
 तब लागि रहहु दीन हित लागी । जब लागि मिलौं तुम्हहि तनु त्यागी ॥
 जोग जाय जप तप ब्रत कीन्हा । प्रभु कहँ देइ भगति बर लीन्हा ॥
 एहि बिधि सर रचि मुनि सरभंगा । बैठे हृदयँ छाड़ि सब संगी ।
 दो०—सीता अनुज समेत प्रभु नील जलद तनु स्याम ।

मम हियँ बसहु निरंतर सगुनरूप श्रीराम ॥ ८ ॥
 अस कहि जोग अग्नि तनु जारा । राम कृपाँ बैकुण्ठ सिधारा
 ताते मुनि हरि लीन न भयऊ । प्रथमहिं भेद भगति बर लयऊ ।
 रिषि निकाय मुनिबर गति देखी । सुखी भए निज हृदयँ बिसेषी ॥
 अस्तुति करहिं सकल मुनि बृन्दा । जयति प्रनत हित करुना कंदा
 पुनि रघुनाथ चले बन आगे । मुनिबर बृन्दा बिपुल सँग लागे ।
 अस्थि समूह देखि रघुराया । पूछी मुनिन्ह लागि अति दाया ॥
 जानतहुँ पूछिअ कस स्वामी । सबदरसी तुम्ह अंतरजामी ॥
 निसिचर निकर सकल मुनि खाए । सुनि रघुबीर नयन जल छाए ॥
 दो०—निसिचर हीन करउँ पहि भुज उठाइ पन कीन्ह ।

सकल मुनिन्ह के आश्रमन्हि जाइ जाइ सुख दीन्ह ॥ ९ ॥
 मुनि अगस्ति कर सिष्य सुजाना । नाम सुतीछन रति भगवाना ॥
 मन क्रम बचन राम पद सेवक । सपनेहुँ आन भरोस न देवक ॥
 प्रभु आगवनु श्रवन सुनि पावा । करत मनोरथ आतुर थावा ।
 हे बिधि दीनबंधु रघुराया । मो से सठ पर करिहहिं दाया ॥

सहित अनुज मोहि राम गोसाईं । मिलिहहिं निज सेवक की नाई ॥
 मोरे जियँ भरोस दृढ़ नाहीं । भगति बिरति न ग्यान मन माहीं ॥
 नाहिं सतसंग जोग जप जागा । नाहिं दृढ़ चरन कमल अनुरागा ॥
 एक बानि करुनानिधान की । सो प्रिय जाकें गति न आन की ॥
 होइहैं सुफल आजु मम लोचन । देखि बदन पंकज भव मोचन ॥
 निर्भर प्रेम मगन मुनि ग्यानी । कहि न जाइ सो दसा भवानी ॥
 दिसि अरु बिदिसि पंथ नाहिं सूझा । को मैं चलेउँ कहाँ नाहिं बूझा ॥
 कबहुँक फिरि पाछें पुनि जाई । कबहुँक नृत्य करइ गुन गाई ॥
 अबिरल प्रेम भगति मुनि पाई । प्रभु देखैं तरु ओट लुकाई ॥
 अतिसय प्रीति देखि रघुबीरा । प्रगटे हृदयँ हरन भव भीरा ॥
 मुनि मग माझ अचल होइ बैसा । पुलक सरीर पनस फल जैसा ॥
 तब रघुनाथ निकट चलि आए । देखि दसा निज जन मन भाए ।
 मुनिहि राम बहु भाँति जगावा । जाग न ध्यान जनित सुख पावा ॥
 भूप रूप तब राम दुरावा । हृदयँ चतुर्भुज रूप देखावा ॥
 मुनि अकुलाइ उठा तब कैसैं । बिकल हीन मनि फनिबर जैसैं ॥
 आगें देखि राम तन स्यामा । सीता अनुज सहित सुख धामा ॥
 परेठ लकुट इव चरनहि लागी । प्रेम मगन मुनिबर बड़भागी ॥
 भूग बिसाल गहि लिए उठाई । परम प्रीति राखे उर लाई ॥
 मुनिहि मिलत अस सोह कृपाला । कनक तरुहि जनु भेंट तमाला ।
 राम बदन बिलोक मुनि ठाढ़ा । मानहुँ चित्र माझ लिखि काढ़ा ॥

दो०—तब मुनि हृदयँ धीर धरि गहि पद बारहि बार ।

निज आश्रम प्रभु आनि करि पूजा बिबिध प्रकार ॥ १० ॥
 कह मुनि प्रभु सुनु बिनती मोरी । अस्तुति करौ कवन बिधि तोरी ॥
 महिमा अमित मोरि मति थोरी । रवि सन्मुख खद्योत अँजोरी ॥
 श्याम तामरस दाप शरीरं । जटा मुकुट परिधन मुनिचीरं ॥
 पाणि चाप शर कटि तूणीरं । नौमि निरंतर श्रीरघुवीरं ॥
 मोह विपिन घन दहन कृशानुः । संत सरोरुह कानन भानुः ॥
 निसिचर करि वरूथ मृगराजः । त्रातु सदा नो भव खग बाजः ॥
 अरुण नयन राजीव सुनेशं । सीता नयन चकोर निशेशं ॥
 हर हृदि मानस बाल मरालं । नौमि राम उर बाहु विशाल ॥
 संशय सर्प ग्रसन उरगादः । शमन सुकर्कश तर्क विषादः ॥
 भव भंजन रंजन सुर यूथः । त्रातु सदा नो कृपा वरूथः ॥
 निर्गुण सगुण विषम सम रूपं । ज्ञान गिरा गोतीतमनूपं ॥
 अमलमखिलमनवद्यमपारं । नौमि राम भंजन महि भारं ॥
 भक्त कल्पपादप आरामः । तर्जन क्रोध लोभ मद कामः ॥
 अति नागर भव सागर सेतुः । त्रातु सदा दिनकर कुल केतुः ॥
 अतुलित भुज प्रताप बल धामः । कलि मल विपुल विभंजन नामः ॥
 धर्म वर्म नर्मद गुण ग्रामः । संतत शं तनोतु मम रामः ॥
 जदपि बिरज व्यापक अबिनासी । सब के हृदयँ निरंतर बासी ॥
 तदपि अनुज श्री सहित खरारी । बसतु मनसि मम कानन चारी ॥
 जे जानहिं ते जानहुँ स्वामी । सगुन अगुन उर अंतरजामी ॥

॥ कोसलपति राजिव नयना । करउ सो राम हृदय मम अयना ।
 अस अभिमान जाइ जनि भोरे । मैं सेवक रघुपति पति मोरे ॥
 शून मुनि बचन राम मन भाए । बहुरि हरषि मुनिबर उर लाए ॥
 परम प्रसन्न जानु मुनि मोही । जो बर मागहु देउँ सो तोही ॥
 मूनि कह मैं बर कबहुँ न जाचा । समुझि न परइ झूठ का साचा ॥
 गृहहि नीक लागै रघुराई । सो मोहि देहु दास सुखदाई ॥
 अतिरल भगति बिरति बिग्याना । होहु सकल गुन ग्यान निधाना ॥
 प्रभु जो दीन्ह सो बरु मैं पावा । अब सो देहु मोहि जो भावा ॥
 श्लो०— अनुज जानकी सहित प्रभु चाप बान धर राम ।

मम हिय गगन इंदु इव बसहु सदा निहकाम ॥ ११ ॥
 एवमस्तु करि रमानिवासा । हरषि चले कुंभज रिषि पासा ॥
 अहत दिवस गुर दरसनु पाएँ । भए मोहि एहिं आश्रम आएँ ॥
 अथ प्रभु संग जाउँ गुर पाहीं । तुम्ह कहँ नाथ निहोरा नाहीं ॥
 दीव्य कृपानिधि मुनि चतुराई । लिए संग बिहसे द्वौ भाई ॥
 गुरु कहत निज भगति अनूपा । मुनि आश्रम पहुँचे सुरभूपा ॥
 गुरु सुतीछन गुर पहिं गयऊ । करि दंडवत कहत अस भयऊ ॥
 नाथ कोसलाधीस कुमारा । आए मिलन जगत आधारा ॥
 राम अनुज समेत बैदेही । निसि दिनु देव जपत हहु जेही ॥
 गूना अगस्ति तुरत उठि धाए । हरि बिलोकि लोचन जल छाए ॥
 गूना पद कमल परे द्वौ भाई । रिषि अति प्रीति लिए उर लाई ॥

सादर कुसल पूछि मुनि ग्यानी । आसन बर बैठारे आनी ॥
 पुनि करि बहु प्रकार प्रभु पूजा । मोहि सम भाग्यवंत नहिं दूजा ॥
 जहँ लगि रहे अपर मुनि बृंदा । हरषे सब बिलोकि सुखकंदा ॥
 दो०—मुनि सपूह महँ खैटे सन्मुख सब की ओर ।

सरद इंदु तन चितवत मानहुँ निकर चकोर ॥ १२ ॥
 तब रघुबीर कहा मुनि पाहीं । तुम्ह सन प्रभु दुराव कछु नाहीं ॥
 तुम्ह जानहु जेहि कारन आयउँ । ताते तात न कहि समुझायउँ ॥
 अब सो मंत्र देहु प्रभु मोही । जेहि प्रकार मारौं मुनिद्रोही ।
 मुनि मुसुकाने सुनि प्रभु बानी । पूछेहु नाथ मोहि का जानी ॥
 तुम्हरेई भजन प्रभाव अघारी । जानउँ महिमा कछुक तुम्हारी ॥
 ऊमरि तरु बिसाल तव माया । फल ब्रह्मांड अनेक निकाया ॥
 जीव चराचर जंतु समाना । भीतर बसहिं न जानहिं आना ॥
 ते फल भच्छक कठिन कराला । तव भयँ डरत सदा सोड काला ॥
 ते तुम्ह सकल लोकपति साई । पूछेहु मोहि मनुज की नाई ॥
 यह बर मागउँ कृपानिकेता । बसहु हृदयँ श्री अनुज समेता ।
 अबिरल भगति बिरति सतसंगा । चरन सरोरुह प्रीति अभंगा ॥
 जद्यपि ब्रह्म अखंड अनंता । अनुभव गम्य भजहिं जेहि संता ॥
 अस तव रूप बखानउँ जानउँ । फिरि फिरि सगुन ब्रह्म रति मानउँ ॥
 संतत दासन्ह देहु बड़ाई । तातें मोहि पूछेहु रघुराई ।
 है प्रभु परम मनोहर ठाऊँ । पावन पंचवटी तेहि नाऊँ ॥

दंडक बन पुनीत प्रभु करहू । उग्र साप मुनिबर कर हरहू ॥
 आस करहु तहँ रघुकुल राया । कीजे सकल मुनिन्ह पर दायी ॥
 चले राम मुनि आयसु पाई । तुरतहिं पंचवटी निअराई ॥
 दो०—गोधराज सैं भेंट भइ बहु बिधि प्रीति बढ़ाइ ।

गोदावरी निकट प्रभु रहे परन गृह छाड़ ॥ १३ ॥
 जब ते राम कीन्ह तहँ बासा । सुखी भए मुनि बीती त्रासा ॥
 गिरि बन नदीं ताल छबि छाए । दिन दिन प्रति अति होहिं सुहाए ॥
 खग मृग बृंद अनंदित रहहीं । मधुप मधुर गुंजत छबि लहहीं ॥
 सो बन बरनि न सक अहिराजा । जहाँ प्रगट रघुबीर बिराजा ॥
 एक बार प्रभु सुख आसीना । लछिमन बचन कहे छलहीना ॥
 सुर नर मुनि सचराचर साई । मैं पूछउँ निज प्रभु की नाई ॥
 मोहि समुझाइ कहहु सोइ देवा । सब तजि करौं चरन रज सेवा ॥
 कहहु ग्यान बिराग अरु माया । कहहु सो भगति करहु जेहिं दायी ॥
 दो०—ईस्वर जीव भेद प्रभु सकल कहौ समुझाइ ।

जातें होइ चरन रति सोक मोह भ्रम जाइ ॥ १४ ॥
 थारेहि महँ सब कहउँ बुझाई । सुनहु तात मति मन चित लाई ॥
 मैं अरु मोर तोर तैं माया । जेहिं बस कीन्ह जीव निकाया ॥
 गो गोचर जहँ लागि मन जाई । सो सब माया जानेहु भाई ॥
 तेहि कर भेद सुनहु तुम्ह सोऊ । बिद्या अपर अबिद्या दोऊ ॥
 एक दुष्ट अतिसय दुखरूपा । जा बस जीव परा भवकूपा ॥

एक रचइ जग गुन बस जाकैं । प्रभु प्रेरित नहिं निज बल ताकैं ।
 ग्यान मान जहँ एकउ नाही । देख ब्रह्म समान सब माहीं ॥
 कहिअ तात सो परम बिरागी । तू न सम सिद्धि तीनि गुन त्यागी ॥
 दो०— माया ईस न आपु कहूँ जान कहिअ सो जीव ।

बंध मोच्छप्रद सर्वपर माया प्रेरक सीव ॥ १५ ॥
 धर्म तैं बिरति जोग तैं ग्याना । ग्यान मोच्छप्रद बेद बखाना ॥
 जातैं बेगि द्रवउँ मैं भाई । सो मम भगति भगत सुखदाई ।
 सो सुतंत्र अवलंब न आना । तेहि आधीन ग्यान बिग्याना ॥
 भगति तात अनुपम सुखमूला । मिलइ जो संत होइँ अनुकूला ।
 भगति कि साधन कहउँ बखानी । सुगम पंथ मोहि पावहिं प्रानी ।
 प्रथमहिं बिप्र चरन अति प्रीती । निज निज कर्म निरत श्रुति रीती ।
 एहि कर फल पुनि बिषय विरागा । तब मम धर्म उपज अनुरागा ।
 श्रवनादिक नव भक्ति दृढ़ाहीं । मम लीला रति अति मन माहीं ॥
 संत चरन पंकज अति प्रेमा । मन क्रम बचन भजन दृढ़ नेमा ॥
 गुरु पितु मातु बंधु पति देवा । सब मोहि कहँ जानै दृढ़ सेवा ।
 मम गुन गावत पुलक सरीरा । गदगद गिरा नयन बह नीरा ॥
 काम आदि मद दंभ न जाकैं । तात निरंतर बस मैं ताकैं ॥
 दो०— बचन कर्म मन मोरि गति भजनु करहिं निःकाम ।

तिन्ह के हृदय कमल महुँ करउँ सदा बिश्राम ॥ १६ ॥
 भगति जोग सुनि अति सुख पावा । लछिमन प्रभु चरनिहि सिरु नावा ॥

एहि बिधि गए कछुक दिन बीती । कहत बिराग ग्यानु गुन नीती ॥
 सूपनखा रावन कै बहिनी । दुष्ट हृदय दारुन जस अहिनी ॥
 पंचबटी सो गइ एक बारा । देखि बिकल भइ जुगल कुमारा ॥
 भ्राता पिता पुत्र उरगारी । पुरुष मनोहर निरखत नारी ॥
 होइ बिकल सक मनहि न रोकी । जर्म रश्मिनि द्रव रबिहि बिलोकी ।
 रुचिर रूप धरि प्रभु पहिं जाई । बोली बचन बहुत मुसुकाई ॥
 तुम्ह सम पुरुष न मो सम नारी । यह सँजोग बिधि रचा बिचारी ॥
 मम अनुरूप पुरुष जग माहीं । देखेउँ खोजि लोक तिहु नाहीं ॥
 तारैं अब लागि रहिउँ कुमारी । मनु माना कछु तुम्हहि निहारी ॥
 सीतहि चितइ कही प्रभु बाता । अहइ कुआर मोर लघु भ्राता ॥
 गइ लछिमन रिपु भगिनी जानी । प्रभु बिलोकि बोले मृदु बानी ॥
 सुंदरि सुनु मैं उह कर दासा । पराधीन नहिं तोर सुपासा ॥
 प्रभु समर्थ कोसलपुर राजा । जो कछु करहिं उनहि सब छाजा ॥
 सेवक सुख चह मान भिखारी । व्यसनी धन सुभ गति बिभिचारी ।
 लोभी जसु चह चार गुमानी । नभ दुहि दूध चहत ए प्राणी ॥
 पुनि फिरि राम निकट सो आई । प्रभु लछिमन पहिं बहुरि पठाई ॥
 लछिमन कहा तोहि सो बरई । जो तृन तोरि लाज परिहरई ॥
 तब खिसिआनि राम पहिं गई । रूप भयंकर प्रगटत भई ॥
 सीतहि सभय देखि रघुराई । कहा अनुज सन सयन बुझाई ॥
 दो०—लछिमन अति लाघवैं सो नाक कान बिनु कीन्हि ।

ताके कर रावन कहैं मनौ चुनौती दीन्हि ॥ १७ ॥

नाक कान बिनु भइ बिकरारा । जनु खव सैल गेरु कै धारा ॥
 खर दूषन पहिं गइ बिलपाता । धिग धिग तव पौरुष बल भ्राता ॥
 तेहिं पूछा सब कहेसि बुझाई । जातुधान सुनि सेन बनाई ॥
 धाए निसिचर निकर बरूथा । जनु सपच्छ कज्जल गिरि जूथा ॥
 नाना बाहन नानाकारा । नानायुध धर घोर अपारा ॥
 सूपनखा आगे करि लीनी । असुभ रूप श्रुति नासा हीनी ॥
 असगुन अमित हांहिं भयकारी । गनहिं न मृत्यु बिबस सब झारी ॥
 गर्जहिं तर्जहिं गगन उड़ाहीं । देखि कटकु भट अति हरषाहीं ॥
 कोउ कह जितत धरहु द्वौ भाई । धरि मारहु तिय लेहु छड़ाई ॥
 धूरि पूरि नभ मंडल रहा । राम बोलाइ अनुज सन कहा ॥
 लै जानकिहि जाहु गिरि कंदर । आवा निसिचर कटकु भयंकर ॥
 रहेहु सजग सुनि प्रभु कै बानी । चले सहित श्री सर धनु पानी ॥
 देखि राम रिपुदल चलि आवा । बिहसि कठिन कोदंड चढ़ावा ॥
 छं०— कोदंड कठिन चढ़ाइ सिर जट जूट बाँधत सोह क्यों ।

मरकत सयल पर लरत दामिनि कोटि सों जुग भुजग ज्यों ॥

कटि कसि निषंग बिसाल भुज गहि चाप बिसिख सुधारि कै ।

चितवत मनहुँ मृगराज प्रभु गजराज घटा निहारि कै ॥

सो०—आइ गए व्यगमेल धरहु धरहु धावत सुभट ।

जथा बिलोकि अकेल बाल रबिहि घेरत दनुज ॥ १८ ॥

प्रभु बिलोकि सर सकहिं न डारी । थकित भई रजनीचर धारी ॥

सचिव बोलि बोले खर दूषन । यह कोउ नृपबालक नर भूषन ॥

नाग असुर सुर नर मुनि जेते । देखे जिते हते हम केते ॥
हम भरि जन्म सुनहु सब भाई । देखी नहिं असि सुंदरताई ॥
जद्यपि भगिनो कीन्ह कुरूपा । बध लायक नहिं पुरुष अनूपा ॥
देहु तुरत निज नारि दुराई । जीअत भवन जाहु द्वौ भाई ॥
मोर कहा तुम्ह ताहि सुनावहु । तासु बचन सुनि आतुर आवहु ॥
दूतन्ह कहा राम सन जाई । सुनत राम बोले मुसुकाई ॥
हम छत्री मृगया बन करहीं । तुम्ह से खल मृग खोजत फिरहीं ॥
रिपु बलवंत देखि नहिं डरहीं । एक बार कालहु सन लरहीं ॥
जद्यपि मनुज दनुज कुल घालक । मुनि पालक खल सालक बालक ॥
जौ न होइ बल घर फिरि जाहू । समर बिमुख मैं हतउँ न काहू ॥
रन चढ़ि करिअ कपट चतुराई । रिपु पर कृपा परम कदराई ॥
दूतन्ह जाइ तुरत सब कहेऊ । सुनि खर दूषन उर अति दहेऊ ॥

छं०— उर दहेउ कहेउ कि धरहु धाए बिकट भट रजनीचरा ।

सर चाप तोमर सक्ति सूल कृपान परिष परसु धरा ॥

प्रभु कीन्ह धनुष टकोर प्रथम कठोर घोर भयावहा ।

भए बधिर व्याकुल जातुधान न ग्यान तेहि अवसर रहा ॥

दो०— सावधान होइ धाए जानि सबल आराति ।

लागे बरषन राम पर अस्त्र सस्त्र बहुभाँति ॥ ११ (क) ॥

तिन्ह के आयुध तिल सम करि काटे रघुबीर ।

तानि सरासन श्रवन लागि पुनि छाँड़े निज तीर ॥ ११ (ख) ॥

छं०—तब चले बान कराल । फुंकरत जनु बहु ब्याल ॥
 कोपेउ समर श्रीराम । चले बिसिख निसित निकाम ॥
 अबलोकि खरतर तीर । मुरि चले निसिचर क्षीर ॥
 भए क्रुद्ध तीनिउ भाइ । जो भागि रन ते जाइ ॥
 तेहि बधब हम निज पानि । फिरे मरन मन महँ ठानि ॥
 आयुध अनेक प्रकार । सनमुख ते करहि प्रहार ॥
 रिपु परम कोपे जानि । प्रभु धनुष सर संधानि ॥
 छाँड़े बिपुल नाराच । लगे कटन बिकट पिसाच ॥
 उर सीस भुज कर चरन । जहँ तहँ लगे महि परन ॥
 चिक्करत लागत बान । धर परत कुधर समान ॥
 भट कटत तन सत खंड । पुनि उठत करि पाषंड ॥
 नभ उड़त बहु भुज मुंड । बिनु मौलि धावत रुंड ॥
 खग कंक काक सृगाल । कटकटहि कठिन कराल ॥

छं०—कटकटहि जंबुक भूत प्रेत पिसाच खरपर संचहीं ।
 बेताल बीर कपाल ताल बजाइ जोगिनि नंचहीं ॥
 रघुबीर बान प्रचंड खंडहि भटन्ह के उर भुज सिरा ।
 जहँ तहँ परहि उठि लरहि धर धरु धरु करहि भयकर गिरा ॥
 अंतावरीं गहि उड़त गीध पिसाच कर गहि धावहीं ।
 संग्राम पुर बासी मनहुँ बहु बाल गुड़ी उड़ावहीं ॥
 मारे पछारे उर बिदारे बिपुल भट कहँरत परे ।
 अबलोकि निज दल बिकल भट तिसिरादि खर दूषन फिरे ॥

सर सक्ति तोमर परसु भूल कृपान एकहि बारहीं ।
करि कोप श्रीरघुबीर पर अगनित निसाचर डारहीं ॥
प्रभु निमिष महुँ रिपु सर निवारि पचारि डारे सायका ।
दस दस बिसिख उर माझ मारे सकल निसिचर नायका ॥
महि परत उठि भट भिरत मरत न करत माया अति घनी ।
सुर डरत चौदह सहस प्रेत बिलोकि एक अवध धनी ॥
सुर मुनि सभय प्रभु देखि मायानाथ अति कौतुक कर्यो ।
देखहिं परसपर राम करि संग्राम रिपुदल लरि मर्यो ॥

दो० — राम राम कहि तनु तजहिं पावहिं पद निर्बान ।

करि उपाय रिपु मारे छन महुँ कृपानिधान ॥ २० (क) ॥

हरषित बरषहिं सुमन सुर बाजहिं गगन निसान ।

अस्तुति करि करि सब चले सोभित बिबिध बिमान ॥ २० (ख) ॥

जब रघुनाथ समर रिपु जीते । सुर नर मुनि सब के भय बीते ॥
तब लछिमन सीतहि लै आए । प्रभु पद परत हरषि उर लाए ॥
सीता चितव स्याम मृदु गाता । परम प्रेम लोचन न अघाता ॥
पंचवटी बसि श्रीरघुनायक । करत चरित सुर मुनि सुखदायक ॥
धुआँ देखि खरदूषन केरा । जाइ सुपनखाँ रावन प्रेरा ॥
बोली बचन क्रोध करि भारी । देस कोस कै सुरति बिसारी ॥
करसि पान सोवसि दिनु राती । सुधि नहिं तब सिर पर आराती ॥
राज नीति बिनु धन बिनु धर्मा । हरिहिं समर्पे बिनु सतकर्मा ॥

बिद्या बिनु बिबेक उपजाएँ । श्रम फल पढ़ें किएँ अरु पाएँ ॥
 संग तैं जती कुमंत्र ते राजा । मान ते ग्यान पान तैं लाजा ॥
 प्रीति प्रनय बिनु मद ते गुनी । नासहिं बेगि नीति अस सुनी ॥
 सो०—रिपु रुज पावक पाप प्रभु अहि गनिअन छोट करि ।

अस कहि बिबिध बिलाप करि लागी रोदन करन ॥ २१ (क) ॥

दो०—सभा भाझ परि ब्याकुल बहु प्रकार कह रोड़ ।

तोहि जिअत दसकंधर मोरि कि असि गति होइ ॥ २१ (ख) ॥
 सुनत सभासद उठे अकुलाई । समुझाई गहि बाँह उठाई ॥
 कह लंकेस कहसि निज बाता । केइँ तव नासा कान निपाता ॥
 अवध नृपति दसरथ के जाए । पुरुष सिंघ बन खेलन आए ॥
 समुझि परी मोहि उन्ह कै करनी । रहित निसाचर करिहिं धरनी ॥
 जिन्ह कर भुजबल पाइ दसानन । अभय भए बिचरत मुनि कानन ॥
 देखत बालक काल समाना । परम धीर धन्वी गुन नाना ॥
 अतुलित बल प्रताप द्वौ भ्राता । खल बधरत सुर मुनि सुखदाता ॥
 सोभा धाम राम अस नामा । तिन्ह के संग नारि एक स्यामा ॥
 रूप रासि बिधि नारि सँवारी । रति सत कोटि तासु बलिहारी ॥
 तासु अनुज काटे श्रुति नासा । सुनि तव भगिनि करहिं परिहासा ॥
 खर दूषन सुनि लगे पुकारा । छन महँ सकल कटक उन्ह मारा ॥
 खर दूषन तिसिरा कर घाता । सुनि दससीस जरे सब गाता ॥
 दो०—सूपनखहि समुझाइ करि बल बोलेसि बहु भाँति ।

गयउ भवन अति सोचबस नीद परइ नहिं राति ॥ २२ ॥

सुर नर असुर नाग खग माहीं । मोरे अनुचर कहँ कोउ नाहीं ॥
 खर दूषन मोहि सम बलवंता । तिन्हहि को मारइ बिनु भगवंता ॥
 सुर रंजन भंजन महि भारा । जौं भगवंत लीन्ह अवतारा ॥
 तौ मैं जाइ बैरु हठि करऊँ । प्रभु सर प्राण तजें भव तरऊँ ॥
 होइहि भजनु न तामस देहा । मन क्रम बचन मंत्र दृढ़ एहा ॥
 जौं नररूप भूपसुत कोऊ । हरिहउँ नारि जीति रन दोऊ ॥
 चला अकेल जान चढ़ि तहवाँ । बस मारीच सिधु तट जहवाँ ॥
 इहाँ राम जसि जुगुति बनाई । सुनहु उमा सो कथा सुहाई ॥
 दो०— लछिमन गए बनहिं जब लेन मूल फल कंद ।

जनकसुता सन बोले बिहसि कृपा सुख बृंद ॥ २३ ॥
 सुनहु प्रिया ब्रत रुचिर सुसीला । मैं कछु करबि ललित नरलीला ॥
 तुम्ह पावक महुँ करहु निवासा । जौं लगि करौं निसाचर नासा ॥
 जबहिं राम सब कहा बखानी । प्रभु पद धरि हियँ अनल समानी ॥
 निज प्रतिबिंब राखि तहँ सीता । तैसइ सील रूप सुबिनीता ॥
 लछिमनहूँ यह मरमु न जाना । जो कछु चरित रचा भगवाना ॥
 दसमुख गयउ जहाँ मारीचा । नाइ माथ स्वारथ रत नीचा ॥
 नवनि नीच कै अति दुखदाई । जिमि अंकुस धनु उरग बिलाई ॥
 भयदायक खल कै प्रिय बानी । जिमि अकाल के कुसुम भवानी ॥
 दो०— करि पूजा मारीच तब सादर पूछी बात ।

कवन हेतु मन व्यग्र अति अकसर आयहु तात ॥ २४ ॥

दसमुख सकल कथा तेहि आगे । कही सहित अभिमान अभागें ॥
 होहु कपट मृग तुम्ह छलकारी । जेहि बिधि हरि आनौ नृपनारी ॥
 तेहिं पुनि कहा सुनहु दससौसा । ते नररूप चराचर ईसा ॥
 तासों तात बयरु नहिं कीजै । मारें मरिअ जिआएँ जीजै ॥
 मुनि मख राखन गयउ कुमारा । बिनु फर सर रघुपति मोहि मारा ॥
 सत जोजन आयउँ छन माहीं । तिन्ह सन बयरु किएँ भल नाहीं ॥
 भइ मम कीट भृंग की नाई । जहँ तहँ मैं देखउँ दोउ भाई ॥
 जौ नर तात तर्दाप अति सूरा । तिन्हहि बिरोधि न आइहि पूरा ॥
 दो०— जेहिं ताड़का सुबाहु हति खंडेउ हर कोदंड।

खर दूषन तिसिरा बधेउ मनुज कि अस बरिबंड ॥ २५ ॥
 जाहु भवन कुल कुसल बिचारी । सुनत जरा दीन्हिसि बहु गारी ॥
 गुरु जिमि मूढ़ करसि मम बोधा । कहु जग मोहि समान को जोधा ॥
 तब मारीच हृदयँ अनुमाना । नवाहि बिरोधे नहिं कल्याणा ॥
 सस्त्री मर्मी प्रभु सठ धनी । बैद बंदि कबि भानस गुनी ॥
 उभय भाँति देखा निज मरना । तब ताकिसि रघुनायक सरना ॥
 उतरु देत मोहि बधब अभागें । कस न मरौ रघुपति सर लागें ॥
 अस जियँ जानि दसानन संग्गा । चला राम पद प्रेम अभंगा ॥
 मन अति हरष जनाव न तेही । आजु देखिहउँ परम सनेही ॥
 छं०— निज परम प्रीतम देखि लोचन सुफल करि सुख पाइहीं।

श्रीसहित अनुज समेत कृपानिकेत पद मन लाइहीं ॥

निर्बान दायक क्रोध जा कर भगति अबसहि बसकरी ।

निज पानि सर संधानि सो मोहि बधिहि सुखसागर हरी ॥

दो०— मम पाछें धर धावत धरें सरासन खान ।

फिरि फिरि प्रभुहि बिलोकिहउँ धन्य न मो सम आन ॥ २६ ॥

तेहि बन निकट दसानन गयऊ । तब मारीच कपटमृग भयऊ ॥

अति बिचित्र कछु बरनि न जाई । कनक देह मनि रचित बनाई ।

सीता परम रुचिर मृग देख्वा । अंग अंग सुमनोहर बेषा ॥

सुनहु देव रघुबीर कृपाला । एहि मृग कर अति सुंदर छाला ॥

सत्यसंध प्रभु बधि करि एही । आनहु चर्म कहति बैदेही ॥

तब रघुपति जानत सब कारन । उठे हरषि सुर काजु सँवारन ॥

मृग बिलोकि कटि परिकर बाँधा । करतल चाप रुचिर सर साँधा ॥

प्रभु लछिमनहि कहा समुझाई । फिरत बिपिन निसिचर बहु भाई ॥

सीता केरि करेहु रखवारी । बुधि बिबेक बल समय बिचारी ॥

प्रभुहि बिलोकि चला मृग भाजी । धाए रामु सरासन साजी ॥

निगम नेति सिव ध्यान न पावा । मायामृग पाछें सो धावा ॥

कबहुँ निकट पुनि दूर पराई । कबहुँक प्रगटइ कबहुँ छपाई ॥

प्रगटत दुरत करत छल भूरी । एहि बिधि प्रभुहि गयउ लै दूरी ॥

तब तकि राम कठिन सर मारा । धरनि परेउ करि घोर पुकारा ॥

लछिमन कर प्रथमहि लै नामा । पाछें सुमिरेसि मन महुँ रामा ॥

प्राण तजत प्रगटेसि निज देहा । सुमिरेसि रामु समेत सनेहा ॥

अंतर प्रेम तासु पहिचाना । मुनि दुर्लभ गति दीन्ह सुजाना ॥

दो०— बिपुल सुमन सुर बरषहिं गावहिं प्रभु गुन गाथ।

निज पद दीन्ह असुर कहूँ दीनबंधु रघुनाथ ॥ २७ ॥
 खल बधि तुरत फिरे रघुबीरा । सोह चाप कर कटि तूनीरा ॥
 आरत गिरा सुनी जब सीता । कह लछिमन सन परम सभीता ॥
 जाहु बेगि संकट अति भ्राता । लछिमन बिहसि कहा सुनु माता ॥
 भृकुटि बिलास सृष्टि लय होई । सपनेहुँ संकट परइ कि सोई ॥
 भरम बचन जब सीता बोला । हरि प्रेरित लछिमन मन डोला ॥
 बन दिसि देव सौँपि सब काहू । चले जहाँ रावन ससि राहू ॥
 सून बीच दसकंधर देखा । आवा निकट जती कै बेषा ॥
 जाकैं डर सुर असुर डेराहीं । निसि न नीद दिन अत्र न खाहीं ॥
 सो दससीस स्वान की नाई । इत उत चितइ चला भडिहाई ॥
 इमि कुपंथ पग देत खगेसा । रह न तेज तन बुधि बल लेसा ॥
 नाना बिधि करि कथा सुहाई । राजनीति भय प्रीति देखाई ॥
 कह सीता सुनु जती गोसाई । बोलेहु बचन दुष्ट की नाई ॥
 तब रावन निज रूप देखावा । भई सभय जब नाम सुनावा ॥
 कह सीता धरि धीरजु गाढ़ा । आइ गयउ प्रभु रहु खल ठाढ़ा ॥
 जिमि हरिबधुहि छुद्र सस चाहा । भएसि कालबस निसिचर नाहा ।
 सुनत बचन दससीस रिसाना । मन महुँ चरन बंदि सुख माना ॥
 दो०— क्रोधवंत तब रावन लीन्हिसि रथ बैठाइ।

चला गगनपथ आतुर भयँ रथ हाँकि न जाइ ॥ २८ ॥

हा जग एक बीर रघुराया । केहिं अपराध बिसारेहु दाया ॥
 आरति हरन सरन सुखदायक । हा रघुकुल सरोज दिननायक ॥
 हा लछिमन तुम्हार नहिं दोसा । सो फलु पायउँ कीन्हेउँ रोसा ॥
 बिबिध बिलाप करति बैदेही । भूरि कृपा प्रभु दूरि सनेही ॥
 बिपति मोरि को प्रभुहि सुनावा । पुरोडास चह रासभ खावा ॥
 सीता कै बिलाप सुनि भारी । भए चराचर जीव दुखारी ॥
 गीधराज सुनि आरत बानी । रघुकुलतिलक नारि पहिचानी ॥
 अधम निसाचर लीन्हें जाई । जिमि मलेछ बस कपिला गाई ॥
 सीते पुत्रि करसि जनि त्रासा । करिहउँ जातुधान कर नासा ॥
 धावा क्रोधवंत खग कैसैं । छूटइ पबि परबत कहूँ जैसैं ॥
 रे रे दुष्ट ठाढ़ किन होही । निर्भय चलेसि न जानेहि मोही ॥
 आवत देखि कृतांत समाना । फिरि दसकंधर कर अनुमाना ॥
 की मैनाक कि खगपति होई । मम बल जान सहित पति सोई ॥
 जाना जरठ जटायू एहा । मम कर तीरथ छाँड़िहि देहा ॥
 सुनत गीध क्रोधातुर धावा । कह सुनु रावन मोर सिखावा ॥
 तजि जानकिहि कुसल गृह जाहू । नाहिं त अस होइहि बहुबाहू ॥
 राम रोष पावक अति घोरा । होइहि सकल सलभ कुल तोरा ॥
 उतरु न देत दसानन जोधा । तबहिं गीध धावा करि क्रोधा ॥
 भरि कच बिरथ कीन्ह महि गिरा । सीतहि राखि गीध पुनि फिरा ॥
 चोचन्ह मारि बिदारेसि देही । दंड एक भइ मुरुछा तैही ॥
 तब सक्रोध निसिचर खिसिआना । कादेसि परम कराल कृपाना ॥

काटेसि पंख परा खग धरनी । सुमिरि राम करि अदभुत करनी ॥
 सीतहि जान चढ़ाइ बहोरी । चला उताइल त्रास न थोरी ॥
 करति बिलाप जाति नभ सीता । ब्याध बिबस जनु मृगी सभोता ॥
 गिरि पर बैठे कपिन्ह निहारी । कहि हरि नाम दीन्ह पट डारी ॥
 एहि बिधि सीतहि सो लै गयऊ । बन असोक महँ राखत भयऊ ।
 दो०— हरि परा खल बहु बिधि भय अरु प्रीति देखाइ ।

तब अमोक पादप तर राखिसि जतन कराइ ॥ २९ (क) ॥

नवाह्नपरायण, छठा विश्राम

जेहि बिधि कपट कुरंग सँग थाइ चले श्रीराम ।

सो छबि सीता राखि उर रटति रहति हरिनाम ॥ २९ (ख) ॥

रघुपति अनुजहि आवत देखी । बाहिज चिंता कीन्ह बिसेषी ॥
 जनकसुता परिहरिहु अकेली । आयहु तात बचन मम पेली ।
 निसिचर निकर फिरहिं बन माहीं । मम मन सीता आश्रम नाहीं ॥
 गहि पद कमल अनुज कर जोरी । कहेउ नाथ कहु मोहि न खोरी ॥
 अनुज समेत गए प्रभु तहवाँ । गोदावरि तट आश्रम जहवाँ ।
 आश्रम देखि जानकी होना । भए बिकल जस प्राकृत दीना ॥
 हा गुन खानि जानकी सीता । रूप सील ब्रत नेम पुनीता ।
 लछिमन समुझाए बहु भाँती । पूछत चले लता तरु पाँती ॥
 हे खग मृग हे मधुकर श्रेणी । तुम्ह देखी सीता मृगनैनी ॥
 खंजन सुक कपोत मृग मीना । मधुप निकर कोकिला प्रबीना ॥

कुंद कली दाढ़िम दामिनी । कमल सरद ससि अहिभामिनी ॥
 बरुन पास मनोज धनु हंसा । गज केहरि निज सुनत प्रसंसा ॥
 श्रीफल कनक कदलि हरषाहीं । नेकु न संक सकुच मन माहीं ॥
 सुनु जानकी तोहि बिनु आजू हरषे सकल पाइ जनु राजू ।
 किमि सहि जात अनख तोहि पाहीं । प्रिया बेगि प्रगटसि कस नाहीं
 एहि बिधि खोजत बिलपत स्वामी । मनहुँ महा बिरही अति कामी ।
 पूरनकाम राम सुख रासी । मनुजचरित कर अज अबिनासी ॥
 आगे परा गौधपति देखा । सुमिरत राम चरन जिन्ह रेखा ॥
 दो०— कर सरोज सिर परसेउ कृपासिंधु रघुबीर ।

निरखि राम छबि धाम मुख बिगत भई सब पीर ॥ ३० ॥
 तब कह गौध बचन धरि धीरा । सुनहु राम भंजन भव भीरा ॥
 नाथ दसानन यह गति कीन्ही । तेहिं खल जनकसुता हरि लीन्ही ॥
 लै दच्छिन् दिसि गयउ गोसाईं । बिलपति अति कुररी की नाई ॥
 दरस लागि प्रभु राखेउँ प्राना । चलन चहत अब कृपानिधाना ॥
 राम कहा तनु राखहु ताता । मुख मुसुकाइ कही तेहिं बाता ॥
 जाकर नाम भरत मुख आवा । अधमउ मुकुत होइ श्रुति गावा ॥
 सो मम लोचन गोचर आगे । राखौं देह नाथ केहि खाँगे ॥
 जल भरि नयन कहहिं रघुराई । तात कर्म निज तैं गति पाई ॥
 परहित बस जिन्ह के मन माहीं । तिन्ह कहूँ जग दुर्लभ कछु नाहीं ॥
 तनु तजि तात जाहु मम धामा । देउँ काह तुम्ह पूरनकामा ॥

दो०— सीता हरन तात जनि कहहु पिता सन जाइ।

जौं मैं राम त कुल सहित कहिहि दसानन आइ ॥ ३१ ॥
गीध देह तजि धरि हरि रूपा । भूषन बहु पट पीत अनूपा ॥
स्याम गात बिसाल भुज चारी । अस्तुति करत नयन भरि बारी ॥

छं०— जय राम रूप अनूप निर्गुन सगुन गुन प्रेरक सही।
दससीस बाहु प्रचंड खंडन चंड सर मंडन मही ॥
पाथोद गात सरोज मुख राजीव आयत लोचन ।
नित नौमि रामु कृपाल बाहु बिसाल भव भय मोचन ॥
बलमप्रमेयमनादिमजमव्यक्तमेकमगोचरं ।
गोबिंद गोपर द्वंद्वहर बिग्यानधन धरनीधरं ॥
जे राम मंत्र जपंत संत अनंत जन मन रंजन ।
नित नौमि राम अकाम प्रिय कामादि खल दल गंजन ॥
जेहि श्रुति निरंजन ब्रह्म व्यापक बिरज अज कहि गावहीं ।
करि ध्यान ग्यान बिराग जोग अनेक मुनि जेहि पावहीं ॥
सो प्रगट करुना कंद सोभा बृंद अग जग मोहई ।
मम हृदय पंकज भृंग अंग अनंग बहु छबि सोहई ॥
जो अगम सुगम सुभाव निर्मल असम सम सीतल सदा ।
पस्यंति जं जोगी जतन करि करत मन गो बस सदा ॥
सो राम रमा निवास संतत दास बस त्रिभुवन धनी ।
मम उर बसउ सो समन संसृति जासु कीरति पावनी ॥

दो०—अबिरल भगति मागि बर गीध गयउ हरिधाम।

तेहि की क्रिया जथोचित निज कर कीन्ही राम॥ ३२॥
 कोमल चित अति दीनदयाला । कारन बिनु रघुनाथ कृपाला ॥
 गीध अधम खग आमिष भोगी । गति दीन्ही जो जाचत जोगी ॥
 सुनहु उमा ते लोग अभागी । हरि तजि होहिं बिषय अनुरागी ॥
 पुनि सीतहि खोजत द्वौ भाई । चले बिलोकत बन बहुताई ॥
 संकुल लता बिटप घन कानन । बहु खग भृग तहँ गज पंचानन ॥
 आवत पंथ कबंध निपाता । तेहि सब कही साप कै बाता ॥
 दुरबासा मोहि दीन्ही सापा । प्रभु पद पेखि मिटा सो पापा ॥
 सुनु गंधर्व कहउँ मैं तोही मोहि न सोहाइ ब्रह्मकुल द्रोही ॥
 दो०—मन क्रम बचन कपट तजि जो कर भूसुर सेव।

मोहि समेत बिरंचि सिव बस ताकें सब देव॥ ३३॥
 सापत ताड़त परुष कहंता । बिप्र पूज्य अस गावहिं संता ॥
 पूजिअ बिप्र सील गुन हीना । सूद्र न गुन गन ग्यान प्रबीना ।
 कहि निज धर्म ताहि समुझावा । निज पद प्रीति देखि मन भावा ॥
 रघुपति चरन कमल सिरु नाई । गयउ गगन आपनि गति पाई ॥
 ताहि देइ गति राम उदारा । सबरी कें आश्रम पगु धारा ॥
 सबरी देखि राम गृहँ आए । मुनि के बचन समुझि जियँ भाए ॥
 सरसिज लोचन बाहु बिसाला । जटा मुकुट सिर उर बनमाला ॥
 स्याम गौर सुंदर दोउ भाई । सबरी परी चरन लपटाई ॥

प्रेम मगन मुख बचन न आवा । पुनि पुनि पद सरोज सिर नावा ॥
सादर जल लै चरन पखारे । पुनि सुंदर आसन बैठारे ॥
दो०— कंद मूल फल सुग्म अति दिए राम कहुं आनि ।

प्रेम सहित प्रभु खाए बारंबार बखानि ॥ ३४ ॥
पानि जोरि आगें भइ ठाढ़ी । प्रभुहि बिलोकि प्रीति अति बाढ़ी ॥
केहि बिधि अस्तुति करौ तुम्हारी । अथम जाति में जड़मति भारी ॥
अथम ते अथम अथम अति नारी । तिन्ह महँ मैं मतिमंद अघारी ॥
कह रघुपति सुनु भामिनि बाता । मानउँ एक भगति कर नाता ॥
जाति पाँति कुल धर्म बड़ाई । धन बल परिजन गुन चतुराई ॥
भगति हीन नर सोहइ कैसा । बिनु जल बारिद देखिअ जैसा ।
नवधा भगति कहउँ तोहि पाहीं । सावधान सुनु धरु मन माहीं ॥
प्रथम भगति संतन्ह कर संगी । दूसरि रति मम कथा प्रसंगी ॥
दो०— गुर पद पंकज सेवा तीसरि भगति अमान ।

चौथि भगति मम गुन गन करइ कपट तजि गान ॥ ३५ ॥
मंत्र जाप मम दृढ़ बिस्वासा । पंचम भजन सो बेद प्रकासा ॥
छठ दम सील बिरति बहु करमा । निरत निरंतर सज्जन धरमा ॥
सातवँ सम मोहि मय जग देखा । मातें संत अधिक करि लेखा ॥
आठवँ जथालाभ संतोषा । सपनेहुँ नहिं देखइ परदोषा ॥
नवम सरल सब सन छलहीना । मम भरोस हियँ हरष न दीना ॥
नव महँ एकउ जिन्ह के होई । नारि पुरुष सचराचर कोई ॥

सोइ अतिसय प्रिय भार्मिनि मोरें । सकल प्रकार भगति दृढ़ तोरें ।
जोगि बृंद दुरलभ गति जोई । तो कहूँ आजु सुलभ भइ सोई ॥
मम दरसन फल परम अनूपा । जीव पाव निज सहज सरूपा ॥
जनकसुता कइ सुधि भार्मिनी । जानहि कहु करियरगामिनी ॥
पंपा सरहि जाहु रघुराई । तहँ होइहि सुग्रीव मिताई ॥
सो सब कहिहि देव रघुबीरा । जानतहूँ पूछहु मतिधीरा ॥
बार बार प्रभु पद सिरु नाई । प्रेम सहित सब कथा सुनाई ॥

छं० — कहि कथा सकल बिलोकि हरि मुख हृदयँ पद पंकज धरे ।
तजि जोग पावक देह हरि पद लीन भइ जहँ नहिं फिरे ॥
नर बिबिध कर्म अधर्म बहु मत सोकप्रद सब त्यागहू ।
बिस्वास करि कह दास तुलसी राम पद अनुरागहू ॥

दो० — जाति हीन अध जन्म महि मृक्त कीन्हि असि नारि ।

महामंद मन सुख चहसि ऐसे प्रभुहि बिसारि ॥ ३६ ॥
चले राम त्यागा ब्रन सोऊ । अतुलित बल नर केहरि दोऊ ॥
बिरही इव प्रभु करत बिषादा कहत कथा अनेक संवादा ॥
लछिमन देखु बिपिन कइ सोभा देखत केहि कर मन नहिं छोभा ॥
नारि सहित सब खग मृग बृंदा । मानहुँ मोरि करत हहिं निंदा ॥
हमहि देखि मृग निकर पराहीं मृगीं कहहिं तुम्ह कहँ भय नाहीं ॥
तुम्ह आनंद करहु मृग जाए । कंचन मृग खोजन ए आए ॥
गग लाइ करिनीं करि लेहीं । मानहुँ मोहि सिखावनु देहीं ॥
गाम्त्र सुचितित पुनि पुनि देखिअ । भृप सुसेवित बस नहिं लेखिअ ॥

राखिअ नारि जदपि उर माहीं । जुबती सास्त्र नृपति बस नाहीं ॥
 देखहु तात बसंत सुहावा । प्रिया हीन मोहि भय उपजावा ॥
 दो०— बिरह बिकल बलहीन मोहि जानेसि निपट अकेल ।

सहित बिपिन मधुकर खग मदन कीन्ह बगमेल ॥ ३७ (क) ॥

देखि गयउ भ्राता सहित तासु दूत सुनि बात ।

डेरा कीन्हेउ मनहुँ तब कटकु हटक मनजात ॥ ३७ (ख) ॥

बिटप बिसाल लता अरुझानी । बिबिध बितान दिए जनु तानी ॥
 कदलि ताल बर धुजा पताका । देखि न मोह धीर मन जाका ॥
 बिबिध भाँति फूले तरु नाना । जनु बानैत बने बहु बाना ॥
 कहूँ कहूँ सुंदर बिटप सुहाए । जनु भट बिलग बिलग होइ आए ॥
 कूजत पिक मानहुँ गज माते । ढेक महोख ऊँट बिसराते ॥
 मोर चकोर कीर बर बाजी । पारावत मराल सब ताजी ॥
 तीतिर लावक पदचर जूथा । बरनि न जाइ मनोज बरूथा ॥
 रथ गिरि सिला दुंदुभी झरना । चातक बंदी गुन गन बरना ॥
 मधुकर मुखर भेरि सहनाई । त्रिविध बयारि बसीठीं आई ॥
 चतुरंगिनी सेन सँग लोन्हें । बिचरत सबहि चुनौती दीन्हें ॥
 लछिमन देखत काम अनीका । रहहि धीर तिन्ह कै जग लीका ॥
 एहि कै एक परम बल नारी । तेहि तें उबर सुभट सोइ भारी ॥
 दो०— तात तीनि अति प्रबल खल काम क्रोध अरु लोभ ।

मुनि बिग्यान धाम मन करहि निमिष महुँ छोभ ॥ ३८ (क) ॥

लोभ के इच्छा दंभ बल काम के केवल नारि ।

क्रोध के परुष बचन बल मुनिबर कहहिं बिचारि ॥ ३८ (ख) ॥
 गुनातीत सचराचर स्वामी । राम उमा सब अंतरजामी ॥
 कामिन्ह के दीनता देखाई । धीरन्ह के मन बिरति दूढ़ाई ॥
 क्रोध मनोज लोभ मद माया । छूटहिं सकल राम कीं दाया ॥
 सो नर इंद्रजाल नहिं भूला । जा पर होइ सो नट अनुकूला ॥
 उमा कहउँ मैं अनुभव अपना । सत हरि भजनु जगत सब सपना ॥
 पुनि प्रभु गए सरोवर तीरा । पंपा नाम सुभग गंभीरा ॥
 संत हृदय जस निर्मल बारी । बाँधे घाट मनोहर चारी ॥
 जहाँ तहाँ पिअहिं बिबिध मृग नीरा । जनु उदार गृह जाचक भीरा ॥
 दो०— पुरइनि सधन ओट जल बेगि न पाइअ मर्म ।

मायाछत्र न देखिऐ जैसें निर्गुन ब्रह्म ॥ ३९ (क) ॥

सुखी मीन सब एकरस अति अगाध जल पाहिं ।

जथा धर्मशीलन्ह के दिन सुख संजुत जाहिं ॥ ३९ (ख) ॥
 बिकसे सरसिज नाना रंग । मधुर मुखर गुंजत बहु भृंगा ॥
 बोलत जलकुक्कुट कलहंसा । प्रभु बिलोकि जनु करत प्रसंसा ॥
 चक्रबाक बक खग समुदाई । देखत बनइ बरनि नहिं जाई ॥
 सुंदर खग गन गिरा सुहाई । जात पथिक जनु लेत बोलाई ॥
 ताल समीप मुनिन्ह गृह छाए । चहु दिशि कानन बिटप सुहाए ॥
 चंपक बकुल कदंब तमाला । पाटल पनस परास रसाला ॥

नव पल्लव कुसुमित तरु नाना । चंचरीक पटली कर गाना ॥
 सीतल मंद सुगंध सुभाऊ । संतत बहइ मनोहर बाऊ ॥
 कुहू कुहू कोकिल धुनि करहीं । सुनि रव सरस ध्यान मुनि टरहीं ॥
 दो०— फल भारन नमि विटप सब रहे भूमि निअराइ ।

पर उपकारी पुरुष जिमि नवहि सुसंपति पाइ ॥ ४० ॥
 देखि राम अति रुचिर तलावा । मज्जनु कीन्ह परम सुख पावा ॥
 देखी सुंदर तरुबर छाया । बैठे अनुज सहित रघुराया ॥
 तहँ पुनि सकल देव मुनि आए । अस्तुति करि निज धाम सिधाए ॥
 बैठे परम प्रसन्न कृपाला । कहत अनुज सन कथा रसाला ॥
 बिरहवंत भगवंतहि देखी । नारद मन भा सोच बिसेषी ॥
 मोर साप करि अंगीकारा । सहत राम नाना दुख भारा ॥
 ऐसे प्रभुहि बिलोकउँ जाई । पुनि न बनिहि अस अवसरु आई ।
 यह बिचारि नारद कर बीना । गए जहाँ प्रभु सुख आसीना ॥
 गावत राम चरित मृदु बानी । प्रेम सहित बहु भौंति बखानी ॥
 करत दंडवत लिए उठाई । राखे बहुत बार उर लाई ॥
 स्वागत पूँछि निकट बैठारे । लछिमन सादर चरन पखारे ॥
 दो०— नाना बिधि बिनती करि प्रभु प्रसन्न जियँ जानि ।

नारद बोले बचन तब जोरि सरोरुह पानि ॥ ४१ ॥
 सुनहु उदार सहज रघुनायक । सुंदर अगम सुगम बर दायक ॥
 देहु एक बर मागउँ स्वामी । जद्यपि जानत अंतरजामी ॥
 जानहु मुनि तुम्ह मोर सुभाऊ । जन सन कबहुँ कि करउँ दुराऊ ॥

कवन वस्तु असि प्रिय मोहि लागी । जो मुनिबर न सकहु तुम्ह मागी ॥
जन कहूँ कछु अंदेय नहिं मोरें । अस बिस्वास तजहु जनि भोरें ॥
तब नारद बोले हरषाई । अस बर मागउँ करउँ ढिठाई ॥
जद्यपि प्रभु के नाम अनेका । श्रुति कह अधिक एक तैं एका ॥
राम सकल नामन्ह ते अधिका । होउ नाथ अघ खग गन बधिका ॥
दो०— सका रजनी भगति तब राम नाम सोइ सोम ।

अपर नाम उडगन बिमल बसहुँ भगत उर ब्योम ॥ ४२ (क) ॥

एवमस्तु मुनि सन कहेउ कृपासिंधु रघुनाथ ।

तब नारद मन हरष अति प्रभु पद नायउ माथ ॥ ४२ (ख) ॥

अति प्रसन्न रघुनाथहि जानी । पुनि नारद बोले मृदु बानी ॥
राम जबहिं प्रेरउ निज माया । मोहेहु मोहि सुनहु रघुराया ॥
तब बिबाह मैं चाहउँ कीन्हा । प्रभु केहि कारन करै न दीन्हा ॥
सुनु मुनि तोहि कहउँ सहरोसा । भजहिं जे मोहि तजि सकल भरोसा ॥
करउँ सदा तिन्ह कै रखवारी । जिमि बालक राखइ महतारी ॥
गह सिसु बच्छ अनल अह धाई । तहँ राखइ जननी अरगाई ॥
प्रौढ़ भएँ तेहि सुत पर माता । प्रीति करइ नहिं पाछिलि बाता ॥
मोरें प्रौढ़ तनय सम ग्यानी । बालक सुत सम दास अमानी ॥
जनहि मोर बल निज बल ताही । दुहु कहँ काम क्रोध रिपु आही ॥
यह बिचारि पंडित मोहि भजहीं । पाएहुँ ग्यान भगति नहिं तजहीं ॥

दो०— काम क्रोध लोभादि मद प्रबल मोह कै धारि ।

तिन्ह महँ अति दारुन दुखद मायारूपी नारि ॥ ४३ ॥

सुनु मुनि कह पुरान श्रुति संता । मोह बिपिन कहूँ नारि बसंता ॥
 जप तप नेम जलाश्रय झारी । होइ ग्रीषम सोषइ सब नारी ॥
 काम क्रोध मद मत्सर भेका । इन्हहि हरषप्रद बरषा एका ॥
 दुर्बासना कुमुद समुदाई । तिन्ह कहँ सरद सदा सुखदाई ॥
 धर्म सकल सरसीरुह बृंदा । होइ हिम तिन्हहि दहइ सुख मंदा ॥
 पुनि ममता जकास बहुताई । पलुहइ नारि सिसिर रितु पाई ॥
 पाप उलूक निकर सुखकारी । नारि निबिड़ रजनी औंधिआरी ॥
 बुधि बल सील सत्य सब मोना । बनसी सम त्रिय कहहिं प्रबीना ॥
 दो०—अवगुन मूल सूलप्रद प्रमदा सब दुख खानि ।

ताते कीन्ह निवारन मुनि मैं यह जियँ जानि ॥ ४४ ॥
 सुनि रघुपति के बचन सुहाए । मुनि तन पुलक नयन भरि आए ॥
 कहहु कवन प्रभु कै असि रीती । सेवक पर ममता अरु प्रीती ॥
 जे न भजहिं अस प्रभु भ्रम त्यागी । ग्यान रंक नर मंद अभागी ॥
 पुनि सादर बोले मुनि नारद । सुनहु राम बिग्यान बिसारद ॥
 संतन्ह के लच्छन रघुबीरा । कहहु नाथ भव भंजन भीरा ॥
 सुनु मुनि संतन्ह के गुन कहऊँ । जिन्ह ते मैं उन्ह के बस रहऊँ ॥
 षट बिकार जित अनघ अकामा । अचल अकिंचन सुचि सुखधामा ॥
 अमित बोध अनीह मितभोगी । सत्यसार कबि कोबिद जोगी ॥
 सावधान मानद मदहीना । धीर धर्म गति परम प्रबीना ॥
 दो०—गुनागार संसार दुख रहित बिगत संदेह ।

तजि प्रम चरन सरोज प्रिय तिन्ह कहूँ देह न गेह ॥ ४५ ॥

निज गुन श्रवन सुनत सकुचाहीं । पर गुन सुनत अधिक हरषाहीं ॥
 सम सीतल नहिं त्यागहिं नीती । सरल सुभाउ सबहि सन प्रीती ॥
 जप तप ब्रत दम संजम नेमा । गुरु गोबिंद बिप्र पद प्रेमा ॥
 श्रद्धा छमा मयत्री दाया । मुदिता मम पद प्रीति अमाया ॥
 बिरति बिबेक बिनय बिग्याना । बोध जथारथ बेद पुराना ॥
 दंभ मान मद करहिं न काऊ । भूलि न देहिं कुमारग पाऊ ॥
 गावहिं सुनहिं सदा मम लीला । हेतु रहित परहित रत सीला ॥
 मुनि सुनु साधुन्ह के गुन जेते । कहि न सकहिं सारद श्रुति तेते ॥

छं०— कहि सक न सारद सेष नारद सुनत पद पंकज गहे ।
 अस दीनबंधु कृपाल अपने भगत गुन निज मुख कहे ॥
 सिरु नइ बारहिं बार चरनन्हि ब्रह्मपुर नारद गए ।
 ते धन्य तुलसीदास आस बिहाइ जे हरि रंग रंग ॥

दो०— रावनारि जसु पावन गावहिं सुनहिं जे लोण ।
 राम भगति दृढ़ पावहिं बिनु बिराग जप जोग ॥ ४६ (क) ॥
 दीप सिखा सम जुबति तन मन जनि होसि पतंग ।
 भजहि राम तजि काम मद करहि सदा सतसंग ॥ ४६ (ख) ॥


मासपारायण, बाईसवाँ विश्राम
 इति श्रीमद्रामचरितमानसे सकलकलिकलुषविध्वंसने

तृतीयः सोपानः समाप्तः ।

(अरण्यकाण्ड समाप्त)



भगवान् रामकी सुग्रीवसे मैत्री



मग्रा मोच त्यागह बल पाँरे । मन विधि घटव काज मैं तोरें ॥

॥ श्रीगणेशाय नमः ॥

श्रीजानकीवल्लभो विजयते

श्रीरामचरितमानस

चतुर्थ सोपान

किष्किन्धाकाण्ड

श्लोक

कुन्देन्दीवरसुन्दरावतिबली विज्ञानधामबुधौ
शोभाक्यौ वरधन्विनौ श्रुतिनुतौ गोविप्रवृन्दप्रियौ ।
मायामानुषरूपिणौ रघुरौ सद्धर्मवर्मौ हितौ
सीतान्वेषणतत्परौ पथिगती भक्तिप्रदी तौ हि नः ॥ १ ॥
ब्रह्माभोधिसमुद्भवं कलिमलप्रध्वंसनं चाव्ययं
श्रीपच्छम्भुमुखेन्दुसुन्दरवरे संशोभितं सर्वदा ।
संसारामयभेषजं सुखकरं श्रीजानकीजीवनं
धन्यास्ते कृतिनः पिबन्ति सततं श्रीरामनामामृतम् ॥ २ ॥

सो०—मुक्ति जन्म महि जानि ग्यान खानि अघ हानि कर ।
जहै बस संभु भवानि सो कासी सेइअ कस न ॥
जरत सकल सुर बृंद बिषम गरल जेहि पान किय ।
तेहि न भजसि मन मंद को कृपाल संकर सरिस ॥

आगेँ चले बहुरि रघुराया । रिष्यमूक पर्वत निअराया ॥
 तहँ रह सचिव सहित सुग्रीवा । आवत देखि अतुल बल सींवा ॥
 अति सभीत कह सुनु हनुमाना । पुरुष जुगल बल रूप निधाना ॥
 धरि बटु रूप देखु तैं जाई । कहेसु जानि जियँ सयन बुझाई ॥
 पठए बालि होहिं मन मैला । भागीँ तुरत तजौँ यह सैला ॥
 बिप्र रूप धरि कपि तहँ गयऊ । माथ नाइ पूछत अस भयऊ ॥
 को तुम्ह स्यामल गौर सरीरा । छत्री रूप फिरहु बन बीरा ॥
 कठिन भूमि कोमल पद गामी । कवन हेतु बिचरहु बन स्वामी ॥
 मृदुल मनोहर सुंदर गाता । सहत दुसह बन आतप बाता ॥
 की तुम्ह तीनि देव महँ कोऊ । नर नारायन की तुम्ह दोऊ ॥
 दो०—जग कारन तारन भव भंजन धरनी भार ।

की तुम्ह अखिल भुवन पति लीन्ह मनुज अवतार ॥ १ ॥
 कोसलेस दसरथ के जाए । हम पितु बचन मानि बन आए ।
 नाम राम लछिमन दोउ भाई । संग नारि सुकुमारि सुहाई ॥
 इहाँ हरी निसिचर बैदेही । बिप्र फिरहिं हम खोजत तेही ॥
 आपन चरित कहा हम गाई । कहहु बिप्र निज कथा बुझाई ॥
 प्रभु पहिचानि परेउ गहि चरना । सो सुख उमा जाइ नहिं बरना ॥
 पुलकित तन मुख आव न बचना । देखत रुचिर बेष कै रचना ॥
 पुनि धीरजु धरि अस्तुति कीन्ही । हरष हृदयँ निज नाथहि चीन्ही ॥
 मोर न्याउ मैं पूछा साई । तुम्ह पूछहु कस नर की नाई ॥
 तव माया बस फिरउँ भुलाना । ताते मैं नहिं प्रभु पहिचाना ॥

दो०—एकु मैं मंद मोहबस कुटिल हृदय अग्यान।

पुनि प्रभु मोहि बिसारेउ दीनबंधु भगवान् ॥ २ ॥
जदपि नाथ बहु अवगुन मोरें । सेवक प्रभुहि परै जनि भोरें ॥
नाथ जीव तव मायाँ मोहा । सो निस्तरइ तुम्हारेहं छोहा ॥
ता पर मैं रघुबीर दोहाई । जानउँ नहिं कछु भजन उपाई ॥
सेवक सुत पति मातु भरोसैं । रहइ असोच बनइ प्रभु पोसैं ॥
अस कहि परेउ चरन अकुलाई । निज तनु प्रगटि प्रीति उर छाई ॥
तब रघुपति उठाइ उर लावा । निज लोचन जल सींचि जुड़ावा ॥
सुनु कपि जियँ मानसि जनि ऊना । तैं मम प्रिय लछिमन ते दूना ॥
समदरसी मोहि कह सब कोऊ । सेवक प्रिय अनन्य गति सोऊ ॥

दो०—सो अनन्य जाकैं असि मति न टरइ हनुमंत।

मैं सेवक सचराचर रूप स्वामि भगवंत ॥ ३ ॥
देखि पवनसुत पति अनुकूला । हृदयँ हरष बीती सब सूला ॥
नाथ सैल पर कपिपति रहई । सो सुग्रीव दास तव अहई ॥
तेहि सन नाथ भयत्री कीजे । दीन जानि तेहि अभय करीजे ॥
सो सीता कर खोज कराइहि । जहाँ तहाँ मरकट कोटि पठाइहि ॥
एहि बिधि सकल कथा समुझाई । लिए दुऔ जन पीठि चढ़ाई ॥
जब सुग्रीवँ राम कहूँ देखा । अतिसय जन्म धन्य करि लेखा ॥
सादर मिलेउ नाइ पद माथा । भेंटेउ अनुज सहित रघुनाथा ॥
कपि कर मन बिचार एहि रीती । करिहहिं बिधि मो सन ए प्रीती ॥

दो०—तब हनुमंत उभय दिसि की सब कथा सुनाइ।

पावक साखी देइ करि जोरी प्रीति दृढ़ाइ ॥ ४ ॥

कीन्हि प्रीति कछु बीच न राखा । लछिमन राम चरित सब भाषा
 कह सुग्रीव नयन भरि बारी । मिलिहि नाथ मिथिलेसकुमारी ॥
 मंत्रिन्ह सहित इहाँ एक बारा । बैठ रहेउँ मैं करत बिचारा ॥
 गगन पंथ देखी मैं जाता । परबस परी बहुत बिलपाता ॥
 राम राम हा राम पुकारी । हमहि देखि दीन्है पट डारी ।
 मागा राम तुरत तेहिं दीन्हा । पट उर लाइ सोच अति कीन्हा ॥
 कह सुग्रीव सुनहु रघुबीरा । तजहु सोच मन आनहु धीरा ॥
 सब प्रकार करिहउँ सेवकाई । जेहि बिधि मिलिहि जानकी आई ॥
 दो०— सखा बचन सुनि हर्षे कृपासिंधु बलसीव ।

कारन कवन बसहु बन मोहि कहहु सुग्रीव ॥ ५ ॥
 नाथ बालि अरु मैं द्वौ भाई । प्रीति रही कछु बरनि न जाई ॥
 मयसुत मायावी तेहि नाऊँ । आवाँ सो प्रभु हमरें गाऊँ ॥
 अर्ध राति पुर द्वार पुकारा । बाली रिपु बल सहै न पारा ॥
 धावा बालि देखि सो भागा । मैं पुनि गयउँ बंधु सँग लागा ॥
 गिरिबर गुहाँ पैठ सो जाई । तब बाली मोहि कहा बुझाई ॥
 परिखेसु मोहि एक पखवारा । नहिं आवौं तब जानेसु मारा ॥
 मास दिवस तहँ रहेउँ खरारी । निसरी रुधिर धार तहँ भारी ॥
 बालि हतेसि मोहि मारिहि आई । सिला देइ तहँ चलेउँ पराई ॥
 मंत्रिन्ह पुर देखा बिनु साई । दीन्है मोहि राज बरिआई ॥
 बाली ताहि मारि गृह आवा । देखि मोहि जियँ भेद बढ़ावा ॥
 रिपु सम मोहि मारेसि अति भारी । हरि लीन्हैसि सर्वसु अरु नारी ॥

ताकें भय रघुबीर कृपाला । सकल भुवन मैं फिरेउँ बिहाला ॥
 इहाँ साप बस आवत नाहीं । तदपि सभीत रहउँ मन माहीं ॥
 सुनि सेवक दुख दीनदयाला । फरक उठीं द्वै भुजा बिसाला ॥
 दो०— सुनु सुग्रीव मारिहउँ बालिहि एकहिं जान ।

ब्रह्म रुद्र सरनागत गाँ न उबरिहिं प्राण ॥ ६ ॥
 जे न मित्र दुख होहिं दुखारी । तिन्हहि बिलोकत पातक भारी ॥
 निज दुख गिरि सम रज करि जाना । मित्रक दुख रज मेरु समाना ।
 जिन्ह केँ असि मति सहज न आई । ते सठ कत हठि करत मिताई ॥
 कुपथ निवारि सुपंथ चलावा । गुन प्रगटै अवगुनन्हि दुरावा ॥
 देत लेत मन संक न धरई । बल अनुमान सदा हित करई ॥
 बिपति काल कर सतगुन नेहा । श्रुति कह संत मित्र गुन एहा ।
 आगें कह मृदु बचन बनाई । पाछें अनहित मन कुटिलाई ॥
 जाकर चित अहि गति सम भाई । अस कुमित्र परिहरेहिं भलाई ॥
 सेवक सठ नृप कृपन कुनारी । कपटी मित्र सूल सम चारी ॥
 सखा सोच त्यागहु बल मोरें । सब बिधि घटब काज मैं तोरें ॥
 कह सुग्रीव सुनहु रघुबीरा । बालि महाबल अति रनधीरा ॥
 दुंदुभि अस्थि ताल देखराए । बिनु प्रयास रघुनाथ ढहाए ॥
 देखि अमित बल बाढ़ी प्रीती । बालि बधब इन्ह भइ परतीती ॥
 बार बार नावइ पद सीसा । प्रभुहि जानि मन हरष कपीसा ॥
 उपजा ग्यान बचन तब बोला । नाथ कृपाँ मन भयउ अलोला ॥
 सुख संपति परिवार बड़ाई । सब परिहरि करिहउँ सेवकाई ॥

ए सब रामभगति के बाधक । कहहिं संत तव पद अवराधक ॥
 सत्रु मित्र सुख दुख जग माहीं । मायाकृत परमारथ नाहीं ॥
 बालि परम हित जासु प्रसादा । मिलेहु राम तुम्ह समन बिषादा ॥
 सपनें जेहि सन होइ लराई । जागैं समुझत मन सकुचाई ॥
 अब प्रभु कृपा करहु एहि भाँती । सब तजि भजनु करौं दिन राती ॥
 सुनि बिराग संजुत कपि बानी । बोले बिहँसि राम धनुपानी ॥
 जो कछु कहेहु सत्य सब सोई । सखा बचन मम मृषा न होई ॥
 नट मरकट इव सबहि नचावत । रामु खगेस बेद अस गावत ।
 लै सुग्रीव संग रघुनाथा । चले चाप सायक गहि हाथा ॥
 तब रघुपति सुग्रीव पठावा । गर्जेस जाइ निकट बल पावा ॥
 सुनत बालि क्रोधातुर धावा । गहि कर चरन नारि समुझावा ॥
 सुनु पति जिन्हहि मिलेउ सुग्रीवा । ते द्वौ बंधु तेज बल सींवा ॥
 कोसलेस सुत लछिमन रामा । कालहु जीति सकहिं संग्रामा ॥
 दो०— कह बाली सुनु भीरु प्रिय समदरसी रघुनाथ ।

जाँ कदाचि मोहि मारहिं तौ पुनि होउँ सनाथ ॥ ७ ॥
 अस कहि चला महा अभिमानी । तू न समान सुग्रीवहि जानी ।
 भिरे उभौ बाली अति तर्जा । मुठिका मारि महाधुनि गर्जा ॥
 तब सुग्रीव बिकल होइ भागा । मुष्टि प्रहार बज्र सम लागा ॥
 मैं जो कहा रघुबीर कृपाला । बंधु न होइ मोर यह काला ॥
 एकरूप तुम्ह भ्राता दोऊ । तेहि भ्रम तें नहिं मारेउँ सोऊ ॥
 कर परसा सुग्रीव सरीरा । तनु भा कुलिस गई सब पीरा ॥

मेली कंठ सुमन कै माला । पठवा पुनि बल देइ बिसाला ॥
पुनि नाना बिधि भई लराई । बिटप ओट देखहिं रघुराई ॥
दो०— बहु छल बल सुग्रीव कर हियँ हारा भय मानि ।

मारा बालि राम तब हृदय माझ सर तानि ॥८॥
परा बिकल महि सर के लागें । पुनि उठि बैठ देखि प्रभु आगें ॥
स्याम गात सिर जटा बनाएँ । अरुन नयन सर चाप चढ़ाएँ ॥
पुनि पुनि चितइ चरन चित दीन्हा । सुफल जन्म माना प्रभु चीन्हा ।
हृदयँ प्रीति मुख बचन कठोरा । बोला चितइ राम की ओरा ॥
धर्म हेतु अवतरेहु गोसाईं । मारेहु मोहि ब्याध की नाई ॥
मैं बैरी सुग्रीव पिआरा । अवगुन कवन नाथ मोहि भारा ॥
अनुज बधू भगिनी सुत नारी । सुनु सठ कन्या सम ए चारी ॥
इन्हहि कुदृष्टि बिलोकइ जोई । ताहि बधैं कछु पाप न होई ॥
मूढ़ तोहि अतिसय अभिमाना । नारि सिखावन करसि न काना ॥
मम भुज बल आश्रित तेहि जानी । मारा चहसि अधम अभिमानी ॥
दो०— सुनहु राम स्वामी सन चल न चातुरी घोरि ।

प्रभु अजहूँ मैं पापी अंतकाल गति तोरि ॥९॥
सुनत राम अति कोमल बानी । बालि सीस परसेउ निज पानी ॥
अचल करौं तनु राखहु प्राणा । बालि कहा सुनु कृपानिधाना ॥
जन्म जन्म मुनि जतनु कराहीं । अंत राम कहि आवत नाहीं ॥
जासु नाम बल संकर कासी । देत सबहि सम गति अबिनासी ॥

मम लोचन गोचर सोइ आवा । बहुरि कि प्रभु अस बनिहि बनावा ॥

छं०— सो नयन गोचर जासु गुन नित नेति कहि श्रुति गावहीं ।

जिति पखन मन गो निरस करि मुनि ध्यान कबहुँक पावहीं ॥

मोहि जानि अति अभिमान बस प्रभु कहेउ राखु सरिरही ।

अस कवन सठ हठि काटि सुरतरु बारि करिहि बबूरही ॥

अब नाथ करि करुना बिलोकहु देहु जो बर मागऊँ ।

जेहिं जोनि जन्मों कर्म बस तहँ राम पद अनुरागऊँ ॥

यह तनय मम सम बिनय बल कल्याणप्रद प्रभु लीजिए ।

गहि बाँह सुर नर नाह आपन दास अंगद कीजिए ॥

दो०— राम चरन दृढ़ प्रीति करि बालि कीन्ह तनु त्याग ।

सुमन माल जिमि कंठ ते गिरत न जानइ नाग ॥ १० ॥

राम बालि निज धाम पठावा । नगर लोग सब व्याकुल धावा ॥

नाना बिधि बिलाप कर तारा । छूटे केस न देह सँभारा ॥

तारा बिकल देखि रघुराया । दीन्ह ग्यान हरि लीन्ही माया ।

छिति जल पावक गगन समीरा । पंच रचित अति अधम सरीरा ॥

प्रगट सो तनु तव आगें सोवा । जीव नित्य केहि लगि तुम्ह रोवा ॥

उपजा ग्यान चरन तब लागी । लीन्हेसि परम भगति बर मागी ॥

उमा दारु जोषित की नाई । सबहि नचावत रामु गोसाईं ॥

तब सुग्रीवहि आयसु दीन्हा । मृतक कर्म बिधिवत सब कीन्हा ॥

राम कहा अनुजहि समुझाई । राज देहु सुग्रीवहि जाई ।

रघुपति चरन नाइ करि माथा । चले सकल प्रेरित रघुनाथा ॥

दो०— लछिम्न तुरत बोलाए पुरजन बिप्र समाज ।

राजु दीन्ह सुग्रीव कहँ अंगद कहँ जुवराज ॥ ११ ॥
 उमा राम सम हित जग माहीं । गुरु पितु मातु बंधु प्रभु नाहीं ॥
 सुर नर मुनि सब कै यह रीती । स्वारथ लागि करहिं सब प्रीती ॥
 बालि त्रास व्याकुल दिन राती । तन बहु बन चिंताँ जर छाती ॥
 सोइ सुग्रीव कीन्ह कपिराऊ । अति कृपाल रघुबीर सुभाऊ ॥
 जानतहूँ अस प्रभु परिहरहीं । काहे न बिपति जाल नर परहीं ॥
 पुनि सुग्रीवहि लीन्ह बोलाई । बहु प्रकार नृपनीति सिखाई ॥
 कह प्रभु सुनु सुग्रीव हरीसा । पुर न जाउँ दस चारि बरीसा ॥
 गत ग्रीष्म बरषा रितु आई । रहिहउँ निकट सैल पर छाई ॥
 अंगद सहित करहु तुम्ह राजू । संतत हृदयँ धरेहु मम काजू ॥
 जब सुग्रीव भवन फिरि आए । रामु प्रबरधन गिरि पर आए ॥
 दो०— प्रथमहिं देवन्ह गिरि गुहा राखेउ रुचिर बनाइ ।

राम कृपानिधि कछु दिन बास करहिंगे आइ ॥ १२ ॥
 सुंदर बन कुसुमित अति सोभा । गुंजत मधुप निकर मधु लोभा ॥
 कंद मूल फल पत्र सुहाए । भए बहुत जब ते प्रभु आए ॥
 देखि मनोहर सैल अनूपा । रहे तहँ अनुज सहित सुरभूपा ॥
 मधुकर खग मृग तनु धरि देवा । करहिं सिद्ध मुनि प्रभु कै सेवा ॥
 मंगलरूप भयउ बन तब ते । कीन्ह निवास रमापति जब ते ॥
 फटिक सिला अति सुभ्र सुहाई । सुख आसीन तहाँ द्वौ भाई ॥
 कहत अनुज सन कथा अनेका । भगति बिरति नृपनीति बिबेका ॥

बरषा काल मेघ नभ छाए । गरजत लागत परम सुहाए ॥
दो०— लछिमन देखु मोर गन नाचत बारिद पेखि ।

गृही बिरति रत हरष जस बिष्णुभगत कहूँ देखि ॥ १३ ॥
घन घमंड नभ गरजत घोरा । प्रिया हीन डरपत मन मोरा ॥
दामिनि दमक रह न घन माहीं । खल कै प्रीति जथा थिर नाहीं ॥
बरषहिं जलद भूमि निअराएँ । जथा नवहिं बुध बिद्या पाएँ ॥
बूँद अधात सहहिं गिरि कैसेँ । खल के बचन संत सह जैसेँ ॥
छुद्र नदीं भरि चलीं तोराई । जस थोरैहुँ धन खल इतराई ॥
भूमि परत भा ढाबर पानी । जनु जीवहि भाया लपटानी ॥
समिटि समिटि जल भरहिं तलावा । जिमि सदगुन सज्जन पहिं आवा ॥
सरिता जल जलनिधि महुँ जाई । होइ अचल जिमि जिव हरि पाई ॥
दो०— हरित भूमि तृन संकुल समुझि परहिं नहिं पंथ ।

जिमि पाखंड बाद तें गुप्त होहिं सदग्रंथ ॥ १४ ॥
दादुर धुनि चहु दिसा सुहाई । बेद पर्दाहं जनु बटु समुदाई ॥
नव पल्लव भए बिटप अनेका । साधक मन जस मिलें बिबेका ॥
अर्क जवास पात बिनु भयऊ । जस सुराज खल उद्यम गयऊ ॥
खोजत कतहुँ मिलइ नहिं धूरी । करइ क्रोध जिमि धरमहि दूरी ॥
ससि संपन्न सोह महि कैसी । उपकारी कै संपति जैसी ॥
निसि तम घन खद्योत बिराजा । जनु दंभिन्ह कर मिला समाजा ॥
महावृष्टि चलि फूटि किआरीं । जिमि सुतंत्र भएँ बिगरहिं नारीं ॥
कृषी निरावहिं चतुर किसाना । जिमि बुध तजहिं मोह मद माना ॥
देखिअत चक्रबाक खग नाहीं । कलिहिं पाइ जिमि धर्म पराहीं ॥

ऊषर बरषइ तून नहिं जामा । जिमि हरिजन हियँ उपज न कामा ॥
बिबिध जंतु संकुल महि भ्राजा । प्रजा बाढ़ जिमि पाइ सुराजा ॥
जहँ तहँ रहे पथिक थार्कि नाना । जिमि इंद्रिय गन उपजें ग्याना ॥
दो०— कबहुँ प्रबल बह मारुत जहँ तहँ मेघ बिलाहिं ।

जिमि कपूत के उपजें कुल सद्धर्म नसाहिं ॥ १५ (क) ॥

कबहुँ दिवस महँ निबिड़ तम कबहुँक प्रगट पतंग ।

बिनसइ उपजइ ग्यान जिमि पाइ कुसंग सुसंग ॥ १५ (ख) ॥

बरषा बिगत सरद रितु आई । लछिमन देखहु परम सुहाई ॥
फूलें कास सकल महि छाई । जनु बरषाँ कृत प्रगट बुढ़ाई ॥
उदित अगस्ति पंथ जल सोषा । जिमि लोभहि सोषइ संतोषा ॥
सरिता सर निर्मल जल सोहा । संत हृदय जस गत मद मोहा ॥
रस रस सूख सरित सर पानी । ममता त्याग करहिं जिमि ग्यानी ॥
जानि सरद रितु खंजन आए । पाइ समय जिमि सुकृत सुहाए ॥
पंक न रेनु सोह असि धरनी । नीति निपुन नृप कै जसि करनी ॥
जल संकोच बिकल भईं भीना । अबुध कुटुंबी जिमि धनहीना ॥
बिनु घन निर्मल सोह अकासा । हरिजन इव परिहरि सब आसा ॥
कहुँ कहुँ बृष्टि सारदी थोरी । कोउ एक पाव भगति जिमि मोरी ॥
दो०— चले हरषि तजि नगर नृप तापस बनिक भिखारि ।

जिमि हरिभगति पाइ श्रम तजहिं आश्रमी चारि ॥ १६ ॥
सुखी भीन जे नीर अगाथा । जिमि हरि सरन न एकउ बाधा ॥
फूलें कमल सोह सर कैसा । निर्गुन ब्रह्म सगुन भएँ जैसा ॥

गुंजत मधुकर मुखर अनूपा । सुंदर खग रव नाना रूपा ॥
 चक्रबाक मन दुख निसि पेखी । जिमि दुर्जन पर संपति देखी ॥
 चातक रटत तृषा अति ओही । जिमि सुख लहइ न संकरद्रोही ॥
 सरदातप निसि ससि अपहरई । संत दरस जिमि पातक टरई ॥
 देखि इंदु चकोर समुदाई । चितवहिं जिमि हरिजन हरि पाई ॥
 मसक दंस बीते हिम त्रासा । जिमि द्विज द्रोह किऐँ कुल नासा ॥
 दो०— भूमि जीव संकुल रहे गए सरद रितु पाइ ।

सदगुर मिले जाहिं जिमि संसय भ्रम समुदाइ ॥ १७ ॥
 बरषा गत निर्मल रितु आई । सुधि न तात सीता कै पाई ॥
 एक बार कैसेहुँ सुधि जानौं । कालहु जीति निमिष महुँ आनौं ॥
 कतहुँ रहउ जौं जीवति होई । तात जतन करि आनउँ सोई ॥
 सुग्रीवहुँ सुधि मोरि बिसारी । पावा राज कोस पुर नारी ॥
 जेहिं सायक मारा मैं बाली । तेहिं सर हतौं मूढ़ कहँ काली ॥
 जासु कृपा छूटहिं मद मोहा । ता कहुँ उमा कि सपनेहुँ कोहा ॥
 जानहिं यह चरित्र मुनि ग्यानी । जिन्ह रघुबीर चरन रति मानी ॥
 लछिमन क्रोधवंत प्रभु जाना । धनुष चढ़ाइ गहे कर बाना ॥
 दो०— तब अनुजहि समुझावा रघुपति करुना सीव ।

भय देखाइ लै आवहु तात सरखा सुग्रीव ॥ १८ ॥
 इहाँ पवनसुत हृदयँ बिचारा । राम काजु सुग्रीवँ बिसारा ॥
 निकट जाइ चरनन्हि सिरु नावा । चारिहु बिधि तेहि कहि समुझावा ॥
 सुनि सुग्रीवँ परम भय माना । बिषयँ मोर हरि लीन्हैउ ग्याना ॥
 अब मारुतसुत दूत समूहा । पठवहु जहँ तहँ बानर जूहा ॥

कहहु पाख महुँ आव न जोई । मोरें कर ता कर बध होई ॥
तब हनुमंत बोलाए दूता । सब कर करि सनमान बहूता ॥
भय अरु प्रीति नीति देखराई । चले सकल चरनन्हि सिर नाई ॥
एहि अवसर लछिमन पुर आए । क्रोध देखि जहँ तहँ कपि धाए ॥
दो०— धनुष चढ़ाइ कहा तब जारि करउँ पुर छार ।

ब्याकुल नगर देखि तब आयउ बालिकुमार ॥ १९ ॥
चरन नाइ सिरु बिनती कीन्ही । लछिमन अभय बाँह तेहि दीन्ही ॥
क्रोधवंत लछिमन सुनि काना । कह कपीस अति भयँ अकुलाना ॥
सुनु हनुमंत संग लै तारा । करि बिनती समुझाउ कुमारा ॥
तारा सहित जाइ हनुमाना । चरन बंदि प्रभु सुजस बखाना ॥
करि बिनती मंदिर लै आए । चरन पखारि पलंग बैठाए ॥
तब कपीस चरनन्हि सिरु नावा । गहि भुज लछिमन कंठ लगावा ॥
नाथ बिषय सम मद कछु नाहीं । मुनि मन मोह करइ छन माहीं ।
सुनत बिनीत बचन सुख पावा । लछिमन तेहि बहु बिधि समुझावा ।
पवन तनय सब कथा सुनाई । जेहि बिधि गए दूत समुदाई ॥
दो०— हरषि चले सुग्रीव तब अंगदादि कपि साथ ।

रामानुज आगें करि आए जहँ रघुनाथ ॥ २० ॥
नाइ चरन सिरु कह कर जोरी । नाथ मोहि कछु नाहिन खोरी ॥
अतिसय प्रबल देव तव माया । छूटइ राम करहु जौं दायी ॥
बिषय बस्य सुर नर मुनि स्वामी । मैं पावँ पसु कपि अति कामी ॥
नारि नयन सर जाहि न लागा । घोर क्रोध तम निसि जो जागा ॥

लोभ पाँस जेहिं गर न बँधाया । सो नर तुम्ह समान रघुराया ॥
 यह गुन साधन तैं नहिं होई । तुम्हरी कृपाँ पाव कोइ कोई ॥
 तब रघुपति बोले मुसुकाई । तुम्ह प्रिय मोहि भरत जिमि भाई ॥
 अब सोइ जतनु करहु मन लाई । जेहि बिधि सीता कै सुधि पाई ॥
 दो०—एहि बिधि होत अतकही आए बनर जूथ ।

नाना बरन सकल दिसि देखिअ कीस बरूथ ॥ २१ ॥
 बनर कटक उमा मैं देखा । सो मूरुख जो करन चह लेखा ॥
 आइ राम पद नावहिं माथा । निरखि बदन सब होहिं सनाथा ॥
 अस कपि एक न सेना माहीं । राम कुसल जेहि पूछी नाहीं ॥
 यह कछु नहिं प्रभु कइ अधिकारि । बिस्वरूप व्यापक रघुराई ॥
 ठाढ़े जहँ तहँ आयसु पाई । कह सुग्रीव सबहि समुझाई ॥
 राम काजु अरु मोर निहोरा । बनर जूथ जाहु चहुँ ओरा ॥
 जनकसुता कहूँ खोजहु जाई । मास दिवस महँ आएहु भाई ॥
 अवधि मेति जो बिनु सुधि पाएँ । आवइ बनिहि सो मोहि मराएँ ॥
 दो०—बचन सुनत सब बनर जहँ तहँ चले तुरंत ।

तब सुग्रीव बोलाए अंगद नल हनुमंत ॥ २२ ॥
 सुनहु नील अंगद हनुमाना । जामवंत मतिधीर सुजाना ॥
 सकल सुभट मिलि दक्षिण जाहू । सीता सुधि पूछेहु सब काहू ॥
 मन क्रम बचन सो जतन बिचारेहु । रामचंद्र कर काजु सँवारेहु ॥
 भानु पीठि सेइअ उर आगी । स्वामिहि सर्व भाव छल त्यागी ॥
 तजि माया सेइअ परलोका । मिटाहिं सकल भवसंभव सोका ॥

देह धरे कर यह फलु भाई । भजिअ राम सब काम बिहाई ॥
 सोइ गुनग्य सोई बड़भागी । जो रघुबीर चरन अनुरागी ॥
 आयसु मागि चरन सिरु नाई । चले हरषि सुमिरत रघुराई ॥
 पाछें पवन तनय सिरु नावा । जानि काज प्रभु निकट बोलावा ॥
 परसा सीस सरोरुह पानी । करमुद्रिका दीन्ह जन जानी ॥
 बहु प्रकार सीतहि समझाएहु । कहि बल बिरह बेगि तुम्ह आएहु ॥
 हनुमत जन्म सुफल करि माना । चलेउ हृदयँ धरि कृपानिधाना ॥
 जद्यपि प्रभु जानत सब बाता । राजनीति राखत सुरत्राता ॥
 दो०— चले सकल बन खोजत सरिता सर गिरि खोह ।

राम काज लखलीन मन बिसरा तन कर छोह ॥ २३ ॥
 कतहुँ होइ निसिचर सैं भेटा । प्रान लेहिं एक एक चपेटा ॥
 बहु प्रकार गिरि कानन हेरहिं । कोउ मुनि मिलइ ताहि सब घेरहिं ॥
 लागि तृषा अतिसय अकुलाने । मिलइ न जल घन गहन भुलाने ॥
 मन हनुमान कीन्ह अनुमाना । मरन चाहत सब बिनु जल पाना ॥
 चढ़ि गिरि सिखर चहुँ दिसि देखा । भूमि बिबर एक कौतुक पेखा ॥
 चक्रबाक बक हंस उड़ाहीं । बहुतक खग प्रबिसहिं तेहि माहीं ॥
 गिरि ते उतरि पवनसुत आवा । सब कहूँ लै सोइ बिबर देखावा ॥
 आगें कै हनुमंतहि लीन्हा । पैटे बिबर बिलंबु न कीन्हा ॥
 दो०— दीख जाइ उपवन बर सर बिगसित बहु कंज ।

मंदिर एक रुचिर तहँ बैठि नारि तप पुंज ॥ २४ ॥
 दूरि ते ताहि सर्बान्ह सिरु नावा । पृछें निज वृत्तांत सुनावा ॥
 तेहिं तब कहा करहु जल पाना । खाहु सुरस सुंदर फल नाना ॥

मज्जनु कीन्ह मधुर फल खाए । तासु निकट पुनि सब चलि आए ॥
 तेहिं सब आपनि कथा सुनाई । मैं अब जाब जहाँ रघुआई ॥
 मूदहु नयन बिबर तजि जाहू । पैहहु सीतहि जनि पछिताहू ॥
 नयन मूदि पुनि देखहि बीरा । ठाढ़े सकल सिंधु कै तीरा ॥
 सो पुनि गई जहाँ रघुनाथा । जाइ कमल पद नाएसि माथा ॥
 नाना भाँति बिनय तेहिं कीन्ही । अनपायनी भगति प्रभु दीन्ही ॥
 दो०— बदरीबन कहूँ सो गई प्रभु अग्या धरि सीस ।

उर धरि राम चरन जुग जे बंदत अज ईस ॥ २५ ॥
 इहाँ बिचारहिं कपि मन माहीं । बीती अवधि काज कछु नाहीं ॥
 सब मिलि कहहिं परस्पर बाता । बिनु सुधि लाएँ करब का भ्राता ॥
 कह अंगद लोचन भरि बारी । दुहुँ प्रकार भइ मृत्यु हमारी ॥
 इहाँ न सुधि सीता कै पाई । उहाँ गएँ मारिहि कपिराई ॥
 पिता बधे पर मारत मोही । राखा राम निहोर न ओही ॥
 पुनि पुनि अंगद कह सब पाहीं । मरन भयउ कछु संसय नाहीं ॥
 अंगद बचन सुनत कपि बीरा । बोलि न सकहिं नयन बह नीरा ॥
 छन एक सोच मगन होइ रहे । पुनि अस बचन कहत सब भए ॥
 हम सीता कै सुधि लीन्हें बिना । नहिं जैहें जुबराज प्रबीना ॥
 अस कहि लवन सिंधु तट जाई । बैठे कपि सब दर्भ डसाई ॥
 जामवंत अंगद दुख देखी । कहों कथा उपदेस बिसेषी ॥
 तात राम कहूँ नर जनि मानहु । निर्गुन ब्रह्म अजित अज जानहु ॥
 हम सब सेवक अति बड़भागी । संतत सगुन ब्रह्म अनुरागी ॥

दो० — निज इच्छाँ प्रभु अवतरइ सुर महि गो द्विज लागि ।

सगुन उपासक संत तहँ रहहिँ मोच्छ सब त्यागि ॥ २६ ॥
 एहि बिधि कथा कहहिँ बहु भाँती गिरि कंदराँ सुनी संपाती ॥
 बाहेर होइ देखि बहु कीसा । मोहि अहार दीन्ह जगदीसा ॥
 आजु सबहि कहँ भच्छन करऊँ । दिन बहु चले अहार बिनु मरऊँ ॥
 कबहुँ न मिल भरि उदर अहारा । आजु दीन्ह बिधि एकहिँ बारा ॥
 डरपे गीध बचन सुनि काना । अब भा मरन सत्य हम जाना ॥
 कपि सब उठे गीध कहँ देखी । जामवंत मन सोच बिसेषी ॥
 कह अंगद बिचारि मन माहीं । धन्य जटायू सम कोउ नाहीं ॥
 राम काज कारन तनु त्यागी । हरि पुर गयउ परम बड़भागी ॥
 सुनि खग हरष सोक जुत बानी । आवा निकट कपिन्ह भय भानी ॥
 तिन्हहि अभय करि पूछेसि जाई । कथा सकल तिन्ह ताहि सुनाई ॥
 सुनि संपाति बंधु कै करनी । रघुपति महिमा बहुबिधि बरनी ॥
 दो० — मोहि लै जाहु सिंधुतट देउँ तिलांजलि ताहि ।

बचन सहाइ करबि मैं पैहु खुजहु जाहि ॥ २७ ॥
 अनुज क्रिया करि सागर तीरा । कहि निज कथा सुनहु कपि बीरा ॥
 हम द्वौ बंधु प्रथम तरुनाई । गगन गए रबि निकट उड़ाई ॥
 तेज न सहि सक सो फिरि आवा । मैं अभिमानी रबि निअरावा ॥
 जरे पंख अति तेज अपारा । परेउँ भूमि करि घोर चिकारा ॥
 मुनि एक नाम चंद्रमा ओही । लागी दया देखि करि मोही ॥
 बहु प्रकार तेहिं ग्यान सुनावा । देहजनित अभिमान छड़ावा ॥
 त्रेताँ ब्रह्म मनुज तनु धरिही । तासु नारि निसिचर पति हरिही ॥

तासु खोज पठइहि प्रभु दूता । तिन्हहि मिलें तैं होब पुनीता ॥
 जमिहहि पंख करसि जनि चिंता । तिन्हहि देखाइ देहेसु तैं सीता ॥
 मुनि कइ गिरा सत्य भइ आजू । सुनि मम बचन करहु प्रभु काजू ॥
 गिरि त्रिकूट ऊपर बस लंका । तहँ रह रावन सहज असंका ॥
 तहँ असोक उपवन जहँ रहई । सीता बैठि सोच रत अहई ॥
 दो०— मैं देखउँ तुम्ह नहीं गीधहि दृष्टि अपार ।

बूढ़ भयउँ न त करतेउँ कछुक सहाय तुम्हार ॥ २८ ॥
 जो नाघइ सत जोजन सागर । करइ सो राम काज मति आगर ॥
 मोहि बिलोकि धरहु मन धीरा । राम कृपाँ कस भयउ सरीरा ॥
 पापिउ जा कर नाम सुमिरहीं । अति अपार भवसागर तरहीं ॥
 तासु दूत तुम्ह तजि कदराई । राम हृदयँ धरि करहु उपाई ॥
 अस कहि गरुड़ गीध जब गयऊ । तिन्ह के मन अति बिसमय भयऊ ॥
 निज निज बल सब काहूँ भाषा । पार जाइ कर संसय राखा ॥
 जरठ भयउँ अब कहइ रिछेसा । नहिं तन रहा प्रथम बल लेसा ॥
 जबहिं त्रिविक्रम भए खरारी । तब मैं तरुन रहेउँ बल भारी ॥
 दो०— बलि बाँधत प्रभु बाढ़ेउ सो तनु बरनि न जाइ ।

उभय घरी महँ दीन्हीं सात प्रदक्षिण धाड़ ॥ २९ ॥
 अंगद कहइ जाउँ मैं पारा । जियँ संसय कछु फिरती बारा ॥
 जामवंत कह तुम्ह सब लायक । पठइअ किमि सबही कर नायक ॥
 कहइ रीछपति सुनु हनुमाना । का चुप साधि रहेहु बलवाना ॥
 पवन तनय बल पवन समाना । बुधि बिबेक बिग्यान निधाना ॥

कवन सो काज कठिन जग माहीं । जो नहिं होइ तात तुम्ह पाहीं ॥
 राम काज लागि तव अवतारा । सुनतहिं भयउ पर्वताकारा ॥
 कनक बरन तन तेज बिराजा । मानहुँ अपर गिरिन्ह कर राजा ॥
 सिंहनाद करि बारहिं बारा । लीलहिं नाघउँ जलनिधि खारा ॥
 सहित सहाय रावनहि मारी । आनउँ इहाँ त्रिकूट उपारी ॥
 जामवंत मैं पूँछउँ तोही । उचित सिखावनु दीजहु मोही ॥
 एतना करहु तात तुम्ह जाई । सीतहि देखि कहहु सुधि आई ॥
 तब निज भुज बल राजिवनैना । काँतुक लागि संग कपि सेना ॥

छं०— कपि सेन संग सँघारि निसिचर राघु सीतहि आनिहैं ।
 त्रैलोक पावन सुजसु सुर मुनि नरदादि बखानिहैं ॥
 जो सुनत गावत कहत समुझत परम पद नर पावई ।
 रघुबीर पद पाथोज मधुकर दास तुलसी गावई ॥

दो०— भव भेषज रघुनाथ जसु सुनहिं जे नर अरु नारि ।

तिन्ह कर सकल मनोरथ सिद्ध करहिं त्रिसिरारि ॥ ३० (क) ॥

सो०— नीलोत्पल तन स्याम काम कोटि सोभा अधिक ।

सुनिअ तासु गुन ग्राम जासु नाम अघ खग बधिक ॥ ३० (ख) ॥

मासपारायण, तेईसवाँ विश्राम

इति श्रीमद्रामचरितमानसे सकलकलिकलुषविध्वंसने

चतुर्थः सोपानः समाप्तः ।

(किष्किन्धाकाण्ड समाप्त)



शरणागत विभीषण



श्रवन सुजम् मुनि आयतै प्रभु भंजन भव भीर।
त्राहि त्राहि आरति हरन मरन मुखद रघुबीर॥

॥ श्रीगणेशाय नमः ॥

श्रीजानकीवल्लभो विजयते

श्रीरामचरितमानस

पञ्चम सोपान

सुन्दरकाण्ड

श्लोक

शान्तं शाश्वतमप्रमेयमनघं निर्वाणशान्तिप्रदं
ब्रह्माशम्भुफणीन्द्रसेव्यमनिशं वेदान्तवेद्यं विभुम् ।
रामाख्यं जगदीश्वरं सुरगुरुं मायामनुष्यं हरिं
वन्देऽहं करुणाकरं रघुवरं भूपालचूडामणिम् ॥ १ ॥
नान्या स्पृहा रघुपते हृदयेऽस्मदीये

सत्यं वदामि च भवानखिलान्तरात्मा ।

भक्तिं प्रयच्छ रघुपुङ्गव निर्भरां मे
कामादिदोषरहितं कुरु मानसं च ॥ २ ॥

अतुलितबलधामं हेमशैलाभदेहं
दनुजवनकृशानुं ज्ञानिनामग्रगण्यम् ।

सकलगुणनिधानं वानराणामधीशं
रघुपतिप्रियभक्तं वातजातं नमामि ॥ ३ ॥

जामवंत के बचन सुहाए । सुनि हनुमंत हृदय अति भाए ॥
तब लगि मोहि परिखेहु तुम्ह भाई । सहि दुख कंद मूल फल खाई ॥
जब लगि आवौं सीतहि देखी । होइहि काजु मोहि हरष बिसेषी ॥
यह कहि नाइ सबन्ह कहूँ माथा । चलेउ हरषि हियँ धरि रघुनाथा ॥
सिंधु तीर एक भूधर सुंदर । कौतुक कूदि चढ़ेउ ता ऊपर ॥
बार बार रघुबीर सँभारी । तरकेउ पवनतनय बल भारी ॥
जेहिं गिरि चरन देखि हनुमंता । चलेउ सो गा पाताल तुरंता ॥
जिमि अमोघ रघुपति कर बना । एही भाँति चलेउ हनुमाना ॥
जलनिधि रघुपति दूत बिचारी । तैं मैनाक होहि श्रमहारी ॥
दो०— हनुमान तेहि परसा कर पुनि कीन्ह प्रनाम ।

राम काजु कीन्हें बिनु मोहि कहाँ बिश्राम ॥ १ ॥
जात पवनसुत देवन्ह देखा । जानैं कहूँ बल बुद्धि बिसेषा ॥
सुरसा नाम अहिन्ह कै माता । पठइन्ह आइ कही तेहिं बाता ॥
आजु सुरन्ह मोहि दीन्ह अहारा । सुनत बचन कह पवनकुमारा ॥

राम काजु करि फिरि मैं आवौं । सीता कइ सुधि प्रभुहि सुनावौं ॥
 तब तव बदन पैठिहउँ आई । सत्य कहउँ मोहि जान दे माई ॥
 कवनेहुँ जतन देइ नहिं जाना । ग्रससि न मोहि कहेउ हनुमाना ॥
 जोजन भरि तेहिं बदन पसारा । कपि तनु कीन्ह दुगुन बिस्तारा ॥
 सोरह जोजन मुख तेहिं ठयऊ । तुरत पवनसुत बतिस भयऊ ॥
 जस जस सुरसा बदन बड़ावा । तासु दून कपि रूप देखावा ॥
 सत जोजन तेहिं आनन कीन्हा । अति लघु रूप पवनसुत लीन्हा ॥
 बदन पड़िठि पुनि बाहेर आवा । मागा बिदा ताहि सिरु नावा ॥
 मोहि सुरन्ह जेहि लागि पठावा । बुधि बल मरमु तोर मैं पावा ॥
 दो०—राम काजु सबु करिहहु तुम्ह बल बुद्धि निधान ।

आसिष देइ गई सो हरषि चलेउ हनुमान ॥ २ ॥
 निसिचरि एक सिंधु महँ रहई । करि माया नभु के खग गहई ॥
 जीव जंतु जे गगन उड़ाहीं । जल बिलोकि तिन्ह कै परिछाहीं ॥
 गहइ छाहँ सक सो न उड़ाई । एहि बिधि सदा गगनचर खाई ॥
 सोइ छल हनूमान कहँ कीन्हा । तासु कपटु कपि तुरतहिं चीन्हा ॥
 ताहि मारि मारुतसुत बीरा । बारिधि पार गयउ मतिथीरा ॥
 तहाँ जाइ देखी बन सोभा । गुंजत चंचरीक मधु लोभा ॥
 नाना तरु फल फूल सुहाए । खग मृग बृंद देखि मन भाए ॥
 सैल बिसाल देखि एक आगें । ता पर थाइ चढ़ेउ भय त्यागें ॥
 उमा न कछु कपि कै अधिकाई । प्रभु प्रताप जो कालहि खाई ॥
 गिरि पर चढ़ि लंका तेहिं देखी । कहि न जाइ अति दुर्ग बिसेषी ॥

अति उत्तंग जलनिधि चहु पासा । कनक कोट कर परम प्रकासा ॥

छं०— कनक कोट बिचित्र मनि कृत सुंदरायतना घना ।
 चउहट्ट हट्ट सुबट्ट बीथीं चारु पुर बहु बिधि बना ॥
 गज बाजि खच्चर निकर पदचर रथ बरूथन्हि को गनै ।
 बहुरूप निसिचर जूथ अतिबल सेन बरनत नहि बनै ॥
 बन बाग उपवन बाटिका सर कूप बापीं सोहहीं ।
 नर नाग सुर गंधर्व कन्या रूप मुनि मन मोहहीं ॥
 कहूँ माल देह बिसाल सैल समान अतिबल गर्जहीं ।
 नाना अखारेन्ह भरहि बहुबिधि एक एकन्ह तर्जहीं ॥
 करि जतन भट कोटिन्ह बिकट तन नगर छहुँ दिसि रच्छहीं ।
 कहूँ महिष मानुष धेनु खर अज खल निसाचर भच्छहीं ॥
 एहि लागि तुलसीदास इन्ह की कथा कछु एक है कही ।
 रघुबीर सर तीरथ सरीरन्ह त्यागि गति पैहहि सही ॥

दो०—पुर रखवारे देखि बहु कपि मन कीन्ह बिचार ।

अति लघु रूप धरौ निसि नगर करौ पइसार ॥ ३ ॥
 मसक समान रूप कपि धरी । लंकहि चलेउ सुमिरि नरहरी ॥
 नाम लंकिनी एक निसिचरी । सो कह चलेसि मोहि निंदरी ॥
 जानेहि नहीं मरमु सठ मोरा । मोर अहार जहाँ लागि चोरा ॥
 मुठिका एक महा कपि हनी । रुधिर बमत धरनों ढनमनी ॥
 पुनि संभारि उठी सो लंका । जोरि पानि कर बिनय ससंका ॥

जब रावनहि ब्रह्म बर दीन्हा । चलत बिंरिच कहा मोहि चीन्हा ॥
बिकल होसि तैं कपि के मारे तब जानेसु निसिचर संघारे ॥
तात मोर अति पुन्य बहूता । देखेउँ नयन राम कर दूता ॥
दो०— तात स्वर्ग अपवर्ग सुख धरिअ तुला एक अंग ।

तूल न ताहि सकल मिलि जो सुख लव सतसंग ॥ ४ ॥
प्रबिसि नगर कीजे सब काजा । हृदयँ राखि कोसलपुर राजा ॥
गरल सुधा रिपु करहिं मिताई । गोपद सिधु अनल सितलाई ॥
गरुड़ सुमेरु रेनु सम ताही । राम कृपा करि चितवा जाही ।
अति लघु रूप धरेउ हनुमाना । पैठा नगर सुमिरि भगवाना ।
मंदिर मंदिर प्रति करि सोधा । देखे जहँ तहँ अगनित जोधा ॥
गयउ दसानन मंदिर माहीं । अति बिचित्र कहि जात सो नाहीं ॥
सयन किएँ देखा कपि तेही । मंदिर महुँ न दीखि बैदेही ॥
भवन एक पुनि दीख सुहावा । हरि मंदिर तहँ भिन्न बनावा ॥
दो०— रामायुध अंकित गृह सोभा बरनि न जाइ ।

नव तुलसिका बंद तहँ देखि हरष कषिराइ ॥ ५ ॥
लंका निसिचर निकर निवासा । इहाँ कहाँ सज्जन कर बासा ॥
मन महुँ तरक करै कपि लागा । तेहीं समय बिभीषनु जागा ॥
राम राम तेहिं सुभिरन कीन्हा । हृदयँ हरष कपि सज्जन चीन्हा ॥
एहि सन हठि करिहउँ पहिचानी साधु ते होइ न कारज हानी ॥
बिप्र रूप धरि बचन सुनाए । सुनत बिभीषन उठि तहँ आए ॥

करि प्रनाम पूँछी कुसलाई । बिप्र कहहु निज कथा बुझाई ॥
 की तुम्ह हरि दासन्ह महुँ कोई । मोरें हृदय प्रीति अति होई ॥
 की तुम्ह रामु दीन अनुरागी । आयहु मोहि करन बड़भागी ॥
 दो०— तब हनुमंत कही सब राम कथा निज नाम ।

सुनत जुगल तन पुलक मन भग्न सुमिरि गुन ग्राम ॥ ६ ॥
 सुनहु पवनसुत रहनि हमारी । जिमि दसनन्हि महुँ जीभ बिचारी ॥
 तात कबहुँ मोहि जानि अनाथा । करिहहिं कृपा भानुकुल नाथा ॥
 तामस तनु कछु साधन नाही । प्रीति न पद सरोज मन माहीं ॥
 अब मोहि भा भरोस हनुमंता । बिनु हरिकृपा मिलहिं नहिं संता ॥
 जौं रघुबीर अनुग्रह कीन्हा । तौ तुम्ह मोहि दरसु हठि दीन्हा ॥
 सुनहु बिभीषन प्रभु कै रीती । करहिं सदा सेवक पर प्रीती ॥
 कहहु कवन मैं परम कुलोना । कपि चंचल सबहीं बिधि हीना ॥
 प्रात लेइ जो नाम हमारा । तेहि दिन ताहि न मिलै अहारा ॥
 दो०— अस मैं अद्यम सखा सुनु मोहु पर रघुबीर ।

कीन्हे कृपा सुमिरि गुन भरे बिलोचन नीर ॥ ७ ॥
 जानतहूँ अस स्वामि बिसारी । फिरहिं ते काहे न होहिं दुखारी ॥
 एहि बिधि कहत राम गुन ग्रामा । पावा अनिर्वाच्य विश्रामा ।
 पुनि सब कथा बिभीषन कही । जेहि बिधि जनकसुता तहैं रही ॥
 तब हनुमंत कहा सुनु भ्राता । देखी चहउँ जानकी माता ॥
 जुगुति बिभीषन सकल सुनाई । चलेउ पवनसुत बिदा कराई ॥

करि सोइ रूप गयउ पुनि तहवाँ । बन असोक सीता रह जहवाँ ॥
देखि मनहि महँ कोन्ह प्रनामा । बैठेहिं बीति जात निसि जामा ॥
कृस तनु सीस जटा एक बेनी । जपति हृदयँ रघुपति गुन श्रेनी ॥
दो०— निज पद नयन दिऐँ मन राम पद कमल लीन ।

परम दुखी भा पवनसुत देखि जानकी दीन ॥ ८ ॥
तरु पल्लव महँ रहा लुकाई । करइ बिचार करौँ का भाई ॥
तेहि अवसर रावनु तहँ आवा । संग नारि बहु किऐँ बनावा ॥
बहु बिधि खल सीतहि समुझावा । साम दान भय भेद देखावा ॥
कह रावनु सुनु सुमुखि सयानी । मंदोदरी आदि सब रानी ॥
तव अनुचरीं करउँ पन मोरा । एक बार बिलोकु मम ओरा ॥
तृन धरि ओट कहति बैदेही । सुमिरि अवधपति परम सनेही ॥
सुनु दसमुख खद्योत प्रकासा । कबहुँ कि नलिनी करइ बिकासा ॥
अस मन समुझ कहति जानकी खल सुधि नहिं रघुबीर बान की ॥
सठ सूनें हरि आनेहि मोही । अधम निलज्ज लाज नहिं तोही ॥
दो०— आपुहि सुनि खद्योत सम रामहि भानु समान ।

परुष बचन सुनि काढ़ि असि बोला अति खिसिआन ॥ ९ ॥
सीता तैं मम कृत अपमाना । कटिहउँ तव सिर कठिन कृपाना ॥
नाहिं त सपदि भानु मम बानी । सुमुखि होति न त जीवन हानी ॥
स्याम सरोज दाम सम सुंदर । प्रभु भुज करि कर सम दसकंधर ॥

सो भुज कंठ कि तव असि घोरा । सुनु सठ अस प्रवान पन मोरा ॥
 चंद्रहास हरु मम परितापं । रघुपति बिरह अनल संजातं ॥
 सीतल निसित बहसि बर धारा । कह सीता हरु मम दुख भारा ।
 सुनत बचन पुनि मारन धावा । मयतनयाँ कहि नीति बुझावा ॥
 कहेसि सकल निसिचरिन्ह बोलाई । सीतहि बहु बिधि त्रासहु जाई ॥
 मास दिवस महुँ कहा न माना । तौ मैं मारबि काढ़ि कृपाना ॥
 दो०—भवन गयउ दसकंधर इहाँ पिसाचिनि बृंद ।

सीतहि त्रास देखावहिं धरहिं रूप बहु मंद ॥ १० ॥
 त्रिजटा नाम राच्छसी एका । राम चरन रति निपुन बिबेका ॥
 सबन्हौ बोलि सुनाएसि सपना । सीतहि सेइ करहु हित अपना ॥
 सपनें बानर लंका जारी । जातुधान सेना सब मारी ॥
 खर आरूढ़ नगन दससीसा । मुंडित सिर खंडित भुज बोसा ।
 एहि बिधि सो दच्छिन दिसि जाई । लंका मनहुँ बिभीषन पाई ।
 नगर फिरी रघुबीर दोहाई । तब प्रभु सीता बोलि पठाई ॥
 यह सपना मैं कहउँ पुकारी । होइहि सत्य गएँ दिन चारी ॥
 तासु बचन सुनि ते सब डरीं । जनकमुता के चरनन्हि परीं ॥
 दो०—जहँ तहँ गई सकल तब सीता कर मन सोच ।

मास दिवस बीते मोहि मारिहि निसिचर पोच ॥ ११ ॥
 त्रिजटा सन बोलीं कर जोरी । मातु बिपति संगिनि तैं मोरी ।
 तजौं देह करु बेगि उपाई । दुसह बिरहु अब नहिं सहि जाई ॥

आनि काठ रचु चिता बनाई । मातु अनल पुनि देहि लगाई ॥
 सत्य करहि मम प्रीति सयानी । सुनै को श्रवन सूल सम बानी ॥
 सुनत बचन पद गहि समुझाएसि । प्रभु प्रताप बल सुजसु सुनार्एसि ॥
 निसि न अनल मिलि सुनु सुकुमारी । अस कहि सो निज भवन सिधारी ॥
 कह सीता बिधि भा प्रतिकूला । मिलिहि न पावक मिटिहि न सूला ॥
 देखिअत प्रगट गगन अंगारा । अवनि न आवत एकउ तारा ।
 पावकमय ससि खवत न आगी । मानहुँ मोहि जानि हतभागी ॥
 सुनहि बिनय मम बिटप असोका । सत्य नाम करु हरु मम सोका ॥
 नूतन किसलय अनल समाना । देहि अग्नि जनि करहि निदाना ॥
 देखि परम बिरहाकुल सीता । सो छन कपिहि कलप सम बीता ॥
 सो०—कपि करि हृदयँ बिचार दीन्ह मुद्रिका डारि तब ।

जनु असोक अंगार दीन्ह हरषि उठि कर गहेउ ॥ १२ ॥
 तब देखी मुद्रिका मनोहर । राम नाम अंकित अति सुंदर ॥
 चकित चितव मुदरी पहिचानी । हरष बिषाद हृदयँ अकुलानी ॥
 जीति को सकइ अजय रघुराई । माया तैं असि रचि नहिं जाई ॥
 सीता मन बिचार कर नाना । मधुर बचन बोलेउ हनुमाना ॥
 रामचंद्र गुन बरनैं लागा । सुनतहिं सीता कर दुख भागा ॥
 लागीं सुनै श्रवन मन लाई । आदिहु तैं सब कथा सुनाई ॥
 श्रवनामृत जेहिं कथा सुहाई । कही सो प्रगट होति किन भाई ॥
 तब हनुमंत निकट चलि गयऊ । फिरि बैठीं मन बिसमय भयऊ ॥

राम दूत में मातु जानकी । सत्य सपथ करुनानिधान की ॥
 यह मुद्रिका मातु में आनी । दीन्ह राम तुम्ह कहँ सहिदानी ॥
 नर बानरहि संग कहु कैसें । कही कथा भइ संगति जैसें ॥
 दो०— कपि के बचन सप्रेम सुनि उपजा मन बिस्वास ।

जाना मन क्रम बचन यह कृपासिधु कर दास ॥ १३ ॥
 हरिजन जानि प्रीति अति गाढ़ी । सजल नयन पुलकावलि बाढ़ी ॥
 बूझत बिरह जलधि हनुमाना । भयहु तात मो कहँ जलजाना ॥
 अब कहु कुसल जाउँ बलिहारी । अनुज सहित सुख भवन खरारी ॥
 कोमलचित कृपाल रघुराई । कपि केहि हेतु धरी नितुराई ॥
 सहज बानि सेवक सुखदायक । कबहुँक सुरति करत रघुनायक ॥
 कबहुँ नयन मम सीतल ताता । होइहहिं निरखि स्याम मृदु गाता ॥
 बचनु न आव नयन भरे बारी । अहह नाथ हौं निपट बिसारी ॥
 देखि परम बिरहाकुल सीता । बोला कपि मृदु बचन बिनीता ॥
 मातु कुसल प्रभु अनुज समेता । तव दुख दुखी सुकृपा निकेता ॥
 जनि जननी मानहु जियँ ऊना । तुम्ह ते प्रेम् राम केँ दूना ॥
 दो०— रघुपति कर संदेसु अब सुनु जननी धरि धीर ।

अस कहि कपि गदगद भयउ भरे बिलोचन नीर ॥ १४ ॥
 कहेउ राम बियोग तव सीता । मो कहँ सकल भए बिपरीता ॥
 नव तरु किसलय मनहुँ कृसानू । कालनिसा सम निरसि ससि भानू ॥
 कुबलय बिपिन कुंत बन सरिसा । बारिद तपत तेल जनु बरिसा ॥

जे हित रहे करत तेइ पीरा । उरग स्वास सम त्रिबिध समीरा ॥
 कहेहू तैं कछु दुख घटि होई । काहि कहौ यह जान न कोई ॥
 तत्व प्रेम कर मम अरु तोरा । जानत प्रिया एकु मनु मोरा ॥
 सो मनु सदा रहत तोहि पाहीं । जानु प्रीति रसु एतनेहि माहीं ॥
 प्रभु संदेसु सुनत बैदेही । मगन प्रेम तन सुधि नहिं तेही ॥
 कह कपि हृदयँ धीर धरु माता । सुमिरु राम सेवक सुखदाता ॥
 उर आनहु रघुपति प्रभुताई । सुनि मम बचन तजहु कदराई ॥
 दो०— निसिचर निकर यतंग सम रघुपति बान कृसानु ।

जननी हृदयँ धीर धरु जरे निसाचर जानु ॥ १५ ॥
 जौं रघुबीर होति सुधि पाई । करते नहिं बिलंबु रघुराई ॥
 राम बान रबि उएँ जानकी । तम बरुथ कहँ जातुधान की ॥
 अबहिं मातु मैं जाउँ लवाई । प्रभु आयसु नहिं राम दोहाई ॥
 कछुक दिवस जननी धरु धीरा । कपिन्ह सहित अइहहिं रघुबीरा ॥
 निसिचर मारि तोहि लै जैहहिं । तिहुँ पुर नारदादि जसु गैहहिं ॥
 हैं सुत कपि सब तुम्हहि समाना । जातुधान अति भट बलवाना ॥
 मोरें हृदय परम संदेहा । सुनि कपि प्रगट कीन्हि निज देहा ॥
 कनक भूधराकार सरीरा । समर भयंकर अतिबल बीरा ॥
 सीता मन भरोस तब भयऊ । पुनि लघु रूप पवनसुत लयऊ ॥
 दो०— सुनु पाता साखामृग नहिं बल बुद्धि बिसाल ।

प्रभु प्रताप तैं गरुड़हि खाइ परम लघु ब्याल ॥ १६ ॥

मन संतोष सुनत कपि बानी । भगति प्रताप तेज बल सानी ॥
 आसिष दीन्हि रामप्रिय जाना । होहु तात बल सील निधाना ॥
 अजर अमर गुननिधि सुत होहू । करहुँ बहुत रघुनायक छोहू ॥
 करहुँ कृपा प्रभु अस सुनि काना । निर्भर प्रेम मगन हनुमाना ॥
 बार बार नाएसि पद सीसा । बोला बचन जोरि कर कीसा ॥
 अब कृतकृत्य भयउँ मैं माता । आसिष तव अमोघ बिख्याता ।
 सुनहु मातु मोहि अतिसय भूखा । लागि देखि सुंदर फल रूखा ॥
 सुनु सुत करहिं बिपिन रखवारी । परम सुभट रजनीचर भारी ॥
 तिन्ह कर भय माता मोहि नाहीं । जौं तुम्ह सुख मानहु मन माहीं ॥
 दो०— देखि बुद्धि बल निपुन कपि कहेउ जानकी जाहु ।

रघुपति चरन हृदय धरि तात मथुर फल खाहु ॥ १७ ॥
 चलेउ नाइ सिरु पैठेउ बागा । फल खाएसि तरु तोरैं लागा ॥
 रहे तहाँ बहु भट रखवारे । कछु मारेसि कछु जाइ पुकारे ॥
 नाथ एक आवा कपि भारी । तेहि असोक बाटिका उजारी ॥
 खाएसि फल अरु बिटप उपारे । रच्छक मर्दि मर्दि महि डारे ॥
 सुनि रावन पठए भट नाना । तिन्हहि देखि गर्जेउ हनुमाना ॥
 सब रजनीचर कपि संघारे । गए पुकारत कछु अधमारे ।
 पुनि पठयउ तेहिं अच्छकुमारा । चला संग लै सुभट अपारा ॥
 आवत देखि बिटप गहि तर्जा । ताहि निपाति महाधुनि गर्जा ॥
 दो०— कछु मारेसि कछु मर्देसि कछु मिलाएसि धरि धूरि ।

कछु पुनि जाइ पुकारे प्रभु मर्कट बल भूरि ॥ १८ ॥

सुनि सुत बध लंकेस रिसाना । पठएसि मेघनाद बलवाना ॥
 मारसि जनि सुत बाँधेसु ताही । देखिअ कपिहि कहाँ कर आही ॥
 चला इंद्रजित अतुलित जोधा । बंधु निधन सुनि उपजा क्रोधा ॥
 कपि देखा दारुन भट आवा । कटकटाइ गर्जा अरु धावा ॥
 अति बिसाल तरु एक उपारा । बिरथ कीन्ह लंकेस कुमारा ॥
 रहे महाभट ताके संगी । गहि गहि कपि मर्दइ निज अंगा ॥
 तिन्हहि निपाति ताहि सन बाजा । धिरे जुगल मानहुँ गजराजा ॥
 मुठिका मारि चढ़ा तरु जाई । ताहि एक छन मुरुछा आई ॥
 उठि बहोरि कीन्हसि बहु माया । जीति न जाइ प्रभंजन जाया ॥
 दो० - ब्रह्म अस्त्र तेहि साँधा कपि मन कीन्ह बिचार ।

जौ न ब्रह्मसर मानउँ महिमा मिटइ अपार ॥ १९ ॥
 ब्रह्मबान कपि कहूँ तेहि मारा । परतिहुँ बार कटकु संघारा ॥
 तेहि देखा कपि मुरुछित भयऊ । नागपास बाँधेसि लै गयऊ ॥
 जासु नाम जपि सुनहु भवानी । भव बंधन काटहिं नर ग्यानी ॥
 तासु दूत कि बंध तरु आवा । प्रभु कारज लागि कपिहिं बैधावा ॥
 कपि बंधन सुनि निसिचर धाए । कौतुक लागि सभाँ सब आए ॥
 दसमुख सभा दोखि कपि जाई कहि न जाइ कछु अति प्रभुताई ॥
 कर जोरें सुर दिसिप बिनीता । भृकुटि बिलोकत सकल सपीता ॥
 देखि प्रताप न कपि मन संका । जिमि अहिगन महुँ गरुड असंका ॥
 दो० — कपिहि बिलोकि दसानन बिहसा कहि दुर्बाद ।

सुत बध सुरति कीन्ह पुनि उपजा हृदयँ बिषाद ॥ २० ॥

कह लंकेस कवन तैं कीसा । केहि कै बल घालेहि बन खीसा ॥
 की धौं श्रवन सुनेहि नहिं मोही । देखउँ अति असंक सठ तोही ॥
 मारे निसिचर केहिं अपराधा । कहु सठ तोहि न प्रान कइ बाधा ॥
 सुनु रावन ब्रह्मांड निकाया । पाइ जासु बल बिरचति माया ॥
 जाकैं बल बिरंचि हरि ईसा । पालत सृजत हरत दससीसा ॥
 जा बल सीस धरत सहसानन । अंडकोस समेत गिरि कानन ॥
 धरइ जो बिबिध देह सुरत्राता । तुम्ह से सठन्ह सिखावनु दाता ॥
 हर कोदंड कठिन जेहिं भंजा । तेहि समेत नृप दल मद गंजा ॥
 खर दूषन त्रिसिरा अरु बाली । बधे सकल अतुलित बलसाली ॥
 दो०— जाके बल लवलेस तैं जितेहु चराचर झारि ।

तासु दूत मैं जा करि हरि आनेहु प्रिय नारि ॥ २१ ॥
 जानउँ मैं तुम्हारि प्रभुताई । सहसबाहु सन परी लराई ॥
 समर बालि सन करि जसु पावा । सुनि कपि वचन बिहसि बिहरावा ॥
 खाथउँ फल प्रभु लागी भूँखा । कपि सुभाव तैं तोरेउँ रूखा ॥
 सब कै देह परम प्रिय स्वामी । मारहिं मोहि कुमारग गामी ॥
 जिन्ह मोहि मारा ते मैं मारे । तेहि पर बाँधेउँ तनयँ तुम्हारे ॥
 मोहि न कछु बाँधे कइ लाजा । कीन्ह चहउँ निज प्रभु कर काजा ॥
 बिनती करउँ जोरि कर रावन । सुनहु मान तजि मोर सिखावन ॥
 देखहु तुम्ह निज कुलहिं बिचारी । भ्रम तजि भजहु भगत भय हारी ॥
 जाकैं डर अति काल डेराई । जो सुर असुर चराचर खाई ॥

तासों बयरु कबहुँ नहिं कीजै । मोरे कहैं जानकी दीजै ॥

दो०—प्रनतपाल रघुनायक करुना सिंधु खरारि।

गएँ सरन प्रभु राखिहैं तव अपराध बिसारि॥ २२ ॥

राम चरन पंकज उर धरहू । लंका अचल राजु तुम्ह करहू ॥

रिषि पुलस्ति जसु बिमल मयंका । तेहि ससि महुँ जनि होहु कलंका ॥

राम नाम बिनु गिरा न सोहा । देखु बिचारि त्यागि मद मोहा ॥

बसन हीन नहिं सोह सुरारी । सब भूषन भूषित बर नारी ॥

राम बिमुख संपति प्रभुताई । जाइ रही पाई बिनु पाई ॥

सजल मूल जिन्ह सरितन्ह नाहीं । बरषि गएँ पुनि तबहिं सुखाहीं ॥

सुनु दसकंठ कहउँ पन रोपी । बिमुख राम आता नहिं कोपी ॥

संकर सहस बिघ्नु अज तोही । सकहिं न राखि राम कर द्रोही ॥

दो०—मोहमूल बहु सूल प्रद त्यागहु तम अभिमान।

भजहु राम रघुनायक कृपा सिंधु भगवान॥ २३ ॥

जदपि कही कपि अति हित बानी । भगति बिबेक बिरति नय सानी ॥

बोला बिहसि महा अभिमानी । मिला हमहि कपि गुर बड़ग्यानी ॥

मृत्यु निकट आई खल तोही । लागेसि अधम सिखावन मोही ॥

उलटा होइहि कह हनुमाना । मतिभ्रम तोर प्रगट मैं जाना ॥

सुनि कपि बचन बहुत खिसिआना । बेगि न हरहुँ मूढ़ कर प्राना ॥

सुनत निसाचर मारन धाए । सचिवन्ह सहित बिभीषनु आए ॥

नाइ सीस करि बिनय बहुता । नीति बिरोध न मारिअ दूता ॥

आन दंड कछु करिअ गोसाँई । सबहीं कहा मंत्र भल भाई ॥
 सुनत बिहसि बोला दसकंधर । अंग भंग करि पठइअ बंदर ॥
 दो०— कपि के ममता पूँछ पर सबहि कहउँ समुझाइ ।

तेल बोरि पट बाँधि पुनि पावक देहु लगाइ ॥ २४ ॥
 पूँछहीन बानर तहँ जाइहि । तब सठ निज नाथहि लइ आइहि ॥
 जिन्ह कै कीन्हिसि बहुत बड़ाई । देखउँ मैं तिन्ह कै प्रभुताई ॥
 बचन सुनत कपि मन मुसुकाना । भइ सहाय सारद मैं जाना ।
 जातुधान सुनि रावन बचना । लागे रचै मूढ़ सोइ रचना ।
 रहा न नगर बसन धृत तेला । बाढ़ी पूँछ कीन्ह कपि खेला ॥
 कौतुक कहँ आए पुरबासी । मारहिं चरन करहिं बहु हाँसी ॥
 बाजहिं ढोल देहिं सब तारी । नगर फेरि पुनि पूँछ प्रजारी ॥
 पावक जरत देखि हनुमंता । भयउ परम लघुरूप तुरंता ॥
 निबुकि चढ़ेउ कपि कनक अटारी । भई सभित निसाचर नारी ॥
 दो०— हरि प्रेरित तेहि अवसर चले मरुत उनचास ।

अट्टहास करि गर्जा कपि बड़ि लाग अकास ॥ २५ ॥
 देह बिसाल परम हरुआई । मंदिर तैं मंदिर चढ़ धाई ।
 जरइ नगर भा लोग बिहाला । झपट लपट बहु कोटि कराला ।
 तात मातु हा सुनिअ पुकारा । एहिं अवसर को हमहि उबारा ॥
 हम जो कहा यह कपि नहिं होई । बानर रूप धरें सुर कोई ॥
 साधु अवग्या कर फलु ऐसा । जरइ नगर अनाथ कर जैसा ।

जारा नगर निमिष एक माहीं । एक बिभीषन कर गृह नाहीं ॥
ता कर दूत अनल जेहिं सिरिजा । जरा न सो तेहि कारन गिरिजा ॥
उलटि पलटि लंका सब जारी । कूदि परा पुनि सिंधु मझारी ॥
दो०— पूँछ बुझाइ खोइ श्रम धरि लघु रूप बहोरि।

जनकसुता के आगे ठाढ़ भयउ कर जोरि ॥ २६ ॥
मातु मोहि दीजे कछु चीन्हा । जैसें रघुनायक मोहि दीन्हा ॥
चूड़ामनि उतारि तब दयऊ । हरष समेत पवनसुत लयऊ ॥
कहेहु तात अस मोर प्रनामा । सब प्रकार प्रभु पूरनकामा ॥
दीन दयाल बिरिदु संभारी । हरहु नाथ मम संकट भारी ॥
तात सक्रसुत कथा सुनाएहु । बान प्रताप प्रभुहि समुझाएहु ॥
मास दिवस महुँ नाथु न आवा । तौ पुनि मोहि जिअत नहिं पावा ॥
कहु कपि केहि बिधि राखीं प्राणा तुम्हहु तात कहत अब जाना ॥
तोहि देखि सीतलि भइ छाती । पुनि मो कहूँ सोइ दिनु सो राती ॥
दो०— जनकसुतहि समुझाइ करि बहु बिधि धीरजु दीन्ह।

चरन कमल सिरु नाइ कपि गवनु राम यहिं कीन्ह ॥ २७ ॥
चलत महाधुनि गर्जेसि भारी । गर्भ स्त्रवहिं सुनि निसिचर नारी ॥
नाधि सिंधु एहि पारहि आवा सबद किलिकिला कपिन्ह सुनावा ॥
हरषे सब बिलोकि हनुमाना । नूतन जन्म कपिन्ह तब जाना ॥
मुख प्रसन्न तन तेज बिराजा । कीन्हेसि रामचंद्र कर काजा ॥
मिले सकल अति भए सुखारी । तलफत मीन पाव जिमि बारी ॥

सुनु कपि तोहि समान उपकारी । नहिं कोउ सुर नर मुनि तनुधारी ॥
 प्रति उपकार करीं का तोरा । सनमुख होइ न सकत मन मोरा ।
 सुनु सुत तोहि उरिन मैं नाहीं । देखेउँ करि बिचार मन माहीं ॥
 पुनि पुनि कर्पिहि चितव सुरत्राता । लोचन नीर पुलक अति गाता ॥
 दो०— सुनि प्रभु बचन बिलोकि मुख गात हरषि हनुमंत ।

चरन परेउ प्रेमाकुल आहि आहि भगवंत ॥ ३२ ॥
 बार बार प्रभु चहइ उठावा । प्रेम मगन तेहि उठब न भावा ॥
 प्रभु कर पंकज कपि कै सीसा । सुमिरि सो दसा मगन गौरीसा ॥
 सावधान मन करि पुनि संकर । लागे कहन कथा अति सुंदर ॥
 कपि उठाइ प्रभु हृदयँ लगावा । कर गहि परम निकट बैठावा ॥
 कहु कपि रावन पालित लंका । केहि बिधि दहेउ दुर्ग अति बंका ॥
 प्रभु प्रसन्न जाना हनुमाना । बोला बचन बिगत अभिमाना ॥
 साखामृग कै बड़ि मनुसाई । साखा तैं साखा पर जाई ॥
 नाधि सिंधु हाटकपुर जारा । निसिचर गन बधि बिपिन उजारा ॥
 सो सब तव प्रताप रघुराई । नाथ न कछू मोरि प्रभुताई ।
 दो०— ता कहूँ प्रभु कछु अगम नहिं जा पर तुम्ह अनुकूल ।

तव प्रभावं बड़वानलहिं जारि सकइ खलु तूल ॥ ३३ ॥
 नाथ भगति अति सुखदायनी । देहु कृपा करि अनपायनी ।
 सुनि प्रभु परम सरल कपि बानी । एवमस्तु तब कहेउ भवानी ।
 उमा राम सुभाउ जेहिं जाना । ताहि भजनु तजि भाव न आना ।

यह संवाद जासु उर आवा । रघुपति चरन भगति सोइ पावा ॥
 सुनि प्रभु बचन कहहिं कपिबृंदा । जय जय जय कृपाल सुखकंदा ॥
 तब रघुपति कपिपतिहि बोलावा । कहा चलैं कर करहु बनावा ॥
 अब बिलंबु केहि कारन कीजे । तुरत कपिन्ह कहूँ आयसु दीजे ॥
 कौतुक देखि सुमन बहु बरषी । नभ तें भवन चले सुर हरषी ॥
 दो०— कपिपति बेगि बोलाए आए जूथप जूथ ।

नाना बरन अतुल बल बानर भालु बरूथ ॥ ३४ ॥
 प्रभु पद पंकज नावहिं सीसा । गर्जहिं भालु महाबल कीसा ॥
 देखी राम सकल कपि सेना । चितइ कृपा करि राजिव नैना ॥
 राम कृपा बल पाइ कपिंदा । भए पच्छजुत मनहुँ गिरिंदा ॥
 हरषि राम तब कीन्ह पयाना सगुन भए सुंदर सुभ नाना ।
 जासु सकल मंगलमय कीती । तासु पयान सगुन यह नीती ॥
 प्रभु पयान जाना बैदेहीं । फरकि बाम अँग जनु कहि देहीं ॥
 जोइ जोइ सगुन जानकिहि होई । असगुन भयउ रावनहि सोई ॥
 चला कटकु को बरनैं पारा । गर्जहिं बानर भालु अपारा ॥
 नख आयुध गिरि पादपधारी । चले गगन महि इच्छाचारी ।
 केहरिनाद भालु कपि करहीं । डगमगाहिं दिग्गज चिक्करहीं ।

छं०— चिक्करहिं दिग्गज डोल महि गिरि लोल सागर खरभरे ।

मन हरष सभ गंधर्व सुर मुनि नाग किंनर दुख टरे ॥
 कटकटहिं मर्कट बिकट भट बहु कोटि कोटिन्ह धावहीं ।
 जय राम प्रबल प्रताप कोसलनाथ गुन गन गावहीं ॥

सहि सक न भार उदार अहिपति बार बारहिं मोहई ।
 गह दसन पुनि पुनि कमठ पृष्ठ कठोर सो किमि सोहई ॥
 रघुबीर रुचिर प्रयान प्रस्थिति जानि परम सुहावनी ।
 जनु कमठ खर्पर सर्पराज सो लिखत अबिचल पावनी ॥

दो०— एहि बिधि जाइ कृषानिधि उतरे सागर तीर ।

जहैं तहैं लागे खान फल भालु बिपुल कपि बीर ॥ ३५ ॥
 उहाँ निसाचर रहहिं ससंका । जब तैं जारि गयउ कपि लंका ॥
 निज निज गृहँ सब करहि बिचारा । नहिं निसिचर कुल केर उबारा ॥
 जासु दूत बल बरनि न जाई । तेहि आएँ पुर कवन भलाई ॥
 दूतिन्ह सन सुनि पुरजन बानी । मंदोदरी अधिक अकुलानी ॥
 रहसि जोरि कर पति पग लागी । बोली बचन नीति रस पागी ॥
 कंत करष हरि सन परिहरहू । मोर कहा अति हित हियँ धरहू ॥
 समुझत जासु दूत-कइ करनी । स्रवहिं गर्भ रजनीचर घरनी ॥
 तासु नारि निज सचिव बोलाई । पठवहु कंत जो चहहु भलाई ॥
 तव कुल कमल बिपिन दुखदाई । सीता सीत निसा सम आई ॥
 सुनहु नाथ सीता बिनु दीन्हें । हित न तुम्हार संभु अज कीन्हें ।
 दो०— राम बान अहि गन सरिस निकर निसाचर भेक ।

जब लगि ग्रसत न तब लगि जतनु करहु तजि टेक ॥ ३६ ॥
 श्रवन सुनी सठ ता करि बानी । बिहसा जगत बिदित अभिमानी ॥
 सभय सुभाउ नारि कर साचा । मंगल महँ भय मन अति काचा ॥
 जौ आवइ मर्कट कटकाई । जिअहिं बिचारे निसिचर खाई ॥

कंपहिं लोकप जाकीं त्रासा । तासु नारि सभीत बड़ि हासा ॥
 अस कहि बिहसि ताहि उर लाई । चलेउ सभाँ ममता अधिकई ॥
 मंदोदरी हृदयँ कर चिंता । भयउ कंत पर बिधि बिपरीता ॥
 बैठेउ सभाँ खबरि असि पाई । सिंधु पार सेना सब आई ॥
 बूझेसि सचिव उचित मत कहहु । ते सब हँसे मष्ट करि रहहु ॥
 जितेहु सुरासुर तब श्रम नार्हीं । नर बानर केहि लेखे मारहीं ॥
 दो०— सचिव बैद गुर तीनि जौं प्रिय बोलहिं भय आस ।

राज धर्म तन तीन कर होइ बेगिहीं नास ॥ ३७ ॥
 सोइ रावन कहुं बनी सहाई । अस्तुति करहिं सुनाइ सुनाई ॥
 अवसर जानि बिभीषनु आवा । भ्राता चरन सीसु तेहिं नावा ॥
 पुनि सिरु नाइ बैठ निज आसन । बोला बचन पाइ अनुसासन ॥
 जौ कृपाल पूछिहु मोहि बाता । मति अनुरूप कहउं हित ताता ॥
 जो आपन चाहै कल्याना । सुजम् सुमति सुभ गति सुख नाना ।
 सो परनारि लिलार गोसाई । तजउ चउथि के चंद कि नाई ॥
 चौदह भुवन एक पति होई । भूतद्रोह तिष्टइ नहिं सोई ॥
 गुन सागर नागर नर जोऊ । अलप लोभ भल कहइ न कोऊ ॥
 दो०— काम क्रोध मद लोभ सब नाश नरक के पंथ ।

सब परिहरि रघुबीरहि भजहु भजहिं जेहि संत ॥ ३८ ॥
 तात राम नहिं नर भूपाला । भुवनेस्वर कालहु कर काला ॥
 ब्रह्म अनामय अज भगवंता । व्यापक अर्जित अनादि अनंता ।
 गो द्विज धेनु देव हितकारी । कृपासिंधु मानुष तनुधारी ॥

जन रंजन भंजन खल ब्राता । बेद धर्म रच्छक सुनु भ्राता ॥
 ताहि बयरु तजि नाइअ माथा । प्रनतारति भंजन रघुनाथा ॥
 देहु नाथ प्रभु कहूँ बैदेही । भजहु राम बिनु हेतु सनेही ॥
 सरन गएँ प्रभु ताहु न त्यागा । बिस्व द्रोह कृत अघ जेहि लागा ॥
 जासु नाम त्रय ताप नसावन । सोइ प्रभु प्रगट समुझु जियँ रावन ॥
 दो०— बार बार पद लागउँ बिनय करउँ दससीस ।

परिहरि मान मोह मद भजहु कोसलाधीस ॥ ३९ (क) ॥

मुनि पुलस्ति निज सिष्य सन कहि पठई यह बात ।

तुरत सो मैं प्रभु सन कही पाइ सुअवसरु तात ॥ ३९ (ख) ॥

माल्यवंत अति सचिव सयाना । तासु बचन सुनि अति सुख माना ॥
 तात अनुज तव नीति बिभूषन । सो उर धरहु जो कहत बिभीषन ॥
 रिपु उतकरष कहत सठ दोऊ । दूरि न करहु इहाँ हइ कोऊ ॥
 माल्यवंत यह गयउ बहोरी । कहइ बिभीषनु पुनि कर जोरी ॥
 सुमति कुमति सब के उर रहहीं । नाथ पुरान निगम अस कहहीं ।
 जहाँ सुमति तहँ संपति नाना । जहाँ कुमति तहँ बिपति निदाना ॥
 तव उर कुमति बसी बिपरीता । हित अनहित मानहु रिपु प्रीता ।
 कालराति निसिचर कुल केरी । तेहि सीता पर प्रीति घनेरी ॥
 दो०— तात चरन गहि मागउँ राखहु मोर दुलार ।

सीता देहु राम कहूँ अहित न होइ तुम्हार ॥ ४० ॥

बुध पुरान श्रुति संमत बानी । कही बिभीषन नीति बखानी ॥
 सुनत दसानन उठा रिसाई । खल तोहि निकट मृत्यु अब आई ।

जिअसि सदा सठ मोर जिआवा रिपु कर पच्छ मूढ तोहि भावा ॥
 कहसि न खल अस को जग माहीं भुज बल जाहि जिता मैं नाहीं ॥
 मम पुर बसि तर्पसिन्ह पर प्रीती सठ मिलु जाइ तिन्हहि कहु नीती ॥
 अस कहि कीन्होस चरन प्रहारा । अनुज गहे पद बारहिं बारा ॥
 उमा संत कइ इहइ बड़ाई । मंद करत जो करइ भलाई ॥
 तुम्ह पितु सरिस भलेहिं मोहि मारा । रामु भजें हित नाथ तुम्हारा ॥
 सचिव संग लै नभ पथ गयऊ । सबहि सुनाइ कहत अस भयऊ ॥
 दो०— रामु सत्यसंकल्प प्रभु सभा कालबस तोरि ।

मैं रघुबीर सरन अब जाउँ देहु जनि खोरि ॥ ४१ ॥
 अस कहि चला बिभीषनु जबहीं आयूहीन भए सब तबहीं ॥
 साधु अवग्या तुरत भवानी । कर कल्याण अखिल कै हानी ॥
 रावन जबहिं बिभीषन त्यागा । भयउ बिभ्रव बिनु तबहिं अभागा ॥
 चलेउ हरषि रघुनायक पाहीं । करत मनोरथ बहु मन माहीं ॥
 देखिहउँ जाइ चरन जलजाता । अरुन मृदुल सेवक सुखदाता ॥
 जे पद परास तरी रिषिनारी । दंडक कानन पावनकारी ॥
 जे पद जनकसुताँ उर लाए । कपट कुरंग संग धर धाए ॥
 हर उर सर सरोज पद जेई । अहोभाग्य मैं देखिहउँ तेई ॥
 दो०— जिन्ह पायन्ह के पादुकन्हि भरतु रहे मन लाइ ।

ते पद आजु बिलोकिहउँ इन्ह नयनन्हि अब जाइ ॥ ४२ ॥
 एहि बिधि करत सप्रेम बिचारा आयउ सर्पाद सिंधु एहिं पारा ॥
 कपिन्ह बिभीषनु आवत देखा । जाना कोउ रिपु दूत बिसेषा ॥

ताहि राखि कपीस पाहिं आए । समाचार सब ताहि सुनाए ॥
 कह सुग्रीव सुनहु रघुसाई । आवा मिलन दसानन भाई ॥
 कह प्रभु सखा बृजिऐ काहा । कहइ कपीस सुनहु नरनाहा ॥
 जानि न जाइ निसाचर माया । कामरूप केहि कारन आया ॥
 भेद हमार लेन सठ आवा । राखिअ बाँध मोहि अस भावा ॥
 सखा नीति तुम्ह नीकि बिचारी । मम पन सरनागत भयहारी ॥
 सुनि प्रभु बचन हरष हनुमाना । सरनागत बच्छल भगवाना ॥
 दो० - सरनागत कहूँ जे तजहि निव्र अनहित अनुमानि ।

ते नर पावैर पापमय तिन्हि बिलोकत हानि ॥ ४३ ॥
 कोटि बिप्र बध लागहि जाहूँ । आएँ सरन तजउँ नहि ताहूँ ॥
 सनमुख होइ जीव मोहि जबहीं । जन्म कोटि अघ नासहिं तबहीं ॥
 पापवंत कर सहज सुभाऊ । भजनु मोर तेहि भाव न काऊ ॥
 जौं पै दुष्ट हृदय सोइ होई । मोरें सनमुख आव कि सोई ॥
 निर्मल मन जन सो मोहि पावा । मोहि कपट छल छिद्र न भावा ॥
 भेद लेन पठवा दससीसा । तबहुँ न कछु भय हानि कपीसा ॥
 जग महुँ सखा निसाचर जेते । लछिमनु हनइ निमिष महुँ तेते ॥
 जौं सभीत आवा सरनाई । राखिहउँ ताहि प्रान की नाई ॥
 दो०— उभय भाँति तेहि आनहुँ हँसि कह कृपानिकेत ।

जय कृपाल कहि कषि चले अंगद हनू समेत ॥ ४४ ॥
 सादर तेहि आगेँ करि बानर । चले जहाँ रघुपति करुनाकर ॥
 दूरिहि ते देखे द्वौ भ्राता । नयनानंद दान के दाता ॥

बहुरि राम छबिधाम बिलोकी । रहेउ ठटुकि एकटक पल रोकी ॥
 भुज प्रलंब कंजारुन लोचन । स्यामल गात प्रनत भय मोचन ॥
 सिंघ कंध आयत उर सोहा । आनन अमित मदन मन मोहा ॥
 नयन नीर पुलकित अति गाता । मन धरि धीर कही मृदु बाता ॥
 नाथ दसानन कर मैं भ्राता । निस्सिचर बंस जनम सुरत्राता ॥
 सहज पापप्रिय तामस देहा । जथा उलूकहि तम पर नेहा ॥
 दो०— श्रवन सुजसु सुनि आयउँ प्रभु भंजन भव भीर ।

त्राहि त्राहि आरति हरन सरन सुखद रघुबीर ॥ ४५ ॥
 अस कहि करत दंडवत देखा । तुरत उठे प्रभु हरष बिसेषा ॥
 दीन बचन सुनि प्रभु मन भावा । भुज बिसाल गहि हृदयँ लगावा ॥
 अनुज सहित मिलि ढिग बैठारी । बोले बचन भगत भयहारी ॥
 कहु लंकेस सहित परिवारा । कुसल कुठाहर बास तुम्हारा ॥
 खल मंडली बसहु दिनु राती । सखा धरम निब्रह्म केहि भाँती ॥
 मैं जानउँ तुम्हारि सब रीती । अति नय निपुन न भाव अनीती ॥
 बरु भल बास नरक कर ताता । दुष्ट संग जनि देइ बिधाता ॥
 अब पद देखि कुसल रघुराया । जौं तुम्ह कीन्हि जानि जन दाया ॥
 दो०—तब लागि कुसल न जीव कहूँ सपनेहुँ मन बिश्राम ।

जब लागि भजत न राम कहूँ सोक धाम तजि काम ॥ ४६ ॥
 तब लागि हृदयँ बसत खल नाना । लोभ मोह मच्छर मद माना ॥
 जब लागि उर न बसत रघुनाथा । धरें चाप सायक कटि भाथा ॥

ममता तरुन तमी औंधआरी । राग द्वेष उलूक सुखकारी ॥
 तब लागि बसति जीव मन माहीं । जव लागि प्रभु प्रताप रबि नहीं ॥
 अब मैं कुसल मिटे भय भारे । देखि राम पद कमल तुम्हारे ॥
 तुम्ह कृपाल जा पर अनुकूला । ताहि न ब्याप त्रिबिध भव सूला ॥
 मैं निसिचर अति अधम सुभाऊ । सुभ आचरनु कीन्ह नहि काऊ ॥
 जासु रूप मुनि ध्यान न आवा । तेहि प्रभु हरषि हृदयँ मोहि लावा ॥
 दो०—अहोभाग्य मम अमित अति राम कृपा सुख पुंज ।

देखेउँ नयन बिगंचि सिव सेव्य जुगल पद कंज ॥ ४७ ॥
 सुनहु सखा निज कहउँ सुभाऊ । जान भुसुँडि संभु गिरिजाऊ ॥
 जौं नर होइ चराचर द्रोही । आवै सभय सरन तकि मोही ॥
 तजि मद मोह कपट छल नाना । करउँ सद्य तेहि साधु समाना ॥
 जननी जनक बंधु सुत दारा । तनु धनु भवन सुहृद परिवारा ॥
 सब कै ममता ताग बटोरी । मम पद मनहि बाँध बरि डोरी ॥
 समदरसी इच्छा कछु नाही । हरष सोक भय नहि मन माहीं ॥
 अस सज्जन मम उर बस कैसैं । लोभी हृदयँ बसइ धनु जैसैं ॥
 तुम्ह सारिखे संत प्रिय मोरें । धरउँ देह नहि आन निहोरें ॥
 दो०—सगुन उपासक परहित निरत नीति दृढ़ नेम ।

ते नर प्रात समान मम जिहू कै द्विज पद प्रेम ॥ ४८ ॥
 सुनु लंकेस सकल गुन तोरें । तारैं तुम्ह अतिसय प्रिय मोरें ॥
 राम बचन सुनि बानर जूथा । सकल कहहिं जय कृपा बरूथा ॥

सुनत बिभीषनु प्रभु कै बानी । नहि अघात श्रवनामृत जानी ॥
 पद अंबुज गहि बारहिं बारा । हृदयँ समात न प्रेमु अपारा ॥
 सुनहु देव सचराचर स्वामी । प्रनतपाल उर अंतरजामी ॥
 उर कछु प्रथम बासना रही । प्रभु पद प्रीति सरित सो बही ॥
 अब कृपाल निज भगति पावनी । देहु सदा सिव मन भावनी ॥
 एवमस्तु कहि प्रभु रनधीरा । पागा तुरत सिंधु कर नीरा ॥
 जदपि सखा तव इच्छा नाहीं । मोर दरसु अमोघ जग माहीं ॥
 अस कहि राम तिलक तेहि सारा । मुमन बृष्टि नभ भई अपारा ॥
 दो०— रावन क्रोध अनल निज स्वास समीर प्रचंड ।

जरत बिभीषनु राखेउ दीन्हैउ राजु अखंड ॥ ४९ (क) ॥

जो संपति सिव रावनहि दीन्हि दिऐँ दस माथ ।

सोइ संपदा बिभीषनहि सकुचि दीन्हि रघुनाथ ॥ ४९ (ख) ॥

अस प्रभु छाड़ि भजहिं जे आना । ते नर पसु बिनु पैंछ बिधाना ॥
 निज जन जानि ताहि अपनावा । प्रभु सुभाव कपि कुल मन भावा ॥
 पुनि सर्वग्य सर्व उर बासी । सर्वरूप सब रहित उदासी ॥
 बोले बचन नीति प्रतिपालक । कारन मनुज दनुज कुल घालक ॥
 सुनु कपीस लंकार्पात बीरा । केहि बिधि तरिअ जलधि गंभीरा ।
 संकुल मकर उरग शूष जाती । अति अगाध दुस्तर सब भाँती ॥
 कह लंकेस सुनहु रघुनायक । कोटि सिंधु सोषक तव सायक ॥
 जद्यपि तदपि नीति असि गाई । बिनय करिअ सागर सन जाई ।

दो०— प्रभु तुम्हार कुलगुर जलधि कहिहि उपाय बिचारि।

बिनु प्रयास सागर तरिहि सकल भालु कपि धारि॥५०॥
 सखा कही तुम्ह नीकि उपाई । करिअ दैव जौं होइ सहाई॥
 मंत्र न यह लछिमन मन भावा । राम बचन सुनि अति दुख पावा ।
 नाथ दैव कर कवन भरोसा । सोषिअ सिंधु करिअ मन रोसा ।
 कादर मन कहूँ एक अधारा । दैव दैव आलसी पुकारा॥
 सुनत बिहसि बोले रघुबीरा । ऐसेहिं करब धरहु मन धीरा॥
 अस कहि प्रभु अनुजहि समुझाई । सिंधु समीप गए रघुराई
 प्रथम प्रनाम कीन्ह सिरु नाई । बैठे पुनि तट दर्भ डसाई॥
 जबहिं बिभीषन प्रभु पहिं आए । पाछें रावन दूत पठाए॥
 दो०— सकल चरित तिन्ह देखे धरें कपट कपि देह।

प्रभु गुन हृदयँ सराहहिं सरनागत पर नेह॥५१॥
 प्रगट बखानाहिं राम सुभाऊ । अति सप्रेम गा बिसरि दुराऊ॥
 रिपु के दूत कपिन्ह तब जाने । सकल बाँधि कपीस पहि आने ।
 कह सुग्रीव सुनहु सब बानर । अंग भंग करि पठवहु निसिचर ।
 सुनि सुग्रीव बचन कपि धाए । बाँधि कटक चहु पास फिराए ।
 बहु प्रकार मारन कपि लागे । दीन पुकारत तर्दापि न त्यागे॥
 जो हमार हर नासा काना । तेहि कोसलाधीस कै आना ।
 सुनि लछिमन सब निकट बोलाए । दया लागि हौंस तुरत छोड़ाए॥
 रावन कर दीजहु यह पाती । लछिमन बचन बाचु कुलघाती॥

दो०— कहेहु मुखार मूढ़ सन मम संदेसु उदार।

सीता देइ मिलहु न त आवा कालु तुम्हार ॥ ५२ ॥
 तुरत नाइ लछिमन पद माथा । चले दूत बरनत गुन गाथा ॥
 कहत राम जसु लंकाँ आए । रावन चरन सीस तिन्ह नाए ॥
 बिहसि दसानन पूँछी बाता । कहसि न सुक आपनि कुसलाता ॥
 पुनि कहु खबरि बिभीषन केरी । जाहि मृत्यु आई अति नेरी ॥
 करत राज लंका सठ त्यागी । होइहि जव कर कीट अभागी ॥
 पुनि कहु भालु कीस कटकाई । कठिन काल प्रेरित चलि आई ॥
 जिन्ह के जीवन कर रखवारा । भयउ मूढुल चित सिंधु बिचारा ॥
 कहु तपसिन्ह कै बात बहोरी । जिन्ह के हृदयँ त्रास अति मोरी ।
 दो०— की भइ भेंट कि फिरि गए श्रवन सुजसु सुनि मोर।

कहसि न रिपु दल तेज बल बहुत चकित चित तोर ॥ ५३ ॥
 नाथ कृपा करि पूँछेहु जैसे । मानहु कहा क्रोध तजि तैसे ॥
 मिला जाइ जब अनुज तुम्हारा । जातहिं राम तिलक तेहि सारा ।
 रावन दूत हमहि सुनि काना । कपिन्ह बाँध दीन्हे दुख नाना ॥
 श्रवन नासिका काटैं लागे । राम सपथ दीन्हें हम त्यागे ॥
 पूँछेहु नाथ राम कटकाई । बदन कोटि सत बरनि न जाई ॥
 नाना बरन भालु कपि धारी । बिकटानन बिसाल भयकारी ॥
 जेहिं पुर दहेउ हतेउ सुत तोरा । सकल कपिन्ह महँ तेहि बलु थोरा
 अमित नाम भट कठिन कराला । अमित नाग बल बिपुल बिसाला

दो०— द्विबिंद मयंद नील नल अंगद गद बिकटासि।

दधिमुख केहरि निसठ सठ जामवंत बलरासि॥५४॥
 ए कपि सब सुग्रीव समाना । इन्ह सम कोटिन्ह गनइ को नाना ॥
 राम कृपाँ अतुलित बल तिन्हहीं । तून समान त्रैलोकहि गनहीं ॥
 अस मैं सुना श्रवन दसकंधर । पदुम अठारह जूथप बंदर ॥
 नाथ कटक महँ सो कपि नाहीं । जो न तुम्हहि जीतै रन माहीं ॥
 परम क्रोध मीजहिं सब हाथा । आयसु पै न देहि रघुनाथा ॥
 सोषहिं सिधु साहित श्लष ब्याला । पूरहिं न त भरि कुधर बिसाला ॥
 मर्दि गर्द मिलवहिं दससीसा । ऐसेइ बचन कहहिं सब कीसा ॥
 गर्जहिं तर्जहिं सहज असंका । मानहुँ ग्रसन चहत हहिं लंका ॥
 दो०— सहज सूर कपि भालु सब पुनि सिर पर प्रभु राम।

रावन काल कोटि कहुँ जीति सकहिं संग्राम॥५५॥
 राम तेज बल बुधि बिपुलाई । सेष सहस सत सकहिं न गाई ॥
 सक सर एक सोषि सत सागर । तव भ्रातहि पूँछेउ नय नागर ॥
 तासु बचन सुनि सागर पाहीं । मागत पंथ कृपा मन माहीं ॥
 सुनत बचन बिहसा दससीसा । जौँ असि मति सहाय कृत कीसा ।
 सहज भीरु कर बचन दृढ़ाई । सागर सन ठानी मचलाई ।
 मूढ़ मृषा का करसि बड़ाई । रिपु बल बुद्धि थाह मैं पाई ॥
 सचिव सभीत बिभीषन जाकेँ । बिजय बिभूति कहाँ जग ताकेँ ।
 सुनि खल बचन दूत रिस बाढ़ी । समय बिचारि पात्रिका काढ़ी ॥

रामानुज दीन्ही यह पाती । नाथ बचाइ जुड़ावहु छाती ॥
बिहसि बाम कर लीन्ही रावन । सचिव बोलि सठ लाग बचावन ॥
दो०— बातन्ह मनहि रिझाइ सठ जनि घालसि कुल खीस ।

राम बिरोध न उबरसि सरन बिष्णु अज ईस ॥ ५६ (क) ॥

की तजि मान अनुज इव प्रभु पद पंकज भृंग ।

होहि कि राम सरानल खल कुल सहित पतंग ॥ ५६ (ख) ॥

सुनत सभय मन मुख मुसुकाई । कहत दसानन सबहि सुनाई ॥
भूमि परा कर गहत अकासा । लघु तापस कर बाग बिलासा ॥
कह सुक नाथ सत्य सब बानी । समुद्रहु छाड़ि प्रकृति अभिमानी ॥
सुनहु बचन मम परिहरि क्रोधा । नाथ राम सन तजहु बिरोधा ॥
अति कोमल रघुबीर सुभाऊ । जद्यपि अखिल लोक कर राऊ ॥
मिलत कृपा तुम्ह पर प्रभु करिही । उर अपराध न एकउ धरिही ॥
जनकसुता रघुनाथहि दीजे । एतना कहा मोर प्रभु कीजे ॥
जब तेहिं कहा देन बैदेही । चरन प्रहार कीन्ह सठ तेही ॥
नाइ चरन सिरु चला सो तहाँ । कृपासिंधु रघुनायक जहाँ ॥
करि प्रनामु निज कथा सुनाई । राम कृपाँ आपनि गति पाई ॥
रिषि अगस्ति कीं साप भवानी । राछस भयउ रहा मुनि ग्यानी ॥
बंदि राम पद बारहिं बारा । मुनि निज आश्रम कहँ पगु धारा ॥
दो०— बिनय न मानत जलधि जड़ गए तीन दिन बीति ।

बोले राम सकोष तब भय बिनु होइ न प्रीति ॥ ५७ ॥

लछिमन बान सरामन आनू । सोषौँ बारिधि बिसिख कृसानू ॥
 सठ सन बिनय कुटिल सन प्रीती । सहज कृपन सन सुंदर नीती ।
 ममता रत सन ग्यान कहानी । अति लोभी सन बिरति बखानी ॥
 क्रोधिहि सम कामिहि हरिकथा । ऊसर बीज बाँँ फल जथा ।
 अस कहि रघुपति चाप चढ़ावा । यह मत लछिमन के मन भावा ॥
 संधानेउ प्रभु बिसिख कराला । उठी उदधि उर अंतर ज्वाला ॥
 मकर उरग झष गन अकुलाने । जरत जंतु जलनिधि जब जाने ॥
 कनक थार भरि मनि गन नाना । बिप्र रूप आयउ तजि माना ॥
 दो०— काटेहि पड़ कदरी फरड़ कोटि जतन कोउ सींच ।

बिनय न मान खगेस सुनु डाटेहि पड़ नव नीच ॥ ५८ ॥
 सभय सिधु गहि पद प्रभु केरे । छमहु नाथ सब अवगुन मेरे ॥
 गगन समीर अनल जल धरनी । इन्ह कइ नाथ सहज जड़ करनी ॥
 तब प्रेरित मायाँ उपजाए । सृष्टि हेतु सब ग्रंथनि गाए ।
 प्रभु आयसु जेहि कहँ जस अहई । सो तेहि भाँँत रहें सुख लहई ।
 प्रभु भल कीन्ह मोहि सिख दीन्ही । मरजादा पुनि तुम्हरी कीन्ही
 ढोल गवाँँ सूद्र पसु नारी । सकल ताड़ना के अधिकारी ॥
 प्रभु प्रताप मैं जाब सुखाई । उतरिहि कटक न मोरि बड़ाई ॥
 प्रभु अग्या अपेल श्रुति गाई । करौँ सो बेगि जो तुम्हहि सोहाई ॥
 दो०— सुनत बिनीत बचन अति कह कृपाल मुमुकाइ ।

जेहि बिधि उतरै कपि कटक तात सो कहहु उपाइ ॥ ५९ ॥

नाथ नील नल कपि द्वौ भाई । लरिकाईं रिषि आसिष पाई ॥
 तिन्ह के परस किएँ गिरि भारे । तरिहहिं जलधि प्रताप तुम्हारे ॥
 मैं पुनि उर धरि प्रभु प्रभुताई । करिहउँ बल अनुमान सहाई ॥
 एहि बिधि नाथ पयोधि बैधाइअ जेहिं यह सुजसु लोक तिहुँ गाइअ ॥
 एहिं सर मम उत्तर तट बासी । हतहु नाथ खल नर अघ रासी ॥
 सुनि कृपाल सागर मन पीरा । तुरतहिं हरी राम रनधीरा ॥
 देखि राम बल पौरुष भारी । हरषि पयोनिधि भयउ सुखारी ॥
 सकल चरित कहि प्रभुहि सुनावा चरन बंदि पाथोधि सिधावा ॥

छं०— निज भवन गवनेउ सिंधु श्रीरघुपतिहि यह मत भायऊ ।
 यह चरित कलि मलहर जथामति दास तुलसी गायऊ ॥
 सुख भवन संसय समन दवन बिषाद रघुपति गुन गना ।
 तजि सकल आस भरोस गावहि सुनहि संतत सठ मना ॥

दो०— सकल सुमंगल दायक रघुनायक गुन गान ।
 सादर सुनहि ते तरहिं भव सिंधु बिना जलजान ॥ ६० ॥

मासपारायण, चौबीसवाँ विश्राम


इति श्रीमद्रामचरितमानसे सकलकलिकलुषविध्वंसने

पञ्चमः सोपानः समाप्तः ।

(सुन्दरकाण्ड समाप्त)



रामके लिये देव-रथ



तेजपुंज रथ दिव्य अनूपा ।
हरषि चढ़े कोसलपुर भूपा ॥

॥ श्रीगणेशाय नमः ॥

श्रीजानकीवल्लभो विजयते

श्रीरामचरितमानस

षष्ठ सोपान

लङ्काकाण्ड

श्लोक

रामं कामारिसेव्यं भवभयहरणं कालमत्तेभसिंहं
योगीन्द्रं ज्ञानगम्यं गुणनिधिमजितं निर्गुणं निर्विकारम् ।
मायातीतं सुरेशं खलवधनिरतं ब्रह्मवृन्दैकदेवं
वन्दे कन्दावदातं सरसिजनयनं देवमुखीशरूपम् ॥ १ ॥
शङ्खेन्द्राभमतीवसुन्दरतनुं शार्दूलचर्माखरं
कालव्यालकरालभूषणधरं गङ्गाशशाङ्कप्रियम् ।

काशीशं कलिकल्मषौघशमनं कल्याणकल्पद्रुमं
 नौमीड्यं गिरिजापतिं गुणनिधिं कन्दर्पहं शङ्करम् ॥ २ ॥
 यो ददाति सतां शम्भुः कैवल्यमपि दुर्लभम् ।
 खलानां दण्डकृद्योऽसौ शङ्करः शं तनोतु ये ॥ ३ ॥

दो०— तब निमेष परमानु जुग बरष कलप सर चंड ।
 भजसि न मन तेहि राम को कालु जासु कोदंड ॥
 सो०— सिंधु बचन सुनि राम सचिव बोलि प्रभु अस कहेउ ।
 अब बिलंबु केहि काम करहु सेतु उतरै कटकु ॥
 सुनहु भानुकुल केतु जामवंत कर जोरि कह ।
 नाथ नाम तव सेतु नर चढ़ि भवसागर तरहि ॥
 यह लघु जलाधि तरत कति बारा । अस सुनि पुनि कह पवनकुमारा ॥
 प्रभु प्रताप बड़वानल भारी । सोषेउ प्रथम पयोनिधि बारी ॥
 तव रिपु नारि रुदन जल धारा । भरेउ बहोरि भयउ तेहिं खारा ॥
 सुनि अति उकुति पवनसुत केरी । हरषे कपि रघुपति तन हेरी ॥
 जामवंत बोले दोउ भाई । नल नीलाहि सब कथा सुनाई ॥
 राम प्रताप सुमिरि मन माहीं । करहु सेतु प्रयास कछु नाहीं ॥
 बोलि लिए कपि निकर बहोरी । सकल सुनहु बिनती कछु मोरी ॥
 राम चरन पंकज उर धरहु । कौतुक एक भालु कपि करहु ॥
 धावहु मर्कट बिकट बरूथा । आनहु बिटप गिरिन्ह के जूथा ॥
 सुनि कपि भालु चले करि हूहा । जय रघुबीर प्रताप समूहा ॥

दो०— अति उत्तंग गिरि पादप लीलहिं लेहिं उठाइ ।

आनि देहिं नल नीलहि रचहिं ते सेतु बनाइ ॥ १ ॥
सैल बिसाल आनि कपि देहीं । कंदुक इव नल नील ते लेहीं ॥
देखि सेतु अति सुंदर रचना । बिहसि कृपानिधि बोले बचना ॥
परम रम्य उत्तम यह धरनी । महिमा अमित जाइ नहि बरनी ॥
करिहउँ इहाँ संभु थापना । मोरे हृदयँ परम कल्पना ॥
सुनि कपीस बहु दूत पठाए । मुनिबर सकल बोलि लै आए ॥
लिंग थापि बिधिवत करि पूजा । सिव समान प्रिय मोहि न दूजा ॥
सिव द्रोही मम भगत कहावा । सो नर सपनेहुँ मोहि न पावा ॥
संकर बिमुख भगति चह मोरी । सो नारकी मूढ़ मति थोरी ॥

दो०— संकरप्रिय मम द्रोही सिव द्रोही मम दास ।

ते नर करहिं कल्प भरि घोर नरक महुँ वास ॥ २ ॥
जे रामेस्वर दरसनु करिहहिं । ते तनु तजि मम लोक सिधरिहहिं ॥
जो गंगाजलु आनि चढ़ाइहि । सो साजुज्य मुक्ति नर पाइहि ॥
होइ अकाम जो छल तजि सेइहि । भगति मोरि तेहि संकर देइहि ॥
मम कृत सेतु जो दरसनु करिही । सो बिनु श्रम भवसागर तरिही ॥
राम बचन सब के जिय भाए । मुनिबर निज निज आश्रम आए ॥
गिरिजा रघुपति कै यह रीती । संतत करहिं प्रनत पर प्रीती ॥
बाँधा सेतु नील नल नागर । राम कृपाँ जसु भयउ उजागर ॥
बूझहिं आनहिं बोरहिं जेई । भए उपल बोहित सम तेई ॥

महिमा यह न जलधि कइ बरनी । पाहन गुन न कपिन्ह कइ करनी ॥

दो०— श्रीरघुबीर प्रताप ते सिंधु तरे पाषाण ।

ते मतिमंद जे राम तजि भजहिं जाइ प्रभु आन ॥ ३ ॥

बाँधि सेतु अति सुदृढ़ बनावा । देखि कृपानिधि के मन भावा ।

चली सेन कछु बरनि न जाई । गर्जहिं मर्कट भट समुदाई ॥

सेतुबंध ढिग चढ़ि रघुराई । चितव कृपाल सिंधु बहुताई ॥

देखन कहूँ प्रभु करुना कंदा । प्रगट भए सब जलचर बृंदा ॥

मकर नक्र नाना झष ब्याला । सत जोजन तन परम बिसाला ॥

अइसेउ एक तिन्हहि जे खाहीं । एकन्ह के डर तेपि डेराहीं ॥

प्रभुहि बिलोकहिं टरहिं न टारे । मन हरषित सब भए सुखारे ॥

तिन्ह की ओट न देखिअ बारी । मगन भए हरि रूप निहारी ॥

चला कटकु प्रभु आयसु पाई । को कहि सक कपि दल बिपुलाई ॥

दो०— सेतु बंध भइ भीर अति कपि नभ पंथ उड़ाहिं ।

अपर जलचरन्ह ऊपर चढ़ि चढ़ि पारहि जाहिं ॥ ४ ॥

अस कौतुक बिलोकि द्वौ भाई । बिहाँसि चले कृपाल रघुराई ॥

सेन सहित उतरे रघुबीरा । कहि न जाइ कपि जूथप भीरा ॥

सिंधु पार प्रभु डेरा कीन्हा । सकल कपिन्ह कहूँ आयसु दीन्हा ।

खाहु जाइ फल मूल सुहाए । सुनत भालु कपि जहाँ तहाँ धाए ॥

सब तरु फरे राम हित लागी । रिनु अरु कुरिनु काल गति त्यागी ॥

खाहिं मधुर फल बिटप हलावहिं । लंका सन्मुख सिखर चलावहिं ॥

जहँ कहँ फिरत निसाचर पावहिं । घेरि सकल बहु नाच नचावहिं ॥
 दसनन्हि काटि नासिका काना । कहि प्रभु सुजसु देहिं तब जाना ॥
 जिन्ह कर नासा कान निपाता । तिन्ह रावनहि कही सब बाता ॥
 सुनत श्रवन बारिधि बंधाना । दस मुख बोलि उठ्य अकुलाना ॥
 दो०— बाँध्यो बननिधि नीरनिधि जलधि सिंधु बारीस ।

सत्य तोयनिधि कंपति उदधि पयोधि नदीस ॥ ५ ॥
 निज बिकलता बिचारि बहोरी । बिहौंस गयउ गृह करि भय भोरी ॥
 मंदोदरी सुन्यो प्रभु आयो । कौतुकहीं पाथोधि बँधायो ॥
 कर गहि पतिहि भवन निज आनी । बोली परम मनोहर बानी ॥
 चरन नाइ सिरु अंचलु रोपा । सुनहु बचन पिय परिहरि कोपा ॥
 नाथ बयरु कीजे ताही सों । बुधि बल सकिअ जीति जाही सों ॥
 तुम्हहि रघुपतिहि अंतर कैसा । खलु खद्योत दिनकरहि जैसा ॥
 अतिबल मधु कैटभ जेहिं मारे । महाबीर दितिपुत संघारे ॥
 जेहिं बलि बाँध सहसभुज मारा । सोइ अवतरेउ हरन महि भारा ॥
 तासु बिरोध न कीजिअ नाथा । काल करम जिव जाकें हाथा ॥
 दो०—रामहि साँपि जानकी चाइ कमल पद माथ ।

सुत कहँ राज समर्पि बन जाइ भजिअ रघुनाथ ॥ ६ ॥
 नाथ दीनदयाल रघुराई । बाघउ सनमुख गएँ न खाई ॥
 चाहिअ करन सो सब करि बीते । तुम्ह सुर असुर चराचर जीते ॥
 संत कहहिं असि नीति दसानन । चौथेंपन जाइहि नृप कानन ॥

तासु भजन कीजिअ तहँ भर्ता । जो कर्ता पालक संहर्ता ॥
 सोइ रघुबीर प्रनत अनुरागी । भजहु नाथ ममता सब त्यागी ॥
 मुनिबर जतनु करहिं जेहि लागी । भूप राजु तजि होहिं बिरागी ।
 सोइ कोसलाधीस रघुराया । आयउ करन तोहि पर दाया ॥
 जौं पिय मानहु मोर सिखावन । सुजसु होइ तिहुँ पुर अति पावन ॥
 दो०— अस कहि नयन नीर भरि गहि पद कंपित गात ।

नाथ भजहु रघुनाथहि अचल होइ अहिवात ॥ ७ ॥
 तब रावन मयसुता उठाई । कहै लाग खल निज प्रभुताई ॥
 सुनु तैं प्रिया बृथा भय माना । जग जोधा को मोहि समाना ॥
 बरुन कुबेर पवन जम काला । भुज बल जितेउँ सकल दिगपाला ॥
 देव दनुज नर सब बस मोरें । कवन हेतु उपजा भय तोरें ॥
 नाना बिधि तेहि कहेसि बुझाई । सभाँ बहोरि बैठ सो जाई ॥
 मंदोदरीं हृदयँ अस जाना । काल बस्य उपजा अभिमाना ॥
 सभाँ आइ मंत्रिन्ह तेहिं बूझा । करब कवन बिधि रिपु सैं जूझा ॥
 कहहिं सचिव सुनु निसिचर नाहा । बार बार प्रभु पूछहु काहा ॥
 कहहु कवन भय करिअ बिचार । नर कपि भालु अहार हमारा ॥
 दो०— सब के बचन श्रवन सुनि कह प्रहस्त कर जोरि ।

नीति बिरोध न करिअ प्रभु मंत्रिन्ह मति अति थोरि ॥ ८ ॥
 कहहिं सचिव सठ ठकुरसोद्वती । नाथ न पूर आव एहि भाँती ॥
 बारिधि नाघि एक कपि आवा । तासु चरित मन महुँ सबु गावा ॥

छुधा न रही तुम्हहि तब काहू । जारत नगरु कस न धरि खाहू ॥
 सुनत नीक आगैं दुख पावा । सचिवन अस मत प्रभुहि सुनावा ॥
 जेहिं बारीस बैधायउ हेला । उतरेउ सेन समेत सुबेला ॥
 सो भनु मनुज खाब हम भाई । बचन कहाहिं सब गाल फुलाई ॥
 तात बचन मम सुनु अति आदर । जनि मन गुनहु मोहि करि कादर ॥
 प्रिय बानी जे मुनहिं जे कहहीं । ऐसे नर निकाय जग अहहीं ॥
 बचन परम हित सुनत कठोरे । सुनहिं जे कहहिं ते नर प्रभु थोरे ॥
 प्रथम बसीठ पठउ सुनु नीती । सीता देइ करहु पुनि प्रीती ॥
 दो०— नारि पाइ फिरि जाहिं जाँ तौ न बढ़ाइअ रारि ।

नाहिं त समुख समर महि तात करिअ हठि मारि ॥ ९ ॥
 यह मत जाँ मानहु प्रभु मोरा । उभय प्रकार सुजसु जग तोरा ॥
 सुत सन कह दसकंठ रिसाई । असि मति सठ केहिं तोहि सिखाई ॥
 अबहीं ते उर संसय होई । बेनुमूल सुत भयहु घमोई ॥
 सुनि पितु गिरा परुष अति घोरा । चला भवन कहि बचन कठोरा ॥
 हित मत तोहि न लागत कैसैं । काल बिबस कहूँ भेषज जैसैं ॥
 संध्या समय जानि दससीसा । भवन चलेउ निरखत भुज बीसा ॥
 लंका सिखर उपर आगरा । अति बिचित्र तहैं होइ अखारा ॥
 बैठ जाइ तेहिं मंदिर रावन । लागे किंनर गुन गन गावन ॥
 बाजहिं ताल पखाउज बीना । नृत्य करहिं अपछरा प्रबीना ॥

दो०— सुनासीर सत सरिस सो संतत करइ बिलास।

परम प्रबल रिपु सीस पर तद्यपि सोच न त्रास ॥ १० ॥
 इहाँ सुबेल सैल रघुबीरा । उतरे सेन सहित अति भीरा ॥
 सिखर एक उतंग अति देखी । परम रम्य सम सुभ्र बिसेषी ॥
 तहँ तरु किसलय सुमन सुहाए । लछिमन रचि निज हाथ डसाए ॥
 ता पर रुचिर मृदुल मृगछाला । तेहिं आसन आसीन कृपाला ॥
 प्रभु कृत सीस कपीस उछंगा । बाभ दहिन दिसि चाप निषंगा ॥
 दुहुँ कर कमल सुधारत बाना । कह लंकेश मंत्र लगि काना ॥
 बड़भागी अंगद हनुमाना । चरन कमल चापत बिधि नाना ॥
 प्रभु पाछे लछिमन बीरासन । कटि निषंग कर बान सरासन ॥
 दो०— एहि बिधि कृपा रूप गुन धाम रामु आसीन।

धन्य ते नर एहिं ध्यान जे रहत सदा लयलीन ॥ ११ (क) ॥

पूरब दिसा बिलोकि प्रभु देखा उदित मयंक।

कहत सबहि देखहु ससिहि मृगपति सरिस असंक ॥ ११ (ख) ॥

पूरब दिसि गिरिगुहा निवासी । परम प्रताप तेज बल रासी ॥
 मत नाग तम कुंभ बिदारी । ससि केसरी गगन बन चारी ॥
 बिथुरे नभ भुक्ताहल तारा । निसि सुंदरी केर सिंगारा ॥
 कह प्रभु ससि महुँ मेचकताई । कहहु काह निज निज मति भाई ॥
 कह सुग्रीव सुनहु रघुराई । ससि महुँ प्रगट भूमि कै झाँई ॥
 मारेउ राहु ससिहि कह कोई । उर महुँ परी स्यामता सोई ॥

कोउ कह जब बिधिरति मुख कीन्हा । सार भाग ससि कर हरि लीन्हा ॥
छिद्र सो प्रगट इंदु उर माहीं । तेहि भग देखिअ नभ परिछाहीं ॥
प्रभु कह गरल बंधु ससि केरा । अति प्रिय निज उर दीन्ह बसेरा ॥
बिष संजुत कर निकर पसारी जारत बिरहवंत नर नारी ।
दो०—कह हनुमंत सुनहु प्रभु ससि तुम्हार प्रिय दास ।

तव मूर्ति बिधु उर बसति सोइ स्यामता अभास ॥ १२ (क) ॥

नवाह्नपारायण, सातवाँ विश्राम

पवन तनय के बचन सुनि बिहँसे रामु सुजान ।

दच्छिन दिसि अवलोकि प्रभु बोले कृपानिधान ॥ १२ (ख) ॥
देखु बिभीषन दच्छिन आसा । घन घमंड दामिनी बिलासा ।
मधुर मधुर गरजइ घन घोरा । होइ बृष्टि जनि उपल कठोरा ॥
कहत बिभीषन सुनहु कृपाला । होइ न तड़ित न बारिद माला ॥
लंका सिखर उपर आगारा । तहाँ दसकंधर देख अखारा ॥
छत्र मेघडंबर सिर धारी । सोइ जनु जलद घटा अति कारी ॥
मंदोदरी श्रवन ताटंका । सोइ प्रभु जनु दामिनी दमंका ॥
बाजहिं ताल मृदंग अनूपा । सोइ रव मधुर सुनहु सुरभूपा ।
प्रभु मुसुकान समुझि अभिमाना । चाप चढ़ाइ बान संधाना ॥
दो०—छत्र मुकुट ताटंक तब हते एकहीं बान ।

सब के देखत महि परे मरमु न कोऊ जान ॥ १३ (क) ॥

अस कौतुक करि राम सर प्रविसेउ आइ निषंग ।

रावन सभा ससंक सब देखि महा रसभंग ॥ १३ (ख) ॥
 कंप न भूमि न मरुत बिसेषा । अस्त्र सस्त्र कछु नयन न देखा ॥
 सोचहिं सब निज हृदय मझारी । असगुन भयउ भयंकर भारी ॥
 दसमुख देखि सभा भय पाई । बिहसि बचन कह जुगुति बनाई ॥
 सिरउ गिरे संतत सुभ जाही । मुकुट परे कस असगुन ताही ॥
 सयन करहु निज निज गृह जाई । गवने भवन सकल सिर नाई ।
 मंदोदरी सोच उर बसेऊ । जब ते श्रवनपूर महि खसेऊ ॥
 सजल नयन कह जुग कर जोरी । सुनहु प्रानपति बिनती मोरी ॥
 कंत राम बिरोध परिहरहू । जानि मनुज जनि हठ मन धरहू ॥
 दो०— बिस्वरूप रघुवंस मनि करहु बचन बिस्वासु ।

लोक कल्पना बेद कर अंग अंग प्रति जासु ॥ १४ ॥
 पद पाताल सीस अज धामा । अपर लोक अँग अँग बिश्रामा ।
 भृकुटि बिलास भयंकर काला । नयन दिवाकर कच घन माला ।
 जासु घान अस्विनीकुमारा । निसि अरु दिवस निमेष अपारा ।
 श्रवन दिसा दस बेद बखानी । मारुत स्वास निगम निज बानी ।
 अधर लोभ जम दसन कराला । माया हास बाहु दिगपाला ॥
 आनन अनल अंबुपति जीहा । उतपति पालन प्रलय समीहा ॥
 रोम राजि अष्टादस भारा । अस्थि सैल सरिता नस जारा ॥
 उदर उदधि अधगो जातना । जगमय प्रभु को बहु कल्पना ॥

दो०— अहंकार सिव बुद्धि अज मन ससि चित्त महान ।

मनुज बास सचराचर रूप राम भगवान् ॥ १५ (क) ॥

अस बिचारि सुनु प्राणपति प्रभु सन बयरु बिहाइ ।

प्रीति करहु रघुबीर पद मम अहिवात न जाइ ॥ १५ (ख) ॥

बिहँसा नारि बचन सुनि काना । अहो मोह महिमा बलवाना ॥

नारि सुभाउ सत्य सब कहहीं । अवगुन आठ सदा उर रहहीं ॥

साहस अनृत चपलता माया । भय अबिबेक असौच अदाया ।

रिपु कर रूप सकल तैं गावा । अति बिसाल भय मोहि सुनावा ।

सो सब प्रिया सहज बस मोरें । समुझि परा प्रसाद अब तोरें ॥

जानिउँ प्रिया तोरि चतुराई । एहि बिधि कहहु मोरि प्रभुताई ॥

तव बतकही गूढ़ मृगलोचनि । समुझत सुखद सुनत भय मोचनि

मंदोदरि मन महुँ अस ठयऊ । पिराहि काल बस मति भ्रम भयऊ ।

दो०— एहि बिधि करत विनोद बहु प्रात प्रगट दसकंध ।

सहज असंक लंकपति सभाँ गयउ मद अंध ॥ १६ (क) ॥

सो०— फूलइ फरइ न बेत जदपि सुधा बरषहि जलद ।

मूरुख हृदयँ न चेत जौँ गुर मिलहि बिरंचि सम ॥ १६ (ख) ॥

इहाँ प्रात जागे रघुराई । पूछा मत सब सचिव बोलाई ॥

कहहु बेगि का करिअ उपाई । जामवंत कह पद सिरु नाई ॥

सुनु सर्वाय सकल उर बासी । बुधि बल तेज धर्म गुन रासी ॥

मंत्र कहउँ निज मति अनुसारा । दूत पठाइअ बालिकुमारा ॥

नीक मंत्र सब के मन माना । अंगद सन कह कृपानिधाना ।
बालितनय बुधि बल गुन धामा । लंका जाहु तात मम कामा ॥
बहुत बुझाई तुम्हहि का कहउँ । परम चतुर मैं जानत अहउँ ।
काजु हमार तासु हित होई । रिपु सन करेहु बतकही सोई ।

सो०— प्रभु अग्या धरि सीस चरन बंदि अंगद उठेउ ।

सोइ गुन सागर ईस राम कृपा जा पर करहु ॥ १७ (क) ॥

स्वयंसिद्ध सब काज नाथ मोहि आदरु दियउ ।

अस बिचारि जुबराज तन पुलकित हरषित हियउ ॥ १७ (ख) ॥

बंदि चरन उर धरि प्रभुताई । अंगद चलेउ सबहि सिरु नाई ।
प्रभु प्रताप उर सहज असंका । रन बाँकुरा बालिसुत बंका ॥
पुर पैठत रावन कर बेटा । खेलत रहा सो होइ गै भेटा ॥
बातहिं बात करष बढ़ि आई । जुगल अतुल बल पुनि तरुनाई ॥
तेहिं अंगद कहूँ लात उठाई । गहि पद पटकेउ भूमि भव्वाँई ।
निसिचर निकर देखि भट भारी । जहँ तहँ चले न सकहिं पुकारी ।
एक एक सन मरमु न कहहीं । समुझि तासु बध चुप करि रहहीं ।
भयउ कोलाहल नगर मझारी । आवा कपि लंका जेहिं जारी ।
अब धौं कहा करिहि करतारा । अति सभीत सब करहिं बिचारा ॥
बिनु पूछें मगु देहिं दिखाई । जेहि बिलोक सोइ जाइ सुखाई ॥

सो०— गयउ सभा दरबार तब सुमिरि राम पद कंज ।

सिंह ठवनि इत उत चितव धीर बीर बल पुंज ॥ १८ ॥

तुरत निसाचर एक पठावा । समाचार रावर्नहि जनावा ॥
 सुनत बिहँसि बोला दससीसा । आनहु बोलि कहाँ कर कीसा ॥
 आयसु पाइ दूत बहु धाए । कपिकुंजरहि बोलि लै आए ॥
 अंगद दीख दसानन बैसैं । सहित प्रान कज्जलगिरि जैसैं ॥
 भुजा बिटप सिर सृंग समाना । रोमावली लता जनु नाना ॥
 मुख नासिका नथन अरु काना । गिरि कंदरा खोह अनुमाना ॥
 गयउ सभाँ मन नेकु न मुरा । बालितनय अतिबल बाँकुरा ॥
 उठे सभासद कपि कहूँ देखी । रावन उर भा क्रोध बिसेषी ॥
 दो०— जथा मत्त गज जूथ महुँ पंचानन चलि जाइ ।

राम प्रताप सुमिरि मन बैठ सभाँ सिरु नाइ ॥ १९ ॥
 कह दसकंठ कवन तैं बंदर । मैं रघुबीर दूत दसकंधर ॥
 मम जनकहि तोहि रही मितार्ई । तव हित कारन आयउँ भाई ॥
 उत्तम कुल पुलस्ति कर नाती । सिव बिरंचि पूजेहु बहु भाँती ॥
 बर पायहु कीन्हैहु सब काजा । जीतेहु लोकपाल सब राजा ॥
 नृप अभिमान मोह बस किंबा । हरि आनिहु सीता जगदंबा ॥
 अब सुभ कहा सुनहु तुम्ह मोरा । सब अपराध छमिहि प्रभु तोरा ॥
 दसन गहहु तृन कंठ कुठारी । परिजन सहित संग निज नारी ॥
 सादर जनकसुता करि आगैं । एहि बिधि चलहु सकल भय त्यागैं ॥
 दो०— प्रनतपाल रघुवंसमनि त्राहि त्राहि अब मोहि ।

आरत गिरा सुनत प्रभु अभय करैगो तोहि ॥ २० ॥

रे कपिपोत बोलु संभारी । मूढ़ न जानेहि मोहि सुरारी ॥
 कहु निज नाम जनक कर भाई । केहि नातें मानिऐ मिताई ॥
 अंगद नाम बालि कर बेटा । तासों कबहुँ भई ही भेटा ॥
 अंगद बचन सुनत सकुचाना । रहा बालि बानर मैं जाना ॥
 अंगद तहीं बालि कर बालक । उपजेहु बंस अनल कुल घालक ॥
 गर्भ न गयहु ब्यर्थ तुम्ह जायहु । निज मुख तापस दूत कहायहु ॥
 अब कहु कुसल बालि कहँ अहई । बिहौंस बचन तब अंगद कहई ॥
 दिन दस गएँ बालि पहिं जाई । बूझेहु कुसल सखा उर लाई ॥
 राम बिरोध कुसल जसि होई । सो सब तोहि सुनाईहि सोई ।
 सुनु सठ भेद होइ मन ताकें । श्रीरघुबीर हृदय नहिं जाकें ॥
 दो०— हम कुल घालक सत्य तुम्ह कुल पालक दससीस ।

अंधउ बधिर न अस कहहिं नयन कान तब बीस ॥ २१ ॥
 सिव विरंचि सुर मुनि समुदाई । चाहत जासु चरन सेवकाई ॥
 तासु दूत होइ हम कुल बोरा । अइसिहुँ पति उर बिहर न तोरा ॥
 सुनि कठोर बानी कपि केरी । कहत दसानन नयन तरेरी ॥
 खल तव कठिन बचन सब सहऊँ । नीति धर्म मैं जानत अहऊँ ॥
 कह कपि धर्मसीलता तोरी । हमहुँ सुनी कृत पर त्रिय चोरी ॥
 देखी नयन दूत रखवारी । बूड़ि न मरहु धर्म ब्रतधारी ॥
 कान नाक बिनु भगिनि निहारी । छमा कीन्ह तुम्ह धर्म बिचारी ॥
 धर्मसीलता तव जग जागी । पावा दरसु हमहुँ बड़भागी ॥

दो० — जनि जल्पसि जड़ जंतु कपि सठ बिलोकु मम बाहु।

लोकपाल बल विपुल ससि ग्रसन हेतु सब राहु ॥ २२ (क) ॥

पुनि नभ सर मम कर निकर कमलन्हि पर करि बास।

सोभत भयउ मराल इव संभु सहित कैलास ॥ २२ (ख) ॥

तुम्हरे कटक माझ सुनु अंगद । मो सन भिरिहि कवन जोधा बद ॥

तव प्रभु नारि बिरहैं बलहीना । अनुज तासु दुख दुखी मलीना ॥

तुम्ह सुग्रीव कूलदुम दोऊ । अनुज हमार भीरु अति सोऊ ॥

जामवंत मंत्री अति बूढ़ा । सो कि होइ अब समरारूढ़ा ॥

सिलिप कर्म जानहिं नल नीला । है कपि एक महा बलसीला ॥

आवा प्रथम नगरु जेहिं जारा । सुनत बचन कह बालिकुमारा ॥

सत्य बचन कहु निसिचर नाहा । साँचेहुँ कीस कीन्ह पुर दाहा ॥

रावन नगर अल्प कपि दहई । सुनि अस बचन सत्य को कहई ॥

जो अति सुभट सराहेहु रावन । सो सुग्रीव केर लघु धावन ॥

चलइ बहुत सो बीर न होई । पठवा खबरि लेन हम सोई ॥

दो० — सत्य नगरु कपि जारेउ बिनु प्रभु आयसु पाइ ।

फिरि न गयउ सुग्रीव यहि तेहिं भय रहा लुकाइ ॥ २३ (क) ॥

सत्य कहहि दसकंठ सब मोहि न सुनि कछु कोह ।

कोउ न हमारें कटक अस तो सन लरत जो सोह ॥ २३ (ख) ॥

प्रीति बिरोध समान सन करिअ नीति असि आहि ।

जौं पृगपति बध मेड़ुकन्हि भल कि कहइ कोउ ताहि ॥ २३ (ग) ॥

जद्यपि लघुता राम कहूँ तोहि बधे बड़ दोष ।
 तदपि कठिन दसकंठ सुनु छत्र जाति कर रोष ॥ २३ (घ) ॥
 बक्र उक्ति धनु बचन सर हृदय दहेउ रिपु कीस ।
 प्रतिउत्तर सइसिन्ह मनहु काढ़त भट दससीस ॥ २३ (ङ) ॥
 हँसि बोलेउ दसमौलि तब कपि कर बड़ गुन एक ।

जो प्रतिपालइ तासु हित करइ उपाय अनेक ॥ २३ (च) ॥
 धन्य कीस जो निज प्रभु काजा । जहँ तहँ नाचइ परिहरि लाजा ॥
 नाचि कूदि करि लोग रिझाई । पति हित करइ धर्म निपुनाई ॥
 अंगद स्वामिभक्त तव जाती । प्रभु गुन कस न कहसि एहि भाँती ॥
 मैं गुन गाहक परम सुजाना । तव कटु रटनि करउँ नहिं काना ॥
 कह कपि तव गुन गाहकताई । सत्य पवनसुत मोहि सुनाई ॥
 बन बिधंसि सुत बधि पुर जारा । तदपि न तेहिं कछु कृत अपकारा ॥
 सोइ बिचारि तव प्रकृति सुहाई । दसकंधर मैं कीन्हि दिठाई ॥
 देखेउँ आइ जो कछु कपि भाषा । तुम्हरेँ लाज न रोष न माखा ॥
 जौँ असि मति पितु खाए कीसा । कहि अस बचन हँसा दससीसा ॥
 पितहि खाइ खातेउँ पुनि तोही । अबहीं समुझि परा कछु मोही ॥
 बालि बिमल जस भाजन जानी । हतउँ न तोहि अधम अभिमानी ॥
 कहु रावन रावन जग केते । मैं निज श्रवन सुने सुनु जेते ।
 बलिहि जितन एक गयउ पताला । राखेउ बाँध सिसुन्ह हयसाला ॥
 खेलहिं बालक मारहिं जाई । दया लागि बलि दीन्ह छोड़ाई ॥

एक बहोरि सहस्रभुज देखा । धाइ धरा जिमि जंतु बिसेषा ।
कौतुक लागि भवन लै आवा । सो पुलस्ति मुनि जाइ छोड़ावा ॥
दो०— एक कहत मोहि सकुच अति रह्य बालि कीं काँख ।

इन्ह भहुँ रावन तैं कवन सत्य ब्रह्म तजि माख ॥ २४ ॥
सुनु सठ सोइ रावन बलसीला । हरगिरि जान जासु भुज लीला ॥
जान उमापति जासु सुराई । पूजेउँ जेहि सिर सुमन चढ़ाई ॥
सिर सरोज निज करन्ह उतारी । पूजेउँ अमित बार त्रिपुरारी ॥
भुज बिक्रम जानहिं दिगपाला । सठ अजहूँ जिन्ह कें उर साला ॥
जानहिं दिग्गज उर कठिनाई । जब जब भिरउँ जाइ बरिआई ॥
जिन्ह के दसन कराल न फूटे । उर लागत मूलक इव टूटे ॥
जासु चलत डोलति इमि धरनी । चढ़त भक्त गज जिमि लघु तरनी ॥
सोइ रावन जग बिदित प्रतापी । सुनेहि न श्रवन अलीक प्रलापी ॥
दो०— तेहि रावन कहँ लघु कहसि नर कर करसि बखान ।

रे कपि बर्बर खर्ब खल अब जाना तव ग्यान ॥ २५ ॥
सुनि अंगद सकोप कह बानी । बोलु सँभारि अधम अभिमानी ।
सहस्रबाहु भुज गहन अपारा । दहन अनल सम जासु कुठारा ॥
जासु परसु सागर खर धारा । बूड़े नृप अगनित बहु बारा ॥
तासु गर्ब जेहि देखत भागा । सो नर क्यों दससीस अभागा ॥
राम मनुज कस रे सठ बंगा । धन्वी कामु नदी पुनि गंगा ॥
पसु सुरधेनु कल्पतरु रूखा । अन्न दान अरु रस पीयूषा ॥

बैनतेय खग अहि सहसानन । चिंतामनि पुनि उपल दसानन ॥
 सुनु मतिमंद लोक बैकुंठा । लाभ कि रघुपति भगति अकुंठा ॥
 दो०— सेन सहित तव मान मथि बन उज्जारि पुर जारि ।

कस रे सठ हनुमान कपि गयउ जो तव सुत मारि ॥ २६ ॥
 सुनु रावन परिहरि चतुराई । भजसि न कृपासिंधु रघुराई ॥
 जौं खल भएसि राम कर द्रोही । ब्रह्म रुद्र सक राखि न तोही ॥
 मूढ़ बृथा जनि मारसि गाला । राम बयर अस होइहि हाला ॥
 तव सिर निकर कपिन्ह के आगे । परिहहिं धरनि राम सर लागे ॥
 ते तव सिर कंदुक सम नाना । खेलिहहिं भालु कीस चौगाना ॥
 जबहिं समर कोपिहि रघुनायक । छुटिहहिं अति कराल बहु सायक ॥
 तब कि चलिहि अस गाल तुम्हारा । अस बिचारि भजु राम उदारा ॥
 सुनत बचन रावन परजरा । जरत महानल जनु घृत परा ॥
 दो०— कुंभकरन अस बंधु मम सुत प्रसिद्ध सकारि ।

मोर पराक्रम नहिं सुनेहि जितेउं चराचर झारि ॥ २७ ॥
 सठ साखामृग जोरि सहाई । बाँधा सिंधु इहइ प्रभुताई ॥
 नाथहिं खग अनेक बारीसा । सूर न होहिं ते सुनु सब कीसा ॥
 मम भुज सागर बल जल पूरा । जहँ बूड़े बहु सुर नर सूरा ॥
 बीस पयोधि अगाध अपारा । को अस बीर जो पाइहि पारा ॥
 दिगपालन्ह मैं नीर भरावा । भूप सुजस खल मोहि सुनावा ॥
 जौं पै समर सुभट तव नाथा । पुनि पुनि कहसि जासु गुन गाथा ॥

तौ बसीठ पठवत केहि काजा । रिपु सन प्रीति करत नहिं लाजा ॥
हरगिरि मथन निरखु मम बाहु । पुनि सठ काप निज प्रभुहि सराहु ।
दो०— सूर कवन राखन सरिस स्वकर काटि जेहिं सीस ।

हुने अनल अति हरष बहु बार साखि गौरीस ॥ २८ ॥
जरत बिलोकेउँ जबहिं कपाला । बिधि के लिखे अंक निज भाला
नर कैं कर आपन बध बाँची । हसेउँ जानि बिधि गिरा असाँची ॥
सोठ मन समुझि त्रास नहिं मोरें । लिखा बिराचि जरठ मति भोरें ।
आन बीर बल सठ मम आगे । पुनि पुनि कहसि लाज पति त्यागें
कह अंगद सलज्ज जग माहीं । रावन तोहि समान कोउ नाहीं ॥
लाजवंत तव सहज सुभाऊ । निज मुख निज गुन कहसि न काऊ ।
सिर अरु सैल कथा चित रही । ताते बार बीस तैं कही ॥
सो भुजबल राखेहु उर घाली । जीतेहु सहसबाहु बलि बाली ॥
सुनु मतिमंद देहि अब पूरा । काटें सीस कि होइअ सूर ॥
इंद्रजालि कहूँ कहिअ न बीरा । काटइ निज कर सकल सरीरा ॥
दो०— जरहिं पतंग मोह बस भार बहिहिं खर बृंद ।

ते नहिं सूर कहावहिं समुझि देखु मतिमंद ॥ २९ ॥
अब जनि बतबढ़ाव खल करही । सुनु मम बचन मान परिहरही ॥
दसमुख मैं न बसीठीं आयउँ । अस बिचारि रघुबीर पठायउँ ॥
बार बार अस कहइ कृपाला । नहिं गजारि जसु बधैं सूकाला ॥
मन महुँ समुझि बचन प्रभु केरे । सहेउँ कठोर बचन सठ तेरे ॥

नाहिं त करि मुख भंजन तोरा । लै जातेउँ सीतहि बरजोरा ॥
 जानेउँ तव बल अधम सुरारी । सूर्ने हरि आनिहि परनारी ॥
 तैं निसिचर पति गर्ब बहूता । मैं रघुपति सेवक कर दूता ॥
 जौं न राम अपमानहिं डरऊँ । तोहि देखत अस कौतुक करऊँ ॥
 दो०—तोहि पटक महि सेन हति चौपट करि तव गाउँ ।

तव जुबतिन्ह समेत सठ जनकसुतहि लै जाउँ ॥ ३० ॥
 जौं अस करौं तदपि न बड़ाई । मुएहि बधैं नहिं कछु मनुसाई ॥
 कौल कामबस कृपिन बिमूढ़ा । अति दरिद्र अजसी अति बूढ़ा ॥
 सदा रोगबस संतत क्रोधी । बिष्णु बिमुख श्रुति संत बिरोधी ॥
 तनु पोषक निंदक अध खानी । जीवत सब सम चौदह प्राणी ॥
 अस बिचारि खल बधउँ न तोही । अब जनि रिस उपजावसि मोही ।
 सुनि सकोप कह निसिचर नाथा । अधर दसन दसि मोजत हाथा ॥
 रे कपि अधम मरन अब चहसी । छोटे बदन बात बड़ि कहसी ।
 कटु जल्पसि जड़ कपि बल जाकैं । बल प्रताप बुधि तेज न ताकैं ॥
 दो०—अगुन अमान जानि तेहि दीन्ह पिता बनबास ।

सो दुख अरु जुबती बिरह पुनि निसि दिन मम त्रास ॥ ३१ (क) ॥

जिन्ह के बल कर गर्ब तोहि अइसे मनुज अनेक ।

खाहिं निसाचर दिवस निसि मूढ समुझ तजि टेक ॥ ३१ (ख) ॥

जब तेहिं कीन्ह राम कै निंदा । क्रोधवंत अति भयउ कपिंदा ॥
 हरि हर निंदा सुनइ जो काना । होइ पाप गोघात समाना ॥

कटकटान कपिकुंजर भारी । दुहु भुजदंड तमकि महि मारी ।
 डोलत धरनि सभासद खसे । चले भाजि भय मारुत ग्रसे ॥
 गिरत सँभारि उठा दसकंधर । भूतल परे मुकुट अति सुंदर ।
 कछु तेहिं लै निज स्मिरन्हि सँवारे । कछु अंगद प्रभु पास पबारे ॥
 आवत मुकुट देखि कपि भागे दिनहीं लूक परन बिधि लागे ।
 की रावन करि कोप चलाए कुलिस चारि आवत अति धाए ।
 कह प्रभु हौंस जनि हृदयँ डेराहू । लूक न असनि केतु नहिं राहू ॥
 ए किरीट दसकंधर केरे आवत बालितनय के प्रेरे ।
 दो०—तरकि पवनसुन कर गहे आनि धरे प्रभु पास ।

कौतुक देखहिं भालु कपि दिनकर सरिस प्रकास ॥ ३२ (क) ॥

उहाँ सकोपि दमानन सब सन कहत रिसाइ ।

धरहु कपिहि धरि मारहु मुनि अगद मुसुकाइ ॥ ३२ (ख) ॥
 एहि बधि बेगि सुभट सब धावहु । खाहु भालु कपि जहँ जहँ पावहु ।
 मर्कटहीन करहु महि जाई । जिअत धरहु तापस द्वौ भाई ॥
 पुनि सकोप बोलेउ जुबराजा । गाल बजावत तोहि न लाजा ॥
 मरु गर काटि निलज कुलधाती । बल बिलोकि बिहरति नहिं छाती ॥
 रे त्रिय चोर कुमारग गामी । खल मल रासि मंदमति कामी ॥
 सन्यपात जल्पसि दुर्बादा । भएसि कालबस खल मनुजादा ॥
 याको फलु पार्वहगो आगें । बानर भालु चपेटन्हि लागें ॥
 रामु मनुज बोलत असि बानी । गिरहिं न तव रसना अभिमानी ॥

गिरिहहिं रसना संसय नाहीं । सिरन्ह समेत समर महि माहीं ॥

सो०— सो नर क्यों दसकंध बालि बध्यो जेहि एक सर ।

बीसहुँ लोचन अंध धिग तव जन्म कुजाति जड़ ॥ ३३ (क) ॥

तव सोनित कीं प्यास तृषित राम सायक निकर ।

तजउँ तोहि तेहि त्रास कटु जल्पक निसिचर अधम ॥ ३३ (ख) ॥

मैं तव दसन तोरिबे लायक । आयसु मोहि न दीन्ह रघुनायक ॥

असि रिस होति दसउ मुख तोरीं । लंका गहि समुद्र महँ बोरीं ॥

गूलरि फल समान तव लंका । बसहु मध्य तुम्ह जंतु असंका ॥

मैं बानर फल खात न बारा । आयसु दीन्ह न राम उदारा ॥

जुगुति सुनत रावन मुसुकाई । मूढ़ सिखिहि कहँ बहुत झुठाई ॥

बालि न कबहुँ गाल अस मारा । मिलि तपसिन्ह तैं भएसि लबारा ।

साँचेहुँ मैं लबार भुज ब्रीह । जौं न उपारिउँ तव दस जीहा ॥

समुझि राम प्रताप कपि कोपा । सभा माझ पन करि पद रोपा ॥

जौं मम चरन सकसि सठ टारी । फिरहिं रामु सीता मैं हारी ॥

सुनहु सुभट सब कह दससीसा । पद गहि धरनि पछारहु कीसा ।

इंद्रजीत आदिक बलवाना । हरषि उठे जहँ तहँ भट नाना ॥

झपटहिं करि बल बिगुल उपाई । पद न टरइ बैठहिं सिरु नाई ॥

पुनि उठि झपटहिं सुर आराती । टरइ न कीस चरन एहि भाँती ॥

पुरुष कुजोगी जिमि उरगारी । मोह बिटप नहिं सकहिं उपारी ॥

दो०— कोटिह मेघनाद सम सुभट उठे हरषाड़।

झपटहिं टैर न कपि चरन पुनि बैठहिं सिर नाइ ॥ ३४ (क) ॥

भूमि न छाँड़त कपि चरन देखत रिपु मद भाग।

कोटि बिघ्न ते संत कर मन जिमि नीति न त्याग ॥ ३४ (ख) ॥

कपि बल देखि सकल हियँ हारे । उठा आपु कपि के परचारे ॥

गहत चरन कह बालिकुमारा । मम पद गहँ न तोर उबारा ॥

गहसि न राम चरन सठ जाई । सुनत फिरा मन अति सकुचाई ॥

भयउ तेजहत श्री सब गई । मध्य दिवस जिमि ससि सोहई ॥

सिंघासन बैठेउ सिर नाई । मानहुँ संपति सकल गँवाई ॥

जगदातमा प्रानपति रामा । तासु बिमुख किमि लह बिश्रामा ॥

उमा राम की भृकुटि बिलासा । होइ बिस्व पुनि पावइ नासा ॥

तून ते कुलिस कुलिस तून करई । तासु दूत पन कहु किमि टरई ॥

पुनि कपि कही नीति बिधि नाना । मान न ताहि कालु निअराना ॥

रिपु मद मथि प्रभु सुजसु सुनायो । यह कहि चल्थो बालि नृप जायो ॥

हतौ न खेत खेलाइ खेलाई । तोहि अबहिं का करौं बड़ाई ॥

प्रथमहिं तासु तनय कपि मारा । सौ सुनि रावन भयउ दुखारा ॥

जातुधान अंगद पन देखी । भय व्याकुल सब भए बिसेषी ॥

दो०— रिपु बल धरषि हरषि कपि बालितनय बल पुंज।

पुलक सरीर नयन जल गहे राम पद कंज ॥ ३५ (क) ॥

साँझ जानि दसकंधर भवन गयउ बिलखाइ।

मंदोदरीं रावनहि बहुरि कहा समुझाइ॥३५(ख)॥
 कंत समुझि मन तजहु कुमतिही । सोह न समर तुम्हहि रघुपतिही ॥
 रामानुज लघु रेख खचाई । सोउ नहिं नावेहु असि मनुसाई ।
 पिय तुम्ह ताहि जितब संग्रामा । जाके दूत केर यह कामा ॥
 कौतुक सिंधु नाथि तव लंका । आयउ कपि केहरी असंका ।
 रखवारे हति बिपिन उजारा । देखत तोहि अच्छ तेहिं मारा ॥
 जारि सकल पुर कीन्हेसि छारा । कहाँ रहा बल गर्ब तुम्हारा ॥
 अब पति मृषा गाल जनि मारहु । मोर कहा कछु हृदयँ बिचारहु ॥
 पति रघुपतिहि नृपति जनि मानहु । अग जग नाथ अतुलबल जानहु ।
 बान प्रताप जान मारीचा । तासु कहा नहिं मानेहि नीचा ॥
 जनक सभाँ अगनित भूपाला । रहे तुम्हउ बल अतुल बिसाला ॥
 भंजि धनुष जानकी बिआही । तब संग्राम जितेहु किन ताही ॥
 सुरपति सुत जानइ बल थोरा । राखा जिअत आँख गहि फोरा ॥
 सूपनखा कै गति तुम्ह देखी । तदपि हृदयँ नहिं लाज बिसेषी ॥
 दो०—बधि बिराध खर दूषनहि लीलाँ हत्यो कबंध।

बालि एक सर मार्यो तेहि जानहु दसकंध॥३६॥
 जेहिं जलनाथ बँधायउ हेला । उतरे प्रभु दल सहित सुबेला ॥
 कारुणीक दिनकर कुल केतू । दूत पठायउ तव हित हेतू ॥
 सभा माझ जेहिं तव बल मथा । करि बरूथ महुँ मृगपति जथा ॥

अंगद हनुमत अनुचर जाके । रन बाँकुरे बीर अति बाँके ॥
 तेहि कहँ पिय पुनि पुनि नर कहहूँ मुधा मान ममता मद बहहूँ ॥
 अहह कंत कृत राम बिरोधा । काल बिबस मन उपज न बोधा ॥
 काल दंड गहि काहु न मारा । हरइ धर्म बल बुद्धि बिचारा ॥
 निकट काल जेहि आवत साईं । तेहि भ्रम होइ तुम्हारिहि नाईं ॥
 दो० दुइ सुत मरे दहेउ पुर अजहूँ पूर पिय देहु ।

कृपासिंधु रघुनाथ भजि नाथ बिमल जसु लेहु ॥ ३७ ॥
 नारि बचन सुनि बिसिख समाना । सभाँ गयउ उठि होत बिहाना ॥
 बैठ जाइ सिंघासन फूली । अति अधिमान त्रास सब भूली ॥
 इहाँ राम अंगदहि बोलावा । आइ चरन पंकज सिरु नावा ॥
 अति आदर समीप बैठारी । बोले बिहँसि कृपाल खरारी ॥
 बालितनय कौतुक अति मोही । तात सत्य कहु पूछउँ तोही ॥
 रावनु जातुधान कुल टीका भुज बल अतुल जासु जग लोका ॥
 तासु मुकुट तुम्ह चारि चलाए । कहहु तात कवनी बिधि पाए ॥
 सुनु सर्वग्य प्रनत सुखकारी । मुकुट न होहिं भूप गुन चारी ॥
 साम दान अरु दंड बिभेदा । नृप उर बसहिं नाथ कह बेदा ॥
 नीति धर्म के चरन सुहाए । अस जियँ जानि नाथ पहिं आए ॥
 दो०— धर्महीन प्रभु पद बिमुख काल बिबस दससीस ।

तेहि परिहरि गुन आए सुनहु कोसलाधीस ॥ ३८ (क) ॥

परम चतुरता श्रवण सुनि बिहँसे राम उदार ।

समाचार पुनि सब कहे गढ़ के बालिकुमार ॥ ३८ (ख) ॥
 रिपु के समाचार जब पाए । राम सचिव सब निकट बोलाए ॥
 लंका बाँके चारि दुआरा । केहि बिधि लागिअ करहु बिचार ॥
 तब कपीस रिच्छेस बिभीषन । सुमिरि हृदयै दिनकर कुल भूषन ॥
 करि बिचार तिन्ह मंत्र दृढ़ावा । चारि अनी कपि कटकु बनावा ॥
 जथाजोग सेनापति कीन्हे । जूथप सकल बोलि तब लीन्हे ॥
 प्रभु प्रताप कहि सब समुझाए । सुनि कपि सिंघनाद करि धाए ॥
 हरषित राम चरन सिर नावहिं । गहि गिरि सिखर बीर सब धावहिं ॥
 गर्जहिं तर्जहिं भालु कपीसा । जय रघुबीर कोसलाधीसा ॥
 जानत परम दुर्ग अति लंका । प्रभु प्रताप कपि चले असंका ॥
 घटाटोप करि चहुँ दिसि घेरी । मुखहिं निसान बजावहिं भेरी ॥
 दो० - जयति राम जय लछ्मिन जय कपीस सुग्रीव ।

गर्जहिं सिंघनाद कपि भालु महा बल सीव ॥ ३९ ॥
 लंकाँ भयउ कोलाहल भारी । सुना दसानन अति अहँकारी ॥
 देखहु बनरन्ह केरि ढिठाई । बिहँसि निसाचर सेन बोलाई ॥
 आए कीस काल के प्रेरे । छुधावत सब निसिचर मेरे ॥
 अस कहि अट्टहास सठ कीन्हा । गृह बैठें अहार बिधि दीन्हा ॥
 सुभट सकल चारिहुँ दिसि जाहू । धरि धरि भालु कीस सब खाहू ॥
 उमा रावनहि अस अभिमाना । जिमि टिटिभ खग सूत उताना ॥

चले निसाचर आयसु मागी । गहि कर भिडिपाल बर साँगी ॥
तोमर मुद्गर परसु प्रचंडा । सूल कृपान परिघ गिरिखंडा ॥
जिमि अरुनोपल निकर निहारी । धावहि सठ खग मांस अहारी ॥
चौच भंग दुख तिन्हहि न सूझा । तिमि धाए मनुजाद अबूझा ॥
दो०— नानायुध सर चाप धर जातुधान बल बीर ।

कोट कैंगूरन्हि चढ़ि गए कोटि कोटि रनधीर ॥ ४० ॥
कोट कैंगूरन्हि सोहहिं कैसे । मेरु के सृंगनि जनु घन बैसे ॥
बाजहिं ढोल निसान जुझाऊ । सुनि धुनि होइ भटन्हि मन चाऊ ॥
बाजहिं भेरि नफीरि अपारा । सुनि कादर उर जाहिं दसारा ॥
देखिन्ह जाइ कपिन्ह के ठट्टा । अति बिसाल तनु भालु सुभट्टा ॥
धावहिं गनहिं न अवघट घाटा । पर्वत फोरि करहिं गहि बाटा ॥
कटकटाहिं कोटिन्ह भट गर्जहिं । दसन ओठ काटहिं अति तर्जहिं ॥
उत रावन इत राम दोहाई । जयति जयति जय परी लराई ॥
निसिचर सिखर समूह ढहावहिं । कूदि धरहिं कपि फेरि चलावहिं ॥

छं०— धरि कुधर खंड प्रचंड मर्कट भालु गढ़ पर डारहीं ।
झपटहिं चरन गहि पटकि महि भजि चलत बहुरि पचारहीं ॥
अति तरल तरुन प्रताप तरपहिं तमकि गढ़ चढ़ि चढ़ि गए ।
कपि भालु चढ़ि मंदिरन्ह जहँ तहँ राम जसु गावत भए ॥

दो०— एकु एकु निसिचर गहि पुनि कपि चले पराड़ ।

ऊपर आपु हेठ भट गिरहिं धरनि पर आइ ॥ ४१ ॥

राम प्रताप प्रबल कपिजूथा । मर्दहिं निसिचर सुभट बरूथा ॥
 चढ़े दुर्ग पुनि जहँ तहँ बानर । जय रघुबीर प्रताप दिवाकर ॥
 चले निसाचर निकर पराई । प्रबल पवन जिमि घन समुदाई ॥
 हाहाकार भयउ पुर भारी । रोवहिं बालक आतुर नारी ॥
 सब मिलि देहिं रावनहिं गारी । राज करत एहिं मृत्यु हँकारी ॥
 निज दल बिचल सुनी तेहिं काना । फेरि सुभट लंकेस रिसाना ॥
 जो रन बिमुख सुना मैं काना । सो मैं हतब कराल कृपाना ॥
 सर्वसु खाइ भोग करि नाना । समर भूमि भए बल्लभ प्राना ॥
 उग्र बचन सुनि सकल डेराने । चले क्रोध करि सुभट लजाने ॥
 सन्मुख मरन बीर कै सोभा । तब तिन्ह तजा प्रान कर लोभा ॥
 दो०— बहु आयुध धर सुभट सब भिरहिं पचारि पचारि ।

व्याकुल किए भालु कपि परिध त्रिसूलन्हि मारि ॥ ४२ ॥
 भय आतुर कपि भागन लागे । जद्यपि उमा जीतिहहिं आगे ॥
 कोउ कह कहँ अंगद हनुमंता । कहँ नल नील दुबिद बलवंता ॥
 निज दल बिकल सुना हनुमाना । पच्छिम द्वार रहा बलवाना ॥
 मेघनाद तहँ करइ लराई । टूट न द्वार परम कठिनाई ॥
 पवनतनय मन भा अति क्रोधा । गर्जेउ प्रबल काल सम जोधा ॥
 कूदि लंक गढ़ ऊपर आवा । गहि गिरि मेघनाद कहूँ धावा ॥
 भंजेउ रथ सारथी निपाता । ताहि हृदय महुँ मारेसि लाता ॥
 दुसरें सूत बिकल तेहि जाना । स्यंदन घाति तुरत गृह आना ॥

दो०— अंगद सुना पवनसुत गढ़ पर गयउ अकेल।

रन बाँकुरा बालिसुत तरकि चढ़ेउ कपि खेल ॥ ४३ ॥
 जुद्ध बिरुद्ध क्रुद्ध द्वौ बंदर । राम प्रताप सुमिरि उर अंतर ॥
 रावन भवन चढ़े द्वौ धाई । करहिं कोसलाधीस दोहाई ॥
 कलस सहित गहि भवनु ढहावा । देखि निसाचरपति भय पावा ॥
 नारि बृंद कर पीटहिं छाती । अब दुइ कपि आए उतपाती ॥
 कपिलीला करि तिन्हहि डेरावहिं । रामचंद्र कर सुजसु सुनावहिं ॥
 पुनि कर गहि कंचन के खंभा कहेन्हि करिअ उतपात अरंभा ॥
 गर्जि परे रिपु कटक मझारी । लागे मदैं भुज बल भारी ॥
 काहुहि लात चपेटन्हि केहू । भजहु न रामहि सो फल लेहू ॥
 दो०— एक एक सौं मर्दहिं तोरि चलावहिं मुंड।

रावन आगे परहिं ते जनु फूटहिं दधि कुंड ॥ ४४ ॥
 महा महा मुखिआ जे पावहिं । ते पद गहि प्रभु पास चलावहिं ॥
 कहइ बिभीषनु तिन्ह के नामा । देहिं राम तिन्हहू निज धामा ॥
 खल मनुजाद द्विजामिष भोगी । पावहिं गति जो जाचत जोगी ॥
 उमा राम मृदुचित करुनाकर बयर भाव सुमिरत मोहि निसिचर ।
 देहिं परम गति सो जियँ जानी । अस कृपाल को कहहु भवानी ॥
 अस प्रभु सुनि न भजहिं भ्रम त्यागी नर मतिमंद ते परम अभागी ।
 अंगद अरु हनुमंत प्रबेसा । कीन्ह दुर्ग अस कह अवधेसा ॥
 लंकाँ द्वौ कपि सोहहिं कैसैं । मथहिं सिंधु दुइ मंदर जैसैं ॥

दो०— भुज बल रिपु दल दलपति देखि दिवस कर अंत ।

कूदे जुगल बिगत श्रम आए जहँ भगवंत ॥ ४५ ॥
 प्रभु पद कमल सीस तिन्ह नाए । देखि सुभट रघुपति मन भाए ॥
 राम कृपा करि जुगल निहारे । भए बिगतश्रम परम सुखारे ॥
 गए जानि अंगद हनुमाना । फिरे भालु मर्कट भट नाना ॥
 जातुधान प्रदोष बल पाई । धाए करि दससीस दोहाई ॥
 निसिचर अनो देखि कपि फिरे । जहँ तहँ कटकटाइ भट भिरे ॥
 द्वौ दल प्रबल पचारि पचारी । लरत सुभट नहिं मानहिं हारी ॥
 महाबीर निसिचर सब कारे । नाना बरन बलीमुख भारे ॥
 सबल जुगल दल समबल जोधा । कौतुक करत लरत करि क्रोधा ॥
 प्राबिट सरद पयोद घनेरे । लरत मनहुँ मारुत के प्रेरे ॥
 अनप अकंपन अरु अतिकाया । बिचलत सेन कीन्हि इन्ह माया ॥
 भयउ निमिष महँ अति औधिआरा । बृष्टि होइ रुधिरोपल छारा ॥
 दो०— देखि निबिड़ तम दसहुँ दिसि कपिदल भयउ खभार ।

एकहि एक न देखई जहँ तहँ करहिं पुकार ॥ ४६ ॥
 सकल मरमु रघुनायक जाना । लिए बोलि अंगद हनुमाना ॥
 समाचार सब कहि समुझाए । सुनत कोपि कपिकुंजर धाए ॥
 पुनि कृपाल हँसि चाप चढ़ावा । पावक सायक सर्पदि चलावा ॥
 भयउ प्रकास कतहुँ तम नहिं । ग्यान उदयँ जिमि संसय जाहीं ॥
 भालु बलीमुख पाइ प्रकासा । धाए हरष बिगत श्रम त्रासा ॥

हनूमान अंगद रन गात्रे । हाँक सुनत रजनीचर भाजे ॥
 भागत भट पटकहिं धरि धरनी । करहिं भालु कपि अद्भुत करनी ॥
 गहि पद डारहिं सागर माहीं । मकर उरग झष धरि धरि खाहीं ॥
 दो०— कछु मारे कछु घायल कछु गढ़ चढ़े पराइ ।

गर्जहिं भालु बलीमुख रिपु दल बल बिचलाइ ॥ ४७ ॥
 निसा जानि कपि चारिउ अनी । आए जहाँ कोसला धनी ॥
 राम कृपा करि चितवा सबही । भए बिगतश्रम बानर तबही ॥
 उहाँ दसानन सचिव हँकारे । सब सन कहेसि सुभट जे मारे ॥
 आधा कटकु कपिन्ह संघारा । कहहु बेगि का करिअ बिचारा ॥
 माल्यवंत अति जरठ निसाचर । रावन मातु पिता मंत्री बर ॥
 बोला बचन नीति अति पावन । सुनहु तात कछु मोर सिखावन ॥
 जब ते तुम्ह सीता हरि आनी । असगुन होहिं न जाहिं बखानी ॥
 बेद पुरान जासु असु गायो । राम बिमुख काहुँ न सुख पायो ॥
 दो०— हिरन्याच्छ भ्राता सहित मधु कैटभ बलवान ।

जेहि मारे सोइ अवतरेउ कृपासिंधु भगवान ॥ ४८ (क) ॥

मासपारायण, पचीसवाँ विश्राम

कालरूप खल बन दहन गुनागार घनबोध ।

सिव विरंचि जेहि सेवहिं तासों कवन बिरोध ॥ ४८ (ख) ॥

परिहरि बयरु देहु बैदेही । भजहु कृपानिधि परम सनेही ॥
 ताके बचन बान सम लागे । करिआ मुह करि जाहि अभागे ॥

बूढ़ भएसि न त मरतेउँ तोही । अब जनि नयन देखावसि मोही ॥
 तेहिं अपने मन अस अनुमाना । बध्यो चहत एहि कृपानिधाना ॥
 सो उठि गयउ कहत दुर्बादा । तब सकोप बोलेउ घननादा ॥
 कौतुक प्रात देखिअहु मोरा । करिहउँ बहुत कहौं का थोरा ॥
 सुनि सुत बचन भरोसा आवा । प्रीति समेत अंक बैठावा ॥
 करत बिचार भयउ भिनुसारा । लागे कपि पुनि चहूँ दुआरा ।
 कोपि कपिन्ह दुर्घट गद्गु घेरा । नगर कोलाहलु भयउ घनेरा ॥
 बिबिधायुध धर निसिचर धाए । गढ़ ते पर्वत सिखर ढहाए ॥

छं०— ढाहे महीधर सिखर कोटिन्ह बिबिध बिधि गोला चले ।
 घहरात जिमि पबिषात यर्जत जनु प्रलय के बादले ॥
 मर्कट बिकट भट जुटत कटत न लटत तन जर्जर भए ।
 गहि सैल तेहि गढ़ पर चलावहि जहँ सो तहँ निसिचर हए ॥

दो०— मेघनाद सुनि श्रवन अस गद्गु पुनि छँका आइ ।

उतरयो बीर दुर्ग ते सन्मुख चल्यो बजाइ ॥४९॥
 कहँ कोसलाधीस द्वौ भ्राता । धन्वी सकल लोक बिख्याता ॥
 कहँ नल नील दुबिद सुग्रीवा । अंगद हनूमंत बल सौंवा ॥
 कहाँ बिभीषनु भ्राताद्रोही । आजु सबहि हठि मारउँ ओही ॥
 अस कहि कठिन बान संधाने । अतिसय क्रोध श्रवन लगि ताने ॥
 सर समूह सो छाड़ै लागा । जनु सपच्छ धावहि बहु नागा ।
 जहँ तहँ परत देखिअहिं बानर । सन्मुख होइ न सके तेहि अवसर ।

जहँ तहँ भागि चले कपि रीछा । बिसरी सबहि जुद्ध कै ईछा ॥
सो कपि भालु न रन महँ देखि । कीन्हैसि जेहि न प्रान अवसेषा ॥
दो० दस दस सर सब मारेसि परे भूमि कपि बीरा ।

सिंहनाद करि गर्जा मेघनाद बल धीर ॥ ५० ॥
देखि पवनसुत कटक बिहाला । क्रोधवत अनु धायउ काला ॥
महासैल एक तुरत उपारा । अति रिस मेघनाद पर डारा ॥
आवत देखि गयउ नभ सोई । रथ सारथी तुरग सब खोई ॥
बार बार पचार हनुमाना । निकट न आव मरमु सो जाना ॥
रघुपति निकट गयउ घननादा । नाना भाँति करैसि दुर्बादा ॥
अस्त्र सस्त्र आयुध सब डारे । कौतुकहीं प्रभु काटि निवारे ॥
देखि प्रताप मूढ़ खिसिआना । करै लाग माया बिधि नाना ॥
जिमि कोउ करै गरुड़ सँ खेला । डरपावै गहि स्वल्प सपेला ॥
दो०— जासु प्रबल माया बस सिव बिरंचि बड़ छोट ।

ताहि दिखावड़ निसिचर निज माया मति खोट ॥ ५१ ॥
नभ चढ़ि बरष बिपुल अंगारा । महि ते प्रगट होहिं जलधारा ।
नाना भाँति पिसाच पिसाची । मारु काटु धुनि बोलहिं नाची ॥
बिष्टा पूय रुधिर कच हाड़ा । बरषइ कबहुँ उपल बहु छाड़ा ॥
बरषि धूरि कीन्हैसि औंधआरा । सूझ न आपन हाथ पसारा ॥
कपि अकुलाने माया देखैं । सब कर मरन बना एहि लेखैं ॥
कौतुक देखि राम मुसुकाने । भए सभौत सकल कपि जाने ॥

एक बान काटी सब माया । जिमि दिनकर हर तिमिर निकाया ॥
 कृपादृष्टि कपि भालु बिलोके । भए प्रबल रन रहहिं न रोके ॥
 दो०— आयसु मागि राम पहि अंगदादि कपि साथ ।

लछिमन चले क्रुद्ध होइ बान सरामन हाथ ॥५२॥
 छतज नयन उर बाहु बिसाला । हिमगिरि निभ तनु कछु एक लाला ।
 इहाँ दसानन सुभट पठाए । नाना अस्त्र सस्त्र गहि धाए ॥
 भूधर नख बिटपायुध धारी । धाए कपि जय राम पुकारी ॥
 भिरे सकल जोरहि सन जोरी । इत उत जय इच्छा नहिं थोरी ॥
 मुठिकन्ह लातन्ह दातन्ह काटहिं । कपि जयसील मारि पुनि डाटहिं ॥
 मारु मारु धरु धरु धरु मारु । सीस तोरि गहि भुजा उपाारु ॥
 असि रव पूरि रही नव खंडा । धावहिं जहँ तहँ रुंड प्रचंडा ॥
 देखहिं कौतुक नभ सुर बृंदा । कबहुँक बिसमय कबहुँ अनंदा ॥
 दो०— रुधिर गाड़ भरि भरि जम्यो ऊपर धूरि उड़ाइ ।

जनु अंगार रासिन्ह पर मृतक धूम रह्यो छाड़ ॥५३॥
 घायल बीर बिराजहिं कैसे । कुसुमित किंसुक के तरु जैसे ॥
 लछिमन मेघनाद द्वौ जोधा । भिरहि परसपर करि अति क्रोधा ॥
 एकहि एक सकइ नहिं जीती । निसिचर छल बल करइ अनीती ॥
 क्रोधवंत तब भयउ अनंता । भंजेउ रथ सारथी तुरंता ॥
 नाना बिधि प्रहार कर सेषा । राच्छस भयउ प्रान अवसेषा ॥
 रावन सुत निज मन अनुमाना । संकठ भयउ हरिहि मम प्राना ॥

बीस्थातिनी छाड़िसि साँगी । तेजपुंज लछिमन उर लागी ॥
 मुरुछा भई सक्ति के लागें तब चलि गयउ निकट भय त्यागें ।
 दो० मेघनाद सम कोटि सत जोधा रहे उठाइ ।

जगदाधार सेष किमि उठै चले खिसिआइ ॥ ५४ ॥
 सुनु गिरिजा क्रोधानल जासू । जारइ भुवन चारिदस आसू ॥
 सक संग्राम जीति को ताही । सेवहिं सुर नर अग जग जाही ॥
 यह कौतूहल जानइ सोई । जा पर कृपा राम कै होई ॥
 संध्या भइ फिरि द्वौ बाहनी । लगे सँभारन निज निज अनी ॥
 व्यापक ब्रह्म अजित भुवनेस्वर । लछिमन कहाँ बूझ करुनाकर ॥
 तब लगि लै आयउ हनुमाना । अनुज देखि प्रभु अति दुख माना ॥
 जामवंत कह बैद सुषेना । लंकाँ रहइ को पठई लेना ॥
 धरि लघु रूप गयउ हनुमंता । आनेउ भवन समेत तुरंता ॥
 दो०—राम पदारबिंद सिर नायउ आइ सुषेन ।

कहा नाम गिरि औषधी जाहु पवनसुत लेन ॥ ५५ ॥
 राम चरन सरसिज उर राखी । चला प्रभंजनसुत बल भाषी ॥
 उहाँ दूत एक मरमु जनाव । रावनु कालनेमि गृह आवा ॥
 दसमुख कहा मरमु तेहिं सुना । पुनि पुनि कालनेमि सिरु धुना ॥
 देखत तुम्हहि नगर जेहिं जारा । तासु पंथ को रोकन पारा ॥
 भजि रघुपति करु हित आपना । छाँड़हु नाथ मृषा जल्पना ॥
 नील कंज तनु सुंदर स्यामा । हृदयँ राखु लोचनाभिरामा ॥

मैं तैं मोर मूढ़ता त्यागू । महा मोह निसि सूतत जागू ॥
 काल ब्याल कर भच्छक जोई । सपनेहुँ समर कि जीतिअ सोई ॥
 दो०— सुनि दमकंठ सिखन अति तेहिं मन कीन्ह बिचार ।

राम दूत कर मरीं बरु यह खल रत मल भार ॥ ५६ ॥
 अस कहि चला रचिसि मग माया । सर मंदिर बर बाग बनाया ॥
 मारुतसुत देखा सुभ आश्रम । मुनिहि बूझि जल पियौं जाइ श्रम ॥
 राच्छस कपट बेष तहँ सोहा । मायापति दूतहि चह मोहा ॥
 जाइ पवनसुत नायउ माथा । लाग सो कहै राम गुन गाथा ॥
 होत महा रन रावन रामहिं । जितिहहिं राम न संसय या महिं ॥
 इहाँ भएँ मैं देखउँ भाई । ग्यानदृष्टि बल मोहि अधिकारि ॥
 माग जल तेहिं दीन्ह कमंडल । कह कपि नहिं अघाउँ थोरें जल ॥
 सर मज्जन करि आतुर आवहु । दिच्छा देउँ ग्यान जेहिं पावहु ॥
 दो०— सर पैठत कपि पद गह्य मकरीं तब अकुलान ।

मारी सो धरि दिव्य तनु चली गगन चढ़ि जान ॥ ५७ ॥
 कपि तव दरस भइउँ निष्पापा । मिटा तात मुनिबर कर सापा ॥
 मुनि न होइ यह निसिचर घोरा । मानहु सत्य बचन कपि मोरा ॥
 अस कहि गई अपछरा जबहीं । निसिचर निकट गयउ कपि तबहीं ।
 कह कपि मुनि गुरदछिना लेहू । पाछें हमहिं मंत्र तुम्ह देहू ॥
 सिर लंगूर लपेटि पछारा । निज तनु प्रगटेसि मरती बारा ॥
 राम राम कहि छाड़ेसि प्राणा । सुनि मन हरषि चलेउ हनुमाना ॥

देखा सैल न औषध चीन्हा । सहसा कपि उपारि गिरि लीन्हा ॥
गहि गिरि निसि नभ धावत भयऊ । अवधपुरी ऊपर कपि गयऊ ॥
दो०— देखा भरत बिसाल अति निसिचर मन अनुमानि ।

बिनु फर सायक मारेउ चाप श्रवन लगि तानि ॥ ५८ ॥
परेउ मुरुछि महि लागत सायक सुमिरत राम राम रघुनायक ॥
सुनि प्रिय बचन भरत तब धाए कपि समीप अति आतुर आए ।
बिकल बिलोकि कीस उर लावा । जागत नहिं बहु भाँति जगावा ।
मुख मलीन मन भए दुखारी । कहत बचन भरि लोचन बारी ॥
जेहिं बिधि राम बिमुख मोहि कीन्हा । तेहिं पुनि यह दारुन दुख दीन्हा ॥
जौं मोरें मन बच अरु काया । प्रीति राम पद कमल अमाया ॥
तौ कपि होउ बिगत श्रम सूला । जौं मो पर रघुपति अनुकूला ॥
सुनत बचन उठि बैठ कपीसा । कहि जय जयति कोसलाधीसा ॥
सो० — लीन्ह कपिहि उर लाइ पुलकित तनु लोचन सजल ।

प्रीति न हृदयँ समाइ सुमिरि राम रघुकुल तिलक ॥ ५९ ॥
तात कुसल कहु सुखनिधान की । सहित अनुज अरु मातु जानकी ॥
कपि सब चरित समास बखाने । भए दुखी मन महँ पछिताने ॥
अहह दैव मैं कत जग जायउँ । प्रभु के एकहु काज न आयउँ ॥
जानि कुअवसरु मन धरि धीरा । पुनि कपि सन बोले बलबीरा ॥
तात गहरु होइहि तोहि जाता । काजु नसाइहि होत प्रभाता ॥
चहु मम सायक सैल समेता । पठवौं तोहि जहँ कृपानिकेता ॥

सुनि कपि मन उपजा अभिमाना । मोरें भार चलिहि किमि बाना ॥
 राम प्रभाव बिचारि बहोरी । बंदि चरन कह कपि कर जोरी ॥
 दो०— तव प्रताप उर राखि प्रभु जैहउँ नाथ तुरंत ।

अस कहि आयसु पाइ पद बंदि चलेउ हनुमंत ॥ ६० (क) ॥

भरत बाहु बल सील गुन प्रभु पद प्रीति अपार ।

मन महँ जात सराहत पुनि पुनि पवनकुमार ॥ ६० (ख) ॥
 उहाँ राम लछिमनहि निहारी । बोले बचन मनुज अनुसारी ॥
 अर्ध राति गइ कपि नहिं आयउ । राम उठाइ अनुज उर लायउ ॥
 सकहु न दुखित देखि मोहि काऊ । बंधु सदा तव मृदुल सुभाऊ ॥
 मम हित लागि तजेहु पितु माता । सहेहु बिपिन हिम आतप बाता ॥
 सो अनुराग कहाँ अब भाई । उठहुन सुनि मम बच बिकलाई ॥
 जौं जनतेउँ बन बंधु बिछोहू । पिता बचन मनतेउँ नहिं ओहू ॥
 सुत बित नारि भवन परिवारा । होहिं जाहिं जग बारहिं बारा ॥
 अस बिचारि जियँ जागहु ताता । मिलइ न जगत सहोदर भ्राता ॥
 जथा पंख बिनु खग अति दीना । मनि बिनु फनि करिबर कर हीना ॥
 अस मम जिवन बंधु बिनु तोही । जौं जड़ दैव जिआवै मोही ॥
 जैहउँ अवध कवन मुहु लाई । नारि हेतु प्रिय भाइ गँवाई ॥
 बरु अपजस सहतेउँ जग माहीं । नारि हानि बिसेष छति नाहीं ॥
 अब अपलोकु सोकु सुत तोरा । सहिहि नितुर कठोर उर मोरा ॥
 निज जननी के एक कुमारा । तात तासु तुम्ह प्रान अधारा ॥

सौंपेसि मोहि तुम्हहि गहि पानी । सब बिधि सुखद परम हित जानी ।
उतरु काह दैहउँ तेहि जाई । उठि किन मोहि सिखावहु भाई ॥
बहु बिधि सोचत सोच बिमोचन स्रवत सलिल राजिव दल लोचन ॥
उमा एक अखंड रघुराई । नर गति भगत कृपाल देखाई ॥
सो०— प्रभु प्रलाप सुनि कान बिकल भए बानर निकर ।

आइ गयउ हनुमान जिमि करुना महँ बीर रस ॥ ६१ ॥
हरषि राम भेटेउ हनुमाना । अति कृतग्य प्रभु परम सुजाना ॥
तुरत बैद तब कीन्हि उपाई । उठि बैठे लछिमन हरषाई ॥
हृदयँ लाइ प्रभु भेटेउ भ्राता । हरषे सकल भालु कपि ब्राता ॥
कपि पुनि बैद तहाँ पहुँचावा जेहि बिधि तबहिं ताहि लइ आवा ॥
यह वृत्तांत दसानन सुनेऊ । अति बिषाद पुनि पुनि सिर धुनेऊ ॥
ब्याकुल कुंभकरन पहिं आवा । बिबिध जतन करि ताहि जगावा ॥
जागा निसिचर देखिअ कैसा । मानहुँ कालु देह धरि बैसा ॥
कुंभकरन बूझा कहु भाई । काहे तव मुख रहे सुखाई ॥
कथा कही सब तेहिं अभिमानी । जेहि प्रकार सीता हरि आनी ॥
तात कपिन्ह सब निसिचर मारे । महा महा जोधा संघारे ॥
दुर्मुख सुररिपु मनुज अहारी । भट अतिकाय अकंपन भारी ॥
अपर महोदर आदिक बीरा । परे समर महि सब रनधीरा ॥
दो०— सुनि दसकंधर बचन तब कुंभकरन बिलखान ।

जगदंबा हरि आनि अब सठ चाहत कल्याण ॥ ६२ ॥

भल न कीन्ह तैं निसिचर नाहा । अब मोहि आइ जगाएहि काहा ॥
 अजहूँ तात त्यागि अभिमाना । भजेहु राम होइहि कल्याणा ॥
 हैं दससीस मनुज रघुनायक । जाके हनूमान से पायक ॥
 अहह बंधु तैं कीन्ह खोटाई । प्रथमहिं मोहि न सुनाएहि आई ॥
 कीन्हेहु प्रभु बिरोध तेहि देवक । सिव बिरंचि सुर जाके सेवक ॥
 नारद मुनि मोहि ग्यान जो कहा । कहतेउँ तोहि समय निरबहा ॥
 अब भरि अंक भेंटु मोहि भाई । लोचन सुफल करौं मैं जाई ॥
 स्याम गात सरसीरुह लोचन । देखौं जाइ ताप त्रय मोचन ॥
 दो०— राम रूप गुन सुमिरत मगन भयउ छन एक ।

रावन मागेउ कोटि घट मद अरु महिष अनेक ॥ ६३ ॥
 महिष खाइ करि मदिरा पाना । गर्जा बज्राघात समाना ॥
 कुंभकरन दुर्मद रन रंगा । चला दुर्ग तजि सेन न संग्गा ॥
 देखि बिभीषनु आगे आयउ । परेउ चरन निज नाम सुनायउ ॥
 अनुज उठाइ हृदयँ तेहि लायो । रघुपति भक्त जानि मन भायो ॥
 तात लात रावन मोहि मारा । कहत परम हित मंत्र बिचारा ॥
 तेहिं गलानि रघुपति पहिं आयउँ । देखि दीन प्रभु के मन भायउँ ॥
 सुनु सुत भयउ कालबस रावन । सो कि मान अब परम सिखावन ॥
 धन्य धन्य तैं धन्य बिभीषन । भयेहु तात निसिचर कुल भूषन ॥
 बंधु बंस तैं कीन्ह उजागर । भजेहु राम सोभा सुख सागर ॥
 दो०— बचन कर्म मन कपट तजि भजेहु राम रनधीर ।

जाहु न निज पर सूझ मोहि भयउँ कालबस बीर ॥ ६४ ॥

बन्धु बचन सुनि चला बिभीषन । आयउ जहँ त्रैलोक बिभूषन ॥
 नाथ भूधराकार सरीरा । कृभकरन आवत रनधीरा ॥
 एतना कपिन्ह सुना जब काना । किलकिलाइ धाए बलवाना ॥
 लिए उठाइ बिटप अरु भूधर । कटकटाइ डारहिं ता ऊपर ॥
 कोटि कोटि गिरि सिखर प्रहारा । करहिं भालु कपि एक एक बारा ॥
 मुरयो न मनु तनु टर्यो न टार्यो । जिमि गज अर्क फलनि को मार्यो ।
 तब मारुतसुत मुठिका हन्यो । पर्यो धरनि ब्याकुल सिर धुन्यो ॥
 पुनि उठि तेहिं मारेउ हनुमंता । घुमिंत भूतल परेउ तुरंता ॥
 पुनि नल नीलहि अवनि पछारेसि जहँ तहँ पटक पटक भट डारेसि ॥
 चली बलीमुख सेन पराई । अति भय त्रसित न कोउ समुहाई ॥
 दो०— अंगदादि कपि मुरुछित करि समेत सुग्रीव ।

काँख दाबि कपिराज कहँ चला अमित बल सीव ॥ ६५ ॥
 उमा करत रघुपति नरलीला । खेल गरुड़ जिमि अहिगन मीला ॥
 भृकुटि भंग जो कालहि खाई । ताहि कि सोहइ ऐसि लराई ॥
 जग पावनि कीरति बिस्तरिहहिं । गाइ गाइ भवनिधि नर तरिहहिं ॥
 मुरुछा गइ मारुतसुत जागा । सुग्रीवहि तब खोजन लागा ॥
 सुग्रीवहु कै मुरुछा बीती । निबुकि गयउ तेहि मृतक प्रतीती ॥
 काटेसि दसन नासिका काना । गरजि अकास चलेउ तेहिं जाना ॥
 गहेउ चरन गहि भूमि पछारा । अति लाघवँ उठि पुनि तेहि मास ॥
 पुनि आयउ प्रभु पहिं बलवाना । जयति जयति जय कृपानिधाना ॥

नाक कान काटे जियँ जानी । फिर क्रोध करि भइ मन ग्लानी ॥
 सहज भीम पुनि बिनु श्रुति नासा । देखत कपि दल उपजी त्रासा ॥
 दो०— जय जय जय रघुवंस मनि धाए कपि दै हूह ।

एकहि बार तासु पर छाड़ैन्हि गिरि तरु जूह ॥ ६६ ॥
 कुंभकरन रन रंग बिरुद्धा । सन्मुख चला काल जनु क्रुद्धा ॥
 कोटि कोटि कपि धरि धरि खाई । जनु टीढ़ी गिरि गुहाँ समाई ।
 कोटिन्ह गहि सरीर सन मर्दा । कोटिन्ह मीजि मिलव महि गर्दा ॥
 मुख नासा श्रवनन्हि कीं बाटा । निसरि पराहिं भालु कपि ठाटा ॥
 रन मद मत्त निसाचर दर्पा । बिस्व ग्रसिहि जनु एहि बिधि अर्पा ॥
 मुरे सुभट सब फिरहिं न फेरे । सूझ न नयन सुनहिं नहिं टेरे ॥
 कुंभकरन कपि फौज बिडारी । सुनि धाई रजनीचर धारी ॥
 देखी राम बिकल कटकाई । रिपु अनीक नाना बिधि आई ॥
 दो०— सुनु सुग्रीव बिभीषन अनुज सँभारेहु सैन ।

मैं देखउँ खल बल दलहि बोले राजिवनैन ॥ ६७ ॥
 कर सारंग साजि कटि भाथा । अरि दल दलन चले रघुनाथा ॥
 प्रथम कीन्हि प्रभु धनुष टँकोरा । रिपु दल बधिर भयउ सुनि सोरा ॥
 सत्यसंध छाँड़े सर लच्छा । कालसर्प जनु चले सपच्छा ।
 जहँ तहँ चले बिपुल नाराचा । लगे कटन भट बिकट पिसाचा ॥
 कटहिं चरन उर सिर भुजदंडा । बहुतक बीर होहिं सत खंडा ॥
 घुमि घुमि घायल महि परहीं । उठि संभारि सुभट पुनि लरहीं ॥

लागत बान जलद जिमि गाजहिं । बहुतक देखि कठिन सर भाजहिं ॥
रुंड प्रचंड मुंड बिनु धावहिं । धरु धरु मारु मारु धुनि गावहिं ॥
दो०— छन महुँ प्रभु के सायकन्हि काटे बिकट पिसाच ।

पुनि रघुबीर निषंग महुँ प्रबिसे सब नाराच ॥ ६८ ॥
कुंभकरन मन दीख बिचारी । हति छन माझ निसाचर धारी ॥
भा अति क्रुद्ध महाबल बीरा । कियो मृगनायक नाद गँभीरा ॥
कोपि महीधर लेइ उपारी । डारइ जहँ मर्कट भट भारी ॥
आवत देखि सैल प्रभु भारे । सरन्हि काटि रज सम करि डारे ॥
पुनि धनु तानि कोपि रघुनायक । छाँड़े अति कराल बहु सायक ॥
तनु महुँ प्रबिसि निसरि सर जाहीं । जिमि दामिनि घन माझ समाहीं ॥
सोनित स्ववत सोह तन कारे । जनु कज्जल गिरि गेरु पनारे ॥
बिकल बिलोकि भालु कपि धाए । बिहँसा जबहिं निकट कपि आए ।
दो०— महानाद करि गर्जा कोटि कोटि गहि कीस ।

महि पटकइ गजराज इव सपथ करइ दससीस ॥ ६९ ॥
भागै भालु बलीमुख जूथा । बृकु बिलोकि जिमि मेष बरूथा ॥
चले भागि कपि भालु भवानी । बिकल पुकारत आरत बानी ॥
यह निसिचर दुकाल सम अहई । कपिकुल देस परन अब चहई ॥
कृपा बारिधर राम खरारी । पाहि पाहि प्रनतारति हारी ॥
सकरुन बचन सुनत भगवाना । चले सुधारि सरासन बाना ॥
राम सेन निज पाछें घाली । चले सकोप महा बलसाली ॥

खैंचि धनुष सर सत संधाने । धूटे तीर सरीर समाने ॥
 लागत सर धावा रिस भरा । कुधर डगमगत डोलति धरा ॥
 लीन्ह एक तेहिं सैल उपाटी । रघुकुलतिलक भुजा सोइ काटी ॥
 धावा बाम बाहु गिरि धारी । प्रभु सोउ भुजा काटि महि पारी ॥
 काटें भुजा सोह खल कैसा । पच्छहीन मंदर गिरि जैसा ॥
 उग्र बिलोकनि प्रभुहि बिलोका । ग्रसन चहत मानहुँ त्रैलोका ॥
 दो०— करि चिक्कार घोर अति धावा बदन पसारि ।

गगन सिद्ध सुर त्रासित ह्य ह्य हेति पुकारि ॥ ७० ॥
 सभय देव करुनानिधि जान्यो । श्रवन प्रजंत सरासनु तान्यो ॥
 बिसिख निकर निसिचर मुख भरेऊ । तदपि महाबल भूमि न परेऊ ॥
 सरन्हि भरा मुख सन्मुख धावा । काल त्रोन सजीव जनु आवा ॥
 तब प्रभु कोपि तीव्र सर लीन्हा । धर ते भिन्न तासु सिर कीन्हा ॥
 सो सिर परेउ दसानन आगे । बिकल भयउ जिमि फनि मनि त्यागे ॥
 धरनि धसइ धर धाव प्रचंडा । तब प्रभु काटि कीन्ह दुइ खंडा ॥
 परे भूमि जिमि नभ तें भूधर । हेठ दाबि कपि भालु निसाचर ॥
 तासु तेज प्रभु बदन समाना । सुर मुनि सबहिं अचंभव माना ॥
 सुर दुंदुभीं बजावहिं हरषहिं । अस्तुति करहिं सुमन बहु बरषहिं ॥
 करि बिनती सुर सकल सिधाए । तेही समय देवरिषि आए ॥
 गगनोपरि हरि गुन गन गाए । रुचिर बीररस प्रभु मन भाए ॥
 बेगि हतहु खल कहि मुनि गए । राम समर माह सोभत भाए ॥

छं०—संग्राम भूमि बिराज रघुपति अतुल बल कोसल धनी ।
 श्रम बिंदु मुख राजीव लोचन अरुन तन सोनित कनी ॥
 भुज जुगल फेरत सर सरासन भालु कपि चहु दिसि बने ।
 कह दास तुलसी कहि न सक छबि सेष जेहि आनन घने ॥

दो०—निसिचर अधम मलाकर ताहि दीन्ह निज धाम ।

गिरिजा ते नर मंदमति जे न भजहिं श्रीराम ॥ ७१ ॥
 दिन के अंत फिरीं द्वौ अनी । समर भई सुभटन्ह श्रम घनी ॥
 राम कृपाँ कपि दल बल बाढ़ा । जिमि तृन पाइ लाग अति डाढ़ा ॥
 छीजहिं निसिचर दिनु अरु राती । निज मुख कहैं सुकृत जेहि भाँती ।
 बहु बिलाप दसकंधर करई । बंधु सीस पुनि पुनि उर धरई ॥
 रोवहिं नारि हृदय हति पानी । तासु तेज बल बिपुल बखानी ॥
 मेघनाद तेहि अवसर आयउ । कहि बहु कथा पिता समुझायउ ॥
 देखेहु कालि मोरि मनुसाई । अबहिं बहुत का करौं बड़ाई ॥
 इष्टदेव सैं बल रथ पायउँ । सो बल तात न तोहि देखायउँ ॥
 एहि बिधि जल्पत भयउ बिहाना । चहुँ दुआर लागे कपि नाना ॥
 इत कपि भालु काल सम बीरा । उत रजनीचर अति रनधीरा ॥
 लरहिं सुभट निज निज जय हेतू । बरनि न जाइ समर खगकेतू ॥
 दो०—मेघनाद मायामय रथ चढ़ि गयउ अकास ।

गजैँ अङ्गहास करि भइ कपि कटकहि त्रास ॥ ७२ ॥
 सक्ति सूल तरवारि कृपाना । अस्त्र सस्त्र कुलिसायुध नाना ॥

डारइ परसु परिध पाषाणा । लागेउ बृष्टि करै बहु बाना ॥
 दस दिसि रहे बान नभ छाई । मानहुँ मघा मेघ झरि लाई ॥
 धरु धरु मारु सुनिअ धुनि काना । जो मारइ तेहि कोउ न जाना ॥
 गहि गिरि तरु अकास कपि धावहिं । देखहिं तेहि न दुखित फिरि आवहिं ॥
 अवघट घाट बाट गिरि कंदर । माया बल कीन्हैसि सर पंजर ॥
 जाहिं कहाँ ब्याकुल भए बंदर । सुरपति बंदि परे जनु मंदर ॥
 मारुतसुत अंगद नल नीला । कीन्हैसि बिकल सकल बलसीला ॥
 पुनि लछिमन सुग्रीव बिभीषन । सरन्ह मारि कीन्हैसि जर्जर तन ॥
 पुनि रघुपति सैं जूझै लागा । सर छाँड़इ होइ लागहिं नागा ॥
 ब्याल पास बस भए खरारी । स्वबस अनंत एक अबिकारी ॥
 नट इव कपट चरित कर नाना । सदा स्वतंत्र एक भगवाना ॥
 रन सोभा लागि प्रभुहिं बैँधायो । नागपास देवन्ह भय पायो ॥
 दो०—गिरिजा जासु नाम जपि मुनि काटहिं भव पास ।

सो कि बंध तर आवइ ब्यापक बिस्व निवास ॥ ७३ ॥
 चरित राम के सगुन भवानी । तर्कि न जाहिं बुद्धि बल बानी ॥
 अस बिचारि जे तग्य बिरागी । रामहि भजहिं तर्क सब त्यागी ॥
 ब्याकुल कटकु कीन्ह घननादा । पुनि भा प्रगट कहइ दुर्बादा ॥
 जामवंत कह खल रहु ठाढ़ । सुनि करि ताहि क्रोध अति बाढ़ ॥
 बूढ़ जानि सठ छाँड़ेउँ तोही । लागेसि अधम पचारै मोही ॥
 अस कहि तरल त्रिसूल चलायो । जामवंत कर गहि सोइ धायो ॥

मारिसि मेघनाद कै छाती । परा भूमि घुर्मित सुरघाती ॥
पुनि रिसान गहि चरन फिरायो । महि पछारि निज बल देखरायो ॥
बर प्रसाद सो मरइ न मारा । तब गहि पद लंका पर हारा ॥
इहाँ देवरिषि गरुड़ पठायो । राम समीप सपदि सो आयो ॥
दो०— खगपति सब धरि खाए माया नाग बरूथ ।

माया बिगत भए सब हरषे बानर जूथ ॥ ७४ (क) ॥
गहि गिरि पादप उपल नख धाए कीस रिसाइ ।

चले तमीचर बिकलतर गढ़ पर चढ़े पराइ ॥ ७४ (ख) ॥
मेघनाद कै मुखा जागी । पितहि बिलोकि लाज अति लागी ॥
तुरत गयउ गिरिबर कंदरा । करौं अजय मख अस मन धरा ॥
इहाँ बिभीषन मंत्र बिचारा । सुनहु नाथ बल अतुल उदारा ॥
मेघनाद मख करइ अपावन । खल मायावी देव सतावन ॥
जौं प्रभु सिद्ध होइ सो पाइहि । नाथ बेगि पुनि जीति न जाइहि ॥
सुनि रघुपति अतिसय सुख माना । बोले अंगदादि कपि नाना ॥
लछिमन संग जाहु सब भाई । करहु बिधंस जग्य कर जाई ॥
तुम्ह लछिमन मारेहु रन ओही । देखि सभय सुर दुख अति मोही ॥
मारेहु तेहि बल बुद्धि उपाई । जेहिं छीजै निसिचर सुनु भाई ॥
जामवंत सुग्रीव बिभीषन । सेन समेत रहेहु तीनिउ जन ॥
जब रघुबीर दीन्ह अनुसासन । कटि निषंग कसि साजि सरासन ॥
प्रभु प्रताप उर धरि रनधीरा । बोले घन इव गिरा गँभीरा ॥
जौं तेहि आजु बधैं बिनु आवौं । तौ रघुपति सेवक न कहावौं ॥

गोमाय गौध कराल खर रव स्वान बोलहिं अति घने ।

जनु कालदूत उलूक बोलहिं बचन परम भयावने ॥

दो०— ताहि कि संपति सगुन सुभ सपनेहुँ मन बिश्राम ।

भूत ब्रह्म रत मोहबस राम बिमुख रति काम ॥ ७८ ॥

चलेउ निसाचर कटकु अपारा । चतुरंगिनी अनी बहु धारा ॥

बिबिधि भाँति बाहन रथ जाना । बिपुल बरन पताक ध्वज नाना ॥

चले मत्त गज जूथ घनेरे । प्राबिट जलद मरुत जनु प्रेरे ॥

बरन बरन बिरदैत निकाया । समर सूर जानहिं बहु माया ॥

अति बिचित्र बाहिनी बिराजी । बीर बसंत सेन जनु साजी ॥

चलत कटक दिगसिंधुर डगहीं । छुभित पयोधि कुधर डगमगहीं ॥

उठी रेनु रबि गयउ छपाई । मरुत थकित बसुधा अकुलाई ॥

पनव निसान घोर रव बाजहिं । प्रलय समय के घन जनु गाजहिं ॥

भेरि नफीरि बाज सहनाई । मारू राग सुभट सुखदाई ॥

केहरि नाद बीर सब करहीं । निज निज बल पौरुष उच्चरहीं ॥

कहइ दसानन सुनहु सुभट्टा । मर्दहु भालु कपिन्ह के टट्टा ॥

हौं मारिहउँ भूप द्वौ भाई । अस कहि सन्मुख फौज रेंगाई ॥

यह सुधि सकल कपिन्ह जब पाई । धाए करि रघुबीर दोहाई ॥

छं०— धाए बिसाल कराल मर्कट भालु काल समान ते ।

मानहुँ सपच्छ उड़ाहिं भूधर बृंद जाना खान ते ॥

नख दसन सैल महाद्रुमायुध सबल संक न मानहीं ।

जय राम रावन मत्त गज मृगराज सुजसु बखानहीं ॥

दो०— दुहु दिसि जय जयकार करि निज निज जोरी जानि।

भिरे बीर इत रामहि उत रावनहि बखानि ॥ ७९ ॥
 रावनु रथी बिरथ रघुबीरा । देखि बिभीषन भयउ अधीरा ॥
 अधिक प्रीति मन भा संदेहा । बँदि चरन कह सहित सनेहा ॥
 नाथ न रथ नहिं तन पद त्राना । केहि बिधि जितब बीर बलवाना ॥
 सुनहु सखा कह कृपानिधाना । जेहिं जय होइ सो स्यंदन आना ॥
 सौरज धीरज तेहि रथ चाका । सत्य सील दृढ़ ध्वजा पताका ।
 बल बिबेक दम पराहित घोरे । छमा कृपा समता रजु जोरे ॥
 ईस भजनु सारथी सुजाना । बिरति चर्म संतोष कृपाना ॥
 दान परसु बुधि सक्ति प्रचंडा । बर बिग्यान कठिन कोदंडा ॥
 अमल अचल मन त्रोन समाना । सम जम नियम सिलीमुख नाना ॥
 कवच अभेद बिप्र गुर पूजा । एहि सम विजय उपाय न दूजा ॥
 सखा धर्ममय अस रथ जाके । जीतन कहँ न कतहुँ रिपु ताके ॥
 दो०— मह्य अजय संसार रिपु जीति सकइ सो बीर।

जाके अस रथ होइ दृढ़ सुनहु सखा मतिधीर ॥ ८० (क) ॥

सुनि प्रभु बचन बिभीषन हरषि गहे पद कंज ।

एहि मिस मोहि उपदेसेहु राम कृपा सुख पुंज ॥ ८० (ख) ॥

उत पचार दसकंधर इत अंगद हनुमान।

लसत निसाचर भालु कपि करि निज निज प्रभु आन ॥ ८० (ग) ॥

सुर ब्रह्मादि सिद्ध मुनि नाना । देखत रन नभ चढ़े बिमाना ॥

हमहू उमा रहे तेहिं संगी । देखत राम चरित रन रंगा ॥

सुभट समर रस दुहु दिसि माते । कपि जयसील राम बल ताते ॥
 एक एक सन भिरहिं पचारहिं । एकन्ह एक मर्दि महि पारहिं ॥
 मारहिं काटहिं धरहिं पछारहिं । सीस तोरि सीसन्ह सन मारहिं ।
 उदर बिदारहिं भुजा उपारहिं । गहि पद अवनि पटक भट डारहिं ॥
 निसिचर भट महि गाड़हिं भालू । ऊपर ढारि देहिं बहु बालू ।
 बीर बलीमुख जुद्ध बिरुद्धे । देखिअत बिपुल काल जनु क्रुद्धे ॥

छं०— क्रुद्धे कृतांत समान कपि तन स्ववत सोनित राजहीं ।
 मर्दिहिं निमाचर कटक भट बलवंत घन जिमि गाजहीं ॥
 मारहिं चपेटन्ह डाटि दातन्ह काटि लातन्ह मीजहीं ।
 चिक्करहिं मर्कट भालु छल बल करहिं जेहिं खल छीजहीं ॥
 धरि गाल फारहिं उर बिदारहिं गल अँतावरि मेलहीं ।
 प्रह्लादपति जनु बिबिध तनु धरि समर अंगन खेलहीं ॥
 धरु मारु काटु पछारु घोर गिरा गगन महि भरि रही ।
 जय राम जो तून ते कुलिस कर कुलिस ते कर तून सही ॥

दो०— निज दल बिचलत देखेसि बीस भुजाँ दस चाप ।

रथ घट्टि चलेउ दसानन फिरहु फिरहु करि दाप ॥ ८१ ॥
 धायउ परम क्रुद्ध दसकंधर । सन्मुख चले हूह दै बंदर ॥
 गहि कर पादप उपल पहारा । डारेन्ह ता पर एकहिं बारा ॥
 लागहिं सैल बज्र तन तासू । खंड खंड होइ फूटहिं आसू ।
 चला न अचल रहा रथ रोपी । रन दुर्मद रावन अति कोपी ॥

इत उत झपटि दपटि कपि जोधा । मदै लाग भयउ अति क्रोधा ॥
चले पराइ भालु कपि नाना । त्राहि त्राहि अंगद हनुमाना ॥
पाहि पाहि रघुबीर गोसाईं यह खल खाइ काल की नाई ॥
तेहिं देखे कपि सकल पराने । दसहुँ चाप सायक संधाने ।

छं०— संधानि धनु सर निकर छाड़ैसि उरग जिमि उड़ि लागहीं ।
रहे पूरि सर धरनी गगन दिसि बिदिसि कहैं कपि भागहीं ॥
भयो अति कोलाहल बिकल कपि दल भालु बोलहिं आतुरे ।
रघुबीर करुना सिंधु आरत बंधु जन रच्छक हरे ॥

दो०— निज दल बिकल देखि कटि कसि निषंग धनु ह्यथ ।

लछिमन चले कुब्ध होइ नाइ राम पद माथ ॥ ८२ ॥
रे खल का मारसि कपि भालू । मोहि बिलोकु तोर मैं कालू ॥
खोजत रहेउँ तोहि सुतघाती । आजु निपाति जुड़ावउँ छाती ॥
अस कहि छाड़ैसि बान प्रचंडा । लछिमन किए सकल सत खंडा ॥
कोटिन्ह आयुध रावन डारे । तिल प्रवान करि काटि निवारे ॥
पुनि निज बान्ह कीन्ह प्रहारा । स्यंदनु भंजि सारथी मारा ॥
सत सत सर मारे दस भाला । गिरि सृंगन्ह जनु प्रबिसहिं व्याला ॥
पुनि सत सर मारा उर माहीं । पेउ धरनि तल सुधि कछु नाहीं ॥
उठा प्रबल पुनि मुरुछ जागी । छाड़िसि ब्रह्म दीन्ह जो साँगी ॥

छं०— सो ब्रह्म दत्त प्रचंड सक्ति अनंत उर लागी सही ।
पर्यो बीर बिकल उठाव दसमुख अतुल बल महिमा रही ॥

ब्रह्मांड भवन बिराज जाकेँ एक सिर जिमि रज कनी ।

तेहि चह उठावन मूढ़ रावन जान नहिं त्रिभुवन धनी ॥

दो०— देखि पवनसुत धायउ बोलत बचन कवरे ।

आवत कपिहि हन्यो तेहि मृष्टि प्रहार प्रघोर ॥८३॥

जानु टेकि कपि भूमि न गिरा । उठा सँभारि बहुत रिस भरा ॥

मुठिका एक ताहि कपि मारा । परेउ सैल जनु बज्र प्रहारा ॥

मुरुछा गै बहोरि सो जागा । कपि बल बिपुल सराहन लागा ।

धिग धिग मम पौरुष धिग मोही । जौं तैं जिअत रहेसि सुरद्रोही ॥

अस कहि लछिमन कहूँ कपि ल्यायो । देखि दसानन बिसमय पायो ।

कह रघुबीर समझु जियँ भ्राता । तुम्ह कृतांत भच्छक सुर वाता ॥

सुनत बचन उठि बैठ कृपाला । गई गगन सो सकति कराला ॥

पुनि कोदंड बान गहि धाए । रिपु सन्मुख अति आतुर आए ॥

छं०— आतुर बहोरि बिभंजि स्यंदन सूत हति व्याकुल कियो ।

गिर्यो धरनि दसकंधर बिकलतर बान सत बेध्यो हियो ॥

सारथी दूसर घालि रथ तेहि तुरत लंका लै गयो ।

रघुबीर बंधु प्रताप पुंज बहोरि प्रभु चरनहि नयो ॥

दो०— उहाँ दसानन जागि करि करै लाग कछु जग्य ।

राम बिरोध बिजय चह सठ हठ बस अति अग्य ॥८४॥

इहाँ बिभीषन सब सुधि पाई । सपदि जाइ रघुपतिहि सुनाई ॥

नाथ करइ रावन एक जागा । सिद्ध भएँ नहिं मरिह अभागा ।

पठवहु नाथ बेगि भट बंदर । करहिं बिधंस आव दसकंधर ॥
 प्रात होत प्रभु सुभट पठाए । हनुमदादि अंगद सब धाए ॥
 कौतुक कूदि चढ़े कपि लंका । पैठे रावन भवन असंका ॥
 जाय करत जबहीं सो देखा । सकल कपिन्ह भा क्रोध बिसेषा ॥
 रन ते निलज भाजि गृह आवा । इहाँ आइ बक ध्यान लगावा ॥
 अस कहि अंगद मास लाता । चितव न सठ स्वारथ मन राता ॥

छं० — नहिं चितव जब करि कोप कपि गहि दसन लातन्ह मारहीं ।
 धरि केस नारि निकारि बाहेर तेऽतिदीन पुकारहीं ॥
 तब उठेउ क्रुद्ध कृतांत सम गहि चरन बानर डारई ।
 एहि बीच कपिन्ह बिधंस कृत मख देखि मन महुँ हारई ॥

दो०—जग्य बिधंसि कुसल कपि आए रघुपति पास ।

चलेउ निसाचर क्रुद्ध होइ त्यागि जिवन कै आस ॥ ८५ ॥
 चलत होहिं अति असुभ भयंकर । बैठहिं गीध उड़ाइ सिरन्ह पर ॥
 भयउ कालबस काहु न माना कहेसि बजावहु जुद्ध निसाना ॥
 चली तमीचर अनी अपारा । बहु गज रथ पदाति असवारा ॥
 प्रभु सन्मुख धाए खल कैसें । सलभ समूह अनल कहँ जैसें ॥
 इहाँ देवतन्ह अस्तुति कोन्ही । दारुन बिपति हमहि एहिं दीन्ही ॥
 अब जनि राम खेलावहु एही । अतिसय दुखित होति बैदेही ॥
 देव बचन सुनि प्रभु मुसुकाना उठि रघुबीर सुधारे बाना ॥
 जटा जूट दृढ़ बाँधे माथे सोहहिं सुमन बीच बिच गाथे ।

अरुन नयन बारिद तनु स्यामा । अखिल लोक लोचनाभिरामा ॥
कटितट परिकर कस्यो निषंगा । कर कोदंड कठिन सारंगा ॥

छं०— सारंग कर सुंदर निषंग सिलीमुखाकर कटि कस्यो ।
भुजदंड पीन मनोहरायत उर धरासुर पद लस्यो ॥
कह दास तुलसी जबहिं प्रभु सर चाप कर फेरन लगे ।
ब्रह्मांड दिग्गज कमठ अहि महि सिंधु भूधर डगमगे ॥

दो०— सोभा देखि हरषि सुर बरषहिं सुमन अपार ।

जय जय जय करुनानिधि छबि बल गुन आगार ॥ ८६ ॥
एहीं बीच निसाचर अनी । कसमसात आई अति घनी ॥
देखि चले सन्मुख कपि भट्टा । प्रलयकाल के जनु घन घट्टा ॥
बहु कृपान तरवारि चमंकहिं । जनु दहँ दिसि दामिनीं दमंकहिं ॥
गज रथ तुरग चिकार कठोरा । गर्जहिं मनहुँ बलाहक घोरा ॥
कपि लंगूर बिपुल नभ छाए । मनहुँ इंद्रधनु उए सुहाए ॥
उठइ धूरि मानहुँ जलधारा । बान बुंद भै बृष्टि अपारा ॥
दुहुँ दिसि पर्वत करहिं प्रहारा । बज्रपात जनु बारहिं बारा ॥
रघुपति कोपि बान झरि लाई । घायल भै निसिचर समुदाई ॥
लागत बान बीर चिकरहीं । घुर्मि घुर्मि जहँ तहँ महि परहीं ॥
स्रवहिं सैल जनु निर्झर भारी । सोनित सरि कादर भयकारी ॥

छं०— कादर भयंकर रुधिर सरिता चली परम अपावनी ।

दोउ कूल दल रथ रेत चक्र अबर्त बहति भयावनी ॥

जलजंतु गज पदचर तुरग खर विविध वाहन को गने ।

सर सक्ति तोमर सर्प चाप तरंग चर्म कमठ घने ॥

दो०— बीर परहिं जनु तीर तरु मज्जा बहु बह फेन ।

कादर देखि डरहिं तहं सुभटन्ह के मन चेन ॥८७॥

मज्जहिं भूत पिसाच बेताला । प्रमथ महा झोटिंग कराला ॥

काक कंक लै भुजा उड़ाहीं । एक ते छीनि एक लै खार्हीं ॥

एक कहहिं ऐसिउ सौंघाई । सठह तुम्हार दरिद्र न जाई ॥

कहँस्त भट घायल तट गिरे । जहँ तहँ मनहुँ अर्धजल परे ॥

खँचहिं गीध आँत तट भए । जनु बंसी खेलत चित दए ॥

बहु भट बहहिं चढ़े खग जाहीं । जनु नावरि खेलहिं सरि माहीं ॥

जोगिनि भरि भरि खण्णर संचहिं । भूत पिसाच बधू नभ नंचहिं ॥

भट कपाल करताल बजावहिं । चामुंडा नाना बिधि गावहिं ॥

जंबुक निकर कटक्कट कट्टहिं । खाहिं हुआहिं अघाहिं दपट्टहिं ॥

कोटिन्ह रुंड मुंड बिनु डोल्लहिं । सीस परे महि जय जय बोल्लहिं ॥

छं०— बोल्लहिं जो जय जय मुंड रुंड प्रचंड सिर बिनु धावहीं ।

खण्णरिन्ह खग अलुज्झि जुझहिं सुभट भटन्ह दहावहीं ॥

बानर निसाचर निकर मर्दहिं राम बल दर्पित भए ।

संग्राम अंगन सुभट सोवहिं राम सर निकरन्हि हए ॥

दो०— रावन हृदय बिचारा भा निसिचर संघार ।

मैं अकेल कपि भालु बहु माया करीं अपार ॥८८॥

देवन्ह प्रभुहि पयादें देखा । उपजा उर अति छेभ बिसेषा ॥
 सुरपति निज रथ तुरत पठावा । हरष सहित मातलि लै आवा ॥
 तेज पुंज रथ दिव्य अनूपा । हरषि चढ़े कोसलपुर भूपा ॥
 चंचल तुरग मनोहर चारी । अजर अमर मन सम गतिकारी ॥
 रथारूढ़ रघुनाथहि देखी । धाए कपि बलु पाइ बिसेषी ॥
 सही न जाइ कपिन्ह कै मारी । तब रावन माया बिस्तारी ॥
 सो माया रघुबीरहि बाँची । लछिमन कपिन्ह सो मानी साँची ॥
 देखी कपिन्ह निसाचर अनी । अनुज सहित बहु कोसलधनी ॥

छं०—बहु राम लछिमन देखि मर्कट भालु मन अति अपडरे ।
 जनु चित्र लिखित समेत लछिमन जहँ सो तहँ चितवहिं खरे ॥
 निज सेन चकित बिलोकि हँसि सर चाप सजि कोसल धनी ।
 माया हरी हरि निमिष महुँ हरषी सकल मर्कट अनी ॥

दो०—बहुरि राम सब तन चितइ बोले बचन गंभीर ।

द्वंदजुद्ध देखहु सकल श्रमित भए अति बीर ॥८९॥
 अस कहि रथ रघुनाथ चलावा । बिप्र चरन पंकज सिरु नावा ।
 तब लंकेश क्रोध उर छावा । गर्जत तर्जत सन्मुख धावा ॥
 जीतेहु जे भट संजुग माहीं । सुनु तापस मैं तिन्ह सम नाही ।
 रावन नाम जगत जस जाना । लोकप जाकें बंदीखाना ॥
 खर दूषन बिराध तुम्ह मारा । बधेहु व्याध इव बालि बिचारा ॥
 निसिचर निकर सुभट संघारेहु । कुंभकरन घननादहि मारेहु ॥

आजु बयरु सबु लेउँ निबाही । जौं रन भूप भाजि नहिं जाही ॥
आजु करउँ खलु काल हवाले परेहु कठिन रावन के पाले ॥
सुनि दुर्बचन कालबस जाना । बिहौंस बचन कह कृपानिधाना ॥
सत्य सत्य सब तव प्रभुताई । जल्पसि जनि देखाउ मनुसाई ॥

छं०— जनि जल्पना करि सुजसु नासहि नीति सुनहि करहि छप्पा ।

संसार महँ पुरुष त्रिविध पाटल रसाल पनस समा ॥

एक सुमनप्रद एक सुमन फल एक फलइ केवल लागहीं ।

एक कहहिं कहहिं करहिं अपर एक करहिं कहत न बागहीं ॥

दो०— राम बचन सुनि बिहँसा मोहि सिखावत ग्यान ।

बयरु करत नहिं तब डरे अब लागे प्रिय प्रान ॥ ९० ॥

कहि दुर्बचन क्रुद्ध दसकंधर । कुलिस समान लाग छौंड़ै सर ॥

नानाकार सिलीमुख धाए । दिसि अरु बिदिसि गगन महि छाए ॥

पावक सर छौंड़ैउ रघुबीरा । छन महँ जरे निसाचर तीरा ॥

छाड़िसि तीब्र सक्ति खिसिआई । बान संग प्रभु फेरि चलाई ॥

कोटिन्ह चक्र त्रिसूल पबारै । बिनु प्रयास प्रभु काटि निवारै ॥

निफल होहिं रावन सर कैसैं । खल के सकल मनोरथ जैसैं ॥

तब सत बान सारथी मारेसि । परेउ भूमि जय राम पुकारेसि ॥

राम कृपा करि सूत उठावा । तब प्रभु परम क्रोध कहूँ पावा ॥

छं०— भए क्रुद्ध जुद्ध बिरुद्ध रघुपति त्रोन सायक कसमसे ।

कोदंड धुनि अति चंड सुनि मनुजाद सब मारुत ग्रसे ॥

मंदोदरी उर कंप कंपति कमठ भू भूधर त्रमे ।

चिक्कहि दिग्गज दसन गहि महि देखि कौतुक सुर हँसे ॥

दो०— तानेउ चाप श्रवन लागि छाँड़े बिसिख कराल ।

राम मारगन गन चले लहलहात जनु ब्याल ॥ ९१ ॥

चले बान सपच्छ जनु उरगा । प्रथमहिं हतेउ सारथी तुरगा ॥

रथ बिभंजि हति केतु पताका । गर्जा अति अंतर बल थाका ॥

तुरत आन रथ चढ़ि खिसिआना । अस्त्र सस्त्र छाँड़ेसि बिधि नाना ।

बिफल होहिं सब उद्यम ताके । जिमि परद्रोह निरत मनसा के ॥

तब रावन दस सूल चलावा । बाजि चारि महि मारि गिरावा ॥

तुरग उठाइ कोपि रघुनायक । खैचि सरासन छाँड़े सायक ॥

रावन सिर सरोज बनचारी । चलि रघुबीर सिलीमुख धारी ।

दस दस बान भाल दस मारे । निसरि गए चले रुधिर पनारे ॥

स्वत रुधिर धायउ बलवाना । प्रभु पुनि कृत धनु सर संधाना ॥

तीस तीर रघुबीर पबारे । भुजन्हि समेत सीस महि पारे ॥

काटतहीं पुनि भए नबीने । राम बहोरि भुजा सिर छीने ॥

प्रभु बहु बार बाहु सिर हए । कटत झटिति पुनि नूतन भए ॥

पुनि पुनि प्रभु काटत भुज सीसा । अति कौतुकी कोसलाधीसा ॥

रहे छाइ नभ सिर अरु बाहू । मानहुँ अमित केतु अरु राहू ॥

छं०— जनु राहु केतु अनेक नभ पथ स्वत सोनित धावहीं ।

रघुबीर तीर प्रचंड लागहिं भूमि गिरन न पावहीं ॥

एक एक सर सिर निकर छेदे नभ उड़त इमि सोहहीं ।

जनु कोपि दिनकर कर निकर जहँ तहँ बिधुनुद पोहहीं ॥

दो०— जिमि जिमि प्रभु हर तासु सिर तिमि तिमि होहि अपार ।

सेवत बिषय बिबर्ध जिमि नित नित नूतन मार ॥१२॥

दसमुख देखि सिरन्ह कै बाढ़ी बिसरा मरन भई रिस गाढ़ी ॥

गर्जेउ मूढ़ महा अभिमानी धायउ दसहु सरासन तानी ॥

समर भूमि दसकंधर कोप्यो । बरषि बान रघुपति रथ तोप्यो ।

दंड एक रथ देखि न परेऊ जनु निहार महँ दिनकर दुरेऊ ॥

हाहाकार सुरन्ह जब कीन्हा । तब प्रभु कोपि कारमुक लीन्हा ॥

सर निवारि रिपु के सिर काटे । ते दिसि बिदिसि गगन महि पाटे ॥

काटे सिर नभ मारग धावहिं । जय जय धुनि करि भय उपजावहिं ॥

कहँ लछिमन सुग्रीव कपीसा । कहँ रघुबीर कोसलाधीसा ॥

छं०— कहँ राम कहि सिर निकर धाए देखि मर्कट भजि चले ।

संधानि धनु रघुबंसमनि हँसि सरन्हि सिर बेधे भले ॥

सिर मालिका कर कालिका गहि बृंद बृंदन्हि बहु मिलीं ।

करि रुधिर सरि मज्जनु मनहुँ संग्राम बट पूजन चलीं ॥

दो०— घुनि दसकंठ क्रुद्ध होइ छाँड़ी सक्ति प्रचंड ।

चली बिभीषन सन्मुख मनहुँ काल कर दंड ॥१३॥

आवत देखि सक्ति अति घोरा । प्रनतारति भंजन पन मोरा ।

तुरत बिभीषन पाछें मेला । सन्मुख राम सहेउ सोइ सेला ॥

लागि सक्ति मुरुछा कछु भई । प्रभु कृत खेल सुरन्ह बिकलई ॥
 देखि बिभीषन प्रभु श्रम पायो । गहि कर गदा क्रुद्ध होइ धायो ॥
 रे कुभाग्य सठ मंद कुबुद्धे । तैं सुर नर मुनि नाग बिरुद्धे ॥
 सादर सिव कहूँ सीस चढ़ाए । एक एक के कोटिन्ह पाए ॥
 तेहि कारन खल अब लगि बाँच्यो । अब तव कालु सीस पर नाच्यो ॥
 राम बिमुख सठ चहसि संपदा । अस कहि हनेसि माझ उर गदा ॥

छं०— उर माझ गदा प्रहार घोर कठोर लागत महि पर्यो ।
 दस बदन सोनित स्रवत पुनि संभारि धायो रिस भर्यो ॥
 द्वौ भिरे अतिबल मल्लजुद्ध बिरुद्ध एकु एकहि हनै ।
 रघुबीर बल दर्पित बिभीषनु घालि नहिं ता कहूँ गनै ॥

दो०— उमा बिभीषनु सवनहि सन्मुख चितव कि काउ ।

सो अब भिरत काल ज्यों श्रीरघुबीर प्रभाउ ॥ ९४ ॥
 देखा श्रमित बिभीषनु भारी । धायउ हनुमान गिरि धारी ॥
 रथ तुरंग सारथी निपाता । हृदय माझ तेहि मारेसि लाता ॥
 ठाढ़ रहा अति कंपित गाता । गयउ बिभीषनु जहँ जनत्राता ॥
 पुनि रावन कपि हतेउ पचारी । चलेउ गगन कपि पूँछ पसारी ॥
 गहिसि पूँछ कपि सहित उड़ाना । पुनि फिरि भिरेउ प्रबल हनुमाना ।
 लरत अकास जुगल सम जोधा । एकहि एकु हनत करि क्रोधा ॥
 सोहहिं नभ छल बल बहु करहीं । कज्जलगिरि सुमेरु जनु लरहीं ॥
 बुधि बल निसिचर परइ न पाय्यो । तब मारुतसुत प्रभु संभार्यो ।

छं०—संभारि श्रीरघुबीर धीर पचारि कपि रावनु हन्यो ।
महि परत पुनि उठि लरत देवन्ह जुगल कहूँ जय जय भन्यो ॥
हनुमंत संकट देखि मर्कट भालु क्रोधातुर चले ।
रन मत्त रावन सकल सुभट प्रचंड भुज बल दलमले ॥

दो०—तब रघुबीर पचारे धाए कीस प्रचंड ।
कपि बल प्रबल देखि तेहि कीन्ह प्रगट पाचंड ॥ ९५ ॥
अंतरधान भयठ छन एका पुनि प्रगटे खल रूप अनेका ॥
रघुपति कटक भालु कपि जेते । जहँ तहँ प्रगट दसानन तेते ॥
देखे कपिन्ह अमित दससीसा । जहँ तहँ भजे भालु अरु कीसा ॥
भागे बानर धरहिं न धीरा । त्राहि त्राहि लछिमन रघुबीरा ॥
दहँ दिसि धावहिं कोटिन्ह रावन । गर्जहिं घोर कठोर भयावन ॥
डरे सकल सुर चले पराई । जय कै आस तजहु अब भाई ।
सब सुर जिते एक दसकंधर । अब बहु भए तकहु गिरि कंदर ॥
रहे बिरंचि संभु मुनि ग्यानी । जिन्ह जिन्ह प्रभु महिमा कह्यु जानी ॥

छं०—जाना प्रताप ते रहे निर्भय कपिन्ह रिपु माने फुरे ।
चले बिचलि मर्कट भालु सकल कृपाल पाहि भयातुरे ॥
हनुमंत अंगद नील नल अतिबल लरत रन बाँकुरे ।
मर्दहिं दसानन कोटि कोटिन्ह कपट भू भट अंकुरे ॥

दो०—सुर बानर देखे बिकल हैंस्यो कोसलाधीस ।
सजि सारंग एक सर हते सकल दससीस ॥ ९६ ॥

प्रभु छन महँ माया सब काटी । जिमि रबि उएँ जाहिं तम फाटी ॥
 रावनु एक देखि सुर हरषे । फिरे सुमन बहु प्रभु पर बरषे ॥
 भुज उठाइ रघुपति कपि फेरे । फिरे एक एकन्ह तब टेरे ॥
 प्रभु बलु पाइ भालु कपि धाए । तरल तमकि संजुग महि आए ॥
 अस्तुति करत देवतन्हि देखें । भयउँ एक मैं इन्ह के लेखें ।
 सठहु सदा तुम्ह मोर मरायल । अस कहि कोपि गगन पर धायल ।
 हाहाकार करत सुर भागे । खलहु जाहु कहँ मोरें आगे ॥
 देखि बिकल सुर अंगद धायो । कूदि चरन गहि भूमि गिरायो ॥
 छं०— गहि भूमि पारयो लात मारयो बालिसृत प्रभु पहिं गयो ।

संभारि उठि दसकंठ घोर कठोर रव गर्जत भयो ॥

करि दाप चाप चढ़ाइ दस संधानि सर बहु बरषई ।

किए सकल भट धायल भयाकुल देखि निज बल हरषई ॥

दो०— तब रघुपति रावन के सीस भुजा सर चाप ।

काटे बहुत बड़े पुनि जिमि तीरथ कर पाप ॥ ९७ ॥

सिर भुज बाढ़ि देखि रिपु केरी । भालु कपिन्ह रिस भई घनेरी ॥

मरत न मूढ़ कटेहुँ भुज सीसा । धाए कोपि भालु भट कीसा ॥

बालितनय मारुति नल नीला । बानरराज दुबिद बलसीला ॥

बिटप महीधर करहिं प्रहारा । सोइ गिरि तरु गहि कपिन्ह सो मारा ॥

एक नखन्हि रिपु बपुष बिदारी । भागि चलहिं एक लातन्ह मारी ॥

तब नल नील सिरन्हि चढ़ि गयऊ । नखन्हि लिलार बिदारत भयऊ ।

रुधिर देखि बिषाद उर भारी । तिन्हहि धरन कहूँ भुजा पसारी ॥
 गहे न जाहिं करन्हि पर फिरहीं । जनु जुग मधुष कमल बन चरहीं ॥
 कोपि कूदि द्वौ धरेसि बहोरी । महि पटकत भजे भुजा मरोरी ॥
 पुनि सकोप दस धनु कर लीन्हे सरन्हि मारि घायल कपि कीन्हे ।
 हनुमदादि मुरुछित करि बंदर । पाइ प्रदोष हरष दसकंधर ॥
 मुरुछित देखि सकल कपि बीरा । जामवंत धायउ रनधीरा ॥
 संग भालु भूधर तरु धारी । मारन लगे पचारि पचारी ॥
 भयउ क्रुद्ध रावन बलवाना । गहि पद महि पटकइ भट नाना ॥
 देखि भालुपति निज दल घाता । कोपि माझ उर मारेसि लाता ॥

छं० — उर लात घात प्रचंड लागत बिकल रथ ते महि परा ।
 गहि भालु बीसहुँ कर मनहुँ कमलन्हि बसे निसि मधुकरा ॥
 मुरुछित बिलोकि बहोरि पद हति भालुपति प्रभु पहिं गयो ।
 निसि जानि स्थंदन घालि तेहि तब सूत जतनु करत भयो ॥

दो०—मुरुछा बिगत भालु कपि सब आए प्रभु पास ।

निसिचर सकल रावनहि घेरि रहे अति त्रास ॥ ९८ ॥

मासपारायण, छब्बीसवाँ विश्राम

तेही निसि सीता पहिं जाई । त्रिजटा कहि सब कथा सुनाई ॥
 सिर भुज बाढ़ि सुनत रिपु केरी । सीता उर भइ त्रास घनेरी ॥
 मुख मलीन उपजी मन चिंता । त्रिजटा सन बोली तब सीता ॥
 होइहि कहा कहसि किन माता । केहि बिधि मरिहि बिस्व दुखदाता ॥

रघुपति सर सिर कटेहुँ न मरई । बिधि बिपरीत चरित सब करई ॥
 मोर अभाग्य जिआवत ओही । जेहिं हौं हरि पद कमल बिछोही ॥
 जेहिं कृत कपट कनक मृग झूठा । अजहुँ सो दैव मोहि पर रूठा ॥
 जेहिं बिधि मोहि दुख दुसह सहाए । लछिमन कहूँ कटु बचन कहाए ॥
 रघुपति बिरह सबिष सर भारी । तकि तकि भार बार बहु मारी ॥
 ऐसेहुँ दुख जो राख मम प्राण । सोइ बिधि ताहि जिआव न आना ॥
 बहु बिधि कर बिलाप जानकी । करि करि सुरति कृपानिधान की ॥
 कह त्रिजटा सुनु राजकुमारी । उर सर लागत मरइ सुरारी ॥
 प्रभु ताते उर हतइ न तेही । एहि के हृदयँ बसति बैदेही ॥
 छं०— एहि के हृदयँ बस जानकी जानकी उर मम बास है ।

मम उदर भुअन अनेक लागत बान सब कर नास है ॥

सुनि बचन हरष बिषाद मन अति देखि पुनि त्रिजटाँ कहा ।

अब मरिहि रिपु एहि बिधि सुनहि सुंदरि तजहि संसय महा ॥

दो०—काटत सिर होइहि बिकल छुटि जाइहि तव ध्यान ।

तब रावनहि हृदय महुँ मरिहहि रामु सुजान ॥ ११ ॥
 अस कहि बहुत भौंति समुझाई । पुनि त्रिजटा निज भवन सिधाई ॥
 राम सुभाउ सुमिरि बैदेही । उपजी बिरह बिथा अति तेही ॥
 निसिहि ससिहि निदति बहु भाँती । जुग सम भई सिराति न राती ॥
 करति बिलाप मनहिं मन भारी । राम बिरहँ जानकी दुखारी ॥
 जब अति भयउ बिरह उर दाहू । फरकेउ बाप नयन अरु बाहू ॥

सगुन बिचारि धरी मन धीरा । अब मिलिहहिं कृपाल रघुबीरा ॥
इहाँ अर्धनिसि रावनु जागा । निज सारथि सन खीझन लागा ॥
सठ रनभूमि छड़ाइसि मोही । धिग धिग अधम मंदमति तोही ॥
तेहिं पद गहि बहु बिधि समुझावा । भोरु भएँ रथ चढ़ि पुनि धावा ॥
सुनि आगवनु दसानन केरा । कपिदल खरभर भयउ घनेरा ॥
जहँ तहँ भूधर बिटप उपारी । धाए कटकटाइ भट भारी ॥

छं०—धाए जो मर्कट बिकट भालु कराल कर भूधर धरा ।
अति कोष करहिं प्रहार मारत भजि चले रजनीचरा ॥
बिचलाइ दल बलवंत कीसन्ह घेरि पुनि रावनु लियो ।
चहुँ दिसि चपेटन्ह मारि नखन्हि बिदारि तनु ब्याकुल कियो ॥

दो०—देखि महा मर्कट प्रबल रावन कीन्ह बिचार ।

अंतरहित होइ निमिष महँ कृत माया बिस्तार ॥ १०० ॥

छं०—जब कीन्ह तेहिं पाषंड । भए प्रगट जंतु प्रचंड ॥
बेताल भूत पिसाच । कर धरें धनु नाराच ॥
जोगिनि गहैं करबाल । एक हाथ मनुज कपाल ॥
करि सद्य सोनित पान । नाचहिं करहिं बहु गान ॥
धरु मारु बोलहिं घोर । रहि पूरि धुनि चहुँ ओर ॥
मुख बाइ धावहिं खान । तब लगे कीस परान ॥
जहँ जाहिं मर्कट भागि । तहँ बरत देखहिं आगि ॥
भए विकल बानर भालु । पुनि लाग बरवै बालु ॥

जहँ तहँ शक्ति करि कीस । गजेंउ बहुरि दससीस ॥
 लखि मन कपीस समेत । भए सकल बीर अचेत ॥
 हा राम हा रघुनाथ । कहि सुभट भीजहि हाथ ॥
 एहि बिधि सकल बल तोरि । तेहि कीन्ह कपट बहोरि ॥
 प्रगटेसि बिपुल हनुमान । धाए गहे पाषान ॥
 तिन्ह रामु घेरे जाइ । चहुँ दिसि बरूथ बनाइ ॥
 मारहु धरहु जनि जाइ । कटकटहि पूँछ उठाइ ॥
 दहँ दिसि लँगूर बिराज । तेहि मध्य कोसलराज ॥

छं०— तेहि मध्य कोसलराज सुंदर स्याम तन सोभा लही ।
 जनु इंद्रधनुष अनेक की बर बारि तुंग तमालही ॥
 प्रभु देखि हरष बिषाद उर सुर बदत जय जय जय करी ।
 रघुबीर एकहि तीर कोपि निषेध महुँ माया हरी ॥
 माया बिगत कपि भालु हरषे बिटप गिरि गहि सब फिरे ।
 सर निकर छाड़े राम रावन बाहु सिर पुनि यहि गिरे ॥
 श्रीराम रावन समर चरित अनेक कल्प जो गावहीं ।
 सत सेष सारद निगम कबि तेउ तदपि पार न पावहीं ॥

दो०— ताके गुन गन कछु कहे जइमति तुलसीदास ।
 जिमि निज बल अनुरूप ते माछी उड़इ अकास ॥ १०१ (क) ॥
 काटे सिर भुज बार बहु मरत न भट लंकैस ।
 प्रभु क्रीड़त सुर सिद्ध मुनि ब्याकुल देखि कलेस ॥ १०१ (ख) ॥

काटत बढ़हिं सीस समुदाई । जिमि प्रति लाभ लोभ अधिकाई ॥
 मरइ न रिपु श्रम भयउ बिसेषा । राम बिभीषन तन तब देखा ॥
 उमा काल मर जाकी ईछा । सो प्रभु जन कर प्रीति परीछा ॥
 सुनु सरबग्य चराचर नायक । प्रनतपाल सुर मुनि सुखदायक ॥
 नाभिकुंड पियूष बस याकें । नाथ जिभत रावनु बल ताकें ॥
 सुनत बिभीषन बचन कृपाला । हरषि गहे कर बान कराला ॥
 असुभ होन लागे तब नाना । रोवहिं खर सूकाल बहु स्वाना ॥
 बोलहिं खग जग आरति हेतू । प्रगट भए नभ जहँ तहँ केतू ॥
 दस दिसि दाह होन अति लागा । भयउ परब बिनु रबि उपरागा ॥
 मंदोदरि उर कंपति भारी । प्रतिमा सबहिं नयन मग बारी ॥

छं०— प्रतिमा रुदहिं पविपात नभ अति बात बह डोलति मही ।
 बरषहिं बलाहक रुधिर कच रज असुभ अति सक को कही ॥
 उतपात अमित बिलोकि नभ सुर बिकल बोलहिं जय जए ।
 सुर सभय जानि कृपाल रघुपति चाप सर जोरत भए ॥

दो०— खैंचि सगसन श्रवन लागि छाड़े सर एकतीस ।

रघुनायक सायक चले मानहुँ काल फनीस ॥ १०२ ॥
 सायक एक नाभि सर सोषा । अपर लगे भुज सिर करि रोषा ॥
 लै सिर बाहु चले नाराचा । सिर भुज हीन रुंड महि नाचा ॥
 धरनि धसइ धर धाव प्रचंडा । तब सर हति प्रभु कृत दुइ खंडा ॥
 गर्जेउ मरत घोर रव भारी । कहाँ रामु रन हतौ पचारी ॥

डोली भूमि गिरत दसकंधर । छुभित सिंधु सरि दिग्गज भूधर ॥
 धरनि परेउ द्वौ खंड बढाई । चापि भालु मर्कट समुदाई ॥
 मंदोदरि आगें भुज सीसा । धरि सर चले जहाँ जगदीसा ॥
 प्रबिसे सब निषंग महँ जाई । देखि सुरन्ह दुंदुभीं बजाई ॥
 तासु तेज समान प्रभु आनन । हरषे देखि संभु चतुरानन ॥
 जय जय धुनि पूरी ब्रह्मंडा । जय रघुबीर प्रबल भुजदंडा ॥
 बरषहिं सुमन देव मुनि बृन्दा । जय कृपाल जय जयति मुकुन्दा ॥
 छं०— जय कृपा कंद मुकुंद द्वंद हरन सरन सुखप्रद प्रभो ।

खल दल बिदारन परम कारन कारुनीक सदा बिभो ॥
 सुर सुमन बरषहिं हरष संकुल बाज दुंदुभि गहगही ।
 संग्राम अंगन राम अंग अनंग बहु सोभा लही ॥
 सिर जटा मुकुट प्रसून बिच बिच अति मनोहर राजही ।
 जनु नीलगिरि पर तड़ित पटल समेत उडुगन भाजही ॥
 भुजदंड सर कोदंड फेरत रुधिर कन तन अति बने ।
 जनु रायमुनीं तपाल पर बैठीं बिपुल सुख आपने ॥

दो०— कृपादृष्टि करि बृष्टि प्रभु अभय किए सुर बृंद ।

भालु कीस सब हरषे जय सुख धाम मुकुंद ॥ १०३ ॥
 पति सिर देखत मंदोदरी । मुहुँछित बिकल धरनि खसि परी ॥
 जुबति बृंद रोवत उठि धाई । तेहि उठाइ रावन पहिं आई ॥
 पति गति देखि ते करहिं पुकारा । छूटे कच नहिं बपुष सँभारा ॥

उर ताड़ना करहिं बिधि नाना । रोवत करहिं प्रताप बखाना ॥
 तव बल नाथ डोल नित धरनी । तेज हीन पावक ससि तरनी ॥
 सेष कमठ सहि सकहिं न भारा । सो तनु भूमि परेउ भरि छारा ॥
 बरुन कुबेर सुरेस समीरा । रन सन्मुख धरि काहुँ न धीरा ॥
 भुजबल जितेहु काल जम साई । आजु परेहु अनाथ की नाई ॥
 जगत बिदित तुम्हारि प्रभुताई । सुत परिजन बल बरनि न जाई ॥
 राम बिमुख अस हाल तुम्हारा । रहा न कोउ कुल रोचनिहारा ॥
 तव बस बिधि प्रपंच सब नाथा । सभय दिसिष नित नावहिं माथा ॥
 अब तव सिर भुज जंबुक खाहीं । राम बिमुख यह अनुचित नाहीं ॥
 काल बिबस पति कहा न माना । अग जग नाथु मनुज करि जाना ॥
 छं०—जान्यो मनुज करि दनुज कानन दहन पावक हरि स्वयं ।

जेहि नमत सिव ब्रह्मादि सुर पिय भजेहु नहिं करुनामयं ॥

आजन्म ते परद्रोह रत पापौघमय तव तनु अयं ।

तुम्हहू दियो निज धाम राम नमामि ब्रह्म निरामयं ॥

दो०—अहह नाथ रघुनाथ सम कृपासिधु नहिं आन ।

जोगि बृंद दुर्लभ गति तोहि दीन्हि भगवान् ॥ १०४ ॥

मंदोदरी बचन सुनि काना । सुर मुनि सिद्ध सबहिं सुख माना ॥

अज महेस नारद सनकादी । जे मुनिबर परमारथबादी ॥

भरि लोचन रघुपतिहि निहारी । प्रेम मगन सब भए सुखारी ॥

रुदन करत देखीं सब नारी । गयउ बिभीषनु मन दुख भारी ॥

बंधु दसा बिलोकि दुख कीन्हा । तब प्रभु अनुजहि आयसु दीन्हा ॥
 लछिमन तेहि बहु बिधि समुझायो । बहुरि बिभीषन प्रभु पहिं आयो ॥
 कृपादृष्टि प्रभु ताहि बिलोका । करहु क्रिया परिहरि सब सोका ॥
 कीन्हि क्रिया प्रभु आयसु मानी । बिधिवत देस काल जियै जानी ॥
 दो०—मंदोदरी आदि सब देइ तिलांजलि ताहि ।

भवन गई रघुपति गुन गन बरनत मन माहि ॥ १०५ ॥
 आइ बिभीषन पुनि सिरु नायो । कृपासिंधु तब अनुज बोलायो ॥
 तुम्ह कपीस अंगद नल नीला । जामवंत मारुति नयसीला ॥
 सब मिलि जाहु बिभीषन साथ । सारेहु तिलक कहेउ रघुनाथा ॥
 पिता बचन मैं नगर न आवउँ । आपु सरिस कपि अनुज पठावउँ ॥
 तुरत चले कपि सुनि प्रभु बचना । कीन्ही जाइ तिलक की रचना ॥
 सादर सिंहासन बैठारी । तिलक सारि अस्तुति अनुसारी ॥
 जोरि पानि सबहीं सिर नाए । सहित बिभीषन प्रभु पहिं आए ॥
 तब रघुबीर बोलि कपि लीन्हे । कहि प्रिय बचन सुखी सब कीन्हे ॥
 छं०—किए सुखी कहि बानी सुधा सम बल तुम्हारे रिपु हयो ।

पायो बिभीषन राज तिहुं पुर जसु तुम्हारे नित नयो ॥
 मोहि सहित सुभ कीरति तुम्हारी परम प्रीति जो गाइहैं ।
 संसार सिंधु अपार पार प्रयास बिनु नर पाइहैं ॥
 दो०—प्रभु के बचन श्रवन सुनि नहिं अघाहिं कपि पुंज ।

बार बार सिर नावहिं गहहिं सकल पद कंज ॥ १०६ ॥

पुनि प्रभु बोलि लियउ हनुमाना । लंका जाहु कहेउ भगवाना ।
समाचार जानकिहि सुनावहु । तासु कुसल लै तुम्ह चलि आवहु ॥
तब हनुमंत नगर पहुँ आए । सुनि निसिचरी निसाचर धाए ॥
बहु प्रकार तिन्ह पूजा कीन्ही । जनकसुता देखाइ पुनि दीन्ही ।
दूरिहि ते प्रनाम कपि कीन्हा । रघुपति दूत जानकी चीन्हा ॥
कहहु तात प्रभु कृपानिकेता । कुसल अनुज कपि सेन समेता ॥
सब बिधि कुसल कोसलाधोसा । मातु समर जीत्यो दससीसा ॥
अबिचल राजु बिभीषन पायो । सुनि कपि बचन हरष उर छायो ॥

छं०— अति हरष मन तन पुलक लोचन सजल कह पुनि पुनि रमा ।
का देउँ तोहि त्रैलोक पहुँ कपि किमपि नहि बानी समा ॥
सुनु मातु मैं पायो अखिल जग राजु आजु न संसय ।
रन जीति रिपुदल बंधु जुत पम्यापि राममनामयं ॥

दो०— सुनु सुत सद्गुन सकल तव हृदयँ बसहुँ हनुमंत ।

सानुकूल कोसलपति रहहुँ समेत अनंत ॥ १०७ ॥
अब सोइ जतन करहु तुम्ह ताता । देखौं नयन स्याम मृदु गाता ॥
तब हनुमान राम पहिं जाई जनकसुता कै कुसल सुनाई ॥
सुनि संदेसु भानुकुलभूषन । बोलि लिए जुबराज बिभीषन ॥
मारुतसुत के संग सिधावहु । सादर जनकसुतहि लै आवहु ॥
तुरतहिं सकल गए जहाँ सीता । सेवहिं सब निसिचरीं बिनीता ॥
बेगि बिभीषन तिन्हहि सिखायो तिन्ह बहु बिधि मज्जन करवायो ॥

बहु प्रकार भूषन पहिराए । सिबिका रुचिर साजि पुनि ल्याए ॥
 ता पर हरषि चढ़ी बैदेही । सुमिरि राम सुखधाम सनेही ॥
 बेतपानि रच्छक चहु पासा । चले सकल मन परम हुलासा ॥
 देखन भालु कीस सब आए । रच्छक कोपि निवारन धाए ॥
 कह रघुबीर कहा मम मानहु । सीतहि सखा पयादेँ आनहु ॥
 देखहुँ कपि जननी की नाई । बिहसि कहा रघुनाथ गोसाईँ ॥
 सुनि प्रभु बचन भालु कपि हरषे । नभ ते सुरन्ह सुमन बहु बरषे ॥
 सीता प्रथम अनल महुँ राखी । प्रगट कीन्हि चह अंतर साखी ॥
 दो०—तेहि कारन करुनानिधि कहे कछुक दुर्बाद ।

सुनत जातुधानीं सब लागीं करै बिषाद ॥ १०८ ॥
 प्रभु के बचन सीस धरि सीता । बोली मन क्रम बचन पुनीता ॥
 लछिमन होहु धरम के नेगी । पावक प्रगट करहु तुम्ह बेगी ॥
 सुनि लछिमन सीता कै बानी । बिरह बिबेक धरम निति सानी ॥
 लोचन सजल जोरि कर दोऊ । प्रभु सन कछु कहि सकत न ओऊ ॥
 देखि राम रुख लछिमन धाए । पावक प्रगटि काठ बहु लाए ॥
 पावक प्रबल देखि बैदेही । हृदयँ हरष नहिं भय कछु तेही ॥
 जाँ मन बच क्रम मम उर माहीं । तजि रघुबीर आन गति नाहीं ॥
 तौ कृसानु सब कै गति जाना । मो कहूँ होउ श्रीखंड समाना ॥
 छं०—श्रीखंड सप्त पावक प्रबेस कियो सुमिरि प्रभु मैथिली ।

जय कोसलेस महेस बंदित चरन रति अति निर्मली ॥

प्रतिबिम्ब अरु लौकिक कलक प्रचंड पावक महुँ जरे ।
 प्रभु चरित काहुँ न लखे नभ सुर सिद्ध मुनि देखहिं खरे ॥
 धरि रूप पावक पानि गहि श्री सत्य श्रुति जग बिदित जो ।
 जिमि छैरसागर इंदिरा रामहि समर्पि आनि सो ॥
 सो राम बाम बिभाग राजति रुचिर अति सोभा भली ।
 नव नील नीरज निकट मानहुँ कनक पंकज की कली ॥

दो०— बरषहिं सुमन हरषि सुर बाजहिं गगन निसान ।

गावहिं किंनर सुरबधू नाचहिं चढ़ी बिमान ॥ १०९ (क) ॥

जनकसुता समेत प्रभु सोभा अमित अपार ।

देखि भालु कपि हरषे जय रघुपति सुख सार ॥ १०९ (ख) ॥

तब रघुपति अनुसासन पाई । मातलि चलेउ चरन सिरु नाई ॥
 आए देव सदा स्वारथी । बचन कहहिं जनु परमारथी ॥
 दीन बंधु दयाल रघुराया । देव कीन्हि देवन्ह पर दाया ॥
 बिस्व द्रोह रत यह खल कामी । निज अब गयउ कुमारगामी ॥
 तुम्ह समरूप ब्रह्म अबिनासी । सदा एकरस सहज उदासी ॥
 अकल अगुन अज अनघ अनामय । अजित अमोघसक्ति करुनामय ॥
 मीन कमठ सूकर नरहरी । बामन परसुराम बपु धरी ॥
 जब जब नाथ सुरन्ह दुखु पायो । नाना तनु धरि तुम्हई नसायो ॥
 यह खल मलिन सदा सुरद्रोही । काम लोभ मद रत अति कोही ॥
 अधम सिरोमनि तब पद पावा । यह हमरें मन बिसमय आवा ॥

हम देवता परम अधिकारी । स्वारथ रत प्रभु भगति बिसारी ॥
 भव प्रबाहँ संतत हम परे । अब प्रभु पाहि सरन अनुसरे ॥
 दो०—करि विनती सुर सिद्ध सब रहे जहँ तहँ कर जोरि ।

अति सप्रेम तन पुलकि बिधि अस्तुति करत बहोरि ॥ ११० ॥

छं०—जय राम सदा सुखधाम हे । रघुनायक सायक चाप धरे ॥
 भव बारन दारन सिंह प्रभो । गुन सागर नागर नाथ बिभो ॥
 तन काम अनेक अनूप छबी । गुन गावत सिद्ध मुनींद्र कबी ॥
 जसु पावन रावन नाग महा । खगनाथ जथा करि कोप गहा ॥
 जन रंजन भंजन सौक भयं । गतक्रोध सदा प्रभु बोधमयं ॥
 अवतार उदार अपार गुनं । महि भार बिभंजन ग्यानधनं ॥
 अज व्यापकमेकवनादि सदा । करुनाकर राम नमामि मुदा ॥
 रघुबंस बिभूषन दूषन हा । कृत भूप बिभीषन दीन रहा ॥
 गुन ग्याननिधान अमान अजं । नित राम नमामि बिभुं बिरजं ॥
 भुजदंड प्रचंड प्रताप बलं । खल बंद निकंद महा कुसलं ॥
 बिनु कारन दीन दयाल हितं । छवि धाम नमामि रमा सहितं ॥
 भव तारन कारन काज परं । मन संभव दारुन दोष हरं ॥
 सर चाप मनोहर त्रोन धरं । जलजारुन लोचन भूपवरं ॥
 सुख मंदिर सुंदर श्रीरमनं । मद मार मुधा ममता समनं ॥
 अनवद्य अखंड न गोचर गो । सबरूप सदा सब होइ न गो ॥
 इति बेद बर्दति न दंतकथा । रवि आतप भिन्नमभिन्न जथा ॥

कृतकृत्य बिभो सब बानर ए । निरखंति तवानन सादर ए ॥
 धिय जीवन देव सरीर हरे । तव भक्ति बिना भव भूलि परे ॥
 अब दीनदयाल दया करिऐ । मति मोरि बिभेदकरी हरिऐ ॥
 जेहि ते बिपरीत क्रिया करिऐ । दुख सो सुख मानि सुखी चरिऐ ॥
 खल खंडन मंडन गम्य छमा । पद पंकज सेवित संभु उमा ॥
 नृप नायक दे बरदानमिदं । चरनांबुज प्रेमु सदा सुभदं ॥

दो०—बिनय कीन्हि चतुरानन प्रेम पुलक अति गात ।

सोभासिंधु बिलोकत लोचन नहीं अघात ॥ १११ ॥
 तेहि अवसर दसरथ तहँ आए । तनय बिलोकि नयन जल छाए ॥
 अनुज सहित प्रभु बंदन कीन्हा । आसिरबाद पिताँ तब दीन्हा ॥
 तात सकल तव पुन्य प्रभाऊ । जीत्योँ अजय निसाचर राऊ ॥
 सुनि सुत बचन प्रीति अति बाढी । नयन सलिल रोमावलि ठाढी ॥
 रघुपति प्रथम प्रेम अनुमाना । चितइ पितहि दीन्हेउ दृढ़ ग्याना ॥
 ताते उमा मोच्छ नहिँ पायो । दसरथ भेद भगति मन लायो ॥
 सगुनोपासक मोच्छ न लेहोँ । तिन्ह कहँ राम भगति निज देहोँ ॥
 बार बार करि प्रभुहि प्रनामा । दसरथ हरषि गए सुरधामा ॥

दो०—अनुज जानकी सहित प्रभु कुसल कोसलाधीस ।

सोभा देखि हरषि मन अस्तुति कर सुर ईस ॥ ११२ ॥

छं०—जय राम सोभा धाम । दायक प्रनत विश्राम ॥

धृत त्रोन बर सर चाप । भुजदंड प्रबल प्रताप ॥

जय दूषनारि खरारि । मर्दन निसाचर धारि ॥
 यह दुष्ट मारेउ नाथ । भए देव सकल सनाथ ॥
 जय हरन धरनी भार । महिमा उदार अपार ॥
 जय रावनारि कृपाल । किए जातुधान बिहाल ॥
 लंकेस अति बल गर्ब । किए बस्य सुर गंधर्ब ॥
 मुनि सिद्ध नर खग नाग । हठि पंथ सब के लाग ॥
 परद्रोह रत अति दुष्ट । पायो सो फलु पापिष्ट ॥
 अब सुनहु दीन दयाल । राजीव नयन बिसाल ॥
 मोहि रहा अति अभिमान । नहिं कोउ मोहि समान ॥
 अब देखि प्रभु पद कंज । गत मान प्रद दुख पुंज ॥
 कोउ ब्रह्म निर्गुन ध्याव । अब्यक्त जेहि श्रुति गाव ॥
 मोहि भाव कोसल भूप । श्रीराम सगुन सरूप ॥
 बैदेहि अनुज समेत । मम हृदय करहु निकेत ॥
 मोहि जानिए निज दास । दे भक्ति रमानिवास ॥

छं०— दे भक्ति रमानिवास त्रास हरन सरन सुखदायकं ।
 सुख धाम राम नमामि काम अनेक छबि रघुनायकं ॥
 सुर बृंद रंजन द्वंद भंजन मनुजतनु अनुलितबलं ।
 ब्रह्मादि संकर सेव्य राम नमामि करुना कोमलं ॥

दो०— अब करि कृपा विलोकि मोहि आयसु देहु कृपाल ।
 काह करौं सुनि प्रिय बचन बोले दीनदयाल ॥ ११३ ॥

सुनु सुरपति कपि भालु हमारे । परे भूमि निसिचरन्हि जे मारे ॥
 मम हित लागि तजे इन्ह प्राना । सकल जिआउ सुरेस सुजाना ॥
 सुनु खगेस प्रभु कै यह बानी । अति अगाध जानहिं मुनि ग्यानी ॥
 प्रभु सक त्रिभुअन मारि जिआई । केवल सक्रहि दीन्हि बड़ाई ॥
 सुधा बरषि कपि भालु जिआए । हरषि उठे सब प्रभु पहिं आए ॥
 सुधाबृष्टि भै दुहु दल ऊपर । जिए भालु कपि नहिं रजनीचर ॥
 रामाकार भए तिन्ह के मन । मुक्त भए छूटे भव बंधन ॥
 सुर अंसिक सब कपि अरु रीछा । जिए सकल रघुपति कीं ईछा ॥
 राम सरिस को दीन हितकारी । कीन्हे मुकुत निसाचर झारी ॥
 खल मल धाम काम रत रावन । गति पाई जो मुनिबर पाव न ॥
 दो० — सुमन बरषि सब सुर चले चढ़ि चढ़ि रुचिर बिमान ।

देखि सुअवसर प्रभु पहिं आयउ संभु सुजान ॥ ११४ (क) ॥

परम प्रीति कर जोरि जुग नलिन नयन भरि बारि ।

पुलकित तन गदगद गिराँ बिनय करत त्रिपुरारि ॥ ११४ (ख) ॥

छं० — मामभिरक्षय रघुकुल नायक । धृत बर चाप रुचिर कर सायक ॥

मोह महा घन पटल प्रभंजन । संसय बिपिन अनल सुर रंजन ॥

अगुन सगुन गुन मंदिर सुंदर । भ्रम तम प्रबल प्रताप दिवाकर ॥

काम क्रोध मद गज पंचानन । बसहु निरंतर जन मन कानन ॥

बिषय मनोरथ पुंज कंज बन । प्रबल तुषार उदार पार मन ॥

भव बारिधि पंदर परमं दर । बारय तारय संसृति दुस्तर ॥

स्याम गात राजीव बिलोचन । दीन बंधु प्रनतारति मोचन ॥
 अनुज जानकी सहित निरंतर । बसहु राम नृप मम उर अंतर ॥
 मुनि रंजन महि मंडल मंडन । तुलसिदास प्रभु त्रास बिखंडन ॥

दो०— नाथ जबहिं कोसलपुरीं होइहि तिलक तुम्हार ।

कृपासिंधु मैं आउब देखन चरित उदार ॥ ११५ ॥
 करि बिनती जब संभु सिधाए । तब प्रभु निकट बिभीषनु आए ॥
 नाइ चरन सिरु कह मृदु बानी । बिनय सुनहु प्रभु सारंगपानी ॥
 सकल सदल प्रभु रावन मार्यो । पावन जस त्रिभुवन बिस्तार्यो ॥
 दीन मलीन हीन मति जाती । मो पर कृपा कीन्हि बहु भाँती ॥
 अब जन गृह पुनीत प्रभु कीजे । मज्जनु करिअ समर श्रम छीजे ॥
 देखि कोस मंदिर संपदा । देहु कृपाल कपिन्ह कहूँ मुदा ॥
 सब बिधि नाथ मोहि अपनाइअ । पुनि मोहि सहित अवधपुर जाइअ ॥
 सुनत बचन मृदु दीनदयाला । सजल भए द्वौ नयन बिसाला ॥

दो०— तोर कोस गृह मोर सब सत्य बचन सुनु भात ।

भरत दसा सुमिरत मोहि निमिष कल्प सम जात ॥ ११६ (क) ॥
 तापस बेध गात कृस जपत निरंतर मोहि ।
 देखीं बेगि सो जतनु करु सखा निहोरउँ तोहि ॥ ११६ (ख) ॥
 बीतैं अवधि जाउँ जाँ जितत न पावउँ बीर ।
 सुमिरत अनुज प्रीति प्रभु पुनि पुनि पुलक सरीर ॥ ११६ (ग) ॥
 करेहु कल्प भरि राजु तुम्ह मोहि सुमिरेहु मन माहि ।
 पुनि मम धाम पाइहहु जहाँ संत सब जाहि ॥ ११६ (घ) ॥

सुनत बिभीषन बचन राम के । हरषि गहे पद कृपाधाम के ॥
 बानर भालु सकल हरषाने । गहि प्रभु पद गुन बिमल बखाने ॥
 बहुरि बिभीषन भवन सिधायो । मनि गन बसन बिमान भरायो ॥
 लै पुष्पक प्रभु आगे राखा । हँस करि कृपासिंधु तब भाषा ॥
 चढ़ि बिमान सुनु सखा बिभीषन गगन जाइ बरषहु पट भूषन ॥
 नभ पर जाइ बिभीषन तबही । बरषि दिए मनि अंबर सबही ॥
 जोड़ जोड़ मन भावइ सोइ लेहीं मनि मुख मेलि डारि कपि देहीं ॥
 हँसे रामु श्री अनुज समेता परम कौतुकी कृपा निकेता ॥
 दो०— मुनि जेहि ध्यान न पावहिं नेति नेति कह बेद ।

कृपासिंधु सोइ कपिन्ह सन करत अनेक बिनोद ॥ ११७ (क) ॥

उभा जोग जप दान तप नाना मख ब्रत नेम ।

राम कृपा नहिं करहिं तसि जसि निष्केवल प्रेम ॥ ११७ (ख) ॥

भालु कपिन्ह पट भूषन पाए । पहिरि पहिरि रघुपति पहिं आए ॥
 नाना जिनस देखि सब कीसा । पुनि पुनि हँसत कोसलाधोसा ॥
 चितइ सबन्हि पर कीन्ही दाया । बोले मृदुल बचन रघुराया ॥
 तुम्हरे बल मैं रावनु मार्यो । तिलक बिभीषन कहँ पुनि सार्यो ॥
 निज निज गृह अब तुम्ह सब जाहू सुमिरेहु मोहि डरपहु बनि काहू ॥
 सुनत बचन प्रेमाकुल बानर । जोरि पानि बोले सब सादर ॥
 प्रभु जोड़ कहहु तुम्हहि सब सोहा । हमरें होत बचन सुनि मोहा ।

दीन जानि कपि किए सनाथा । तुम्ह त्रैलोक ईस रघुनाथा ॥
 सुनि प्रभु बचन लाज हम मरहों । मसक कहूँ खगपति हित करहीं ॥
 देखि राम रुख बानर रोछा । प्रेम मगन नहिं गृह कै ईछा ॥
 दो०— प्रभु प्रेरित कपि भालु सब राम रूप उर राखि ।

हरष विषाद सहित चले बिनय बिबिध बिधि भाषि ॥ ११८ (क) ॥

कपिपति नील रीछपति अंगद नल हनुमान ।

सहित बिभीषन अपर जे जूथष कपि बलवान ॥ ११८ (ख) ॥

कहि न सकहिं कछु प्रेम बस भरि भरि लोचन बारि ।

सन्मुख चितवहिं राम तन नयन निमेष निवारि ॥ ११८ (ग) ॥

अतिसय प्रीति देखि रघुराई । लीन्हे सकल बिमान चढ़ाई ॥
 मन महुँ बिप्र चरन सिरु नायो । उत्तर दिसिहि बिमान चलायो ॥
 चलत बिमान कोलाहल होई । जय रघुबीर कहइ सबु कोई ॥
 सिंहासन अति उच्च मनोहर । श्री समेत प्रभु बैठे ता पर ॥
 राजत रामु सहित भामिनी । मेरु संग जनु घन दामिनी ॥
 रुचिर बिमानु चलेउ अति आतुर । कीन्ही सुमन बृष्टि हरषे सुर ॥
 परम सुखद चलि त्रिविध बयारी । सागर सर सरि निर्मल बारी ॥
 सगुन होहिं सुंदर चहुँ पासा । मन प्रसन्न निर्मल नभ आसा ॥
 कह रघुबीर देखु रन सीता । लछिमान इहाँ हत्यो इंद्रजीता ॥
 हनुमान अंगद के मारे । रन महि धरे निसाचर भारे ॥

कुंभकरन रावन द्वौ भाई । इहाँ हते सुर मुनि दुखदाई ॥

दो०— इहाँ सेतु बाँध्यों अरु थापेउँ मिव सुख धाम ।

सीता सहित कृपानिधि संभुहि कीन्ह प्रनाम ॥ ११९ (क) ॥

जहाँ जहाँ कृपासिन्धु बन कीन्ह वास बिश्राम ।

सकल देखाए जानकिहि कहे सबन्हि के नाम ॥ ११९ (ख) ॥

तुरत बिमान तहाँ चलि आवा । दंडक बन जहाँ परम सुहावा ॥

कुंभजादि मुनिनायक नाना । गए रामु सब केँ अस्थाना ॥

सकल रिषिन्ह सन पाइ असीसा । चित्रकूट आए जगदीसा ॥

तहाँ करि मुनिन्ह केर संतोषा । चला बिमानु तहाँ ते चोखा ॥

बहुरि राम जानकिहि देखाई । जमुना कलि मल हरनि सुहाई ॥

पुनि देखी सुरसरी पुनीता । राम कहा प्रनाम करु सीता ॥

तीरथपति पुनि देखु प्रयागा । निरखत जन्म कोटि अघ भागा ॥

देखु परम पावनि पुनि बेनी । हरनि सोक हरि लोक निसेनी ॥

पुनि देखु अवधपुरी अति पावनि । त्रिविध ताप भव रोग नसावनि ॥

दो०— सीता सहित अवध कहँ कीन्ह कृपाल प्रनाम ।

सजल नयन तन पुलकित पुनि पुनि हरषित राम ॥ १२० (क) ॥

पुनि प्रभु आइ त्रिवेनी हरषित भग्जनु कीन्ह ।

कपिन्ह सहित विप्रन्ह कहँ दान विविध विधि दीन्ह ॥ १२० (ख) ॥

प्रभु हनुमंतहि कहा बुझाई । धरि बटु रूप अवधपुर जाई ॥

भरतहि कुसल हमारि सुनाएहु । समाचार लै तुम्ह चलि आएहु ॥
 तुरत पवनसुत गवनत भयऊ । तब प्रभु भरद्वाज पहिं गयऊ ॥
 नाना बिधि मुनि पूजा कीन्ही । अस्तुति करि पुनि आसिष दीन्ही ॥
 मुनि पद बंदि जुगल कर जोरी । चढ़ि बिमान प्रभु चले बहोरी ॥
 इहाँ निषाद सुना प्रभु आए । नाव नाव कहँ लोग बोलाए ॥
 सुरसरि नाधि जान तब आयो । उतरेउ तट प्रभु आयसु पायो ॥
 तब सीताँ पूजी सुरसरी । बहु प्रकार पुनि चरनन्हि परी ॥
 दीन्हि असीस हरषि मन गंगा । सुंदरि तब अहिवात अभंगा ॥
 सुनत गुहा धायउ प्रेमाकुल । आयउ निकट परम सुख संकुल ॥
 प्रभुहि सहित बिलोकि बैदेही । परेउ अवनि तन सुधि नहिं तेही ॥
 प्रीति परम बिलोकि रघुराई । हरषि उठाइ लियो उर लाई ॥

छं०—लियो हृदयँ लाइ कृपा निधान सुजान रायँ रमापती ।

बैठारि परम समीप बूझी कुसल सो कर बीनती ॥
 अब कुसल पद पंकज बिलोकि बिरंचि संकर सेव्य जे ।
 सुख धाम पूरनकाम राम नमामि राम नमामि ते ॥
 सब भाँति अधम निषाद सो हरि भरत ज्यौं उर लाइयो ।
 मतिमंद तुलसीदास सो प्रभु मोह बस बिसराइयो ॥
 यह रावनारि चरित्र पावन राम पद रतिप्रद सदा ।
 कामादिहर बिग्यानकर सुर सिद्ध मुनि गावहिं मुदा ॥

दो० — समर बिजय रघुबीर के चरित जे सुनहिं सुजान ।

बिजय बिबेक बिभूति नित तिन्हहिं देहिं भगवान ॥ १२१ (क) ॥

यह कलिकाल मलायतन मन करि देखु बिचार ।

श्रीरघुनाथ नाम तजि नाहिन आन आधार ॥ १२१ (ख) ॥

मासपारायण, सत्ताईसवाँ विश्राम

इति श्रीमद्रामचरितमानसे सकलकलिकलुषविध्वंसने

षष्ठः सोपानः समाप्तः ।

(लङ्काकाण्ड समाप्त)



प्रभुका ऐश्वर्य



अमित रूप प्रगटे तेहि काला।

जथाजोग मिले सबहि कृपाला॥

॥ श्रीगणेशाय नमः ॥

श्रीजानकीवल्लभो विजयते

श्रीरामचरितमानस

सप्तम सोपान

उत्तरकाण्ड

श्लोक

केकीकण्ठाभनीलं सुरवरविलसद्विप्रपादाब्जचिह्नं
शोभाढ्यं पीतवस्त्रं सरसिजनयनं सर्वदा सुप्रसन्नम् ।
पाणौ नाराचचारुं कपिनिकरयुतं बन्धुना सेव्यमानं
श्रीमीड्यं जानकीशं रघुवरमनिशं पुष्पकारूढरामम् ॥ १ ॥
कोसलेन्द्रपदकञ्जमञ्जुलौ कोमलावजमहेशवन्दितौ ।
जानकीकरसरोजलालितौ चिन्तकस्य मनभृङ्गसङ्गिनौ ॥ २ ॥

कुन्दइन्दुदरगौरसुन्दरं अम्बिकापतिमभीष्टसिद्धिदम् ।

कारुणीककलकञ्जलोचनं नौमि शङ्करमनङ्गमोचनम् ॥ ३ ॥

दो०— रहा एक दिन अवधि कर अति आरत पुर लोग ।
 जहँ तहँ सोचहिं नारि नर कस तन राम बियोग ॥
 सगुन होहिं सुंदर सकल मन प्रसन्न सब केर ।
 प्रभु आगवन जनाव जनु नगर रम्य चहुँ फेर ॥
 कौसल्यादि मातु सब मन अनंद अस होइ ।
 आयउ प्रभु श्री अनुजजुत कहन चहत अब कोइ ॥
 भरत नयन भुज दच्छिन फरकत बारहिं बार ।
 जानि सगुन मन हरष अति लागे करन बिचार ॥
 रहेउ एक दिन अवधि अधारा । समुझत मन दुख भयउ अपारा ॥
 कारन कवन नाथ नहिं आयउ । जानि कुटिल किधौ मोहि बिसरायउ ॥
 अहह धन्य लछिमन बड़भागी । राम पदारविंदु अनुरागी ॥
 कपटी कुटिल मोहि प्रभु चीन्हा । ताते नाथ संग नहिं लीन्हा ॥
 जाँ करनी समुझै प्रभु मोरी । नहिं निस्तार कलष सत कोरी ॥
 जन अवगुन प्रभु मान न काऊ । दोन बंधु अति मृदुल सुभाऊ ॥
 मोरे जियँ भरोस दृढ़ सोई । मिलिहहिं राम सगुन सुभ होई ।
 बीतें अवधि रहहिं जाँ प्राना । अधम कवन जग मोहि समाना ॥
 दो०— राम बिरह सागर महँ भरत मगन मन होत ।

बिप्र रूप धरि पवनसुत आइ गयउ जनु पोत ॥ १ (क) ॥

बैठे देखि कुसासन जटा मुकुट कस गात ।

राम राम रघुपति जपत स्ववत नयन जलजात ॥ १ (ख) ॥

देखत हनुमान अति हरषेउ । पुलक गात लोचन जल बरषेउ ॥
मन महँ बहुत भाँति सुख मानी । बोलेउ श्रवन मुधा सम बानी ॥
जासु बिरहँ सोचहु दिन राती । रटहु निरंतर गुन गन पाँती ॥
रघुकुल तिलक सुजन सुखदाता । आयउ कुसल देव मुनि त्राता ॥
रिपु रन जीति सुजस सुर गावत । सीता सहित अनुज प्रभु आवत ।
सुनत बचन बिसरे सब दूखा । तृषावन्त जिमि पाइ पियूषा ॥
को तुम्ह तात कहाँ ते आए । मोहि परम प्रिय बचन सुनाए ॥
मारुत सुत मैं कपि हनुमान । नामु मोर सुनु कृपानिधाना ॥
दीनबंधु रघुपति कर किंकर । सुनत भरत भेंटेउ उठि सादर ॥
मिलत प्रेम नहिं हृदयै समाता । नयन स्ववत जल पुलकित गाता ॥
कपि तव दरस सकल दुख बीते । मिले आजु मोहि राम पिरीते ॥
बार बार बूझी कुसलाता । तो कहँ देउँ काह सुनु भ्राता ॥
एहि संदेस सरिस जग माहीं । करि बिचार देखेउँ कछु नाहीं ॥
नाहिन तात उरिन मैं तोही । अब प्रभु चरित सुनावहु मोही ॥
तब हनुमंत नाइ पद माथा । कहे सकल रघुपति गुन गाथा ॥
कहु कपि कबहुँ कृपाल गोसाई । सुमिरहिं मोहि दास की नाई ॥
छं०—निज दास ज्यो रघुबंसभूषन कबहुँ मम सुमिरन कर्यो ।

सुनि भरत बचन बिनीत अति कपि पुलकि तन चरनहि पर्यो ॥

रघुबीर निज मुख जासु गुन गन कहत अग जग नाथ जो ।

काहे न होइ बिनीत परम पुनीत सदगुन सिधु सो ॥

दो०—राम प्रान प्रिय नाथ तुम्ह सत्य बचन मम तात ।

पुनि पुनि मिलत भरत सुनि हरष न हृदयँ समात ॥ २ (क) ॥

सो०—भरत चरन सिरु नाइ तुरित गयउ कपि राम पहिं ।

कही कुसल सब जाइ हरषि चलेउ प्रभु जान चढ़ि ॥ २ (ख) ॥

हरषि भरत कोसलपुर आए । समाचार सब गुरहि सुनाए ॥

पुनि मंदिर महँ बात जनाई । आवत नगर कुसल रघुराई ॥

सुनत सकल जननीं उठि धाई । कहि प्रभु कुसल भरत समुझाई ॥

समाचार पुरबासिन्ह पाए । नर अरु नारि हरषि सब धाए ॥

दधि दुर्बा रोचन फल फूला । नव तुलसी दल मंगल मूला ॥

भरि भरि हेम थार भामिनी । गावत चलि सिधुरगामिनी ॥

जे जैसेहिं तैसेहिं उठि धावहिं । बाल बृद्ध कहँ संग न लावहिं ॥

एक एकन्ह कहँ बूझहिं भाई । तुम्ह देखे दयाल रघुराई ॥

अवधपुरी प्रभु आवत जानी । भई सकल सोभा कै खानी ॥

बहइ सुहावन त्रिविध समीरा । भइ सरजू अति निर्मल नीरा ॥

दो०—हरषित गुर परिजन अनुज भूसुर बृंद समेत ।

चले भरत मन प्रेम अति सन्मुख कृपानिकेत ॥ ३ (क) ॥

बहुतक चढ़ीं अटारिन्ह निरखहिं गगन बिमान ।

देखि मधुर सुर हरषित करहिं सुमंगल गान ॥ ३ (ख) ॥

राका ससि रघुपति पुर सिंधु देखि हरषान ।

बह्यो कोलाहल करत जनु नारि तरंग समान ॥ ३ (ग) ॥

इहाँ भानुकुल कमल दिवाकर । कपिन्ह देखावत नगर मनोहर ॥

सुनु कपीस अंगद लंकेसा । पावन पुरी रुचिर यह देसा ॥

जद्यपि सब बैकुंठ बखाना । बेद पुरान बिदित जगु जाना ॥

अवधपुरी सम प्रिय नहिं सोऊ । यह प्रसंग जानइ कोउ कोऊ ॥

जन्मभूमि मम पुरी सुहावनि । उत्तर दिसि बह सरजू पावनि ॥

जा मज्जन ते बिनहिं प्रयासा । मम समीप नर पावहिं बासा ॥

अति प्रिय मोहि इहाँ के बासी । मम धामदा पुरी सुख रासी ॥

हरषे सब कपि सुनि प्रभु बानी । धन्य अवध जो राम बखानी ॥

दो०— आवत देखि लोग सब कृपासिंधु भगवान ।

नगर निकट प्रभु प्रेरैउ उतरेउ भूमि बिमान ॥ ४ (क) ॥

उतरि कहेउ प्रभु पुष्पकहि तुम्ह कुबेर पहिं जाहु ।

प्रेरित राम चलेउ सो हरषु बिरहु अति ताहु ॥ ४ (ख) ॥

आए भरत संग सब लोगा । कृस तन श्रीरघुबीर ब्रियोगा ॥

बामदेवे बसिष्ट मुनिनायक । देखे प्रभु महि धरि धनु सायक ॥

धाइ धरे गुर चरन सरोरुह । अनुज सहित अति पुलक तनोरुह ॥

भेंटि कुसल बूझी मुनिराया । हमरें कुसल तुम्हारिहिं दाया ॥

सकल द्विजन्ह मिलि नायठ माथा । धर्म धुरंधर रघुकुलनाथा ॥

गहे भरत पुनि प्रभु पद पंकज । नम्रत जिन्हहिं सुर मुनि संकर अज ॥

परे भूमि नहिं उठत उठाए । बर करि कृपासिंधु उर लाए ॥
स्यामल गात रोम भए ठाढ़े । नव राजीव नयन जल बाढ़े ॥

छं०— राजीव लोचन स्रवत जल तन ललित पुलकावलि बनी ।
अति प्रेम हृदय लगाइ अनुजहि मिले प्रभु त्रिभुवन धनी ॥
प्रभु मिलत अनुजहि सोह मो पहिं जाति नहिं उपमा कही ।
जनु प्रेम अरु सिंगार तनु धरि मिले बर सुषमा लही ॥
बूझत कृपानिधि कुसल भरतहि बचन बेगि न आवई ।
सुनु सिवा सो सुख बचन मन ते भिन्न जान जो पावई ॥
अब कुसल कौसलनाथ आरत जानि जन दरसन दियो ।
बूझत बिरह बारीस कृपानिधान मोहि कर गहि लियो ॥

दो०— पुनि प्रभु हरषि सत्रुहन भेंटे हृदय लगाइ ।

लछिमन भरत मिले तब परम प्रेम दोउ भाइ ॥५॥
भरतानुज लछिमन पुनि भेंटे । दुसह बिरह संभव दुख मेटे ॥
सीता चरन भरत सिरु नावा । अनुज समेत परम सुख पावा ॥
प्रभु बिलोकि हरषे पुरबासी । जनित बियोग बिपति सब नासी ॥
प्रेमातुर सब लोग निहारी । कौतुक कीन्ह कृपाल खरारी ॥
अमित रूप प्रगटे तेहि काला । जथा जोग मिले सबहि कृपाला ॥
कृपादृष्टि रघुबीर बिलोकी । किए सकल नर नारि बिसोकी ।
छन महिं सर्बहि मिले भगवाना । उभा मरम यह काहुँ न जाना ॥
एहि बिधि सबहि सुखी करि रामा । आगे चले सील गुन धामा ॥

कौसल्यादि मातु सब धाई । निरखि बच्छ जनु धेनु लवाई ॥

छं०—जनु धेनु बालक बच्छ तजि गृहँ चरन बन परबस गई ।

दिन अंत पुर रुख स्वयत थन हुंकार करि धावत भई ॥

अति प्रेम प्रभु सब मातु भेटों बचन मुदु बहुबिधि कहे ।

गड़ बिषम बिपति बियोगभव तिन्ह हरष सुख अगनित लहे ॥

दो०—भेटेउ तनय सुमित्राँ राम चरन रति जानि ।

रामहि मिलत कैकई हृदयँ बहुत सकुचानि ॥ ६ (क) ॥

लछिमन सब मातन्ह मिलि हरषे आसिष पाइ ।

कैकई कहँ पुनि पुनि मिले मन कर छोभु न जाइ ॥ ६ (ख) ॥

सासुन्ह सबनि मिली बैदेही । चरनन्ह लागि हरषु अति तेही ॥

देहिं असीस बूझि कृसलाता । होइ अचल तुम्हार अहिवाता ॥

सब रघुपति मुख कमल बिलोकहिं । मंगल जानि नयन जल रोकहिं ॥

कनक थार आरती उतारहिं । बार बार प्रभु गात निहारहिं ॥

नाना भाँति निछावरि करहीं । परमानंद हरष उर भरहीं ॥

कौसल्या पुनि पुनि रघुबीरहि । चितवति कृपासिंधु रनधीरहि ॥

हृदयँ बिचारति बारहिं बारा । कवन भाँति लंकापति मारा ॥

अति सुकुमार जुगल मेरे बारे । निसिचर सुभट महाबल भारे ॥

दो०—लछिमन अरु सीता सहित प्रभुहि बिलोकति मातु ।

परमानंद मगन मन पुनि पुनि पुलकित गातु ॥ ७ ॥

लंकापति कपीस नल नीला । जामवंत अंगद सुभसीला ॥

हनुमदादि सब बानर बीरा । धरे मनोहर मनुज सरीरा ॥
 भरत सनेह सील ब्रत नेमा । सादर सब बरनहिं अति प्रेमा ॥
 देखि नगरवासिन्ह कै रीती । सकल सराहहिं प्रभु पद प्रीती ॥
 पुनि रघुपति सब सखा बोलाए । मुनि पद लागहु सकल सिखाए ॥
 गुर बसिष्ट कुलपूज्य हमारे । इन्ह की कृपाँ दनुज रन मारे ॥
 ए सब सखा सुनहु मुनि भेरे । भए समर सागर कहँ बेरे ॥
 मम हित लागि जन्म इन्ह हारे । भरतहु ते मोहि अधिक पिआरे ॥
 सुनि प्रभु बचन मगन सब भए । निमिष निमिष उपजत सुख नए ॥
 दो० - कौसल्या के चरनहि पुनि तिन्ह नाथउ माथ ।

आसिष दीन्हे हरषि तुम्ह प्रिय मम जिमि रघुनाथ ॥ ८ (क) ॥

सुमन बृष्टि नभ संकुल भवन चले सुखकंद ।

चढ़ी अटारिन्ह देखहिं नगर नारि नर बृंद ॥ ८ (ख) ॥

कंचन कलस बिचित्र सँवारे । सबहिं धरे सजि निज निज द्वारे ॥
 बंदनवार पताका केतू । सबन्हि बनाए मंगल हेतू ॥
 बीथीं सकल सुगंध सिचाई । गजमनि रचि बहु चौक पुराई ॥
 नाना भाँति सुमंगल साजे । हरषि नगर निसान बहु बाजे ॥
 जहँ तहँ नारि निछावरि करहीं । देहिं असीस हरष उर भरहीं ॥
 कंचन थार आरती नाना । जुबतीं सजें करहिं सुभ गाना ॥
 करहिं आरती आरतिहर के । रघुकुल कमल बिपिन दिनकर के ॥
 पुर सोभा संपति कल्याणा । निगम सेष सारदा बखाना ॥

तेउ यह चरित देखि ठगि रहहीं । उमा तासु गुन नर किमि कहहीं ।

दो०—नारि कुमुदिनीं अवध सर रघुपति बिरह दिनेस ।

अस्त भएँ बिगसत भई निरखि राम राकेस ॥ ९ (क) ॥

होहिं सगुन सुभ बिबिधि विधि बाजहिं गगन निसान ।

पुर नर नारि सनाथ करि भवन चले भगवान ॥ ९ (ख) ॥

प्रभु जानी कैकई लजानी । प्रथम तासु गृह गए भवानी ॥

ताहि प्रबोधि बहुत सुख दीन्हा । पुनि निज भवन गवन हरि कीन्हा ॥

कृपासिंधु जब मंदिर गए । पुर नर नारि सुखी सब भए ॥

गुर बसिष्ट द्विज लिए बुलाई । आजु सुधरी सुदिन समुदाई ॥

सब द्विज देहु हरषि अनुसासन । रामचंद्र बैठहिं सिंघासन ॥

मुनि बसिष्ट के बचन सुहाए । सुनत सकल बिप्रन्ह अति भाए ॥

कहहिं बचन मृदु बिप्र अनेका । जग अभिराम राम अभिषेका ॥

अब मुनिबर बिलंब नहिं कीजै । महाराज कहैं तिलक करीजै ॥

दो०—तब मुनि कहेउ सुमंत्र सन सुनत चलेउ हरषाड़ ।

रथ अनेक बहु बाजि गज तुस्त सँवारे जाइ ॥ १० (क) ॥

जहैं तहैं धावन पठइ पुनि मंगल द्रव्य मगाइ ।

हरष समेत बसिष्ट पद पुनि सिरु नायउ आइ ॥ १० (ख) ॥

नवाह्नपारायण, आठवाँ विश्राम

अवधपुरी अति रुचिर बनाई । देवन्ह सुमन बृष्टि झरि लाई ॥

राम कहा सेवकन्ह बुलाई । प्रथम सखन्ह अन्हवावहु जाई ॥
 सुनत बचन जहँ तहँ जन धाए । सुग्रीवादि तुरत अन्हवाए ॥
 पुनि करुनानिधि भरतु हँकारे । निज कर राम जटा निरुआरे ॥
 अन्हवाए प्रभु तीनिउ भाई । भगत बछल कृपाल रघुराई ॥
 भरत भाग्य प्रभु कोमलताई । सेष कोटि सत सकहिं न गाई ॥
 पुनि निज जटा राम बिबराए । गुर अनुसासन मागि नहाए ॥
 करि मञ्जन प्रभु भूषन साजे । अंग अनंग देखि सत लाजे ॥
 दो०—सासुन्ह सादर जानकिहि मञ्जन तुरत कराइ ।

दिब्य बसन बर भूषन अँग अँग सजे बनाइ ॥ ११ (क) ॥

राम बाम दिसि सोभति रमा रूप गुन खानि ।

देखि मातु सब हरषीं जन्म सुफल निज जानि ॥ ११ (ख) ॥

सुनु खगेस तेहि अवसर ब्रह्मा सिव मुनि बृंद ।

चढ़ि बिमान आए सब सुर देखन सुखकंद ॥ ११ (ग) ॥

प्रभु बिलोकि मुनि मन अनुराग । तुरत दिब्य सिंघासन माग ॥

रबि सम तेज सो बरनि न जाई । बैठे राम द्विजन्ह सिरु नाई ॥

जनकसुता समेत रघुराई । पेखि प्रहरषे मुनि समुदाई ॥

बेद मंत्र तब द्विजन्ह उचारे । नभ सुर मुनि जय जयति पुकारे ॥

प्रथम तिलक बसिष्ट मुनि कीन्हा । पुनि सब बिप्रन्ह आयसु दीन्हा ॥

सुत बिलोकि हरषीं महतारी । बार बार आरती उतारी ॥

बिग्रह दान बिबिधि बिधि दीन्हे । जाचक सकल अजाचक कीन्हे ॥
सिधासन पर त्रिभुवन साईं देखि सुरन्ह दुंदुभीं बजाईं ॥

छं०— नभ दुंदुभीं बाजहिं बिपुल गंधर्व किंनर गावहीं ।
नाचहिं अपछरा बृंद परमानंद सुर मुनि पावहीं ॥
भरतादि अनुज बिभीषणांगद हनुमदादि समेत ते ।
गहें छत्र चामर ब्यजन धनु असि चर्म सक्ति बिराजते ॥
श्री सहित दिनकर बंस भूषन काम बहु छबि सोहई ।
नव अंबुधर बर गात अंबर पीत सुर मन मोहई ॥
मुकुटांगदादि बिचित्र भूषन अंग अंगान्ह प्रति सजे ।
अंभोज नयन बिसाल उर भुज धन्य नर निरखंति जे ॥

दो०— वह सोभा समाज सुख कहत न बनइ खगेस ।
बरनहिं सारद सेष श्रुति सो रस जान महेस ॥ १२ (क) ॥
भिन्न भिन्न अस्तुति करि गए सुर निज निज धाम ।
बंदी बेष बेद तब आए जहँ श्रीराम ॥ १२ (ख) ॥
प्रभु सर्वग्य कीन्ह अति आदर कृपानिधान ।
लखेउ न काहूँ मरम कछु लगे करन गुन गान ॥ १२ (ग) ॥

छं०— जय सगुन निर्गुन रूप रूप अनूप भूष सिरोमने ।
दसकंधरादि प्रचंड निसिचर प्रबल खल भुजबल हने ॥
अवतार नर संसार भार बिभंजि दारुन दुख दहे ।
जय प्रनतपाल दयाल प्रभु संजुक्त सक्ति नमामहे ॥

तव बिषय माया बस सुरासुर नाग नर अग जग हरे।
 भव पंथ भ्रमत अमित दिवस निसि काल कर्म गुननि भरे॥
 जे नाथ करि करुना बिलोके त्रिविधि दुख ते निबहे।
 भव खेद छेदन दच्छ हम कहूँ रच्छ राम नमामहे॥
 जे ग्यान मान बिमत्त तव भव हरनि भक्ति न आदरी।
 ते पाइ सुर दुर्लभ पदादपि परत हम देखत हरी॥
 बिस्वास करि सब आस परिहरि दास तव जे होइ रहे।
 जपि नाम तव बिनु श्रम तरहिं भव नाथ सो समरामहे॥
 जे चरन सिव अज पूज्य रज सुभ परसि मुनिपतिनी तरी।
 नख निर्गता मुनि बंदिता त्रैलोक पावनि सुरसरी॥
 ध्वज कुलिस अंकुस कंज जुत बन फिरत कंटक किन लहे।
 पद कंज द्वंद मुकुंद राम रमेस नित्य भजामहे॥
 अब्यक्तमूलमनादि तरु त्वच चारि निगमागम भने।
 षट कंध सारखा पंच बीस अनेक पर्न सुमन घने॥
 फल जुगल बिधि कटु मधुर बेल अकेलि जेहि आश्रित रहे।
 पल्लवत फूलत नवल नित संसार बिटप नमामहे॥
 जे ब्रह्म अजमद्वैतमनुभवगम्य मन पर ध्यावहीं।
 ते कहहूँ जानहूँ नाथ हम तव सगुन जस नित गावहीं॥
 करुनायतन प्रभु सदगुनाकर देव यह बर भागहीं।
 मन बचन कर्म बिकार तजि तव चरन हम अनुरागहीं॥

दो०— सब के देखत बेदन्ह बिनती कीन्ह उदार।

अंतर्धान भए पुनि गए ब्रह्म आगार॥ १३ (क)॥

बैनतेय सुनु संभु तब आए जहँ रघुबीर।

बिनय करत गदगद गिरा पूरित पुलक सरीर॥ १३ (ख)॥

छं०— जय राम रमारमनं समनं । भवताप भयाकुल पाहि जनं ॥

अवधेस सुरेस रमेस बिभो । सरनागत मागत पाहि प्रभो ॥

दससीस बिनासन बीस भुजा । कृत दूरि महा महि भूरि रुजा ॥

रजनीचर बंद पतग रहे । सर पावक तेज प्रचंड दहे ॥

महि मंडल मंडन चारुतरं । धृत सायक चाप निधंग बरं ॥

मद मोह महा ममता रजनीं । तम पुंज दिवाकर तेज अनी ॥

मनजात किरात निपात किए । मृग लोग कुभोग सरेन हिए ॥

हति नाथ अनाथनि पाहि हरे । बिषया बन पावैर भूलि परे ॥

बहु रोग बियोगन्हि लोग हए । भवदंघ्रि निरादर के फल ए ॥

भव सिंधु अगाध परे नर ते । पद पंकज प्रेम न जे करते ॥

अति दीन मलीन दुखी नितहीं । जिन्ह के पद पंकज प्रीति नहीं ॥

अवलंब भवंत कथा जिन्ह के । प्रिय संत अनंत सदा तिन्ह के ॥

नहिं राग न लोभ न मान मदा । तिन्ह के सम बैभव वा बिपदा ॥

एहि ते तव सेवक होत मुदा । मुनि त्यागत जोग भरोस सदा ॥

करि प्रेम निरंतर नेम लिएँ । पद पंकज सेवक सुद्ध हिएँ ॥

सम मानि निरादर आदरही । सब संत सुखी बिचरंति मही ॥

मुनि मानस पंकज भृंग भजे । रघुबीर महा रनधीर अजे ॥
 तब नाम जपामि नमामि हरी । भव रोग महागद मान अरी ॥
 गुन सील कृपा परमायतन । प्रनमामि निरंतर श्रीरमन ॥
 रघुनंद निकंदय द्वंद्वघन । महिपाल बिलोकय दीनजन ॥

दो०—आर आर अर मागउँ हरबि देहु श्रीरंग ।

पद सरोज अनपायनी भगति सदा सतसंग ॥ १४ (क) ॥

बरनि उमापति राघ गुन हरबि गए कैलास ।

तब प्रभु कपिन्ह दिवाए सब बिधि सुखप्रद बास ॥ १४ (ख) ॥

सुनु खगपति यह कथा पावनी । त्रिविध ताप भव भय दावनी ॥
 महाराज कर सुभ अभिषेका । सुनत लहहिं नर बिरति बिबेका ॥
 जे सकाम नर सुनहिं जे गावहिं । सुख संपति नाना बिधि पावहिं ॥
 सुर दुर्लभ सुख करि जग माहीं । अंतकाल रघुपति पुर जाहीं ॥
 सुनहिं बिमुक्त बिरत अरु बिषई । लहहिं भगति गति संपति नई ॥
 खगपति राम कथा मैं बरनी । स्वमति बिलास त्रास दुख हरनी ॥
 बिरति बिबेक भगति दृढ़ करनी । मोह नदी कहँ सुंदर तरनी ॥
 नित नव मंगल कौसलपुरी । हरषित रहहिं लोग सब कुरी ॥
 नित नइ प्रीति राम पद पंकज । सब केँ जिन्हहि नमत सिव मुनि अज ॥
 मंगन बहु प्रकार पहिराए । द्विजन्ह दान नाना बिधि पाए ॥
 दो०—ब्रह्मानंद मगन कपि सब केँ प्रभु पद प्रीति ।

जात न जाने दिवस तिन्ह गए भास घट बीति ॥ १५ ॥

बिसरे गृह सपनेहुँ सुधि नहीं । जिमि परद्रोह संत मन माहीं ।
तब रघुपति सब सखा बोलाए । आइ सबन्हि सादर सिरु नाए ।
परम प्रीति समीप बैठारे । भगत सूखद मृदु बचन उचारे ।
तुम्ह अति कीन्हि मोरि सेवकाई मुख पर केहि बिधि करौ बड़ाई ॥
ताते मोहि तुम्ह अति प्रिय लागे । मम हित लागि भवन सुख त्यागे ॥
अनुज राज संपति बैदेही । देह मेह परिवार सनेही ॥
सब मम प्रिय नहिं तुम्हहि समाना मृषा न कहउँ मोर यह बाना ॥
सब के प्रिय सेवक यह नीती । मोरें अधिक दास पर प्रीती ॥
दो० अब गृह जाहु सखा सब भजेहु मोहि दृढ़ नेम ।

सदा सर्वगत सर्वहित जानि करेहु अति प्रेम ॥ १६ ॥
सुनि प्रभु बचन मगन सब भए । को हम कहाँ बिसरि तन गए ॥
एकटक रहे जोरि कर आगे । सकहिं न कछु कहि अति अनुरागे ॥
परम प्रेम तिन्ह कर प्रभु देखा कहा बिबिधि बिधि ग्यान बिसेषा
प्रभु सन्मुख कछु कहन न पारहिं । पुनि पुनि चरन सरोज निहारहिं ॥
तब प्रभु भूषन बसन मगाए । नाना रंग अनूप सुहाए ॥
सुग्रीवहि प्रथमहिं पहिराए । बसन भरत निज हाथ बनाए ॥
प्रभु प्रेरित लछिमन पहिराए । लंकापति रघुपति मन भाए ॥
अंगद बैठ रहा नहिं डोला । प्रीति देखि प्रभु ताहि न बोला ॥
दो०— जाभवन्त नीलादि सब पहिराए रघुनाथ ।

हियँ धरि राम रूप सब चले नाइ पद माथ ॥ १७ (क) ॥

तब अंगद उठि नाइ सिरु सजल नयन कर जोरि ।

अति बिनीत बोलेउ बचन मनहुँ प्रेम रस बोरि ॥ १७ (ख) ॥
 सुनु सर्वग्य कृपा सुख सिंधो । दीन दयाकर आरत बंधो ॥
 मरती बेर नाथ मोहि बाली । गयउ तुम्हारेहि कोंछें घाली ॥
 असरन सरन बिरदु संभारी । मोहि जनि तजहु भगत हितकारी ॥
 मोरें तुम्ह प्रभु गुर पितु माता । जाउँ कहाँ तजि पद जलजाता ॥
 तुम्हहि बिचारि कहहु नरनाहा । प्रभु तजि भवन काज मम काहा ॥
 बालक ग्यान बुद्धि बल हीना । राखहु सरन नाथ जन दीना ॥
 नीचि टहल गृह कै सब करिहउँ । पद पंकज बिलोकि भव तरिहउँ ॥
 अस कहि चरन परेउ प्रभु पाही । अब जनि नाथ कहहु गृह जाही ॥
 दो०— अंगद बचन बिनीत सुनि रघुपति करुना सीव ।

प्रभु उठाइ उर लायउ सजल नयन राजीव ॥ १८ (क) ॥

निज उर माल बसन मनि बालितनय पहिराइ ।

बिदा कीन्हि भगवान तब बहु प्रकार समुझाइ ॥ १८ (ख) ॥
 भरत अनुज सौमित्रि समेता । पठवन चले भगत कृत चेता ॥
 अंगद हृदयँ प्रेम नहिं थोरा । फिरि फिरि चितव राम की ओरा ॥
 बार बार कर दंड प्रनामा । मन अस रहन कहहिं मोहि रामा ॥
 राम बिलोकनि बोलनि चलनी । सुमिरि सुमिरि सोचत हैंस मिलनी ॥
 प्रभु रुख देखि बिनय बहु भाषी । चलेउ हृदयँ पद पंकज राखी ॥
 अति आदर सब कपि पहुँचाए । भाइन्ह सहित भरत पुनि आए ॥

तब सुग्रीव चरन गहि नाना । भाँति बिनय कीन्हे हनुमाना ॥
दिन दस करि रघुपति पद सेवा । पुनि तब चरन देखिहउँ देवा ॥
पुन्य पुंज तुम्ह पवनकुमारा । सेवहु जाइ कृपा आगारा ॥
अस कहि कपि सब चले तुरन्ता । अंगद कहइ सुनहु हनुमन्ता ॥

दो०— कहेहु दंडवत प्रभु सैं तुम्हहि कहउँ कर जोरि ।

बार बार रघुनाथकहि सुरति कराएहु भोरि ॥ १९ (क) ॥

अस कहि चलेउ बालिसुत फिरि आयउ हनुमन्त ।

तासु प्रीति प्रभु सन कही मगन भए भगवंत ॥ १९ (ख) ॥

कुलिसहु चाहि कठोर अति कोमल कुसुमहु चाहि ।

चित्त खगेस राम कर समुझि परइ कहु कहि ॥ १९ (ग) ॥

पुनि कृपाल लियो बोलि निषादा । दीन्हे भूषन बसन प्रसादा ॥

जाहु भवन मम सुमिरन करेहु । मन क्रम बचन धर्म अनुसरेहु ॥

तुम्ह मम सखा भरत सम भ्राता । सदा रहेहु पुर आवत जाता ॥

बचन सुनत उपजा सुख भारी । परेउ चरन भरि लोचन बारी ॥

चरन नलिन उर धरि गृह आवा । प्रभु सुभाउ परिजनन्हि सुनावा ॥

रघुपति चरित देखि पुरबासी । पुनि पुनि कहहिं धन्य सुखरासी ॥

राम राज बैठैं त्रैलोका । हरषित भए गए सब सोका ॥

बयारु न कर काहु सन कोई । राम प्रताप बिषमता खोई ॥

दो०— बरनाश्रम निज निज धरम निरत बेद पथ लोग ।

चलहिं सदा पावहिं सुखहि नहिं भय सोक न रोग ॥ २० ॥

दैहिक दैविक भौतिक तापा । राम राज नहिं काहुहि ब्यापा ॥
 सब नर करहिं परस्पर प्रीती । चलहिं स्वधर्म निरत श्रुति नीती ॥
 चारिउ चरन धर्म जग माहीं । पूरि रहा सपनेहुँ अघ नाहीं ॥
 राम भगति रत नर अरु नारी । सकल परम गति के अधिकारी ॥
 अल्पमृत्यु नहिं कवनिउ पीरा । सब सुंदर सब बिरुज सरीरा ॥
 नहिं दरिद्र कोउ दुखी न दीना । नहिं कोउ अबुध न लच्छन हीना ।
 सब निर्दभ धर्मरत पुनी । नर अरु नारि चतुर सब गुनी ॥
 सब गुनग्य पंडित सब ग्यानी । सब कृतग्य नहिं कपट सयानी ॥
 दो० — राम राज नभगेस सुनु सचराचर जग माहिं ।

काल कर्म सुभाव गुन कृत दुख काहुहि नाहिं ॥ २१ ॥
 भूमि सप्त सागर मेखला । एक भूप रघुपति कोसला ॥
 भुअन अनेक रोम प्रति जासू । यह प्रभुता कछु बहुत न तासू ।
 सो महिमा समुझत प्रभु केरी । यह बरनत हीनता घनेरी ।
 सोउ महिमा खगेस जिन्ह जानी । फिरि एहिं चरित तिन्हहुँ रति मानी ॥
 सोउ जाने कर फल यह लीला । कहहिं महा मुनिबर दमसीला ॥
 राम राज कर सुख संपदा । बरनि न सकइ फनीस सारदा ॥
 सब उदार सब पर उपकारी । बिप्र चरन सेवक नर नारी ॥
 एकनारि ब्रत रत सब झारी । ते मन बच क्रम पति हितकारी ॥
 दो० — दंड जतिन्ह कर भेद जहँ नर्तक नृत्य समाज ।

जीतहु मनहि सुनिअ अस रामचंद्र केँ राज ॥ २२ ॥

फूलहिं फरहिं सदा तरु कानन । रहहिं एक सँग गज पंचानन ॥
 खग मृग सहज बयरु बिसराई । सबन्हि भरस्पर प्रीति बढ़ाई ॥
 कूजहिं खग मृग नाना बृंदा । अभय चरहिं बन करहिं अनंदा ॥
 सीतल सुरभि पवन बह मंदा । गुंजत अलि लै चलि मकरंदा ।
 लता बिटप मार्गे मधु चवहीं । मनभावतो धेनु पय स्ववहीं ।
 ससि संपन्न सदा रह धरनी । त्रेताँ भइ कृतजुग कै करनी ॥
 प्रगटी गिरिन्ह बिबिधि मनि खानी । जगदातमा भूप जग जानी ॥
 सरिता सकल बहहिं बर बारी । सीतल अमल स्वाद सुखकारी ॥
 सागर निज मरजादौ रहहीं । डारहिं रत्न तटन्हि नर लहहीं ॥
 सरसिज संकुल सकल तड़ागा । अति प्रसन्न दस दिसा बिभागा ॥
 दो०— बिधु महि पूर मयूखन्हि रबि तप जेतनेहि काज ।

मार्गे बारिद देहिं जल रामचंद्र के राज ॥ २३ ॥
 कोटिन्ह बाजिमेध प्रभु कीन्हे । दान अनेक द्विजन्ह कहैं दीन्हे ॥
 श्रुति पथ पालक धर्म धुरंधर । गुनातीत अरु भोग पुरंदर ॥
 पति अनुकूल सदा रह सीता । सोभा खानि सुसील बिनीता ॥
 जानति कृपासिंधु प्रभुताई । सेवति चरन कमल मन लाई ॥
 जद्यपि गृहैं सेवक सेवकिनी । बिपुल सदा सेवा बिधि गुनी ॥
 निज कर गृह परिचरजा करई । रामचंद्र आयसु अनुसरई ॥
 जेहि बिधि कृपासिंधु सुख मानइ । सोइ कर श्री सेवा बिधि जानइ ॥
 कौसल्यादि सासु गृह माहीं । सेवइ सबन्हि मान मद नाहीं ॥

उमा रमा ब्रह्मादि बंदिता । जगदंबा संततमनिंदिता ॥

दो०—जासु कृपा कटाच्छु सुर चाहत चितव न सोइ ।

राम पदारबिंद रति करति सुभावहि खोइ ॥ २४ ॥

सेवहिं सानकूल सब भाई । राम चरन रति अति अधिकाई ॥

प्रभु मुख कमल बिलोकत रहहीं । कबहुँ कृपाल हमहि कछु कहहीं ॥

राम करहिं भ्रातन्ह पर प्रीती । नाना भाँति सिखावहिं नीती ॥

हरषित रहहिं नगर के लोगा । करहिं सकल सुर दुर्लभ भोगा ।

अहर्निश बिधिहि मनावत रहहीं । श्रीरघुबीर चरन रति चहहीं ।

दुइ सुत सुंदर सीताँ जाए । लव कुस बेद पुरान्ह गाए ॥

दोउ बिजई बिनई गुन मंदिर । हरि प्रतिबिंब मनहुँ अति सुंदर ॥

दुइ दुइ सुत सब भ्रातन्ह केरे । भए रूप गुन सील घनेरे ॥

दो०—ग्यान गिरा गोतीत अज माया मन गुन पार ।

सोइ सच्चिदानंद घन कर नर चरित उदार ॥ २५ ॥

प्रातकाल सरऊ करि मज्जन । बैठहिं सभाँ संग द्विज सज्जन ॥

बेद पुरान बसिष्ट बखानहिं । सुनहिं राम जद्यपि सब जानहिं ॥

अनुजन्ह संजुत भोजन करहीं । देखि सकल जननीं सुख भरहीं ॥

भरत सत्रुहन दोनउ भाई । सहित पवनसुत उपवन जाई ॥

बूझहिं बैठि राम गुन गाहा । कह हनुमान सुमति अवगाहा ॥

सुनत बिमल गुन अति सुख पावहिं । बहुरि बहुरि करि बिनय कहावहिं ॥

सब केँ गृह गृह होहिं पुराना । रामचरित पावन बिधि नाना ॥

नर अरु नारि राम गुन गानहि । करहिं दिक्स निसि जात न जानहिं
दो०— अवधपुरी बासिन्ह कर सुख संपदा समाज ।

सहस सेष नहिं कहि सकहिं जहँ नृप राम बिराज ॥ २६ ॥
नारदादि सनकादि मुनीसा । दरसन लागि कोसलाधीसा ॥
दिन प्रति सकल अजोध्या आवहिं देखि नगरु बिरागु बिसरावहिं ॥
जातरूप मनि रचित अटारी । नाना रंग रुचिर गच द्वारी ॥
पुर चहुँ पास कोट अति सुंदर । रचे कैंगूरा रंग रंग बर ॥
नव ग्रह निकर अनीक बनाई । जनु घेरी अमरावति आई ॥
महि बहु रंग रचित गच काँचा । जो बिलोकि मुनिबर मन नाचा ॥
धवल धाम ऊपर नभ चुंबत । कलस मनहुँ रबिससि दुति निदत ॥
बहु मनि रचित झरोखा भ्राजहिं । गृह गृह प्रति मनि दीप बिराजहिं ॥
छं०— मनि दीप राजहिं भवन भ्राजहिं देहरीं बिद्रुम रची ।

मनि खंभ भीति बिरंचि बिरची कनक मनि मरकत खची ॥
सुंदर मनोहर मंदिरायत अजिर रुचिर फटिक रचे ।
प्रति द्वार द्वार कपाट पुरट बनाइ बहु बज्रहिं खचे ॥
दो०— चारु चित्रमाला गृह गृह प्रति लिखे बनाइ ।

राम चरित जे निरख मुनि ते मन लेहिं चोराइ ॥ २७ ॥
सुमन बाटिका सबहिं लगाई । बिबिध भाँति करि जतन बनाई ॥
लता ललित बहु जाति सुहाई । फूलहिं सदा बसंत कि नाई ॥
गुंजत मधुकर मुखर मनोहर । मारुत त्रिबिधि सदा बह सुंदर ॥

नाना खग बालकन्ह जिआए । बोलत मधुर उड़ात सुहाए ॥
 मोर हंस सारस पारावत । भवननि पर सोभा अति पावत ॥
 जहाँ तहाँ देखहिं निज परिछाहीं । बहु बिधि कूजहिं नृत्य कराहीं ॥
 सुक सारिका पदावहिं बालक । कहहु राम रघुपति जनपालक ॥
 राज दुआर सकल बिधि चारू । बीथी चौहट रुचिर बजारू ॥
 छं०— बाजार रुचिर न बनइ बरनत वस्तु बिनु गथ पाइए ।

जहाँ भूप रमानिवास तहाँ की संपदा किमि गाइए ॥

बैठे बजाज सराफ बनिक अनेक मनहुँ कुबेर ते ।

सब सुखी सब सच्चरित सुंदर नारि नर सिसु जरठ जे ॥

उत्तर दिसि सरजू बह निर्मल जल गंभीर ।

दूरि बाँधे घाट मनोहर स्वल्प पंक नहीं तीर ॥ २८ ॥

क रुचिर सो घाटा । जहाँ जल पिअहिं बाजि गज ठाटा ॥

पनिघट राम मनोहर नाना । तहाँ न पुरुष करहिं अस्त्राना ॥

राजघाट बिधि सुंदर बर । मज्जहिं तहाँ बरन चारिउ नर ॥

तीर तीर ह के मंदिर । चहुँ दिसि तिन्ह के उपवन सुंदर ॥

कहुँ कहुँ सरि तीर उदासी । बसहिं ग्यान रत मुनि संन्यासी ॥

तीर तीर तुलसी सुहाई । बृंद बृंद बहु मुनिन्ह लगाई ॥

पुर सोभा कछु बरान जाई । बाहेर नगर परम रुचिराई ॥

देखत पुरी अखिल अधभागा । बन उपवन बापिका तड़ागा ॥

छं०— बापीं तड़ाग अनूप कूप मनोहरायत सोहर्हीं ।
 सोपान सुंदर नीर निर्मल देखि सुर मुनि मोहर्हीं ॥
 बहु रंग कंज अनेक खग कूजहिं मधुप गुंजारहीं ।
 आराम रम्य पिकादिं खग रव जनु पथिक हंकारहीं ॥

दो०— रमानाथ जहैं राजा सो पुर बरनि कि जाइ ।

अनिमादिक सुख संपदा रहीं अवध सब छाड़ ॥ २१ ॥
 जहैं तहैं नर रघुपति गुन गावहिं बैठि परसपर इहइ सिखावहिं ॥
 भजहु प्रनत प्रतिपालक रामहि । सोभा सील रूप गुन धामहि ।
 जलज बिलोचन स्यामल गातहि । पलक नयन इव सेवक त्रातहि ।
 धृत सर रुचिर चाप तूनीरहि । संत कंज बन रबि रनधीरहि ॥
 काल कराल ब्याल खगराजहि । नमत राम अकाम ममता जहि ॥
 लोभ मोह मृगजूथ किरातहि । मनसिज करि हरि जन सुखदातहि ॥
 संसय सोक निबिड़ तम भानुहि । दनुज गहन घन दहन कृसानुहि ॥
 जनकसुता समेत रघुबीरहि । कस न भजहु भंजन भव भीरहि ॥
 बहु बासना मसक हिम रासिहि । सदा एकरस अज अबिनासिहि ॥
 मुनि रंजन भंजन महि भारहि । तुलसिदास के प्रभुहि उदारहि ॥
 दो०— एहि बिधि नगर नारि नर करहिं राम गुन गान ।

सानुकूल सब पर रहहिं संतत कृपानिधान ॥ ३० ॥
 जब ते राम प्रताप खगेसा । उदित भयउ अति प्रबल दिनेसा ॥
 पूरि प्रकास रहेउ तिहुँ लोका । बहुतेन्ह सुख बहुतन मन सोका ॥

जिन्हहि सोक ते कहउँ बखानी । प्रथम अबिद्या निसा नसानी ॥
 अघ उलूक जहँ तहाँ लुकाने । काम क्रोध कैरव सकुचाने ॥
 बिबिध कर्म गुन काल सुभाऊ । ए चकोर सुख लहहिं न काऊ ॥
 मत्सर मान मोह मद चोरा । इन्ह कर हुनर न कवनिहुँ ओरा ॥
 धरम तड़ाग ग्यान बिग्याना । ए पंकज बिकसे बिधि नाना ॥
 सुख संतोष बिराग बिबेका । बिगत सोक ए कोक अनेका ॥
 दो०—यह प्रताप रबि जाके उर जब करइ प्रकास ।

पछिले बाढ़हिं प्रथम जे कहे ते पावहिं नास ॥ ३१ ॥
 भ्रातन्ह सहित रामु एक बारा । संग परम प्रिय पवनकुमारा ।
 सुंदर उपबन देखन गए । सब तरु कृसुमित पल्लव नए ॥
 जानि समय सनकादिक आए । तेज पुंज गुन सील सुहाए ॥
 ब्रह्मानंद सदा लयलीना । देखत बालक बहुकालीना ॥
 रूप धरें जनु चारिउ बेदा । समदरसी मुनि बिगत बिभेदा ॥
 आसा बसन ब्यसन यह तिन्हहीं । रघुपति चरित होइ तहँ सुनहीं ॥
 तहाँ रहे सनकादि भवानी । जहँ घटसंभव मुनिबर ग्यानी ॥
 राम कथा मुनिबर बहु बरनी । ग्यान जोनि पावक जिमि अरनी ॥
 दो०—देखि राम मुनि आवत हरषि दंडवत कीन्ह ।

स्वागत पूँछि पीत पट प्रभु बैठन कहँ दीन्ह ॥ ३२ ॥
 कीन्ह दंडवत तीनिउँ भाई । सहित पवनसुत सुख अधिकाई ॥
 मुनि रघुपति छबि अतुल बिलोकी । भए मगन मन सके न रोकी ॥

स्यामल गात सरोरुह लोचन । सुंदरता मंदिर भव मोचन ॥
 एकटक रहे निमेष न लावहिं । प्रभु कर जोरें सीस नवावहिं ॥
 तिन्ह कै दसा देखि रघुबीरा । स्रवत नयन जल पुलक सरीरा ॥
 कर गहि प्रभु मुनिबर बैठारे । परम मनोहर बचन उचारे ॥
 आजु धन्य मैं सुनहु मुनीसा । तुम्हरेँ दरस जाहिं अघ खीसा ॥
 बड़े भाग पाइब सतसंगा । बिनहिं प्रयास होहिं भव भंगा ॥
 दो०— संत संग अपवर्ग कर कामी भव कर पंथ ।

कहहिं संत कबि कोबिद श्रुति पुरान सदग्रंथ ॥ ३३ ॥
 सुनि प्रभु बचन हरषि मुनि चारी । पुलकित तन अस्तुति अनुसारी ॥
 जय भगवंत अनंत अनामय । अनघ अनेक एक करुनामय ॥
 जय निर्गुन जय जय गुन सागर । सुख मंदिर सुंदर अति नागर ॥
 जय इंदिरा रमन जय भूधर । अनुपम अज अनादि सोभाकर ॥
 ग्यान निधान अमान मानप्रद । पावन सुजस पुरान बेद बद ॥
 तग्य कृतग्य अग्यता भंजन । नाम अनेक अनाम निरंजन ॥
 सर्व सर्वगत सर्व उरालय । बससि सदा हम कहूँ परिपालय ॥
 द्वंद बिपति भव फंद बिभंजय । हृदि बसि राम काम मद गंजय ॥
 दो०— परमानंद कृपायतन मन परिपूरन काम ।

प्रेम भगति अनपायनी देहु हमहि श्रीराम ॥ ३४ ॥
 देहु भगति रघुपति अति पावनि । त्रिबिधि ताप भव दाप नसावनि ॥
 प्रनत काम सुरधेनु कलपतरु । होइ प्रसन्न दीजै प्रभु यह बरु ॥

भव बारिधि कुंभज रघुनायक । सेवत सुलभ सकल सुख दायक ॥
 मन संभव दारुन दुख दारय । दीनबंधु समता बिस्तारय ।
 आस त्रास इरिष्यादि निवारक । बिनय बिबेक बिरति बिस्तारक ॥
 भूप मौलि मनि मंडन धरनी । देहि भगति संसृति सरि तरनी ॥
 मुनि मन मानस हंस निरंतर । चरन कमल बंदित अज संकर ॥
 रघुकुल केतु सेतु श्रुति रच्छक । काल करम सुभाउ गुन भच्छक ॥
 तारन तरन हरन सब दूषन । तुलसिदास प्रभु त्रिभुवन भूषन ॥
 दो०— बार बार अस्तुति करि प्रेम सहित सिरु नाइ ।

ब्रह्म भवन सनकादि गे अति अभीष्ट बर पाइ ॥ ३५ ॥
 सनकादिक बिधि लोक सिधाए । भ्रातन्ह राम चरन सिर नाए ॥
 पूछत प्रभुहि सकल सकुचाहीं । चितवहिं सब मारुतसुत पाहीं ।
 सुनी चहहिं प्रभु मुख कै बानी । जो सुनि होइ सकल भ्रम हानी ॥
 अंतरजामी प्रभु सभ जाना । बूझत कहहु काह हनुमाना ॥
 जोरि पानि कह तब हनुमंता । सुनहु दीनदयाल भगवंता ॥
 नाथ भरत कछु पूँछन चहहीं । प्रसन्न करत मन सकुचत अहहीं ॥
 तुम्ह जानहु कपि मोर सुभाऊ । भरतहि मोहि कछु अंतर काऊ ॥
 सुनि प्रभु बचन भरत गहे चरना । सुनहु नाथ प्रनतारति हरना ॥
 दो०— नाथ न मोहि संदेह कछु सपनेहुँ सोक न मोह ।

केवल कृपा तुम्हारिहि कृपानंद संदोह ॥ ३६ ॥
 करउँ कृपानिधि एक ढिठाई । मैं सेवक तुम्ह जन सुखदाई ।

संतन्ह कै महिमा रघुराई बहु बिधि बेद पुरानन्ह गाई ॥
 श्रीमुख तुम्ह पुनि कीन्ह बड़ाई । तिन्ह पर प्रभुहि प्रीति अधिकाई ॥
 सुना चहउँ प्रभु तिन्ह कर लच्छन । कृपासिंधु गुन ग्यान बिचच्छन
 संत असंत भेद बिलगाई । प्रनतपाल मोहि कहहु बुझाई ॥
 संतन्ह के लच्छन सुनु भ्राता । अगनित श्रुति पुरान बिख्याता ॥
 संत असंतन्हि कै असि करनी । जिमि कुठार चंदन आचरनी ॥
 काटइ परसु मलय सुनु भाई । निज गुन देइ सुगंध बसाई ॥
 दो० - ताते सुर सीसन्ह चढ़त जग बल्लभ श्रीखंड ।

अनल दाहि पीटत घनहिं परसु बदन यह दंड ॥ ३७ ॥
 बिषय अलंपट सील गुनाकर । पर दुख दुख सुख सुख देखे पर ॥
 सम अभूतरिपु बिमद बिरागी । लोभामरष हरष भय त्यागी ॥
 कोमलचित दीनन्ह पर दाया । मन बच क्रम मम भगति अमाया
 सबहि मानप्रद आपु अमानी । भरत प्राण सम मम ते प्राणी ॥
 बिगत काम मम नाम परायन । सांति बिरति बिनती मुदितायन ।
 सीतलता सरलता मयत्री । द्विज पद प्रीति धर्म जनयत्री ॥
 ए सब लच्छन बसहिं जासु उर । जानेहु तात संत संतत फुर ॥
 सम दम नियम नीति नहिं डोलहिं । परुष बचन कबहूँ नहिं बोलहिं ॥
 दो० — निंदा अस्तुति उभय सम ममता मम पद कंज ।

ते सज्जन मम प्राणप्रिय गुन मंदिर सुख पुंज ॥ ३८ ॥
 सुनहु असंतन्ह केर सुभाऊ । भूलेहुँ संगति करिअ न काऊ ॥

तिन्ह कर संग सदा दुखदाई । जिमि कपिलहि घालाइ हरहाई ॥
 खलन्ह हृदयँ अति ताप बिसेषी । जरहिं सदा पर संपति देखी ॥
 जहँ कहूँ निंदा सुनहिं पराई । हरषहिं मनहुँ परी निधि पाई ॥
 काम क्रोध मद लोभ परायन । निर्दय कपटी कुटिल मलायन ॥
 बयरु अकारन सब काहू सौं । जो कर हित अनहित ताहू सौं ॥
 झूठइ लेना झूठइ देना । झूठइ भोजन झूठ चबेना ॥
 बोलहिं मधुर बचन जिमि मोरा । खाइ महा अहि हृदय कठोरा ॥
 दो०—पर द्रोही पर दार रत पर धन पर अपबाद ।

ते नर पाँवर पापमय देह धरें मनुजाद ॥ ३९ ॥
 लोभइ ओढ़न लोभइ डासन । सिस्त्रोदर पर जमपुर त्रास न ॥
 काहू की जौं सुनहिं बड़ाई । स्वास लेहिं जनु जूझी आई ॥
 जब काहू कै देखहिं बिपती । सुखी भए मानहुँ जग नृपती ॥
 स्वारथ रत परिवार बिरोधी । लंपट काम लोभ अति क्रोधी ॥
 मातु पिता गुर बिप्र न मानहिं । आपु गए अरु घालहिं आनहिं ॥
 करहिं मोह बस द्रोह परावा । संत संग हरि कथा न भावा ॥
 अवगुन सिंधु मंदमति कामी । बेद बिदूषक परधन स्वामी ॥
 बिप्र द्रोह पर द्रोह बिसेषा । दंभ कपट जियँ धरें सुबेषा ॥
 दो०—ऐसे अधम मनुज खल कृतजुग त्रेताँ नाहिं ।

द्वापर कछुक बृंद बहु होइहहिं कलिजुग माहिं ॥ ४० ॥
 पर हित सरिस धर्म नहिं भाई । पर पीड़ा सम नहिं अधमाई ॥

निर्नय सकल पुरान बेद कर । कहेउँ तात जानहिं कोबिद नर ॥
 नर सरीर धरि जे पर पीरा । करहिं ते सहहिं महा भव भीरा ॥
 करहिं मोह बस नर अघ नाना । स्वारथ रत परलोक नसाना ।
 कालरूप तिन्ह कहँ मैं भ्राता । सुभ अरु असुभ कर्म फल दाता ॥
 अस बिचारि जे परम सयाने । भजहिं मोहि संसृत दुख जाने ॥
 त्यागहिं कर्म सुभासुभ दायक । भजहिं मोहि सुर नर मुनि नायक ॥
 संत असंतन्ह के गुन भाषे । ते न परहिं भव जिन्ह लिखि राखे ।
 दो०—सुन्ह तात माया कृत गुन अरु दोष अनेक ।

गुन यह डभय न देखिअहिं देखिअ सो अबिबेक ॥ ४१ ॥
 श्रीमुख बचन सुनत सब भाई । हरषे प्रेम न हृदयँ समाई ॥
 करहिं बिनय अति बारहिं बारा । हनूमान हियँ हरष अपारा ॥
 पुनि रघुपति निज मंदिर गए । एहि बिधि चरित करत नित नए ॥
 बार बार नारद मुनि आवहिं चरित पुनीत राम के गावहिं ॥
 नित नव चरित देखि मुनि जाहीं । ब्रह्मलोक सब कथा कहाहीं ॥
 सुनि बिरंचि अतिसय सुख मानहिं । पुनि पुनि तात करहु गुन गानहिं ॥
 सनकादिक नारदहि सराहहि । जद्यपि ब्रह्म निरत मुनि आहहिं ॥
 सुनि गुन गान समाधि बिसारी । सादर सुनहिं परम अधिकारी ।
 दो० - जीवनमुक्त ब्रह्मपर चरित सुनहिं तजि ध्यान ।

जे हरि कथाँ न करहि रति तिन्ह के हिय पाषाण ॥ ४२ ॥
 एक बार रघुनाथ बोलाए । गुर द्विज पुरबासी सब आए ॥

बैठे गुर मुनि अरु द्विज सज्जन । बोले बचन भगत भव भंजन ॥
 सुनहु सकल पुरजन मम बानी । कहउँ न कछु ममता उर आनी ॥
 नहिं अनीति नहिं कछु प्रभुताई । सुनहु करहु जो तुम्हहि सोहाई ॥
 सोइ सेवक प्रियतम मम सोई । मम अनुसासन मानै जोई ॥
 जाँ अनीति कछु भाषौं भाई । तौ मोहि बरजहु भय बिसराई ॥
 बड़े भाग मानुष तनु पावा । सुर दुर्लभ सब ग्रंथन्हि गावा ॥
 साधन धाम मोच्छ कर द्वारा । पाइ न जेहिं परलोक सँवारा ॥
 दो०—सो परत्र दुख पावइ सिर धुनि धुनि पछिताइ ।

कालहि कर्महि ईस्वरहि मिथ्या दोस लगाइ ॥ ४३ ॥
 एहि तन कर फल बिषय न भाई । स्वर्गउ स्वल्प अंत दुखदाई ॥
 नर तनु पाइ बिषयँ मन देहीं । पलटि सुधा ते सठ बिष लेहीं ॥
 ताहि कबहुँ भल कहइ न कोई । गुंजा ग्रहइ परस मन खोई ॥
 आकर चारि लच्छ चौरासी । जोनि भ्रमत यह जिव अबिनासी ॥
 फिरत सदा माया कर प्रेरा । काल कर्म सुभाव गुन घेरा ॥
 कबहुँक करि करुना नर देही । देत ईस बिनु हेतु सनेही ॥
 नर तनु भव बारिधि कहूँ बेरो । सन्मुख मरुत अनुग्रह मेरो ॥
 करनधार सदगुर दृढ़ नावा । दुर्लभ साज सुलभ करि पावा ॥
 दो०—जो न तै भव सागर नर समाज अस पाइ ।

सो कृत निंदक भंदमति आत्माहन गति जाइ ॥ ४४ ॥
 जाँ परलोक इहाँ सुख चहहू । सुनि मम बचन हृदयँ दृढ़ रहहू ॥

सुलभ सुखद मारग यह भाई । भगति मोरि पुरान श्रुति गाई ॥
 ग्यान अगम प्रत्यूह अनेका । साधन कठिन न मन कहूँ टेका ॥
 करत कष्ट बहु पावइ कोऊ । भक्ति हीन मोहि प्रिय नहिं सोऊ ॥
 भक्ति सुतंत्र सकल सुख खानी । बिनु सतसंग न पावहिं प्राणी ॥
 पुन्य पुंज बिनु मिलहिं न संता । सतसंगति संसृति कर अंता ॥
 पुन्य एक जग महुँ नहिं दूजा । मन क्रम बचन बिप्र पद पूजा ॥
 सानुकूल तेहि पर मुनि देवा । जो तजि कपटु करइ द्विज सेवा ॥
 दो०—औरउ एक गुपुत मत सबहि कहउँ कर जोरि।

संकर भजन बिना नर भगति न पावइ मोरि ॥ ४५ ॥
 कहहु भगति पथ कवन प्रयासा । जोग न मख जप तप उपवासा ॥
 सरल सुभाव न मन कुटिलाई । जथा लाभ संतोष सदाई ॥
 मोर दास कहाइ नर आसा । करइ तौ कहहु कहा बिस्वासा ॥
 बहुत कहउँ का कथा बढाई । एहि आचरन बस्य मैं भाई ॥
 बैर न बिग्रह आस न आसा । सुखमय ताहि सदा सब आसा ॥
 अनारंभ अनिकेत अमानी । अनघ अरोष दच्छ बिग्यानी ॥
 प्रीति सदा सज्जन संसर्गा । तृन सम बिषय स्वर्ग अपबर्गा ॥
 भगति पच्छ हठ नहिं सठताई । दुष्ट तर्क सब दूर बहाई ॥
 दो०—मम गुन ग्राम नाम रत गत ममता मद मोह।

ता कर सुख सोइ जानइ परानंद संदोह ॥ ४६ ॥
 सुनत सुधासम बचन राम के । गहे सबनि पद कृपाधाम के ॥

जननि जनक गुर बंधु हमारे । कृपा निधान प्रान ते प्यारे ॥
 तनु धनु धाम राम हितकारी । सब बिधि तुम्ह प्रनतारति हारी ॥
 असि सिख तुम्ह बिनु देइ न कोऊ । मातु पिता स्वारथ रत ओऊ ॥
 हेतु रहित जग जुग उपकारी । तुम्ह तुम्हार सेवक असुरारी ॥
 स्वारथ मीत सकल जग माहीं । सपनेहुँ प्रभु परमारथ नाहीं ॥
 सब के बचन प्रेम रस साने । सुनि रघुनाथ हृदयँ हरषाने ॥
 निज निज गृह गए आयसु पाई । बरनत प्रभु बतकही सुहाई ॥
 दो०— उमा अवधबासी नर नारि कृतारथ रूप ।

ब्रह्म सच्चिदानंद घन रघुनायक जहँ भूप ॥ ४७ ॥
 एक बार बसिष्ट मुनि आए । जहाँ राम सुखधाम सुहाए ॥
 अति आदर रघुनायक कीन्हा । पद पखारि पादोदक लीन्हा ॥
 राम सुनहु मुनि कह कर जोरी । कृपासिंधु बिनती कछु मोरी ॥
 देखि देखि आचरन तुम्हारा । होत मोह मम हृदयँ अपारा ॥
 महिमा अमिति बेद नहिं जाना । मैं केहि भाँति कहउँ भगवाना ॥
 उपरोहित्य कर्म अति मंदा । बेद पुरान सुमृति कर निंदा ॥
 जब न लेउँ मैं तब बिधि मोही । कहा लाभ आगें सुत तोही ॥
 परमात्मा ब्रह्म नर रूपा । होईहि रघुकुल भूषन भूपा ॥
 दो०— तब मैं हृदयँ बिचारा जोग जग्य छत दान ।

जा कहूँ करिअ सो पैहउँ धर्म न एहि सम आन ॥ ४८ ॥
 जप तप नियम जोग निज धर्मा । श्रुति संभव नाना सुभ कर्मा ॥

ग्यान दया दम तीरथ मज्जन । जहँ लगी धर्म कहत श्रुति सज्जन ॥
 आगम निगम पुरान अनेका । पढ़े सुने कर फल प्रभु एका ॥
 तब पद पंकज प्रीति निरंतर । सब साधन कर यह फल सुंदर ॥
 छूटइ मल कि मलहि के धोएँ । धृत कि पाव कोइ बारि बिलोएँ ॥
 प्रेम भगति जल बिनु रघुराई । अभिअंतर मल कबहुँ न जाई ॥
 सोइ सर्वग्य तग्य सोइ पंडित । सोइ गुन गृह बिग्यान अखंडित ॥
 दच्छ सकल लच्छन जुत सोई । जाकेँ पद सरोज रति होई ॥
 दो०— नाथ एक बर मागउँ राम कृपा करि देहु ।

जन्म जन्म प्रभु पद कमल कबहुँ घटै जनि नेहु ॥ ४९ ॥
 अस कहि मुनि बसिष्ट गृह आए । कृपासिंधु के मन अति भाए ॥
 हनूमान भरतादिक भ्राता । संग लिए सेवक सुखदाता ॥
 पुनि कृपाल पुर बाहेर गए । गज रथ तुरग मगावत भए ॥
 देखि कृपा करि सकल सराहे । दिए अचित जिन्ह जिन्ह तेइ चाहे ॥
 हरन सकल श्रम प्रभु श्रम पाई । गए जहाँ सीतल अवैराई ॥
 भरत दीन्ह निज बसन डसाई । बैठे प्रभु सेवहिं सब भाई ॥
 मारुतसुत तब मारुत करई । पुलक वपुष लोचन जल भरई ॥
 हनूमान सम नहिं बड़भागी । नहिं कोउ राम चरन अनुरागी ॥
 गिरिजा जासु प्रीति सेवकाई । बार बार प्रभु निज मुख गाई ॥
 दो०— तेहिं अवसर मुनि नारद आए करतल बिन ।

गावन लगे राम कल कीरति सदा नबीन ॥ ५० ॥

मामवलोकय पंकज लोचन । कृपा बिलोकनि सोच बिमोचन ॥
नील तामरस स्याम काम अरि । हृदय कंज मकरंद मधुप हरि ॥
जातुधान बरूथ बल भंजन । मुनि सज्जन रंजन अघ गंजन ।
भूसुर ससि नव बृंद बलाहक । असरन सरन दीन जन गाहक ॥
भुज बल बिपुल भार महि खंडित । खर दूधन बिराध बध पंडित ॥
रावनारि सुखरूप भूपवर । जय दसरथ कुल कुमुद सुधाकर ॥
सुजस पुरान बिदित निगमागम । गावत सुर मुनि संत समागम ॥
कारुणीक ब्यलीक मद खंडन । सब बिधि कुसल कोसला मंडन ॥
कलि मल मथन नाम ममताहन । तुलसिदास प्रभु पाहि प्रनत जन ॥
दो०— प्रेम सहित मुनि नारद बरनि राम गुन ग्राम ।

सोभासिंधु हृदयँ धरि गए जहाँ बिधि धाम ॥ ५१ ॥
गिरिजा सुनहु बिसद यह कथा । मैं सब कही मोरि मति जथा ॥
राम चरित सत कोटि अपारा । श्रुति सारदा न बरनै पारा ॥
राम अनंत अनंत गुनानी । जन्म कर्म अनंत नामानी ।
जल सीकर महि रज गनि जाहीं । रघुपति चरित न बरनि सिराहीं ॥
बिमल कथा हरि पद दायनी । भगति होइ सुनि अनपायनी ॥
उमा कहिउँ सब कथा सुहाई । जो भुसुंडि खगपतिहि सुनाई ।
कछुक राम गुन कहेउँ बखानी । अब का कहौं सो कहहु भवानी ॥
सुनि सुभ कथा उमा हरप्रानी । बोली अति बिनीत मृदु बानी ॥
धन्य धन्य मैं धन्य पुरारी । सुनेउँ राम गुन भव भय हारी ॥

दो० — तुम्हरी कृपाँ कृपायतन अब कृतकृत्य न मोह।

जानेऊँ राम प्रताप प्रभु चिदानंद संदोह ॥५२ (क)॥

नाथ तवानन ससि खवत कथा सुधा रघुबीर।

श्रवन घुटन्हि मन पान करि नहिं अघात मतिधीर ॥५२ (ख)॥

राम चरित जे सुनत अघाहीं रस बिसेष जाना तिन्ह नाहीं ॥

जीवनमुक्त महामुनि जेऊ । हरि गुन सुनहिं निरंतर तेऊ ॥

भव सागर चह पार जौ पावा । राम कथा ता कहँ दृढ़ नावा ॥

बिषइन्ह कहँ पुनि हरि गुन ग्रामा । श्रवन सुखद अरु मन अभिरामा ॥

श्रवनवंत अस को जग माहीं । जाहि न रघुपति चरित सोहाहीं ।

ते जड़ जीव निजात्मक घाती । जिन्हहि न रघुपति कथा सोहाती ॥

हरिचरित्र मानस तुम्ह गावा सुनि मैं नाथ अमिति सुख पावा ॥

तुम्ह जो कही यह कथा सुहाई । कागभसुंड़ि गरुड़ प्रति गाई ।

दो० - बिरति ग्यान बिग्यान दृढ़ राम चरन अति नेह।

बायस तन रघुपति भगति मोहि परम संदेह ॥५३॥

नर सहस्र महँ सुनहु पुरारी । कोउ एक होइ धर्म ब्रतधारी ॥

धर्मसील कोटिक महँ कोई । बिषय बिमुख बिराग रत होई ॥

कोटि बिरक्त मध्य श्रुति कहई । सम्यक ग्यान सकृत कोउ लहई ।

ग्यानवंत कोटिक महँ कोऊ । जीवनमुक्त सकृत जग सोऊ ॥

तिन्ह सहस्र महँ सब सुख खानी दुर्लभ ब्रह्म लीन बिग्यानी ।

धर्मसील बिरक्त अरु ग्यानी । जीवनमुक्त ब्रह्मपर प्राणी ॥

सब ते सो दुर्लभ सुराया । राम भगति रत गत भद माया ॥
 सो हरिभगति काग किमि पाई । बिस्वनाथ मोहि कहहु बुझाई ॥
 दो०—राम परायन ग्यान रत गुनागर मति धीर ।

नाथ कहहु केहि करन पायउ काक सरीर ॥ ५४ ॥
 यह प्रभु चरित पवित्र सुहावा । कहहु कृपाल काग कहँ पावा ॥
 तुम्ह केहि भाँति सुना मदनारी । कहहु मोहि अति कौतुक भारी ॥
 गरुड़ महाग्यानी गुन रासी । हरि सेवक अति निकट निवासी ॥
 तेहिं केहि हेतु काग सन जाई । सुनी कथा मुनि निकर बिहाई ॥
 कहहु कवन बिधि भा संबादा । दोउ हरिभगत काग उरगादा ॥
 गौरि गिरा सुनि सरल सुहाई । बोले सिव सादर सुख पाई ॥
 धन्य सती पावन मति तोरी । रघुपति चरन प्रीति नहिं थोरी ॥
 सुनहु परम पुनीत इतिहासा । जो सुनि सकल लोक भ्रम नासा ॥
 उपजइ राम चरन बिस्वासा । भव निधि तरनर बिनहिं प्रयासा ॥
 दो०—ऐसिअ प्रसन्न बिहंगपति कीन्हि काग सन जाइ ।

सो सब सादर कहिहउँ सुनहु उमा मन लाइ ॥ ५५ ॥
 मैं जिमि कथा सुनी भव मोचनि । सो प्रसंग सुनु सुमुखि सुलोचनि ॥
 प्रथम दच्छ गृह तव अवतारा । सती नाम तब रहा तुम्हारा ॥
 दच्छ जग्य तव भा अपमाना । तुम्ह अति क्रोध तजे तब प्राणा ॥
 मम अनुचरन्ह कीन्ह मख भंगा । जानहु तुम्ह सो सकल प्रसंगा ॥
 तब अति सोच भयउ मन मोरें । दुखी भयउँ बियोग प्रिय तोरें ॥

सुंदर बन गिरि सरित तड़ागा । कौतुक देखत फिरउँ बेरागा ॥
गिरि सुमेर उत्तर दिशि दूरी । नील सैल एक सुंदर भूरी ॥
तासु कनकमय सिखर सुहाए । चारि चारु मोरे मन भाए ॥
तिन्ह पर एक एक बिटप बिसाला । बट पीपर पाकरी रसाला ॥
सैलोपरि सर सुंदर सोहा । मनि सोपान देखि मन मोहा ॥
दो०— सीतल अमल मधुर जल जलज बिपुल बहुरंग ।

कूजत कल रव हंस गन गुंजत मंजुल भृंग ॥ ५६ ॥
तेहिं गिरि रुचिर बसइ खग सोई । तासु नास कल्पांत न होई ॥
माया कृत गुन दोष अनेका । मोह मनोज आदि अबिबेका ॥
रहे ब्यापि समस्त जग माहीं । तेहि गिरि निकट कबहुँ नहिं जाहीं ॥
तहँ बसि हरिहि भजइ जिमि कागा सो सुनु उमा सहित अनुरागा ॥
पीपर तरु तर ध्यान सो धरई । जाप जग्य पाकरि तर करई ॥
आँब छाँह कर मानस पूजा । तजि हरि भजनु काजु नहिं दूजा ।
बर तर कह हरि कथा प्रसंगा । आवहिं सुनहिं अनेक बिहंगा ॥
राम चरित बिचित्र बिधि नाना । प्रेम सहित कर सादर गाना ॥
सुनहिं सकल मति बिमल मराला । बसहिं निरंतर जे तेहिं ताला ॥
जब मैं जाइ सो कौतुक देखा । उर उपजा आनंद बिसेषा ॥
दो० तब कछु काल मराल तनु धरि तहँ कीन्ह निवास ।

सादर सुनि रघुपति गुन पुनि आयउँ कैलास ॥ ५७ ॥
गिरिजा कहेउँ सो सब इतिहासा । मैं जेहि समय गयउँ खग पासा ।

अब सो कथा सुनहु जेहि हेतू । गयउ काग पहिं खग कुल केतू ॥
 जब रघुनाथ कीन्हि रन क्रीड़ा । समुझत चरित होति मोहि ब्रीड़ा ॥
 इंद्रजीत कर आपु बँधायो । तब नारद मुनि गरुड़ पठायो ॥
 बंधन काटि गयो उरगादा । उपजा हृदयँ प्रचंड बिषादा ॥
 प्रभु बंधन समुझत बहु भाँती । करत बिचार उरग आराती ॥
 व्यापक ब्रह्म बिरज बागीसा । माया मोह पार परमीसा ॥
 सो अवतार सुनेउँ जग माहीं । देखेउँ सो प्रभाव कछु नाहीं ॥
 दो०— भव बंधन ते छूटहि नर जपि जा कर नाम ।

खर्ब निसाचर बाँधेउ नागपास सोइ राम ॥ ५८ ॥
 नाना भाँति मनहि समुझावा । प्रगट न ग्यान हृदयँ भ्रम छावा ॥
 खेद खिन्न मन तर्क बढ़ाई । भयउ मोहबस तुम्हरिहिं नाई ॥
 व्याकुल गयउ देवरिषि पाहीं । कहेसि जो संसय निज मन माहीं ॥
 सुनि नारदहि लागि अति दाया । सुनु खग प्रबल राम कै माया ॥
 जो ग्यानिन्ह कर चित अपहरई । बरिआई बिमोह मन करई ॥
 जेहिं बहु बार नचावा मोही । सोइ व्यापी बिहंगपति तोही ॥
 महामोह उपजा उर तोरें । मिटिहि न बेगि कहें खग मोरें ॥
 चतुरानन पहिं जाहु खगेसा । सोइ करेहु जेहि होइ निदेसा ॥
 दो०— अस कहि चले देवरिषि करत राम गुन गान ।

हरि माया बल बरनत पुनि पुनि परम सुजान ॥ ५९ ॥
 तब खगपति बिरंचि पहिं गयऊ । निज संदेह सुनावत भयऊ ॥

सुनि बिरंचि रामहि सिरु नावा । समुझि प्रताप प्रेम अति छावा ॥
 मन महूँ करइ बिचार बिधाता । माया बस कबि कोबिद ग्याता ॥
 हरि माया कर अमिति प्रभावा । बिपुल बार जेहिं मोहि नचावा ॥
 अग जगमय जग मम उपराजा । नहिं आचरज मोह खगराजा ॥
 तब बोले बिधि गिरा सुहाई । जान महेस राम प्रभुताई ॥
 बैनतेय संकर पहिं जाहू । तात अनत पूछहु जानि काहू ॥
 तहँ होइहि तव संसय हानी । चलेउ बिहंग सुनत बिधि बानी ॥
 दो०— परमातुर बिहंगपति आयउ तब मो पास ।

जात रहेउँ कुबेर गृह रहिहु उमा कैलास ॥६०॥
 तेहिं मम पद सादर सिरु नावा । पुनि आपन संदेह सुनावा ॥
 सुनि ता करि बिनती मृदु बानी । प्रेम सहित मैं कहेउँ भवानी ॥
 मिलेहु गरुड़ मारग महँ मोही । कवन भाँति समुझावौं तोही ॥
 तबहिं होइ सब संसय भंगा । जब बहु काल करिअ सतसंगा ॥
 सुनिअ तहाँ हरिकथा सुहाई । नाना भाँति मुनिन्ह जो गाई ॥
 जेहि महूँ आदि मध्य अवसाना । प्रभु प्रतिपाद्य राम भगवाना ॥
 नित हरि कथा होत जहँ भाई । पठवउँ तहाँ सुनहु तुम्ह जाई ॥
 जाइहि सुनत सकल संदेहा । राम चरन होइहि अति नेहा ॥
 दो०— बिनु सतसंग न हरि कथा तेहि बिनु मोह न भाग ।

मोह गएँ बिनु राम पद होइ न दृढ़ अनुराग ॥६१॥
 मिलहिं न रघुपति बिनु अनुराग । किएँ जोग तप ग्यान बिराग ॥

उत्तर दिसि सुंदर गिरि नीला । तहँ रह काकभुसुंड़ि सुसीला ॥
 राम भगति पथ परम प्रबीना । ग्यानी गुन गृह बहु कालीना ॥
 राम कथा सो कहइ निरंतर । सादर सुनहिं बिबिध बिहंगबर ॥
 जाइ सुनहु तहँ हरि गुन भूरी । होइहि मोह जनित दुख दूरी ।
 मैं जब तेहि सब कहा बुझाई । चलेउ हरषि मम पद सिरु नाई ॥
 ताते उमा न मैं समझावा । रघुपति कृपाँ मरमु मैं पावा ॥
 होइहि कीन्ह कबहुँ अभिमाना । सो खोवै चह कृपानिधाना ॥
 कछु तेहि ते पुनि मैं नहिं राखा । समुझइ खग खगही कै भाषा ॥
 प्रभु माया बलवंत भवानी । जाहि न मोह कवन अस ग्यानी ।
 दो० — ग्यानी भगत सिरोमनि त्रिभुवनपति कर जान ।

ताहि मोह माया नर पावैर करहिं गुमान ॥ ६२ (क) ॥

मासपारायण, अट्टाईसवाँ विश्राम

सिव विरंचि कहूँ मोहइ को है बपुरा आन ।

अस जियँ जानि भजहिं मुनि माया पति भगवान ॥ ६२ (ख) ॥

गयउ गरुड़ जहँ बसइ भुसुंड़ा । मति अकुंठ हरि भगति अखंडा ॥
 देखि सैल प्रसन्न मन भयऊ । माया मोह सोच सब गयऊ ॥
 करि तड़ाग मज्जन जलपाना । बट तर गयउ हृदयँ हरषाना ॥
 बृद्ध बृद्ध बिहंग तहँ आए । सुनै राम के चरित सुहाए ॥
 कथा अरंभ करै सोइ चाहै । तेही समय गयउ खगनाहा ॥
 आवत देखि सकल खगराजा । हरषेउ बायस सहित समाजा ॥

अति आदर खगपति कर कीन्हा । स्वागत पूछि सुआसन दीन्हा ॥
करि पूजा समेत अनुरागा । मधुर बचन तब बोलेउ कागा ॥
दो०— नाथ कृतारथ भयउँ मैं तव दरसन खगराज ।

आयसु देहु सो करौं अब प्रभु आयहु केहि काज ॥ ६३ (क) ॥

सदा कृतारथ रूप तुम्ह कह मृदु बचन खगेस ।

जेहि कै अस्तुति सादर निज मुख कीन्हि महेस ॥ ६३ (ख) ॥

सुनहु तात जेहि कारन आयउँ । सो सब भयउ दरस तव पायउँ ।
देखि परम पावन तव आश्रम । गयउ मोह संसय नाना भ्रम ॥
अब श्रीराम कथा अति पावनि । सदा सुखद दुख पुंज नसावनि ॥
सादर तात सुनावहु मोही । बार बार बिनवउँ प्रभु तोही ॥
सुनत गरुड़ कै गिरा बिनीता । सरल सुप्रेम सुखद सुपुनीता ।
भयउ तासु मन परम उछाहा । लाग कहैं रघुपति गुन गाहा ॥
प्रथमहिँ अति अनुराग भवानी । रामचरित सर कहेसि बखानी ॥
पुनि नारद कर मोह अपारा । कहेसि बहुरि रावन अवतारा ॥
प्रभु अवतार कथा पुनि गाई । तब सिमु चरित कहेसि मन लाई ॥
दो०— बालचरित कहि बिबिधि बिधि मन महँ परम उछाह ।

रिषि आगवन कहेसि पुनि श्रीरघुबीर बिबाह ॥ ६४ ॥
बहुरि राम अभिषेक प्रसंगा । पुनि नृप बचन राज रस भंगा ॥
पुरबासिन्ह कर बिरह बिषादा । कहेसि राम लछ्मिन संबादा ॥
बिपिन गवन केवट अनुरागा । सुरसरि उतरि निवास प्रयागा ॥

बालमीक प्रभु मिलन बखाना । चित्रकूट जिमि बसे भगवाना ॥
 सचिवागवन नगर नृप मरना । भरतागवन प्रेम बहु बरना ॥
 करि नृप क्रिया संग पुरबासी । भरत गए जहँ प्रभु सुख रासी ॥
 पुनि रघुपति बहुबिधि समुझाए । लै पादुका अवधपुर आए ॥
 भरत रहनि सुरपति सुत करनी । प्रभु अरु अत्रि भेंट पुनि बरनी ॥
 दो०— कहि बिराध बध जेहि बिधि देह तजी सरभंग ।

बरनि सुतीछन प्रीति पुनि प्रभु अगस्ति सतसंग ॥ ६५ ॥
 कहि दंडक बन पावनताई । गीध मइत्री पुनि तेहिं गाई ॥
 पुनि प्रभु पंचवटी कृत बासा । भंजी सकल मुनिन्ह की बासा ॥
 पुनि लछिमन उपदेस अनूपा । सूपनखा जिमि कीन्हि कुरूपा ॥
 खर दूषन बध बहुरि बखाना । जिमि सब मरमु दसानन जाना ॥
 दसकंधर मारीच बतकही । जेहि बिधि भई सो सब तेहिं कही ॥
 पुनि माया सीता कर हरना । श्रीरघुबीर बिरह कछु बरना ॥
 पुनि प्रभु गीध क्रिया जिमि कीन्ही । बधि कबंध सबरिहि गति दीन्ही ॥
 बहुरि बिरह बरनत रघुबीरा । जेहि बिधि गए सरोबर तीरा ॥
 दो०— प्रभु नारद संवाद कहि मारुति मिलन प्रसंग ।

पुनि सुग्रीव मिताई बालि प्रान कर भंग ॥ ६६ (क) ॥

कपिहि तिलक करि प्रभु कृत सैल प्रवरवन बास ।

बरनन वर्षा सरद अरु राम रोष कपि त्रास ॥ ६६ (ख) ॥

जेहि बिधि कपिपति कीस पठाए । सीता खोज सकल दिसि धाए ॥

बिबर प्रबेस कीन्ह जेहि भाँती । कपिन्ह बहोरि मिला संपाती ॥
 सुनि सब कथा समीरकुमारा । नाघत भयउ पयोधि अपारा ॥
 लंकाँ कपि प्रबेस जिमि कीन्हा । पुनि सीतहि धीरजु जिमि दीन्हा ॥
 बन उजारि रावनहि प्रबोधी । पुर दहि नाघेउ बहुरि पयोधी ॥
 आए कपि सब जहँ रघुराई । बैदेही की कुसल सुनाई ॥
 सेन समेति जथा रघुबीरा । उतरे जाइ बारिनिधि तीरा ॥
 मिला बिभीषन जेहि बिधि आई । सागर निग्रह कथा सुनाई ॥
 दो०— सेतु बाँधि कपि सेन जिमि उतरी सागर पार ।

गयउ बसीठे बीरबर जेहि बिधि बालिकुमार ॥ ६७ (क) ॥

निसिचर कीस लराई बरनिसि बिबिध प्रकार ।

कुंभकरन धननाद कर बल पौरुष संघार ॥ ६७ (ख) ॥

निसिचर निकर मरन बिधि नाता रघुपति रावन समर बखाना ॥
 रावन बध मंदोदरि सोका । राज बिभीषन देव असोका ॥
 सीता रघुपति मिलन बहोरी । सुरन्ह कीन्हि अस्तुति कर जोरी ॥
 पुनि पुष्पक चढ़ि कपिन्ह समेता । अवध चले प्रभु कृपा निकेता ॥
 जेहि बिधि राम नगर निज आए । बायस बिसद चरित सब गाए ॥
 कहेसि बहोरि राम अभिषेका । पुर बरनत नृपनीति अनेका ॥
 कथा समस्त भुसुंड बखानी । जो मैं तुम्ह सन कही भवानी ॥
 सुनि सब राम कथा खगनाहा कहत बचन मन परम उल्लाहा ॥

सो०—गयउ मोर संदेह सुनेउँ सकल रघुपति चरित ।

भयउ राम पद नेह तव प्रसाद बायस तिलक ॥ ६८ (क) ॥

मोहि भयउ अति मोह प्रभु बंधन रन महुँ निरखि ।

चिदानंद संदोह राम बिकल कारन कवन ॥ ६८ (ख) ॥

देखि चरित अति नर अनुसारी । भयउ हृदयँ मम संसय भारी ॥

सोइ भ्रम अब हित करि मैं माना । कीन्ह अनुग्रह कृपानिधाना ॥

जो अति आतप ब्याकुल होई । तरु छाया सुख जानइ सोई ॥

जौं नहिं होत मोह अति मोही । मिलतेउँ तात कवन बिधि तोही ॥

सुनतेउँ किमि हरि कथा सुहाई । अति बिचित्र बहु बिधि तुम्ह गाई ॥

निगमागम पुरान मत एहा । कहहिं सिद्ध मुनि नहिं संदेहा ॥

संत बिसुद्ध मिलहिं परि तेही । चितवहिं राम कृपा करि जेही ॥

राम कृपाँ तव दरसन भयऊ । तव प्रसाद सब संसय गयऊ ।

दो०— सुनि बिहंगपति बानी सहित बिनय अनुराग ।

पुलक गात लोचन सजल मन हरषेउ अति काग ॥ ६९ (क) ॥

श्रोता सुपति सुसील सुचि कथा रसिक हरि दास ।

पाइ उपा अति गोप्यमपि सज्जन करहिं प्रकास ॥ ६९ (ख) ॥

बोलेउ काकभसुंड बहोरी । नभग नाथ पर प्रीति न थोरी ॥

सब बिधि नाथ पूज्य तुम्ह मेरे । कृपापात्र रघुनायक केरे ॥

तुम्हहिं न संसय मोह न माया । मो पर नाथ कीन्ह तुम्ह दाया ।

पठइ मोह मिस खगपति तोही । रघुपति दीन्ह बड़ाई मोही ॥

तुम्ह निज मोह कहौ खग साई । सो नहिं कछु आचरज गोसाई ॥
 नारद भव बिरंचि सनकादी । जे मुनिनायक आतमबादी ॥
 मोह न अंध कीन्ह केहि केही को जग काम नचाव न जेही ॥
 तृष्णँ केहि न कीन्ह बौराहा । केहि कर हृदय क्रोध नहिं दाहा ॥
 दो०— ग्यानी तापस सूर कवि कोबिद गुन आगार ।

केहि कै लोभ बिडंबना कीन्ह न एहि संसार ॥ ७० (क) ॥

श्री मद बक्र न कीन्ह केहि प्रभुता बधिर न काहि ।

मृगलोचनि के नैन सर को अस लाग न जाहि ॥ ७० (ख) ॥

गुन कृत सन्यपात नहिं केही । कोउ न मान मद तजेउ निबेही ॥
 जोबन ज्वर केहि नहिं बलकावा । ममता केहि कर जस न नसावा ॥
 मच्छर काहि कलंक न लावा । काहि न सोक समीर डोलावा ॥
 चिंता साँपिनि को नहिं खाया । को जग जाहि न ब्यापी माया ॥
 कीट मनोरथ दारु सरीरा । जेहि न लाग धुन को अस धीरा ॥
 सुत बित लोक ईषना तीनी । केहि कै मति इन्ह कृत न मलीनी ॥
 यह सब माया कर परिवारा । प्रबल अमिति को बरनै पारा ॥
 सिव चतुरानन जाहि डेराहीं । अपर जीव केहि लेखे माहीं ॥
 दो०— ब्यापि रहेउ संसार महुँ माया कटक घचंड ।

सेनापति कामादि भट दंभ कपट धाषंड ॥ ७१ (क) ॥

सो दासी रघुबीर के समुझैं मिथ्या सोपि ।

छूट न राम कृपा बिनु नाथ कहउँ पद रोपि ॥ ७१ (ख) ॥

जो माया सब जगहि नचावा । जासु चरित लखि काहुँ न पावा ॥
 सोइ प्रभु भू बिलास खगराजा । नाच नटी इव सहित समाजा ॥
 सोइ सच्चिदानंद घन रामा । अज बिग्यान रूप बल धामा ॥
 व्यापक व्याप्य अखंड अनंता । अखिल अमोघसक्ति भगवंता ॥
 अगुन अदभ्र गिरा गोतीता । सबदरसी अनवद्य अजीता ॥
 निर्मम निराकार निरमोहा । नित्य निरंजन सुख संदोहा ॥
 प्रकृति पार प्रभु सब उर बासी । ब्रह्म निरीह बिरज अबिनासी ॥
 इहाँ मोह कर कारन नाहीं । रबि सन्मुख तम कबहुँ कि जाहीं ॥
 दो०— भगत हेतु भगवान प्रभु राम धरेउ तनु भूप ।

किए चरित पावन परम प्राकृत नर अनुरूप ॥ ७२ (क) ॥

जथा अनेक बेष धरि नृत्य करइ नट कोइ ।

सोइ सोइ भाव देखावइ आपुन होइ न सोइ ॥ ७२ (ख) ॥

असि रघुपति लीला उरगारी । दनुज बिमोहनि जन सुखकारी ॥
 जे मति मलिन बिषय बस कामी । प्रभु पर मोह धरहिं इमि स्वामी ॥
 नयन दोष जा कहँ जब होई । पीत बरन ससि कहँ कह सोई ॥
 जब जेहि दिसि भ्रम होइ खगेसा । सो कह पच्छिम उयउ दिनेसा ॥
 नौकारूढ़ चलत जग देखा । अचल मोह बस आपुहि लेखा ॥
 बालक भ्रमहिं न भ्रमहिं गृहादी । कहहिं परस्पर मिथ्याबादी ॥
 हरि बिषइक अस मोह बिहंगा । सपनेहुँ नहिं अग्यान प्रसंगा ॥
 मायाबस मतिमंद अभागी । हृदयँ जमनिका बहुबिधि लागी ॥

ते सठ हठ बस संसय करहीं । निज अग्यान राम पर धरहीं ॥

दो०— काम क्रोध मद लोभ रत गृहासक्त दुखरूप ।

ते किमि जानहिं रघुपतिहि मूढ़ परे तम कूप ॥ ७३ (क) ॥

निर्गुन रूप सुलभ अति सगुन जान नहिं कोइ ।

सुगम अगम नाना चरित सुनि मुनि मन भ्रम होइ ॥ ७३ (ख) ॥

सुनु खगेस रघुपति प्रभुताई । कहउँ जथामति कथा सुहाई ॥

जेहि बिधि मोह भयउ प्रभु मोही । सोउ सब कथा सुनावउँ तोही ॥

राम कृपा भाजन तुम्ह ताता । हरि गुन प्रीति मोहि सुखदाता ॥

ताते नहिं कछु तुम्हहिं दुरावउँ । परम रहस्य मनोहर गावउँ ॥

सुनहु राम कर सहज सुभाऊ । जन अभिमान न राखहिं काऊ ॥

संसृत मूल सूलप्रद नाना । सकल सोक दायक अभिमाना ॥

ताते करहिं कृपानिधि दूरी । सेवक पर ममता अति भूरी ॥

जिमि सिसु तन ब्रन होइ गोसाई । मातु चिराव कठिन की नाई ॥

दो०— जदपि प्रथम दुख पावइ रोवइ बाल अधीर ।

ब्याधि नास हित जननी गनति न सो सिसु पीर ॥ ७४ (क) ॥

तिमि रघुपति निज दास कर हरहिं मान हित लागि ।

तुलसिदास ऐसे प्रभुहि कस न भजहु भ्रम त्यागि ॥ ७४ (ख) ॥

राम कृपा आपनि जड़ताई । कहउँ खगेस सुनहु मन लाई ॥

जब जब राम मनुज तनु धरहीं । भक्त हेतु लीला बहु करहीं ॥

तब तब अवधपुरी मैं जाऊँ । बालचरित बिलोकि हरषाऊँ ॥

जन्म महोत्सव देखउँ जाई । बरष पाँच तहँ रहउँ लोभाई ॥
 इष्टदेव मम बालक रामा । सोभा बपुष कोटि सत कामा ॥
 निज प्रभु बदन निहारि निहारी । लोचन सुफल करउँ उरगारी ॥
 लघु बायस बपु धरि हरि संग्गा । देखउँ बालचरित बहु रंगा ॥
 दो०— लरिकाईं जहँ जहँ फिरहिं तहँ तहँ संग उड़ाउँ ।

जृठनि परइ अजिर महँ सो उठाइ करि खाउँ ॥ ७५ (क) ॥

एक बार अतिसय सब चरित किए रघुबीर ।

सुमिरत प्रभु लील्य सोइ पुलकित भयउ सरीर ॥ ७५ (ख) ॥
 कहइ भसुंड सुनहु खगनायक । राम चरित सेवक सुखदायक ।
 नृप मंदिर सुंदर सब भाँती । खचित कनक मनि नाना जाती ॥
 बरनि न जाइ रुचिर अँगनाई । जहँ खेलहिं नित चारिउ भाई ॥
 बालबिनोद करत रघुराई । बिचरत अजिर जननि सुखदाई ॥
 मरकत मृदुल कलेवर स्यामा । अंग अंग प्रति छबि बहु कामा ॥
 नव राजीव अरुन मृदु चरना । पदज रुचिर नख ससि दुति हरना ॥
 ललित अंक कुलिसादिक चारी । नूपुर चारु मधुर रवकारी ॥
 चारु पुरट मनि रचित बनाई । कटि किकिनि कल मुखर सुहाई ॥
 दो०— रेखा त्रय सुंदर उदर नाभी रुचिर गँभीर ।

उर आगत भ्राजत विबिधि बाल बिभूषन चीर ॥ ७६ ॥
 अरुन पानि नख करज मनोहर । बाहु बिसाल बिभूषन सुंदर ॥
 कंध बाल केहरि दर ग्रीवा । चारु चिबुक आनन छबि सीवा ॥

कलबल बचन अधर अरुनारे । दुइ दुइ दसन बिसद बर बारे ॥
 ललित कपोल मनोहर नासा । सकल सुखद सास कर सम हासा ॥
 नील कंज लोचन भव मोचन । भ्राजत भाल तिलक गोरोचन ॥
 बिकट भृकुटि सम श्रवन सुहाए । कुंचित कच मेचक छबि छाए ॥
 पीत झीनि झगुली तन सोही । किलकनि चितवनि भावति मोही ॥
 रूप रासि नृप अजिर बिहारी । नाचहिं निज प्रतिबिंब निहारी ॥
 मोहि सन करहिं बिबिधि विधि ब्रीड । बरनत मोहि होति अति ब्रीडा ॥
 किलकत मोहि धरन जब धावहिं । चलउँ भागि तब पूष देखावहिं ॥
 दो०— आवत निकट हँसहिं प्रभु भाजत रुदन कराहिं ।

जाउँ समीप गहन पद फिरि फिरि चितइ पराहिं ॥ ७७ (क) ॥

प्राकृत सिसु इव लीला देखि भयउ मोहि मोह ।

कवन चरित्र करत प्रभु चिदानंद संदोह ॥ ७७ (ख) ॥

एतना मन आनत खगराया । रघुपति प्रेरित ब्यापी माया ॥
 सो माया न दुखद मोहि काहीं । आन जीव इव संसृत नाहीं ॥
 नाथ इहाँ कह्यु कारन आना । सुनहु सो सावधान हरिजाना ॥
 ग्यान अखंड एक सीताबर । माया बस्य जीव सचराचर ॥
 जौ सब के रह ग्यान एकरस । ईस्वर जीवहि भेद कहहु कस ॥
 माया बस्य जीव अभिमानी । ईस बस्य माया गुन खानी ॥
 परबस जीव स्वबस भगवंता । जीव अनेक एक श्रीकंता ॥
 मुधा भेद जद्यपि कृत माया । बिनु हरि जाइ न कोटि उपाया ॥

दो० — रामचंद्र के भजन बिनु जो चह पद निर्बान ।

ग्यानवंत अपि सो नर पसु बिनु पूछ बिषान ॥ ७८ (क) ॥

राकापति षोड़स उअहिं तारागन समुदाइ ।

सकल गिरिन्ह दव लाइअ बिनु रबि राति न जाइ ॥ ७८ (ख) ॥

ऐसेहिं हरि बिनु भजन खगेसा । मिटइ न जीवन्ह केर कलेसा ॥

हरि सेवकहि न ब्याप अबिद्या । प्रभु प्रेरित ब्यापइ तेहि बिद्या

ताते नास न होइ दास कर । भेद भगति बाढ़इ बिहंगबर ॥

भ्रम तैं चकित राम मोहि देखा । बिहँसे सो सुनु चरित बिसेषा ॥

तेहि कौतुक कर मरमु न काहूँ । जाना अनुज न मातु पिताहूँ ।

जानु पानि धाए मोहि धरना । स्यामल गात अरुन कर चरना ॥

तब मैं भागि चलेऊँ उरगारी । राम गहन कहँ भुजा पसारी ।

जिमि जिमि दूर उड़ाउँ अकासा । तहँ भुज हरि देखउँ निज पासा ।

दो० — ब्रह्मलोक लागि गयउँ मैं चितयउँ पाछ उड़ात ।

जुग अंगुल कर बीच सब राम भुजहि मोहि तात ॥ ७९ (क) ॥

सप्ताबरन भेद करि जहाँ लगें गति मोरि ।

गयउँ तहाँ प्रभु भुज निरखि ब्याकुल भयउँ बहोरि ॥ ७९ (ख) ॥

मूदेऊँ नयन त्रसित जब भयऊँ । पुनि चितवत कोसलपुर गयऊँ ।

मोहि बिलोकि राम मुसुकाहीं । बिहँसत तुरत गयउँ मुख माहीं ॥

उदर भाझ सुनु अंडज राया । देखेऊँ बहु ब्रह्मांड निकाया ।

अति बिचित्र तहँ लोक अनेका । रचना अधिक एक ते एका ॥

कोटिन्ह चतुरानन गौरीसा । अगनित उडगन रबि रजनीसा ॥
अगनित लोकपाल जम काला । अगनित भूधर भूमि बिसाला ॥
सागर सरि सर बिपिन अपारा । नाना भाँति सृष्टि बिस्तारा ॥
सुर मुनि सिद्ध नाग नर किनर । चारि प्रकार जीव सचराचर ॥
दो०— जो नहिं देखा नहिं सुना जो मनहुँ न समाइ ।

सो सब अद्भुत देखेउँ बरनि कवनि बिधि जाइ ॥ ८० (क) ॥

एक एक ब्रह्मांड महुँ रहउँ बरष सत एक ।

एहि बिधि देखत फिरउँ मैं अंड कटाह अनेक ॥ ८० (ख) ॥

लोक लोक प्रति भिन्न बिधाता । भिन्न बिष्णु सिव मनु दिसिजाता ॥
नर गंधर्व भूत बेताला । किनर निर्मचर पसु खग ब्याला ॥
देव दनुज गन नाना जाती । सकल जीव तहँ आनहि भाँती ॥
महि सरि सागर सर गिरि नाना । सब प्रपंच तहँ आनइ आना ॥
अंडकोस प्रति प्रति निज रूपा । देखेउँ त्रिनस अनेक अनूपा ॥
अवधपूरी प्रति भुवन निनारी । सरजू भिन्न भिन्न नर नारी ॥
दसरथ कौसल्या सुनु ताता । बिबिध रूप भरतादिक भ्राता ॥
प्रति ब्रह्मांड राम अवतारा । देखेउँ बालबिनोद अपारा ॥
दो०— भिन्न भिन्न मैं दीख सबु अति बिचित्र हरिजान ।

अगनित भुवन फिरेउँ प्रभु राम न देखेउँ आन ॥ ८१ (क) ॥

सोइ सिसुपन सोइ सोभा सोइ कृपाल रघुबीर ।

भुवन भुवन देखत फिरउँ प्रेरित मोह समीर ॥ ८१ (ख) ॥

भ्रमत मोहि ब्रह्मांड अनेका । बीते मनहुँ कल्प सत एका ॥
 फिरत फिरत निज आश्रम आयउँ । तहँ पुनि रहि कछु काल गवाँयउँ ॥
 निज प्रभु जन्म अवध सुनि पायउँ । निर्भर प्रेम हरषि उठि धायउँ ॥
 देखउँ जन्म महोत्सव जाई । जेहि बिधि प्रथम कहा मैं गाई ॥
 राम उदर देखेउँ जग नाना । देखत बनइ न जाइ बखाना ॥
 तहँ पुनि देखेउँ राम सुजाना । माया पति कृपाल भगवाना ॥
 करउँ बिचार बहोरि बहोरी । मोह कलिल व्यापित मति मोरी ॥
 उभय घरी महँ मैं सब देखा । भयउँ भ्रमित मन मोह बिसेषा ॥
 दो०— देखि कृपाल बिकल मोहि बिहँसे तब रघुबीर ।

बिहँसतहीं मुख बाहेर आयउँ सुनु मतिधीर ॥ ८२ (क) ॥

सोइ लरिकाई मो सन करन लगे पुनि राम ।

कोटि भाँति समुझावउँ मनु न लहइ बिश्राम ॥ ८२ (ख) ॥

देखि चरित यह सो प्रभुताई । समुझत देह दसा बिसराई ॥
 धरनि परेउँ मुख आव न बाता । त्राहि त्राहि आरत जन त्राता ॥
 प्रेमाकुल प्रभु मोहि बिलोकी । निज माया प्रभुता तब रोकी ॥
 कर सरोज प्रभु मम सिर धरेऊ । दीनदयाल सकल दुख हरेऊ ॥
 कीन्ह राम मोहि बिगत बिमोहा । सेवक सुखद कृपा संदोहा ॥
 प्रभुता प्रथम बिचारि बिचारी । मन महँ होइ हरष अति भारी ॥
 भगत बछलता प्रभु कै देखी । उपजी मम उर प्रीति बिसेषी ॥
 सजल नयन पुलकित कर जोरी । कीन्हउँ बहु बिधि बिनय बहोरी ॥

दो०— सुनि सप्रेम मम बानी देखि दीन निज दास।

बचन सुखद गंभीर मृदु बोले रमानिवास ॥ ८३ (क) ॥

काकभसुंड़ि मागु बर अति प्रसन्न मोहि जानि।

अनिमादिक सिद्धि अपर रिधि मोच्छ सकल सुख खानि ॥ ८३ (ख) ॥

ग्यान बिबेक बिरति बिग्याना । मुनि दुर्लभ गुन जे जग नाना ॥

आजु देउँ सब संसय नाही । मागु जो तोहि भाव मन माहीं ॥

सुनि प्रभु बचन अधिक अनुरागेउँ मन अनुमान करन तब लागेउँ ॥

प्रभु कह देन सकल सुख सही । भगति आपनी देन न कही ।

भगति हीन गुन सब सुख ऐसे । लवन बिना बहु बिजन जैसे ॥

भजन हीन सुख कवने काजा । अस बिचारि बोलेउँ खगराजा ॥

जौं प्रभु होइ प्रसन्न बर देहू मो पर करहु कृपा अरु नेहू ॥

मन भावत बर मागउँ स्वामी । तुम्ह उदार उर अंतरजामी ॥

दो० - अबिरल भगति बिसुद्ध तब श्रुति पुरान जो गाव ।

जेहि खोजत जोगीस मुनि प्रभु प्रसाद कोउ पाव ॥ ८४ (क) ॥

भगत कल्पतरु प्रनत हित कृपा सिधु सुख धाम ।

सोइ निज भगति मोहि प्रभु देहु दया करि राम ॥ ८४ (ख) ॥

एवमस्तु कहि रघुकुलनायक । बोले बचन परम सुखदायक ॥

सुनु बायस तैं सहज सयाना । काहे न मागसि अस बरदाना ॥

सब सुख खानि भगति तैं मागी । नहिं जग कोउ तोहि सम बड़भागी ॥

जो मुनि कोटि जतन नहिं लहहीं । जे जप जोग अनल तन दहहीं ॥

रीझेउँ देखि तोरि चतुराई । मागेहु भगति मोहि अति भाई ॥
 सुनु बिहंग प्रसाद अब मोरें । सब सुभ गुन बसिहहिं उर तोरें ॥
 भगति ग्यान बिग्यान बिरागा । जोग चरित्र रहस्य बिभागा ॥
 जानब तैं सबही कर भेदा । मम प्रसाद नहिं साधन खेदा ॥
 दो०— माया संभव भ्रम सब अब न व्यापिहहिं तोहि ।

जानेसु ब्रह्म अनादि अज अगुन गुनाकर मोहि ॥ ८५ (क) ॥

मोहि भगत प्रिय संतत अस बिचारि सुनु काग ।

कार्य बचन मन मम पद करेसु अचल अनुराग ॥ ८५ (ख) ॥

अब सुनु परम बिमल मम बानी । सत्य सुगम निगमादि बखानी ॥
 निज सिद्धांत सुनावउँ तोही । सुनु मन धरु सब तजि भजु मोही ॥
 मम माया संभव संसार । जीव चराचर बिबिधि प्रकारा ॥
 सब मम प्रिय सब मम उपजाए । सब ते अधिक मनुज मोहि भाए ॥
 तिन्ह महुँ द्विज द्विज महुँ श्रुतिधारी । तिन्ह महुँ निगम धरम अनुसारी ।
 तिन्ह महुँ प्रिय बिरक्त पुनि ग्यानी । ग्यानिहु ते अति प्रिय बिग्यानी ॥
 तिन्ह ते पुनि मोहि प्रिय निज दासा । जेहि गति मोरि न दूसरि आसा ॥
 पुनि पुनि सत्य कहउँ तोहि पाहीं । मोहि सेवक सम प्रिय कोउ नाहीं ॥
 भगति हीन बिरंचि किन होई । सब जीवहु सम प्रिय मोहि सोई ॥
 भगतिवंत अति नीचउ प्राणी । मोहि प्रानप्रिय असि मम बानी ॥
 दो०— सुचि सुसील सेवक सुमति प्रिय कहु काहि न लाग ।

श्रुति पुरान कह नीति असि सावधान सुनु काग ॥ ८६ ॥

एक पिता के बिपुल कुमारा । होहिं पृथक गुन सील अचारा ॥
 कोउ पंडित कोउ तापस ग्याता । कोउ धनवंत मूर कोउ दाता ॥
 कोउ सर्वग्य धर्मस्त कोई । सब पर पितहि प्रीति सम होई ॥
 कोउ पितु भगत बचन मन कर्मा । सपनेहुँ जान न दूसर धर्मा ॥
 सो सुत प्रिय पितु प्रान समाना । जद्यपि सो सब भाँति अयाना ॥
 एहि बिधि जीव चराचर जेते । त्रिजग देव नर अमुर समेतै ॥
 अखिल बिस्व यह मोर उपाया । सब पर मोहि बराबरि दाया ॥
 तिन्ह महँ जो परिहरि मद माया । भजै मोहि मन बच अरु काया ॥
 दो०— पुरुष नपुंसक नारि वा जीव चराचर कोइ ।

सर्व भाव भज कष्ट तजि मोहि परम प्रिय सोइ ॥ ८७ (क) ॥

सो०— सत्य कहउँ खग तोहि सुचि सेवक मय प्रानप्रिय ।

अस बिचारि भजु मोहि परिहरि आस भरोस सब ॥ ८७ (ख) ॥

कबहुँ काल न ब्यापिहि तोही । सुमिरेसु भजेसु निरंतर मोही ॥
 प्रभु बचनामृत सुनि न अघाऊँ । तनु पुलकित मन अति हरषाऊँ ॥
 सो सुख जानइ मन अरु काना । नहिं रसना पहिं जाइ बखाना ॥
 प्रभु सोभा सुख जानहिं नयना । कहि किमि सकहिं तिन्हि नहिं बयना ॥
 बहु बिधि मोहि प्रबोधि सुख देई । लगे करन सिंसु कौतुक तेई ॥
 सजल नयन कछु मुख करि रूखा । चितइ मातु लागी अति भूखा ॥
 देखि मातु आतुर उठि धाई । कहि मृदु बचन लिए उर लाई ॥
 गोद राखि कराव पय पाना । रघुपति चरित ललित कर गाना ॥

सो० — जेहि सुख लागि पुरारि असुभ बेष कृत सिव सुखद ।

अवधपुरी नर नारि तेहि सुख महुँ संतत मगन ॥ ८८ (क) ॥

सोई सुख लवलेस जिन्ह बारक सपनेहुँ लहेउ ।

ते नहिं गनहिं खगेस ब्रह्मसुखहि सज्जन सुमति ॥ ८८ (ख) ॥

मैं पुनि अवध रहेउँ कछु काला । देखेउँ बालबिनोद रसाला ॥

राम प्रसाद भगति बर पायउँ । प्रभु पद बंदि निजाश्रम आयउँ ॥

तब ते मोहि न ब्यापी माया । जब ते रघुनायक अपनाया ॥

यह सब गुप्त चरित मैं गावा । हरि मायाँ जिमि मोहि नचावा ।

निज अनुभव अब कहउँ खगेसा । बिनु हरि भजन न जाहिं कलेसा ॥

राम कृपा बिनु सुनु खगराई । जानि न जाइ राम प्रभुताई ॥

जानै बिनु न होइ परतीती । बिनु परतीति होइ नहिं प्रीती ॥

प्रीति बिना नहिं भगति दिदाई । जिमि खगपति जल कै चिकनाई ॥

सो० — बिनु गुर होइ कि ग्यान ग्यान कि होइ बिराग बिनु ।

गावहिं बेद पुरान सुख कि लहिअ हरि भगति बिनु ॥ ८९ (क) ॥

कोउ बिश्राम कि पाव तात सहज संतोष बिनु ।

छलै कि जल बिनु नाव कोटि जतन पचि पचि मरिअ ॥ ८९ (ख) ॥

बिनु संतोष न काम नसाहीं । काम अछत सुख सपनेहुँ नाहीं ।

राम भजन बिनु मिटहिं कि कामा । थल बिहीन तरु कबहुँ कि जामा ॥

बिनु बिग्यान कि समता आवइ । कोउ अवकास कि नभ बिनु पावइ ॥

श्रद्धा बिना धर्म नहिं होई । बिनु महि गंध कि पावइ कोई ॥

बिनु तप तेज कि कर बिस्तारा । जल बिनु रस कि होइ संसारा ॥
 सील कि मिल बिनु बुध सेवकाई । जिमि बिनु तेज न रूप गोसाँई ॥
 निज सुख बिनु मन होइ कि थीरा । परस कि होइ बिहीन समीरा ॥
 कबनिउ सिद्धि कि बिनु बिस्वासा । बिनु हरि भजन न भव भय नासा ॥
 दो०— बिनु बिस्वास भगति नहिं तेहि बिनु द्रवहिं न रामु ।

राम कृपा बिनु सपनेहुँ जीव न लह बिश्रामु ॥ १० (क) ॥

सो०— अस बिचारि मतिधोर तजि कुतर्क संसय सकल ।

भजहु राम रघुबीर करुनाकर सुंदर सुखद ॥ १० (ख) ॥
 निज मति सरिस नाथ मैं गाई । प्रभु प्रताप महिमा खगराई ॥
 कहेउँ न कछु करि जुगति बिसेषी । यह सब मैं निज नयनहि देखी ॥
 महिमा नाम रूप गुन गाथा । सकल अमित अनंत रघुनाथा ॥
 निज निज मति भुनि हरि गुन गावहिं । निगम सेष सिव पार न पावहिं ॥
 तुम्हहि आदि खग भसक प्रजंता । नभ उड़ाहिं नहिं पावहिं अंता ।
 तिमि रघुपति महिमा अवगाहा । तात कबहुँ कोउ पाव कि थाहा ॥
 रामु काम सत कोटि सुभग तन । दुर्गा कोटि अमित अरि मर्दन ॥
 सक्र कोटि सत सरिस बिलासा । नभ सत कोटि अमित अवकासा ॥
 दो०— मरुत कोटि सत विपुल बल रबि सत कोटि प्रकास ।

ससि सत कोटि सुसीतल समन सकल भव त्रास ॥ ११ (क) ॥

काल कोटि सत सरिस अति दुस्तर दुर्ग दुरंत ।

धूपकेतु सत कोटि सम दुराधरष भगवंत ॥ ११ (ख) ॥

प्रभु अगाध सत कोटि पताला । समन कोटि सत सरिस कराला ॥
 तीरथ अमित कोटि सम पावन । नाम अखिल अघ पूग नसावन ॥
 हिमार्गारि कोटि अचल रघुबीरा । सिधु कोटि सत सम गंभीरा ।
 कामधेनु सत कोटि समाना । सकल काम दायक भगवाना ।
 सारद कोटि अमित चतुराई । बिधि सत कोटि सृष्टि निपुनाई ।
 बिष्णु कोटि सम पालन कर्ता । रुद्र कोटि सत सम संहर्ता ।
 धनद कोटि सत सम धनवाना । माया कोटि प्रपंच निधाना ॥
 भार धरन सत कोटि अहीसा । निरवधि निरुपम प्रभु जगदासा ।
 छं०—निरुपम न उपमा आन राम समान रामु निगम कहै ।

जिमि कोटि सत खद्योत सम रबि कहत अति लघुता लहै ॥

एहि भाँति निज निज मति बिलास मुनीस हरिहि बखानहीं ।

प्रभु भाव गाहक अति कृपाल सप्रेम सुनि सुख मानहीं ॥

दो०—रामु अमित गुन सागर थाह कि पावइ कोइ ।

संतन्ह सन जस किछु सुनेउँ तुम्हहि सुनायउँ सोइ ॥ १२ (क) ॥

सो०—भाव बस्य भगवान सुख निधान करुना भवन ।

तजि ममता मद मान भजिअ सदा सीता रवन ॥ १२ (ख) ॥

सुनि भुसुंड़ि के बचन सुहाए । हरषित खगपति पंख फुलाए ॥

नयन नीर मन अति हरषाना । श्रीरघुपति प्रताप उर आना ॥

पाछिल मोह समुझि पछिताना । ब्रह्म अनादि मनुज करि माना ।

पुनि पुनि काग चरन सिरु नावा । जानि राम सम प्रेम बढ़ावा ॥

गुर बिनु भव निधि तरङ्ग न कोई । जौं बिरंचि संकर सम होई ॥
 संसय सर्प ग्रसेउ मोहि ताता । दुखद लहरि कुतर्क बहु ब्राता ॥
 तव सरूप गारुड़ि रघुनायक । मोहि जिआयउ जन सुखदायक ॥
 तव प्रसाद मम मोह नसाना । राम रहस्य अनूपम जाना ॥
 दो०— ताहि प्रसंसि बिबिधि बिधि सीस नाइ कर जोरि ।

बचन बिनीत सप्रेम मृदु बोलेउ गरुड़ बहोरि ॥ ९३ (क) ॥

प्रभु अपने अबिबेक ते ब्रूझउँ स्वामी तोहि ।

कृपासिधु सादर कहहु जानि दास निज मोहि ॥ ९३ (ख) ॥
 तुम्ह सर्बग्य तग्य तम पारा । सुमति सुसील सरल आचारा ॥
 ग्यान बिरति बिग्यान निवासा । रघुनायक के तुम्ह प्रिय दासा ॥
 कारन कवन देह यह पाई । तात सकल मोहि कहहु बुझाई ॥
 राम चरित सर सुंदर स्वामी । पायहु कहाँ कहहु नभगामी ॥
 नाथ सुना मैं अस सिव पाहीं । महा प्रलयहुँ नास तव नाहीं ॥
 मुधा बचन नहिं ईस्वर कहई । सोउ मोरें मन संसय अहई ॥
 अग जग जीव नाग नर देवा । नाथ सकल जगु काल कलेवा ॥
 अंड कटाह अमित लय कारी । कालु सदा दुरतिक्रम भारी ॥
 सो०— तुम्हहि न ब्यापत काल अति कराल कारन कवन ।

मोहि सो कहहु कृपाल ग्यान प्रभाव कि जोग बल ॥ ९४ (क) ॥

दो०— प्रभु तव आश्रम आएँ मोर मोह भ्रम भाग ।

कारन कवन सो नाथ सब कहहु सहित अनुराग ॥ ९४ (ख) ॥

गरुड़ गिरा सुनि हरषेउ कागा । बोलेउ उमा परम अनुरागा ॥
 धन्य धन्य तव मति उरगारी । प्रसन्न तुम्हारि मोहि अति प्यारी ॥
 सुनि तव प्रसन्न सप्रेम सुहाई । बहुत जनम कै सुधि मोहि आई ॥
 सब निज कथा कहउँ मैं गाई । तात सुनहु सादर मन लाई ॥
 जप तप मख सम दम ब्रत दाना । बिरति बिबेक जोग बिग्याना ॥
 सब कर फल रघुपति पद प्रेमा । तेहि बिनु कोउ न पावइ छेमा ॥
 एहिं तन राम भगति मैं पाई । ताते मोहि ममता अधिकाई ॥
 जेहि तैं कछु निज स्वार्थ होई । तेहि पर ममता कर सब कोई ॥
 सो० - पन्नगारि असि नीति श्रुति संपत सज्जन कहहिं ।

अति नीचहु सन प्रीति करिअ जानि निज परम हित ॥ १५ (क) ॥

पाट कीट तैं होइ तेहि तैं पाटंबर रुचिर ।

कृमि पालइ सब कोइ परम अपावन प्रान सम ॥ १५ (ख) ॥
 स्वार्थ साँच जीव कहूँ एहा । मन क्रम बचन राम पद नेहा ॥
 सोइ पावन सोइ सुभग सरीरा । जो तनु पाइ भजिअ रघुबीरा ॥
 राम बिमुख लहि बिधि सम देही । कबि कोबिद न प्रसंसहिं तेही ॥
 राम भगति एहिं तन उर जामी । ताते मोहि परम प्रिय स्वामी ॥
 तजउँ न तन निज इच्छा मरना । तन बिनु बेद भजन नहिं बरना ॥
 प्रथम मोहँ मोहि बहुत बिगोवा । राम बिमुख सुख कबहुँ न सोवा ॥
 नाना जनम कर्म पुनि नाना । किए जोग जप तप मख दाना ॥
 कवन जोनि जनमेउँ जहँ नाहीं । मैं खगेस भ्रमि भ्रमि जग माहीं ॥

देखेउँ करि सब करम गोसाईं । सुखी न भयउँ अबहिं की नाई ॥
सुधि मोहि नाथ जन्म बहु केरी । सिव प्रसाद मति मोहँ न घेरी ॥
दो० — प्रथम जन्म के चरित अब कहउँ सुनहु बिहगैस ।

सुनि प्रभु पद रति उपजइ जातैं मिटहिं कलेस ॥ ९६ (क) ॥

पुरुष कल्प एक प्रभु जग कलिजुग मल मूल ।

नर अरु नारि अधर्मरत सकल निगम प्रतिकूल ॥ ९६ (ख) ॥

तेहिं कलिजुग कोसलपुर जाई । जन्मत भयउँ सूद्र तनु पाई ॥
सिव सेवक मन क्रम अरु बानी । आन देव निंदक अभिमानी ॥
धन मद मत्त परम बाचाला । उग्रबुद्धि उर दंभ बिसाला ॥
जदपि रहेउँ रघुपति रजधानी । तदपि न कछु महिमा तब जानी ॥
अब जाना मैं अवध प्रभावा । निगमागम पुरान अस गावा ॥
कवनेहुँ जन्म अवध बस जोई । राम परायन सो परि होई ॥
अवध प्रभाव जान तब प्रानी । जब उर बसहिं रामु धनुषानी ॥
सो कलिकाल कठिन उरगारी । पाप परायन सब नर नारी ॥
दो० — कलिमल ग्रसे धर्म सब लुप्त भए सदग्रंथ ।

दंभिन्ह निज मति कल्पि करि प्रगट किए बहु पंथ ॥ ९७ (क) ॥

भए लोग सब मोहबस लोभ ग्रसे सुभ कर्म ।

सुनु हरिजान ग्यान निधि कहउँ कलुक कलिधर्म ॥ ९७ (ख) ॥

बरन धर्म नहिं आश्रम चारी । श्रुति बिरोध रत सब नर नारी ॥
द्विज श्रुति बेचक भूप प्रजासन । कोउ नहिं मान निगम अनुसासन ॥

मारग सोइ जा कहूँ जोइ भावा । पंडित सोइ जो गाल बजावा ॥
 मिथ्यारंभ दंभ रत जोई । ता कहूँ संत कहइ सब कोई ॥
 सोइ सयान जो परधन हारी । जो कर दंभ सो बड़ आचारी ॥
 जो कह झूठ मसखरी जाना । कलिजुग सोइ गुनवंत बखाना ॥
 निराचार जो श्रुति पथ त्यागी । कलिजुग सोइ ग्यानी सो बिगगी ॥
 जाकेँ नख अरु जटा बिसाला । सोइ तापस प्रसिद्ध कलिकाला ॥
 दो०— असुभ बेष भूषन धरें भच्छाभच्छ जे खाहिं ।

तेइ जोगी तेइ सिद्ध नर पूज्य ते कलिजुग माहिं ॥ ९८ (क) ॥

सो०— जे अपकारी चार तिन्ह कर गौरव मान्य तेइ ।

मन क्रम बचन लबार तेइ बकता कलिकाल महूँ ॥ ९८ (ख) ॥

नारि बिबस नर सकल गोसाईं । नाचहिं नट मर्कट की नाई ॥
 सूद्र द्विजन्ह उपदेसहिं ग्याना । मेलि जनेऊ लेहिं कुदाना ॥
 सब नर काम लोभ रत क्रोधी । देव बिप्र श्रुति संत बिरोधी ॥
 गुन मंदिर सुंदर पति त्यागी । भजहिं नारि पर पुरुष अभागी ॥
 सौभागिनीं बिभूषन हीना । बिधवन्ह के सिंगार नबीना ॥
 गुर सिष बधिर अंध का लेखा । एक न सुनइ एक नहिं देखा ॥
 हरइ सिष्य धन सोक न हरई । सो गुर घोर नरक महूँ परई ॥
 मातु पिता बालकन्ह बोलावहिं । उदर भरै सोइ धर्म सिखावहिं ॥
 दो०— ब्रह्म ग्यान बिनु नारि नर कहहिं न दूसरि बात ।

कौड़ी लागि लोभ बस करहिं बिप्र गुर घात ॥ ९९ (क) ॥

बादहिं सूद्र द्विजन्ह सन हम तुम्ह ते कछु घाटि ।

जानइ ब्रह्म सो बिप्रवर आँखि देखावहिं डाटि ॥ १९ (ख) ॥

पर त्रिय लंपट कपट सयाने । मोह द्रोह ममता लपटाने ॥

तेइ अभेदवादी ग्यानी नर । देखा मैं चरित्र कलिजुग कर ॥

आपु गए अरु तिन्हू घालहिं । जे कहूँ सत मारग प्रतिपालहिं ॥

कल्प कल्प भरि एक एक नरका । परहिं जे दूषहिं श्रुति करि तरका ॥

जे बरनाधम तेलि कुम्हारा । स्वपच्च किरात कोल कलवारा ॥

नारि मुई गृह संपति नासी । मूड़ मुड़ाइ होहिं संन्यासी ॥

ते बिप्रन्ह सन आपु पुजावहिं । उभय लोक निज हाथ नसावहिं ॥

बिप्र निरच्छर लोलुप कामी । निराचार सठ बृषली स्वामी ॥

सूद्र करहिं जप तप ब्रत नाना । बैठि बरासन कहहिं पुराना ॥

सब नर कल्पित करहिं अचारा । जाइ न बरनि अनीति अपारा ॥

दो० — भए बरन संकर कलि भित्रसेतु सब लोग ।

करहिं पाप पावहिं दुख भय रुज सोक बियोग ॥ १०० (क) ॥

श्रुति संमत हरि भक्ति पथ संजुत बिरति बिबेक ।

तेहिं न चलहिं नर मोह बस कल्पहिं पंथ अनेक ॥ १०० (ख) ॥

छं० — बहु दाम सँवारहिं धाम जती । बिषया हरि लीन्हि न रहि बिरती ॥

तपसी धनवंत दरिद्र गृही । कलि कौतुक तात न जात कही ॥

कुलवंति निकारहिं नारि सती । गृह आनहिं चेरि निबेरि गती ॥

सुत मानहिं मातु पिता तब लौं । अबलानन दीख नहीं जब लौं ॥

समुरारि पिआरि लगी जब तैं । रिपुरुप कुटुंब भए तब तैं ॥
 नृप पाप परायन धर्म नहीं । करि दड बिडंब प्रजा नितहीं ॥
 धनवंत कुलीन मलीन अपी । द्विज चिन्ह जनेउ उधार तपी ॥
 नहिं मान पुरान न बेदहि जो । हरि सेवक संत सही कलि सो ॥
 कवि बृंद उदार दुनी न सुनी । गुन दूषक ब्रात न कोपि गुनी ॥
 कलि बारहिं बार दुकाल परै । बिनु अन्न दुखी सब लोग मरै ॥

दो० — सुनु खगेस कलि कपट हठ दंभ द्वेष पाषंड ।

मान मोह मारादि मद व्यापि रहे ब्रह्मंड ॥ १०१ (क) ॥

तामस धर्म करहिं नर जप तप ब्रत मख दान ।

देव न बरषहिं धरनीं बए न जामहिं धान ॥ १०१ (ख) ॥

छं० — अबला कच भूषन भूरि छुधा । धनहीन दुखी ममता बहुधा ॥

सुख चाहिं मूढ़ न धर्म रता । मति थोरि कठोरि न कोमलता ॥

नर पीड़ित सेग न भोग कहीं । अभिमान बिरोध अकारनहीं ॥

लघु जीवन संबतु पंच दसा । कलपांत न नास गुमानु असा ॥

कलिकाल बिहाल किए मनुजा । नहिं मानत कौं अनुजा तनुजा ॥

नहिं तोष बिचार न सीतलता । सब जाति कुजाति भए मगता ॥

इरिषा परुषाच्छ लालुपता । भरि पूरि रही समता खिगता ॥

सब लोग बियोग बिसोक हए । बरनाश्रम धर्म अचार गए ॥

दम दान दया नहिं जानपनी । जड़ता परबंचनताति घनी ॥

तनु पोषक नारि नरा सगरे । परनिदक जे जग मो बगरे ॥

दो०— सुनु ब्यालारि काल कलि मल अवगुन आगार ।

गुनउ बहुत कलिजुग कर बिनु प्रयास निस्तार ॥ १०२ (क) ॥

कृतजुग त्रेताँ द्वापर पूजा मख अरु जोग ।

जो गति होइ सो कलि हरि नाम ते पावहि लोग ॥ १०२ (ख) ॥

कृतजुग सब जोगी बिग्यानी । करि हरि ध्यान तरहिं भव प्रानी ॥

त्रेताँ बिबिध जग्य नर करहीं । प्रभुहि समर्पि कर्म भव तरहीं ॥

द्वापर करि रघुपति पद पूजा । नर भव तरहिं उपाय न दूजा ॥

कलिजुग केवल हरि गुन गाहा । गावत नर पावहिं भव थाहा ॥

कलिजुग जोग न जग्य न ग्याना । एक अधार राम गुन गाना ॥

सब भरोस तजि जो भज रामहि । प्रेम समेत गाव गुन ग्रामहि ॥

सोइ भव तर कछु संसय नाहीं । नाम प्रताप प्रगट कलि माहीं ॥

कलि कर एक पुनीत प्रतापा । मानस पुन्य होहिं नहिं यापा ॥

दो०— कलिजुग सम जुग आन नहिं जाँ नर कर बिस्वास ।

गाइ राम गुन गन बिमल भव तर बिनहिं प्रयास ॥ १०३ (क) ॥

प्रगट चारि पद धर्म के कलि महँ एक प्रधान ।

जेन केन बिधि दीन्हें दान करइ कल्याण ॥ १०३ (ख) ॥

नित जुग धर्म होहिं सब केरे । हृदयँ राम माया के प्रेरे ॥

सुद्ध सत्त्व समता बिग्याना । कृत प्रभाव प्रसन्न मन जाना ॥

सत्त्व बहुत रज कछु रति कर्मा । सब बिधि सुख त्रेता कर धर्मा ॥

बहु रज स्वल्प सत्त्व कछु तामस । द्वापर धर्म हरष भय मानस ॥

तामस बहुत रजोगुन थोरा । कलि प्रभाव बिरोध चहुँ ओरा ॥
 बुध जुग धर्म जानि मन माहीं । तजि अधर्म रति धर्म कराहीं ।
 काल धर्म नहिं ब्यापहिं ताही । रघुपति चरन प्रीति अति जाही ॥
 नट कृत बिकट कपट खगराया । नट सेवकहि न ब्यापइ माया ॥
 दो०— हरि माया कृत दोष गुन बिनु हरि भजन न जाहिं ।

भजिअ राम तजि काम सब अस बिचारि मन माहिं ॥ १०४ (क) ॥

तेहिं कलिकाल बरष बहु बसेउँ अवध बिहगेस ।

परेउ दुकाल बिपति बस तब मैं गयउँ बिदेस ॥ १०४ (ख) ॥
 गयउँ उजेनी सुनु उरगारी । दीन मलीन दरिद्र दुखारी ॥
 गएँ काल कछु संपति पाई । तहँ पुनि करउँ संभु सेवकाई ।
 बिप्र एक बैदिक सिव पूजा । करइ सदा तेहि काजु न दूजा ॥
 परम साधु परमारथ बिंदक । संभु उपासक नहिं हरि निदक ॥
 तेहि सेवउँ मैं कपट समेता । द्विज दयाल अति नीति निकेता ॥
 बाहिज नम्र देखि मोहि साई । बिप्र पढ़ाव पुत्र की नाई ॥
 संभु मंत्र मोहि द्विजवर दीन्हा । सुभ उपदेस बिबिध बिधि कीन्हा ॥
 जपउँ मंत्र सिव मंदिर जाई । हृदय दंभ अहमिति अधिकाई ।
 दो०— मैं खल मल संकुल मति नीच जाति बस मोह ।

हरिजन द्विज देखें जरउँ करउँ बिष्णु कर द्रोह ॥ १०५ (क) ॥

सो०— गुर नित मोहि प्रबोध दुखित देखि आचरण मम ।

मोहि उपजइ अति क्रोध दंभिहि नीति कि भावई ॥ १०५ (ख) ॥

एक बार गुर लीन्ह बोलाई । मोहि नीति बहु भाँति सिखाई ॥
 सिव सेवा कर फल सुत सोई । अबरल भगति राम पद होई ॥
 रामहि भजहिं तात सिव धाता । नर पावँर कै केतिक बाता ॥
 जासु चरन अज सिव अनुरागी । तासु द्रोहँ सुख चहसि अभागी ॥
 हर कहँ हरि सेवक गुर कहेऊ । सुनि खगनाथ हृदय मम दहेऊ ॥
 अधम जाति मैं बिद्या पाएँ । भयउँ जथा अहि दूध पिआएँ ।
 मानी कुटिल कृभाग्य कुजाती । गुर कर द्रोह करउँ दिनु राती ॥
 अति दयाल गुर स्वल्प न क्रोधा । पुनि पुनि मोहि सिखाव सुबोधा ॥
 जेहि ते नीच बड़ाई पावा । सो प्रथमहिं हति ताहि नसावा ॥
 धूम अनल संभव सुनु भाई । तेहि बुझाव धन पदवी पाई ॥
 रज मग परी निरादर रहई । सब कर पद प्रहार नित सहई ॥
 मरुत उड़ाव प्रथम तेहि भरई । पुनि नृप नयन किरीटन्ह परई ॥
 सुनु खगपति अस समुझि प्रसंगा । बुध नहिं करहिं अधम कर संग ॥
 कबि कोबिद गावहिं असि नीती । खल सन कलह न भल नहिं प्रीती ॥
 उदासीन नित रहिअ गोसाई । खल परिहरिअ स्वान की नाई ॥
 मैं खल हृदयँ कपट कुटिलाई । गुर हित कहइ न मोहि सोलाई ॥
 दो० - एक बार हर मंदिर जपत रहेउँ सिव नाम ।

गुर आयउ अभिमान तैं उठि नहिं कीन्ह प्रनाम ॥ १०६ (क) ॥

सो दयाल नहिं कहेउ कछु उर न रोष लवलेस ।

अति अध गुर अपमानता सहि नहिं सके महेस ॥ १०६ (ख) ॥

मंदिर माझ भई नभनानी । रे हतभाग्य अग्य अभिमानी ॥
 जद्यपि तव गुर केँ नहिं क्रोधा । अति कृपाल चित सम्यक बोधा ॥
 तदपि साप सठ दैहउँ तोही । नीति बिरोध सोहाइ न मोही ॥
 जौं नहिं दंड करौं खल तोरा । भ्रष्ट होइ श्रुतिमारग मोरा ।
 जे सठ गुर सन इरिषा करहीं । रौरव नरक कोटि जुग परहीं ॥
 त्रिजग जोनि पुनि धरहिं सरीरा । अयुत जन्म भरि पावहिं पीरा ॥
 बैठ रहेसि अजगर इव पापी । सर्प होहि खल मल मति ब्यापी ॥
 महा बिटप कोटर पहुँ जाई । रहु अधमाधम अधगति पाई ॥
 दो०— हाहाकार कीन्ह गुर दारुन सुनि सिव साप ।

कंपित मोहि बिलोकि अति उर उपजा परिताप ॥ १०७ (क) ॥

करिं दंडवत सप्रेम द्विज सिव समुख कर जोरि ।

बिनय करत गदगद स्वर समुझि घोर गति धोरि ॥ १०७ (ख) ॥

छं०-नमामीशमीशान निर्वाणरूपं । विभुं व्यापकं ब्रह्म वेदस्वरूपं ॥

निजं निर्गुणं निर्विकल्पं निरीहं । चिदाकाशमाकाशवासं भजेऽहं ॥

निराकारमोकारमूलं तुरीयं । गिरा ग्यान गोतीतमीशं गिरीशं ॥

कालं महाकाल कालं कृपालं । गुणागार संसारघारं नतोऽहं ॥

तुषारात्रि संकाश गौरं गभीरं । मनोभूत कोटि प्रभा श्री शरीरं ॥

स्फुरन्मौलि कल्लोलिनी चारु गंगा । लसद्भालबालेन्दु कंठे भुजंगा ॥

चलत्कुंडलं धू सुनेत्रं विशालं । प्रसन्नाननं नीलकंठं दयालं ॥

मृगाधीशचर्माम्बरं मुण्डमालं । प्रियं शंकरं सर्वनाथं भजामि ॥

प्रचंडं प्रकृष्टं प्रगल्भं परेशं । अखंडं अजं भानुकोटिप्रकाशं ॥
 त्रयः शूल निर्मूलनं शूलपाणिं । भजेऽहं भवानीपतिं भावगम्यं ॥
 कलातीत कल्याण कल्पान्तकारी । सदा सज्जनानन्ददाता पुरारी ॥
 चिदानन्द संदोह मोहापहारी । प्रसीद प्रसीद प्रभो मन्मथारी ॥
 न यावद् उमानाथ पादारविन्दं । भजंतीह लोके परे वा नराणां ॥
 न तावत्सुखं शान्ति सन्तापनाशं । प्रसीद प्रभो सर्वभूताधिवासं ॥
 न जानामि योगं जपं नैव पूजां । नतोऽहं सदा सर्वदा शंभु तुभ्यं ॥
 जरा जन्म दुःखौघ तातप्यमानं । प्रभो पाहि आपन्नयामीश शंभो ॥

श्लोक—रुद्राष्टकमिदं प्रोक्तं विप्रेण हरतोषये ।

ये घठन्ति नरा भक्त्या तेषां शम्भुः प्रसीदति ॥

दो०— सुनि बिनती सर्वग्य सिव देखि बिप्र अनुरागु ।

पुनि मंदिर नभबानी भइ द्विजबर बर भागु ॥ १०८ (क) ॥

जौं प्रसन्न प्रभु मों पर नाथ दीन पर नेहु ।

निज पद भगति देइ प्रभु पुनि दूसर बर देहु ॥ १०८ (ख) ॥

तव माया बस जीव जड़ संतत फिरइ भुलान ।

तेहि पर क्रोध न करिअ प्रभु कृपासिंधु भगवान ॥ १०८ (ग) ॥

संकर दीनदयाल अब एहि पर होहु कृपाल ।

साप अनुग्रह होइ जेहिं नाथ थोरेहीं काल ॥ १०८ (घ) ॥

एहि कर होइ परम कल्याणा । सोइ करहु अब कृपानिधाना ॥

बिप्र गिरा सुनि परहित सानी । एवमस्तु इति भइ नभबानी ॥

जदपि कीन्ह एहिं दारुन पापा । मैं पुनि दीन्हि कोप करि सापा ॥
 तदपि तुम्हारि साधुता देखी । करिहउँ एहि पर कृपा बिसेषी ॥
 छमासील जे पर उपकारी । ते द्विज मोहि प्रिय जथा खरारी ।
 मोर श्राप द्विज व्यर्थ न जाइहि । जन्म सहस अवस्य यह पाइहि ॥
 जनमत मरत दुसह दुख होई । एहि स्वल्पउ नहिं व्यापिहि सोई ॥
 कवनेउँ जन्म मिटिहि नहिं ग्याना । सुनहि सूद्र मम बचन प्रवाना ॥
 रघुपति पुरी जन्म तव भयऊ । पुनि तैं मम सेवौं मन दयऊ ॥
 पुरी प्रभाव अनुग्रह मोरें । राम भगति उपजिहि उर तोरें ॥
 सुनु मम बचन सत्य अब भाई । हरितोषन ब्रत द्विज सेवकाई ॥
 अब जनि करहि बिप्र अपमाना । जानेसु संत अनंत समाना ॥
 इंद्र कुलिस मम सूल बिसाला । कालदंड हरि चक्र कराला ।
 जो इन्ह कर मारा नहिं मरई । बिप्र द्रोह पावक सो जरई ॥
 अस बिबेक राखेहु मन माहीं । तुम्ह कहैं जग दुर्लभ कछु नाहीं ॥
 औरउ एक आसिषा मोरी । अप्रतिहत गति होइहि तोरी ॥

दो०— सुनि सिव बचन हरषि गुर एवमस्तु इति भाषि ।

मोहि प्रबोधि गयउ गृह संभु चरन उर राखि ॥ १०९ (क) ॥

प्रेरित काल बिंधि गिरि जाइ भयउँ मैं ब्याल ।

पुनि प्रयास बिनु सो तनु तजेउँ गएँ कछु काल ॥ १०९ (ख) ॥

जोइ तनु धरउँ तजउँ पुनि अनायास हरिजान ।

जिमि नूतन पद पहिरइ नर परिहरइ पुरान ॥ १०९ (ग) ॥

सिखँ राखी श्रुति नीति अरु मैं नहिं पावा क्लेश ।

एहि बिधि धरेउँ बिबिधि तनु ग्यान न गयउ खगेस ॥ १०९ (घ) ॥
 त्रिजग देव नर जोइ तनु धरऊँ । तहँ तहँ राम भजन अनुसरऊँ ॥
 एक सूल मोहि बिसर न काऊँ । गुर कर कोमल सील सुभाऊँ ॥
 चरम देह द्विज कै मैं पाई । सुर दुर्लभ पुरान श्रुति गाई ॥
 खेलउँ तहूँ बालकन्ह मोला । करउँ सकल रघुनायक लीला ॥
 प्रौढ़ भएँ मोहि पिता पढ़ावा । समझउँ सुनउँ गुनउँ नहिं भावा ॥
 मन ते सकल बासना भागी । केवल राम चरन लय लागी ॥
 कहु खगेस अस कवन अभागी । खरी सेव सुरधेनुहि त्यागी ॥
 प्रेम मगन मोहि कछु न सोहाई । हारेउ पिता पढ़ाई पढ़ाई ॥
 भए कालबस जब पितु माता । मैं बन गयउँ भजन जनत्राता ॥
 जहँ जहँ बिपिन मुनीस्वर पावउँ । आश्रम जाइ जाइ सिरु नावउँ ॥
 बूझउँ तिन्हहि राम गुन गाहा । कहहिं सुनउँ हरषित खगनाहा ॥
 सुनत फिरउँ हरि गुन अनुबादा । अब्याहत गति संभु प्रसादा ॥
 छूटी त्रिविधि ईषना गाढ़ी । एक लालसा उर अति बाढ़ी ॥
 राम चरन बारिज जब देखौं । तब निज जन्म सफल करि लेखौं ॥
 जेहि पूँछउँ सोइ मुनि अस कहई । ईस्वर सर्व भूतमय अहई ॥
 निर्गुन मत नहिं मोहि सोहाई । सगुन ब्रह्म रति उर अधिकाई ॥
 दो०— गुर के बचन सुरति करि राम चरन मनु लाग ।

रघुपति जस गावत फिरउँ छन छन नव अनुराग ॥ ११० (क) ॥

सठ स्वपच्छ तव हृदयँ बिसाला । सपदि होहि पच्छी चंडाला
लीन्ह श्राप मैं सीस चढ़ाई । नहिं कछु भय न दीनता आई ॥
दो० — तुरत भयउँ मैं काग तब पुनि मुनि पद सिरु नाइ ।

सुमिरि राम रघुवंस मनि हरषित चलेउँ उड़ाइ ॥ ११२ (क) ॥

उमा जे राम चरन रत बिगत काम मद क्रोध ।

निज प्रभुमय देखहि जगत केहि सन करहि बिरोध ॥ ११२ (ख) ॥

सुनु खगेस नहिं कछु रिषि दूषन । उर प्रेरक रघुवंस बिभूषन ॥
कृपासिंधु मुनि मति करि भोरी । लीन्ही प्रेम परिच्छा मोरी ॥
मन बच क्रम मोहि निज जन जाना । मुनि मति पुनि फेरी भगवाना ॥
रिषि मम महत सीलता देखी । राम चरन बिस्वास बिसेषी ॥
अति बिसमय पुनि पुनि पछिताई । सादर मुनि मोहि लीन्ह बौलाई ॥
मम परितोष बिबिधि बिधि कीन्हा । हरषित राममंत्र तब दीन्हा ।
बालकरूप राम कर ध्याना । कहेउ मोहि मुनि कृपानिधाना ॥
सुंदर सुखद मोहि अति भावा । सो प्रथमहिं मैं तुम्हहि सुनावा ॥
मुनि मोहि कछुक काल तहँ राखा । रामचरितमानस तब भाषा ॥
सादर मोहि यह कथा सुनाई । पुनि बोले मुनि गिरा सुहाई ॥
रामचरित सर गुप्त सुहावा । संभु प्रसाद तात मैं पावा ॥
तोहि निज भगत राम कर जानी । ताते मैं सब कहेउँ बखानी ॥
राम भगति जिन्ह के उर नाहीं । कबहुँ न तात कहिअ तिन्ह पाहीं ॥
मुनि मोहि बिबिधि भाँति समुझावा । मैं सप्रेम मुनि पद सिरु नावा ॥

निज कर कमल परसि मम सीसा । हरषित आसिष दीन्ह मुनीसा ।
 राम भगति अबिरल उर तोरें बसिहि सदा प्रसाद अब मोरें ॥
 दो०— सदा राम प्रिय होहु तुम्ह सुभ गुन भवन अमान ।

कामरूप इच्छामरन ग्यान विराग निधान ॥ ११३ (क) ॥

जेहि आश्रम तुम्ह बसब पुनि सुमिरत श्रीभगवंत ।

ब्यापिहि तहैं न अबिद्या जोजन एक प्रजंत ॥ ११३ (ख) ॥

काल कर्म गुन दोष सुभाऊ कछु दुख तुम्हहि न ब्यापिहि काऊ
 राम रहस्य ललित बिधि नाना । गुप्त प्रगट इतिहास पुराना ॥
 बिनु श्रम तुम्ह जानब सब सोऊ । नित नव नेह राम पद होऊ ॥
 जो इच्छा करिहहु मन माहीं । हरि प्रसाद कछु दुर्लभ नाहीं ॥
 सुनि मुनि आसिष सुनु मतिधीरा ब्रह्मगिरा भइ गगन गँभीरा ॥
 एवमस्तु तव बच मुनि ग्यानी । यह मम भगत कर्म मन बानी ॥
 सुनि नभगिरा हरष मोहि भयऊ । प्रेम मगन सब संसय गयऊ ॥
 करि बिनती मुनि आयसु पाई । पद सरोज पुनि पुनि सिरु नाई ॥
 हरष सहित एहिं आश्रम आयउँ । प्रभु प्रसाद दुर्लभ बर पायउँ ॥
 इहाँ बसत मोहि सुनु खग ईसा । बीते कलप सात अरु बीसा ॥
 करउँ सदा रघुपति गुन गाना । सादर सुनहिं बिहंग सुजाना ।
 जब जब अवधपुरी रघुबीरा । धरहिं भगत हित मनुज सरीरा ॥
 तब तब जाइ राम पुर रहऊँ । सिसुलीला बिलोकि सुख लहऊँ ॥
 पुनि उर राखि राम सिसुरूपा । निज आश्रम आवउँ खगभूपा ॥
 कथा सकल मैं तुम्हहि सुनाई । काग देह जेहिं कारन पाई ।

कहिउँ तात सब प्रसन्न तुम्हारी । राम भगति महिमा अति भारी ॥

दो०— ताते यह तन मोहि प्रिय भयउ राम पद नेह ।

निज प्रभु दरसन पायउँ गए सकल संदेह ॥ ११४ (क) ॥

मासपारायण, उनतीसवाँ चिश्राम

भगति पच्छ हठ करि रहेउँ दीन्हि महारिषि साप ।

मुनि दुर्लभ बर पायउँ देखहु भजन प्रताप ॥ ११४ (ख) ॥

जे असि भगति जानि परिहरहीं । केवल ग्यान हेतु श्रम करहीं ॥

ते जड़ कामधेनु गृहैं त्यागी । खोजत आकु फिरहिं पय लागी ॥

सुनु खगेस हरि भगति बिहाई । जे सुख चाहहिं आन उपाई ॥

ते सठ महासिधु बिनु तरनी । पैरि पार चाहहिं जड़ करनी ॥

सुनि भसुंड़ि के बचन भवानी । बोलेउ गरुड़ हरषि मृदु बानी ॥

तव प्रसाद प्रभु मम उर भाहीं । संसय सोक मोह भ्रम नाहीं ॥

सुनेउँ पुनीत राम गुन ग्रामा । तुम्हरी कृपाँ लहेउँ बिश्रामा ॥

एक बात प्रभु पूँछउँ तोही । कहहु बुझाइ कृपानिधि मोही ॥

कहहिं संत मुनि बेद पुराना । नहिं कछु दुर्लभ ग्यान समाना ।

सोइ मुनि तुम्ह सन कहेउ गोसाईं । नहिं आदरेहु भगति की नाई ॥

ग्यानहि भगतिहि अंतर केता । सकल कहहु प्रभु कृपा निकेता ॥

सुनि उरगारि बचन सुख माना । सादर बोलेउ काग सुजाना ॥

भगतिहि ग्यानहि नहिं कछु भेदा । उभय हरहिं भव संभव खेदा ॥

नाथ मुनीस कहहिं कछु अंतर । सावधान सोउ सुनु बिहंगबर ॥

ग्यान बिराग जोग बिग्याना । ए सब पुरुष सुनहु हरिजाना ॥
पुरुष प्रताप प्रबल सब भाँती । अबला अबल सहज जड़जाती ॥
दो०—पुरुष त्यागि सक नारिहि जो बिरक्त मति धीर।

न तु कामी बिषयाबस बिमुख जो पद रघुबीर ॥ ११५ (क) ॥

सो०—सोउ मुनि ग्याननिधान मृगनयनी बिधु मुख निरखि।

बिबस होइ हरिजान नारि बिघु माया प्रगट ॥ ११५ (ख) ॥
इहाँ न पच्छपात कछु राखउँ । बेद पुरान संत मत भाषउँ ॥
मोह न नारि नारि कै रूपा । पन्नगारि यह रीति अनूपा ॥
माया भगति सुनहु तुम्ह दोऊ । नारि बर्ग जानइ सब कोऊ ॥
पुनि रघुबीरहि भगति पिआरी । माया खलु नर्तकी बिचारी ॥
भगतिहि सानुकूल रघुराया । ताते तेहि डरपति अति माया ॥
राम भगति निरुपम निरुपाधी । बसइ जासु उर सदा अबाधी ॥
तेहि बिलोकि माया सकुचाई । करि न सकइ कछु निज प्रभुताई ॥
अस बिचारि जे मुनि बिग्यानी । जाचहिं भगति सकल सुख खानी ॥
दो०—यह रहस्य रघुनाथ कर बेगि न जानइ कोइ।

जो जानइ रघुपति कृपाँ सपनेहुँ मोह न होइ ॥ ११६ (क) ॥

औरउ ग्यान भगति कर भेद सुनहु सुप्रबीन।

जो सुनि होइ राम पद प्रीति सदा अबिछीन ॥ ११६ (ख) ॥

सुनहु तात यह अकथ कहानी । समुझत बनइ न जाइ बखानी ॥
ईस्वर अंस जीव अबिनासी । चेतन अमल सहज सुखरासी ॥

सो मायाबस भयउ गोसाई । बँध्यो कीर मरकट की नाई ॥
 जड़ चेतनहि ग्रंथि परि गई । जदपि मृषा छूटत कठिनई ॥
 तब ते जीव भयउ संसारी । छूट न ग्रंथि न होइ सुखारी ॥
 श्रुति पुरान बहु कहेउ उपाई । छूट न अधिक अधिक अरुझाई ॥
 जीव हृदयँ तम मोह बिसेषी । ग्रंथि छूट किमि परइ न देखी ॥
 अस संजोग ईस जब करई । तबहुँ कदाचित सो निरुअरई ॥
 सात्त्विक श्रद्धा धेनु सुहाई । जौं हरि कृपाँ हृदयँ बस आई ॥
 जप तप व्रत जम नियम अपारा । जे श्रुति कह सुभ धर्म अचारा ॥
 तेइ तून हरित चरै जब गाई । भाव बच्छ सिसु पाइ पेन्हाई ॥
 नोइ निबृत्ति पात्र बिस्वासा । निर्मल मन अहीर निज दासा ॥
 परम धर्ममय पय दुहि भाई । अवटै अनल अकाम बनाई ॥
 तोष मरुत तब छमाँ जुड़ावै । धृति सम जावनु देइ जमावै ॥
 मुदितौं मथै बिचार मथानी । दम आधार रजु सत्य सुबानी ॥
 तब मथि काढ़ि लेइ नवनीता । बिमल बिराग सुभग सुपुनीता ॥

दो० — जोग अगिनि करि प्रगट तब कर्म सुभासुभ लाइ ।

बुद्धि सिरावै ग्यान घृत ममता मल जरि जाइ ॥ ११७ (क) ॥

तब बिग्यानरूपिनी बुद्धि बिसद घृत पाइ ।

चित्त दिआ भरि धरै दृढ़ समता दिअटि बनाइ ॥ ११७ (ख) ॥

तीनि अवस्था तीनि गुन तेहि कपास तैं काढ़ि ।

तूल तुरीय संवारि पुनि जाती करै सुगाढ़ि ॥ ११७ (ग) ॥

सो०—एहि बिधि लेसै दीप तेज रासि बिग्यानमय।

जातहिं जामु समीप जरहिं मदादिक सलभ सब ॥ ११७ (घ) ॥
 सोहमस्मि इति बृत्ति अखंडा । दीप सिखा सोइ परम प्रचंडा ॥
 आतम अनुभव सुख सुप्रकासा । तब भव मूल भेद भ्रम नासा ॥
 प्रबल अबिद्या कर परिवारा । मोह आदि तम मिटइ अपारा ॥
 तब सोइ बुद्धि पाइ उँजआरा । उर गृहँ बैठि ग्रंथि निरुआरा ॥
 छोरन ग्रंथि पाव जौँ सोई । तब यह जीव कृतारथ होई ॥
 छोरत ग्रंथि जानि खगराया । बिघ्न अनेक करइ तब माया ॥
 रिद्धि सिद्धि प्रेइ बहु भाई । बुद्धिहि लोभ दिखावहिं आई ॥
 कल बल छल करि जाहिं समीपा । अंचल बात बुझावहिं दीपा ॥
 होइ बुद्धि जौँ परम सयानी । तिन्ह तन चितव न अनहित जानी ॥
 जौँ तेहि बिघ्न बुद्धि नहिं बाधी । तौ बहोरि सुर करहिं उपाधी ॥
 इंद्री द्वार झरोखा नाना । तहँ तहँ सुर बैठे करि थाना ॥
 आवत देखहिं बिषय बयारी । ते हठि देहिं कपाट उधारी ॥
 जब सो प्रभंजन उर गृहँ जाई । तबहिं दीप बिग्यान बुझाई ॥
 ग्रंथि न छूटि मिटा सो प्रकासा । बुद्धि बिकल भइ बिषय बतासा ॥
 इंद्रिन्ह सुरन्ह न ग्यान सोहाई । बिषय भोग पर प्रीति सदाई ॥
 बिषय समीर बुद्धि कृत भोरी । तेहि बिधि दीप को बार बहोरी ॥
 दो० — तब फिरि जीव बिबिधि बिधि पावइ संसृति क्लेस ।

हरि माया अति दुस्तर तरि न जाइ बिहगोस ॥ ११८ (क) ॥

कहत कठिन समुझत कठिन साथत कठिन बिवेक ।

होइ घुनाच्छ न्याय जौ पुनि प्रत्यूह अनेक ॥ ११८ (ख) ॥
 ग्यान पंथ कृपान कै धारा । परत खगेस होइ नहिं बारा ॥
 जो निर्बिघ्न पंथ निर्बहई । सो कैवल्य परम पद लहई ॥
 अति दुर्लभ कैवल्य परम पद । संत पुरान निगम आगम बद ॥
 राम भजत सोइ मुक्ति गोसाईं । अनइच्छित आवइ बरिआई ॥
 जिमि थल बिनु जल रहि न सकाई । कोटि भाँत कोउ करै ठपाई ॥
 तथा मोच्छ सुख सुनु खगराई । रहि न सकइ हरि भगति बिहाई ॥
 अस बिचारि हरि भगत सयाने । मुक्ति निरादर भगति लुभाने ॥
 भगति करत बिनु जतन प्रयासा । संसृति मूल अबिद्या नासा ॥
 भोजन करिअ तृपिति हित लागी । जिमि सो असन पचवै जठरागी ॥
 असि हरि भगति सुगम सुखदाई । को अस मूढ़ न जाहि सोहाई ॥
 दो०— सेवक सेव्य भाव बिनु भव न तरिअ उरगारि ।

भजहु राम पद पंकज अस सिद्धांत बिचारि ॥ ११९ (क) ॥

जो चेतन कहैं जड़ करइ जड़हि करइ चैतन्य ।

अस समर्थ रघुनायकहि भजहिं जीव ते धन्य ॥ ११९ (ख) ॥
 कहेउँ ग्यान सिद्धांत बुझाई । सुनहु भगति मनि कै प्रभुताई ॥
 राम भगति चिंतामनि सुंदर । बसइ गरुड़ जाके उर अंतर ॥
 परम प्रकास रूप दिन राती । नहिं कछु चहिअ दिआ घृत बाती ॥
 मोह दरिद्र निकट नहिं आवा । लोभ बात नहिं ताहि भुझावा ॥

प्रबल अबिद्या तम मिटि जाई । हरहिं सकल सलभ समुदाई ॥
 खल कामादि निकट नहिं जाहीं । बसइ भगति जाके उर माहीं ॥
 गरल सुधासम अरि हित होई । तेहि मनि बिनु सुख पाव न कोई ॥
 व्यापहिं मानस रोग न भारी । जिन्ह के बस सब जीव दुखारी ॥
 राम भगति मनि उर बस जाकें । दुख लक्लेस न सपनेहुँ ताकें ॥
 चतुर सिरोमनि तेइ जग माहीं । जे मनि लागि सुजतन कराहीं ॥
 सो मनि जदपि प्रगट जग अहई । राम कृपा बिनु नहिं कोउ लहई ॥
 सुगम उपाय पाइबे केरे । नर हतभाग्य देहिं भटभेरे ॥
 पावन पर्वत बेद पुराना । राम कथा रुचिराकर नाना ॥
 मर्म सज्जन सुमति कुदारी । ग्यान बिराग नयन उरगारी ॥
 भाव सहित खोजइ जो प्रानी । पाव भगति मनि सब सुख खानी ॥
 मोरें मन प्रभु अस बिस्वासा । राम ते अधिक राम कर दासा ॥
 राम सिंधु घन सज्जन धीरा । चंदन तरु हरि संत समीरा ।
 सब कर फल हरि भगति सुहाई । सो बिनु संत न काहूँ पाई ॥
 अस बिचारि जोइ कर सतसंगा । राम भगति तेहि सुलभ बिहंगा ॥
 दो०— ब्रह्म पयोनिधि मंदर ग्यान संत सुर आहिं ।

कथा सुधा मथि काढ़हिं भगति मधुरता जाहिं ॥ १२० (क) ॥

बिरति चर्म असि ग्यान मद लोभ मोह रिपु मारि ।

जय पाइअ सो हरि भगति देखु खगेस बिचारि ॥ १२० (ख) ॥

पुनि सपेम बोलेउ खगराऊ । जाँ कृपाल मोहि ऊपर भाऊ ॥

नाथ मोहि निज सेवक जानी । सप्त प्रसन्न मम कहहु बखानी ॥
 प्रथमहिं कहहु नाथ मतिधीरा । सब ते दुर्लभ कवन सरीरा ॥
 बड़ दुख कवन कवन सुख भारी । सोउ संछेपहिं कहहु बिचारी ।
 संत असंत मरम तुम्ह जानहु । तिन्ह कर सहज सुभाव बखानहु ॥
 कवन पुन्य श्रुति बिदित बिसाला । कहहु कवन अघ परम कराला ॥
 मानस रोग कहहु समुझाई । तुम्ह सबग्य कृपा अधिकार्य ॥
 तात सुनहु सादर अति प्रीती । मैं संछेप कहउँ यह नीती ॥
 नर तन सम नहिं कवनिउ देही । जीव चराचर जाचत तेही ।
 नरक स्वर्ग अपवर्ग निसेनी । ग्यान बिराग भगति सुभ देनी ।
 सो तनु धरि हरि भजहिं न जे नर । होहिं बिषय रत मंद मंद तर ॥
 काँच किरिच बदलैं ते लेहीं । कर ते डारि परस मनि देहीं ।
 नहिं दरिद्र सम दुख जग माहीं । संत मिलन सम सुख जग नाहीं ।
 पर उपकार बचन मन काया । संत सहज सुभाउ खगराया ॥
 संत सहहिं दुख पर हित लागी । पर दुख हेतु असंत अभागी ॥
 भूर्ज तरू सम संत कृपाला । परहित निति सह बिपति बिसाला ।
 सन इव खल पर बंधन करई । खाल कढ़ाई बिपति सहि मरई ॥
 खल बिनु स्वारथ पर अपकारी । अहि मूषक इव सुनु उरगारी ।
 पर संपदा बिनास नसाहीं । जिमि मसि हति हिम उपल बिलाहीं ॥
 दुष्ट उदय जग आरति हेतू । जथा प्रसिद्ध अध्रम ग्रह कैतू ॥
 संत उदय संतत सुखकारी । बिस्व सुखद जिमि इंदु तमारी ॥
 परम धर्म श्रुति बिदित अहिंसा । पर निंदा सम अघ न गरीसा ।

हर गुर निंदक दादुर होई । जन्म सहस्र पाव तन सोई ॥
 द्विज निंदक बहु नरक भोग करि । जग जनमइ बायस सरीर धरि ॥
 मुर श्रुति निंदक जे अभिमानी रौरव नरक परहिं ते प्राणी ॥
 होहिं उलूक संत निदा रत मोह निसा प्रिय ग्यान भानु गत ॥
 सब कै निदा जे जड़ करहीं ते चमगादुर होइ अवतरहीं ॥
 सुनहु तात अब मानस रोगा । जिन्ह ते दुख पावहिं सब लोगा ॥
 मोह सकल व्याधिन्ह कर मूला तिन्ह ते पुनि उपजहिं बहु सूला ।
 काम बात कफ लोभ अपारा । क्रोध पित्त नित छाती जारा ॥
 प्रीति करहिं जौं तीनिउ भाई । उपजइ सन्यपात दुखदाई ॥
 बिषय मनोरथ दुर्गम नाना । ते सब सूल नाम को जाना ॥
 ममता दादु कंडु इरषाई । हरष बिषाद गरह बहुताई ॥
 पर सुख देखि जरनि सोइ छई । कृष्ट द्रष्टा मन कुटिलई ॥
 अहंकार अति दुखद डमरुआ । दंभ कपट मद मान नेहरुआ ।
 तृष्णा उदरबृद्धि अति भारी । त्रिविधि ईषणा तरुन तिजारी ॥
 जुग बिधि ज्वर मत्सर अबिबेका कहैं लगि कहौं कुरोग अनेका ॥
 दो०— एक व्याधि बस नर मर्हि ए असाधि बहु व्याधि ।

पीड़हि संतत जीव कहूँ सो किमि लहै समाधि ॥ १२१ (क) ॥

नेम धर्म आचार तप ग्यान जग्य जप दान ।

भेषज पुनि कोटिन्ह नहिं रोग जाहिं हरिजान ॥ १२१ (ख) ॥

एहि बिधि सकल जीव जग रोगी । सोक हरष भय प्रीति बियोगी ॥

मानस रोग कछुक में गाए । हहिं सब कै लखि बिरलेह पाए ॥
 जाने ते छोड़हिं कछु पापी । नास न पावहिं जन परितापी ॥
 बिषय कुपथ्य पाइ अंकुरे । मुनिहु हृदयै का नर बापुरे ॥
 राम कृपाँ नासहिं सब रोगा । जाँ एहि भाँति बनै संजोगा ॥
 सदगुर बैद बचन बिस्वासा । संजम यह न बिषय कै आसा ॥
 रघुपति भगति सजीवन मूरी । अनूपान श्रद्धा मति पूरी ॥
 एहि बिधि भलेहिं सो रोग नसाहीं । नाहिं त जतन कोटि नहिं जाहीं ॥
 जानिअ तब मन बिरुज गोसाँई । जब उर बल बिराग अधिकाई ॥
 सुमति छुधा बाढ़इ नित नई । बिषय आस दुर्बलता गई ॥
 बिमल ग्यान जल जब सो नहाई । तब रह राम भगति उर छाई ॥
 सिव अज सुक सनकादिक नारद । जे मुनि ब्रह्म बिचार बिसारद ॥
 सब कर मत खगनायक एहा । करिअ राम पद पंकज नेहा ॥
 श्रुति पुरान सब ग्रंथ कहाहीं । रघुपति भगति बिना सुख नाहीं ॥
 कमठ पीठ जामहिं बरु बारा । बंध्या सुत बरु काहुहि मारा ॥
 फूलहिं नभ बरु बहुबिधि फूला । जीव न लह सुख हरि प्रतिकूला ॥
 तृषा जाइ बरु मृगजल पाना । बरु जामहिं सस सीस बिषाना ॥
 अंधकारु बरु रबिहि नसावै । राम बिमुख न जीव सुख पावै ॥
 हिम ते अनल प्रगट बरु होई । बिमुख राम सुख पाव न कोई ॥
 दो०— बारि मयें घृत होइ बरु सिकता ते बरु तेल ।

बिनु हरि भजन न भव तरिअ यह सिद्धांत अपेल ॥ १२२ (क) ॥

मम कहि करइ बिरंचि प्रभु अजहि मसक ते हीन ।

अम बिचारि तजि संसय रामहि भजहि प्रबीन ॥ १२२ (ख) ॥

श्लोक विनिश्चितं वदामि ते न अन्यथा चचांसि मे ।

हरिं नरा भजन्ति चेति दुस्तरं तरन्ति ते ॥ १२२ (ग) ॥

कहेउँ नाथ हरि चरित अनूपा । व्यास समास स्वमति अनुरूपा ॥
श्रुति सिद्धांत इहइ उरगारी । राम भजिअ सब काज बिसारी ॥
प्रभु रघुपति तजि सेइअ काही । मोहि से सठ पर ममता जाही ॥
तुम्ह बिग्यानरूप नहिं मोहा । नाथ कीन्ह मो पर अति छोहा ॥
पूछहु राम कथा अति पावनि । सुक सनकादि संभु मन भावनि ॥
सत संगति दुर्लभ संसारा । निमिष दंड भरि एकउ बारा ॥
देखु गरुड़ निज हृदयँ बिचारी । मैं रघुबीर भजन अधिकारी ॥
सकुनाधम सब भौंति अपावन । प्रभु मोहि कीन्ह बिदित जग पावन ।
दो० — आजु धन्य मैं धन्य अति जद्यपि सब बिधि हीन ।

निज जन जानि राम मोहि संत समागम दीन ॥ १२३ (क) ॥

नाथ जथामति भाषेउँ राखेउँ नहिं कछु गोइ ।

चरित सिंधु रघुनायक थाह कि पावइ कोइ ॥ १२३ (ख) ॥

सुमिरि राम के गुन गन नाना । पुनि पुनि हरष भुसुंड़ि सुजाना ॥
महिमा निगम नेति करि गाई । अतुलित बल प्रताप प्रभुताई ॥
सिव अज पूज्य चरन रघुराई । मो पर कृपा परम मृदुलाई ॥
अस सुभाउ कहँ सुनउँ न देखउँ । केहि खगेस रघुपति सम लेखउँ ॥

साधक सिद्ध बिमुक्त उदासी । कबि कोबिद कृतग्य संन्यासी ॥
 जोगी सूर सुतापस ग्यानी । धर्म निरत पंडित बिग्यानी ॥
 तरहिं न बिनु सेएँ मम स्वामी । राम नमामि नमामि नमामी ॥
 सरन गएँ मो से अघ रासी । होहिं सुद्ध नमामि अबिनासी ॥
 दो०— जासु नाम भव भेषज हरन घोर त्रय सूल ।

सो कृपाल मोहि तो पर सदा रहउ अनुकूल ॥ १२४ (क) ॥

सुनि भुमंडि के बचन सुभ देखि राम पद नेह ।

बोलेउ प्रेम सहित गिरा गरुड़ बिगत संदेह ॥ १२४ (ख) ॥

मैं कृतकृत्य भयउँ तव बानी । सुनि रघुबीर भगति रस सानी ॥
 राम चरन नूतन रति भई । माया जनित बिपति सब गई ॥
 मोह जलधि बोहित तुम्ह भए । मो कहँ नाथ बिबिध सुख दए ॥
 मो पहिं होइ न प्रति उपकारा । बंदउँ तव पद बारहिं बारा ॥
 पूरन काम राम अनुरागी । तुम्ह सम तात न कोउ बड़भागी ॥
 संत बिटप सरिता गिरि धरनी । पर हित हेतु सबन्ह कै करनी ॥
 संत हृदय नवनीत समाना । कहा कबिन्ह परि कहै न जाना ॥
 निज परिताप द्रवइ नवनीता । पर दुख द्रवहिं संत सुपुनीता ॥
 जीवन जन्म सुफल मम भयऊ । तव प्रसाद संसय सब गयऊ ॥
 जानेहु सदा मोहि निज किकर । पुनि पुनि उमा कहइ बिहंगबर ॥
 दो०— तासु चरन सिरु नइ करि प्रेम सहित मतिधीर ।

गयउ गरुड़ बैकुंठ तब हृदयँ राखि रघुबीर ॥ १२५ (क) ॥

गिरिजा संत समागम सम न लाभ कछु आन ।

बिनु हरि कृपा न होइ सो गावहिं बेद पुरान ॥ १२५ (ख) ॥
 कहेउँ परम पुनीत इतिहासा । सुनत श्रवन छूटहिं भव पासा ॥
 प्रनत कल्पतरु करुना पुंजा । उपजइ प्रीति राम पद कंजा ॥
 मन क्रम बचन जनित अघ जाई । सुनहिं जे कथा श्रवन मन लाई ॥
 तीर्थाटन साधन समुदाई । जोग बिराग ग्यान निपुनाई ॥
 नाना कर्म धर्म ब्रत दाना । संजम दम जप तप मख नाना ॥
 भूत दया द्विज गुर सेवकाई । बिद्या बिनय बिबेक बड़ाई ॥
 जहँ लगि साधन बेद बखानी । सब कर फल हरि भगति भवानी ॥
 सो रघुनाथ भगति श्रुति गाई । राम कृपाँ काहूँ एक पाई ॥
 दो०—मुनि दुर्लभ हरि भगति नर पावहिं बिनहिं प्रयास ।

जे यह कथा निरंतर सुनहिं मानि बिस्वास ॥ १२६ ॥
 सोइ सर्वग्य गुनी सोइ ग्याता । सोइ महि मंडित पंडित दाता ॥
 धर्म परायन सोइ कुल त्राता । राम चरन जा कर मन राता ॥
 नीति निपुन सोइ परम सयाना । श्रुति सिद्धांत नीक तेहिं जाना ॥
 सोइ कवि कोबिद सोइ रनधीरा । जो छल छाड़ि भजइ रघुबीरा ॥
 धन्य देस सो जहँ सुरसरी । धन्य नारि पतिव्रत अनुसरी ॥
 धन्य सो भूपु नीति जो करई । धन्य सो द्विज निज धर्म न टरई ॥
 सो धन धन्य प्रथम गति जाकी । धन्य पुन्य रत मति सोइ पाकी ॥
 धन्य घरी सोइ जब सतसंगा । धन्य जन्म द्विज भगति अभंगा ॥

दो०— सो कुल धन्य उमा सुनु जगत पूज्य सुपुनीत ।

श्रीरघुबीर परायन जेहि नर उपज बिनीत ॥ १२७ ॥
मति अनुरूप कथा मैं भायो । जद्यपि प्रथम गुप्त करि राखी ॥
तब मन प्रीति देखि अधिकारि । तब मैं रघुपति कथा सुनाई ॥
यह न कहिअ सठही हठसीलहि । जो मन लाइ न सुन हरि लीलहि ॥
कहिअ न लोभिहि क्रोधिहि कामिहि । जो न भजइ सचराचर स्वामिहि ॥
द्विज द्रोहिहि न सुनाइअ कबहूँ । सुरपति सरिस होइ नृप जबहूँ ॥
राम कथा के तेइ अधिकारी । जिन्ह के सत संगति अति प्यारी ॥
गुर पद प्रीति नीति रत जेई । द्विज सेवक अधिकारी तेई ॥
ता कहँ यह बिसेष सुखदाई । जाहि प्रानप्रिय श्रीरघुराई ॥
दो०— राम चरन रति जो चह अथवा पद निर्बान ।

भाव सहित सो यह कथा करउ श्रवन पुट पान ॥ १२८ ॥
राम कथा गिरिजा मैं बरनी । कलि मल समनि मनोमल हरनी ॥
संसृति रोग सजीवन मूरी । राम कथा गावहिं श्रुति सूरी ॥
एहि महँ रुचिर सप्त सोपाना । रघुपति भगति केर पंथाना ॥
अति हरि कृपा जाहि पर होई । पाउँ देइ एहिं मारग सोई ॥
मन कामना सिद्धि नर पावा । जे यह कथा कपट तजि गावा ॥
कहहिं सुनिहिं अनुमोदन करहीं । ते गोपद इव भवनिधि तरहीं ॥
सुनि सब कथा हृदय अति भाई । गिरिजा बोली गिरा सुहाई ॥
नाथ कृपाँ मम गत संदेहा । राम चरन उपजेउ नव नेहा ॥

श्लो०—मैं कृतकृत्य भइउँ अब तब प्रसाद बिस्वेस।

उपजी राम भगति दृढ़ बीते सकल कलेस॥१२९॥

गह सुभ संभु उमा संबादा । सुख संपादन समन बिषादा ।

भव भंजन गंजन संदेहा । जन रंजन सज्जन प्रिय एहा ॥

राम उपासक जे जग माहीं । एहि सम प्रिय तिन्ह केँ कछु नाहीं ॥

रघुपति कृपाँ जथामति गावा । मैं यह पावन चरित सुहावा ॥

एहिं कलिकाल न साधन दूजा । जोग जग्य जप तप व्रत पूजा ॥

रामहि सुमिरिअ गाइअ रामहि । संतत सुनिअ राम गुन ग्रामहि ॥

जासु पतित पावन बड़ बाना । गावहिं कबि श्रुति संत पुराना ।

ताहि भजहि मन तजि कुटिलाई । राम भजें गति केहिं नहिं पाई ॥

छं०—पाई न केहिं गति पतित पावन राम भजि सुनु सठ भना ।

गनिका अजामिल ब्याध गीध गजादि खल तारे घना ॥

आभीर जमन किरात खस स्वपचादि अति अधरूप जे ।

कहि नाम बारक तेपि पावन होहि राम नमामि ते ॥

रघुबंस भूषन चरित यह नर कहहिं सुनिहिं जे गावहीं ।

कलि मल मनोमल धोइ बिनु श्रम राम धाम सिधावहीं ॥

सत पंच चौपाई मनोहर जानि जो नर उर धरै ।

दारुन अविद्या पंच जनित बिकार श्री रघुबर हरै ॥

सुंदर सुजान कृपा निधान अनाथ पर कर प्रीति जो ।

सो एक राम अकाम हित निर्बानप्रद सम आन को ॥

जाकी कृपा लबलेस ते मतिमंद तुलसीदासहूँ।
 पायो परम बिश्रामु राम समान प्रभु नाहीं कहूँ॥
 दो०— मो सम दीन न दीन हित तुम्ह समान रघुबीर।
 अस बिचारि रघुबंस मनि हरहु बिषम भव भीर॥ १३० (क)॥
 कामिहि नारि पिआरि जिमि लोभिहि प्रिय जिमि दाम।
 तिमि रघुनाथ निरंतर प्रिय लागहु मोहि राम॥ १३० (ख)॥
 श्लोक—यत्पूर्वं प्रभुणा कृतं सुकविना श्रीशम्भुना दुर्गमं
 श्रीमद्रामपदाब्जभक्तिमनिशं प्राप्त्यै तु रामायणम्।
 मत्वा तद्रघुनाथनामनिरतं स्वान्तस्तमःशान्तये
 भाषाबद्धमिदं चकार तुलसीदासस्तथा मानसम्॥ १॥
 पुण्यं पापहरं सदा शिवकरं विज्ञानभक्तिप्रदं
 मायामोहमलापहं सुविमलं प्रेमान्बुधपूरं शुभम्।
 श्रीमद्रामचरित्रमानसमिदं भक्त्यावगाहन्ति ये
 ते संसारपतङ्गघोरकिरणैर्दहन्ति नो भानवाः॥ २॥


मासपारायण, तीसवाँ विश्राम
 नवाह्नपारायण, नवाँ विश्राम



इति श्रीमद्रामचरितमानसे सकलकलिकलुषविध्वंसने
 सप्तमः सोपानः समाप्तः।

(उत्तरकाण्ड समाप्त)





सुलभ सुखद मारग यह भाई । भगति मोरि पुरान श्रुति गाई ॥
 ग्यान अगम प्रत्यूह अनेका । साधन कठिन न मन कहूँ टेका ॥
 करत कष्ट बहु पावइ कोऊ । भक्ति हीन मोहि प्रिय नहिं सोऊ ॥
 भक्ति सुतंत्र सकल सुख खानी । बिनु सतसंग न पावहिं प्राणी ॥
 पुन्य पुंज बिनु मिलहिं न संता । सतसंगति संसृति कर अंता ॥
 पुन्य एक जग महूँ नहिं दूजा । मन क्रम बचन बिप्र पद पूजा ॥
 सानुकूल तेहि पर मुनि देवा । जो तजि कपटु करइ द्विज सेवा ॥
 दो०— औरउ एक गुप्त मत सबहि कहउँ कर जोरि ।

संकर भजन बिना नर भगति न पावइ मोरि ॥ ४५ ॥
 कहहु भगति पथ कवन प्रयासा । जोग न मख जप तप उपवासा ॥
 सरल सुभाव न मन कुटिलाई । जथा लाभ संतोष सदाई ॥
 मोर दास कहाइ नर आसा । करइ तौ कहहु कहा बिस्वासा ॥
 बहुत कहउँ का कथा बढ़ाई । एहि आचरन बस्य मैं भाई ॥
 बैर न बिग्रह आस न त्रासा । सुखमय ताहि सदा सब आसा ॥
 अनारंभ अनिकेत अमानी । अनघ अरोष दच्छ बिग्यानी ॥
 प्रीति सदा सज्जन संसर्गा । तून सम बिषय स्वर्ग अपबर्गा ॥
 भगति पच्छ हठ नहिं सठताई । दुष्ट तर्क सब दूरि बहाई ॥
 दो०— मम गुन ग्राम नाम रत गत ममता मद मोह ।

ता कर सुख सोइ जानइ परानंद संदोह ॥ ४६ ॥
 सुनत सुधासम बचन राम के । गहे सबनि पद कृपाधाम के ॥

जननि जनक गुर बंधु हमारे । कृपा निधान प्रान ते प्यारे ॥
 तनु धनु धाम राम हितकारी । सब बिधि तुम्ह प्रनतारति हारी ॥
 असि सिख तुम्ह बिनु देइ न कोऊ । मातु पिता स्वारथ रत ओऊ ॥
 हेतु रहित जग जुग उपकारी । तुम्ह तुम्हार सेवक असुरारी ॥
 स्वारथ मीत सकल जग माहीं । सपनेहुँ प्रभु परमारथ नाहीं ॥
 सब के बचन प्रेम रस साने । सुनि रघुनाथ हृदयँ हरषाने ॥
 निज निज गृह गए आयसु पाई । बरनत प्रभु बतकही सुहाई ॥
 दो० - उमा अवधबासी नर नारि कृतारथ रूप ।

ब्रह्म सच्चिदानंद घन रघुनायक जहँ भूप ॥ ४७ ॥
 एक बार बसिष्ट मुनि आए । जहाँ राम सुखधाम सुहाए ॥
 अति आदर रघुनायक कीन्हा । पद पखारि पादोदक लीन्हा ॥
 राम सुनह मुनि कह कर जोरी । कृपासिधु बिनती कछु मोरी ॥
 देखि देखि आचरन तुम्हारा । होत मोह मम हृदयँ अपारा ॥
 महिमा अमिति बेद नहि जाना । मैं केहि भाँति कहउँ भगवाना ॥
 उपरोहित्य कर्म अति मंदा । बेद पुरान सुमृति कर निंदा ॥
 जब न लेउँ मैं तब बिधि मोही । कहा लाभ आगँ सुत तोही ॥
 परमात्मा ब्रह्म नर रूपा । होइहि रघुकुल भूषन भूपा ॥
 दो० — तब मैं हृदयँ बिचारा जोग जग्य ब्रत दान ।

जा कहूँ करिअ सो पैहउँ धर्म न एहि सम आन ॥ ४८ ॥
 जप तप नियम जोग निज धर्मा । श्रुति संभव नाना सुभ कर्मा ॥

ग्यान दया दम तीरथ मज्जन । जहँ लगी धर्म कहत श्रुति सज्जन ॥
 आगम निगम पुरान अनेका । पढ़े सुने कर फल प्रभु एका ॥
 तव पद पंकज प्रीति निरंतर । सब साधन कर यह फल सुंदर ॥
 धूँटइ मल कि मलहि के धोएँ । घृत कि पाव कोइ बारि बिलोएँ ॥
 प्रेम भगति जल बिनु रघुराई । अभिअंतर मल कबहुँ न जाई ॥
 सोइ सर्बग्य तग्य सोइ पंडित । सोइ गुन गृह बिग्यान अखंडित ॥
 दच्छ सकल लच्छन जुत सोई । जाकेँ पद सरोज रति होई ॥
 दो०— नाथ एक बार मागउँ राम कृपा करि देहु ।

जन्म जन्म प्रभु पद कमल कबहुँ घटै जनि नेहु ॥ ४९ ॥
 अस कहि मुनि बसिष्ट गृह आए । कृपासिधु के मन अति भाए ॥
 हनूमान भरतादिक भ्राता । संग लिए सेवक सुखदाता ॥
 पुनि कृपाल पुर बाहेर गए । गज रथ तुरग मगावत भए ॥
 देखि कृपा करि सकल सराहे । दिए उचित जिन्ह जिन्ह तेइ चाहे ॥
 हरन सकल श्रम प्रभु श्रम पाई । गए जहाँ सीतल अवैराई ॥
 भरत दीन्ह निज बसन डसाई । बैठे प्रभु सेवाहिं सब भाई ॥
 मारुतसुत तब मारुत करई । पुलक बपुष लोचन जल भरई ॥
 हनूमान सम नहिं बड़भागी । नहिं कोउ राम चरन अनुरागी ॥
 गिरिजा जासु प्रीति सेवकाई । बार बार प्रभु निज मुख गाई ॥
 दो०— तेहिं अवसर मुनि नारद आए करतल बीन ।

गावन लगे राम कल कीरति सदा नबीन ॥ ५० ॥

मामवलोकय पंकज लोचन । कृपा बिलोकनि सोच बिमोचन ॥
 नील तामरस स्याम काम अरि । हृदय कंज मकरंद मधुप हरि ॥
 जातुधान बरूथ बल भंजन । मुनि सज्जन रंजन अघ गंजन ।
 भूसुर ससि नव बृंद बलाहक । असरन सरन दीन जन गाहक ॥
 भुज बल बिपुल भार महि खंडित खर दूषन बिराध बध पंडित ॥
 रावनारि सुखरूप भूपबर । जय दसरथ कुल कुमुद सुधाकर ॥
 सुजस पुरान बिदित निगमागम । गावत सुर मुनि संत समागम ॥
 कारुनीक ब्यलीक मद खंडन । सब बिधि कृसल कोसला मंडन ॥
 कलि मल मथन नाम ममताहन । तुर्लासदास प्रभु पाहि प्रनत जन ॥
 दो०—प्रेम सहित मुनि नारद बरनि राम गुन ग्राम ।

सोभासिंधु हृदय धरि गए जहाँ बिधि धाम ॥ ५१ ॥
 गिरिजा सुनहु बिसद यह कथा । मैं सब कही मोरि मति जथा ॥
 राम चरित सत कोटि अपारा । श्रुति सारदा न बरनै पारा ॥
 राम अनंत अनंत गुनानी । जन्म कर्म अनंत नामानी ॥
 जल सीकर महि रज गनि जाहीं रघुपति चरित न बरनि सिराहीं ॥
 बिमल कथा हरि पद दायनी । भगति होइ सुनि अनपायनी ॥
 उमा कहिउँ सब कथा सुहाई । जो भुसुंड़ि खगपतिहि सुनाई ॥
 कल्लुक राम गुन कहेउँ बखानी । अब का कहौं सो कहहु भवानी ॥
 सुनि सुभ कथा उमा हरषानी । बोली अति बिनीत मृदु बानी ॥
 धन्य धन्य मैं धन्य पुरारी । सुनेउँ राम गुन भव भय हारी ॥

दो० — तुम्हरी कृपाँ कृपायतन अब कृतकृत्य न मोह।

जानेऊँ राम प्रताप प्रभु चिदानंद संदोह ॥ ५२ (क) ॥

नाथ तवानन ससि स्रवत कथा सुधा रघुबीर।

श्रवन पुटन्हि मन पान करि नहिं अधात मतिधीर ॥ ५२ (ख) ॥

राम चरित जे सुनत अधाहीं । रस बिसेष जाना तिन्ह नाहीं ॥

जीवनमुक्त महामुनि जेऊ । हरि गुन सुनहिं निरंतर तेऊ ॥

भव सागर चह पार जो पावा । राम कथा ता कहँ दृढ़ नावा ॥

बिषइन्ह कहँ पुनि हरि गुन ग्रामा । श्रवन सुखद अरु मन अभिरामा ॥

श्रवनवंत अस को जग माहीं । जाहि न रघुपति चरित सोहाहीं ।

ते जड़ जीव निजात्मक घाती । जिन्हहि न रघुपति कथा सोह्याती ॥

हरिचरित्र मानस तुम्ह गावा । सुनि मै नाथ अमिति सुख पावा ॥

तुम्ह जो कही यह कथा सुहाई । कागभसुंड़ि गरुड़ प्रति गाई ।

दो० — बिरति ग्यान बिग्यान दृढ़ राम चरन अति नेह।

बायस तन रघुपति भगति मोहि परम संदेह ॥ ५३ ॥

नर सहस्र महँ सुनहु पुरारी । कोउ एक होइ धर्म ब्रतधारी ।

धर्मसील कोटिक महँ कोई । बिषय बिमुख बिराग रत होई ॥

कोटि बिरक्त मध्य श्रुति कहई । सम्यक ग्यान सकृत कोउ लहई ।

ग्यानवत कोटिक महँ कोऊ । जीवनमुक्त सकृत जग सोऊ ॥

तिन्ह सहस्र महँ सब सुख खानी । दुर्लभ ब्रह्म लीन बिग्यानी ।

धर्मसील बिरक्त अरु ग्यानी । जीवनमुक्त ब्रह्मपर प्रानी ॥

सब ते सो दुर्लभ सुरराया । राम भगति रत गत मद माया ॥
 सो हरिभगति काग किमि पाई । बिस्वनाथ मोहि कहहु बुझाई ॥
 दो०—राम परायन ग्यान रत गुनागार मति धीर ।

नाथ कहहु केहि कारन पायउ काक सरीर ॥५४॥
 यह प्रभु चरित पवित्र सुहावा । कहहु कृपाल काग कहँ पावा ॥
 तुम्ह केहि भाँति सुना मदनारी । कहहु मोहि अति कौतुक भारी ॥
 गरुड़ महाग्यानी गुन रासी । हरि सेवक अति निकट निवासी ॥
 तेहिं केहि हेतु काग सन जाई । सुनी कथा मुनि निकर बिहाई ॥
 कहहु कवन बिधि भा संबादा । दोउ हरिभगत काग उरगादा ॥
 गौरि गिरा सुनि सरल सुहाई । बोले सिव सादर सुख पाई ॥
 धन्य सती पावन मति तोरी । रघुपति चरन प्रीति नहिं थोरी ॥
 सुनहु परम पुनीत इतिहासा । जो सुनि सकल लोक भ्रम नासा ॥
 उपजइ राम चरन बिस्वासा । भव निधि तर नर बिनहिं प्रयासा ॥
 दो०—ऐसिअ प्रसन्न बिहंगपति कीन्ह काग सन जाइ ।

सो सब सादर कहिहउँ सुनहु उमा मन लाइ ॥५५॥
 मैं जिमि कथा सुनी भव मोचनि । सो प्रसंग सुनु सुमुखि सुलोचनि ॥
 प्रथम दच्छ गृह तव अवतारा । सती नाम तब रहा तुम्हारा ॥
 दच्छ जग्य तव भा अपमाना । तुम्ह अति क्रोध तजे तब प्राना ॥
 मम अनुचरन्ह कीन्ह मख भंगा । जानहु तुम्ह सो सकल प्रसंगा ॥
 तब अति सोच भयउ मन मोरें । दुखी भयउँ बियोग प्रिय तोरें ॥

सुंदर बन गिरि सरित तड़ागा । कौतुक देखत फिरउँ बेरागा ॥
गिरि सुमेर उत्तर दिसि दूरी । नील सैल एक सुंदर भूरी ॥
तासु कनकमय सिखर सुहाए । चारि चारु मोरे मन भाए ॥
तिन्ह पर एक एक बिटप बिसाला । बट पीपर पाकरी रसाला ॥
सैलोपरि सर सुंदर सोहा । मनि सोपान देखि मन मोहा ॥
दो०— सीतल अमल मधुर जल जलज बिपुल बहुरंग ।

कूजत कल रव हंस गन गुंजत मंजुल भृंग ॥ ५६ ॥
तेहिं गिरि रुचिर बसइ खग सोई । तासु नास कल्पांत न होई ॥
माया कृत गुन दोष अनेका । मोह मनोज आदि अबिबेका ॥
रहे ब्यापि समस्त जग माहीं । तेहि गिरि निकट कबहुँ नहिं जाहीं ॥
तहँ बसि हरिहि भजइ जिमि कागा । सो सुनु उमा सहित अनुरागा ॥
पीपर तरु तर ध्यान सो धरई । जाप जग्य पाकरि तर करई ॥
आँब छाँह कर मानस पूजा । तजि हरि भजनु काजु नहिं दूजा ।
बर तर कह हरि कथा प्रसंगा । आवहिं सुनहिं अनेक बिहंगा ॥
राम चरित बिचित्र बिधि नाना । प्रेम सहित कर सादर गाना ॥
सुनहिं सकल मति बिमल मराला । बसहिं निरंतर जे तेहिं ताला ॥
जब मैं जाइ सो कौतुक देखा । उर उपजा आनंद बिसेषा ॥
दो०— तब कछु काल मराल तनु धरि तहँ कीन्ह निवास ।

सादर सुनि रघुपति गुन पुनि आयउँ कैलास ॥ ५७ ॥
गिरिजा कहेउँ सो सब इतिहासा । मैं जेहि समय गयउँ खग पासा ।

अब सो कथा सुनहु जेहि हेतू । गयउ काग पहिं खग कुल केतू ॥
 जब रघुनाथ कीन्हि रन क्रीड़ा । समुझत चरित होति मोहि ब्रीड़ा ॥
 इंद्रजीत कर आपु बैधायो । तब नारद मुनि गरुड़ पठायो ॥
 बंधन काटि गयो उरगादा । उपजा हृदयँ प्रचंड बिषादा ॥
 प्रभु बंधन समुझत बहु भाँती । करत बिचार उरग आराती ॥
 व्यापक ब्रह्म बिरज बागीसा । माया मोह पार परमीसा ॥
 सो अवतार सुनेउँ जग माहीं । देखेउँ सो प्रभाव कछु नाहीं ॥
 दो०— भव बंधन ते छूटहिं नर जपि जा कर नाम ।

खर्ब निसाचर बाँधेउ नागपास सोइ राम ॥ ५८ ॥
 नाना भाँति मनहि समुझावा । प्रगट न ग्यान हृदयँ भ्रम छावा ॥
 खेद खिन्न मन तर्क बढ़ाई । भयउ मोहबस तुम्हरिहिं नाई ॥
 व्याकुल गयउ देवरिषि पाहीं । कहेसि जो संसय निज मन माहीं ॥
 सुनि नारदहि लागि अति दाया । सुनु खग प्रबल राम कै माया ॥
 जो ग्यानिन्ह कर चित अपहरई । बरिआई बिमोह मन करई ॥
 जेहिं बहु बार नचावा मोही । सोइ व्यापी बिहंगपति तोही ॥
 महामोह उपजा उर तोरें । मिटिहि न बेगि कहें खग मोरें ॥
 चतुरानन पहिं जाहु खगेसा । सोइ करेहु जेहि होइ निदेसा ॥
 दो०— अस कहि चले देवरिषि करत राम गुन गान ।

हरि माया बल बरनत पुनि पुनि परम सुजान ॥ ५९ ॥
 तब खगपति बिरंचि पहिं गयऊ । निज संदेह सुनावत भयऊ ॥

सुनि बिरंचि रामहि सिरु नावा । समुझि प्रताप प्रेम अति छावा ॥
 मन महूँ करइ बिचार बिधाता । माया बस कबि कोबिद ग्याता ॥
 हरि माया कर अमिति प्रभावा । बिपुल बार जेहिं मोहि नचावा ॥
 अग जगमय जग मम उपराजा । नहिं आचरज मोह खगराजा ॥
 तब बोले बिधि गिरा सुहाई । जान महेस राम प्रभुताई ॥
 बैनतेय संकर पहिं जाहूँ । तात अनत पूछहु जनि काहूँ ॥
 तहँ होइहि तव संसय हानी । चलेउ बिहंग सुनत बिधि बानी ॥
 दो०— परमातुर बिहंगपति आयउ तब मो पास ।

जात रहेउँ कुबेर गृह रहिहु उमा कैलास ॥६०॥
 तेहिं मम पद सादर सिरु नावा । पुनि आपन संदेह सुनावा ॥
 सुनि ता करि बिनती मृदु बानी । प्रेम सहित मैं कहेउँ भवानी ॥
 मिलेहु गरुड़ मारग महँ मोही । कवन भाँति समुझावौं तोही ॥
 तबहिं होइ सब संसय भंगा । जब बहु काल करिअ सतसंगा ॥
 सुनिअ तहाँ हरिकथा सुहाई । नाना भाँति मुनिन्ह जो गाई ॥
 जेहि महूँ आदि मध्य अवसाना । प्रभु प्रतिपाद्य राम भगवाना ॥
 नित हरि कथा होत जहँ भाई । पठवउँ तहाँ सुनहु तुम्ह जाई ॥
 जाइहि सुनत सकल संदेहा । राम चरन होइहि अति नेहा ॥
 दो०— बिनु सतसंग न हरि कथा तेहि बिनु मोह न भाग ।

मोह गएँ बिनु राम पद होइ न दृढ़ अनुराग ॥६१॥
 मिलहिं न रघुपति बिनु अनुरागा । किएँ जोग तप ग्यान बिरागा ॥

उत्तर दिसि सुंदर गिरि नीला । तहँ रह काकभुसुंडि सुसीला ॥
 राम भगति पथ परम प्रबीना । ग्यानी गुन गृह बहु कालीना ॥
 राम कथा सो कहइ निरंतर । सादर सुनहिं बिबिध बिहंगबर ॥
 जाइ सुनहु तहँ हरि गुन भूरी । होइहि मोह जनित दुख दूरी ।
 मैं जब तेहि सब कहा बुझाई । चलेउ हरषि मम पद सिरु नाई ॥
 ताते उमा न मैं समुझावा । रघुपति कृपाँ मरमु मैं पावा ॥
 होइहि कीन्ह कबहुँ अभिमाना । सो खोवै चह कृपानिधाना ॥
 कछु तेहि ते पुनि मैं नहिं राखा । समुझइ खग खगही कै भाषा ॥
 प्रभु माया बलवंत भवानी । जाहि न मोह कवन अस ग्यानी ।
 दो०— ग्यानी भगत सिरोमनि त्रिभुवनपति कर जान ।

ताहि मोह माया नर पावँर करहिं गुमान ॥ ६२ (क) ॥

मासपारायण, अट्टाईसवाँ विश्राम

सिव बिरंचि कहूँ मोहइ को है बपुरा आन ।

अस जियँ जानि भजहिं मुनि माया पति भगवान ॥ ६२ (ख) ॥

गयउ गरुड़ जहँ बसइ भुसुंडा । मति अकुंठ हरि भगति अखंडा ॥
 देखि सैल प्रसन्न मन भयऊ । माया मोह सोच सब गयऊ ॥
 करि तड़ाग मज्जन जलपाना । बट तर गयउ हृदयँ हरषाना ॥
 बृद्ध बृद्ध बिहंग तहँ आए । सुनै राम के चरित सुहाए ॥
 कथा अरंभ करै सोइ चाहा । तेही समय गयउ खगनाहा ॥
 आवत देखि सकल खगराजा । हरषेउ बायस सहित समाजा ॥

अति आदर खगपति कर कीन्हा । स्वागत पूछि सुआसन दीन्हा ॥
करि पूजा समेत अनुरागा । मधुर बचन तब बोलेउ कागा ॥
दो०— नाथ कृतारथ भयउँ मैं तव दरसन खगराज ।

आयसु देहु सो करौं अब प्रभु आयहु केहि काज ॥ ६३ (क) ॥

सदा कृतारथ रूप तुम्ह कह मृदु बचन खगेस ।

जेहि कै अस्तुति सादर निज मुख कीन्हि महेस ॥ ६३ (ख) ॥

सुनहु तात जेहि कारन आयउँ । सो सब भयउ दरस तव पायउँ ।
देखि परम पावन तव आश्रम । गयउ मोह संसय नाना भ्रम ॥
अब श्रीराम कथा अति पावनि । सदा सुखद दुख पुंज नसावनि ॥
सादर तात सुनावहु मोही । बार बार बिनवउँ प्रभु तोही ॥
सुनत गरुड़ कै गिरा बिनीता । सरल सुप्रेम सुखद सुपुनीता ॥
भयउ तासु मन परम उछाहा । लाग कहै रघुपति गुन गाहा ।
प्रथमहिं अति अनुराग भवानी । रामचरित सर कहेसि बखानी ॥
पुनि नारद कर मोह अपारा । कहेसि बहुरि रावन अवतारा ॥
प्रभु अवतार कथा पुनि गाई । तब सिमु चरित कहेसि मन लाई ॥
दो०— बालचरित कहि बिबिधि बिधि मन महँ परम उछाह ।

रिषि आगवन कहेसि पुनि श्रीरघुबीर बिबाह ॥ ६४ ॥
बहुरि राम अभिषेक प्रसंगा । पुनि नृप बचन राज रस भंगा ॥
पुरबासिन्ह कर बिरह बिषादा । कहेसि राम लछिमन संबादा ॥
बिपिन गवन केवट अनुरागा । सुरसरि उत्तरि निवास प्रयागा ॥

बालमीक प्रभु मिलन बखाना । चित्रकूट जिमि बसे भगवाना ॥
 सचिवागवन नगर नृप मरना । भरतागवन प्रेम बहु बरना ।
 करि नृप क्रिया संग पुरबासी । भरत गए जहाँ प्रभु सुख रासी ॥
 पुनि रघुपति बहुबिधि समुझाए । लै पादुका अवधपुर आए ॥
 भरत रहनि सुरपति सुत करनी । प्रभु अरु अत्रि भेंट पुनि बरनी ॥
 दो०— कहि बिराध बध जेहि बिधि देह तजी सरभंग ।

बरनि सुतीछन प्रीति पुनि प्रभु अगस्ति सतसंग ॥ ६५ ॥
 कहि दंडक बन पावनताई । गोध मइत्री पुनि तेहिं गाई ॥
 पुनि प्रभु पंचवटीं कृत बासा । भंजी सकल मुनिन्ह की बासा ॥
 पुनि लछिमन उपदेस अनूपा । सूपनखा जिमि कीन्ह कुरूपा ॥
 खर दूषन बध बहुरि बखाना । जिमि सब मरमु दसानन जाना ॥
 दसकंधर मारीच बतकही । जेहि बिधि भई सो सब तेहिं कही ।
 पुनि माया सीता कर हरना । श्रीरघुबीर बिरह कछु बरना ॥
 पुनि प्रभु गोध क्रिया जिमि कीन्ही , बधि कबंध सबरिहि गति दीन्ही ॥
 बहुरि बिरह बरनत रघुबीरा । जेहि बिधि गए सरोबर तीरा ॥
 दो०— प्रभु नारद संवाद कहि मारुति मिलन प्रसंग ।

पुनि सुग्रीव मिताई बालि प्रान कर भंग ॥ ६६ (क) ॥
 कपिहि तिलक करि प्रभु कृत सैल प्रवरषन बास ।

बरनन बर्षा सरद अरु राम रोष कपि बास ॥ ६६ (ख) ॥
 जेहि बिधि कपिपति कीस पठाए । सीता खोज सकल दिसि धाए ॥

बिबर प्रबेस कीन्ह जेहि भाँती । कपिन्ह बहोरि मिला संपाती ॥
 सुनि सब कथा समीरकुमारा । नाघत भयउ पयोधि अपारा ॥
 लंकाँ कपि प्रबेस जिमि कीन्हा । पुनि सीतहि धीरजु जिमि दीन्हा ॥
 बन उजारि रावनहि प्रबोधी । पुर दहि नाघेउ बहुरि पयोधी ॥
 आए कपि सब जहँ रघुराई । बैदेही की कुसल सुनाई ॥
 सेन समेति जथा रघुबीरा । उतरे जाइ बारिनिधि तीरा ॥
 मिला बिभीषन जेहि बिधि आई । सागर निग्रह कथा सुनाई ॥
 दो०— सेतु बाँधि कपि सेन जिमि उतरी सागर पार ।

गयउ बसीठी बीरबर जेहि बिधि बालिकुमार ॥ ६७ (क) ॥

निसिचर कीस लराई बरनिसि बिबिध प्रकार ।

कुंभकरन घननाद कर बल पौरुष संघार ॥ ६७ (ख) ॥

निसिचर निकर मरन बिधि नाना । रघुपति रावन समर बखाना ॥
 रावन बध मंदोदरि सोका । राज बिभीषन देव असोका ॥
 सीता रघुपति मिलन बहोरी । सुरन्ह कीन्ह अस्तुति कर जोरी ॥
 पुनि पुष्पक चढ़ि कपिन्ह समेता । अवध चले प्रभु कृपा निकेता ॥
 जेहि बिधि राम नगर निज आए । बायस बिसद चरित सब गाए ॥
 कहेसि बहोरि राम अभिषेका । पुर बरनत नृपनीति अनेका ॥
 कथा समस्त भुसुंड बखानी । जो मैं तुम्ह सन कही भवानी ॥
 सुनि सब राम कथा खगनाहा । कहत बचन मन परम उछाहा ॥

सो०—गयउ मोर संदेह सुनेउँ सकल रघुपति चरित ।

भयउ राम पद नेह तव प्रसाद बाधस तिलक ॥ ६८ (क) ॥

मोहि भयउ अति मोह प्रभु बंधन रन महुँ निरखि ।

चिदानंद संदेह राम बिकल कारन कवन ॥ ६८ (ख) ॥

देखि चरित अति नर अनुसारी । भयउ हृदयँ मम संसय भारी ॥

सोइ भ्रम अब हित करि मै माना । कीन्ह अनुग्रह कृपानिधाना ॥

जो अति आतप ब्याकुल होई । तरु छाया सुख जानइ सोई ॥

जौं नहिं होत मोह अति मोही । मिलतेउँ तात कवन बिधि तोही ।

सुनतेउँ किमि हरि कथा सुहाई । अति बिचित्र बहु बिधि तुम्ह गाई ॥

निगमागम पुरान मत एहा । कहहिं सिद्ध मुनि नहिं संदेहा ॥

संत बिसुद्ध मिलहिं परि तेही । चितवहिं राम कृपा करि जेही ॥

राम कृपाँ तव दरसन भयऊ । तव प्रसाद सब संसय गयऊ ॥

दो०—सुनि बिहंगपति बानी सहित बिनय अनुराग ।

पुलक गात लोचन सजल मन हरषेउ अति काग ॥ ६९ (क) ॥

श्रोता सुमति सुसील सुचि कथा रसिक हरि दास ।

पाइ उमा अति गोप्यमपि सज्जन करहिं प्रकास ॥ ६९ (ख) ॥

बोलेउ काकभसुंड बहोरी । नभग नाथ पर प्रीति न थोरी ॥

सब बिधि नाथ पूज्य तुम्ह मेरे । कृपापात्र रघुनायक केरे ॥

तुम्हहि न संसय मोह न माया । मो पर नाथ कीन्ह तुम्ह दायी ॥

पठइ मोह मिस खगपति तोही । रघुपति दीन्ह बड़ाई मोही ॥

तुम्ह निज मोह कही खग साईं । सो नहिं कछु आचरज गोसाईं ॥
नारद भव बिरंचि सनकादी । जे मुनिनायक आतमबादी ॥
मोह न अंध कीन्ह केहि केही । को जग काम नचाव न जेही ॥
तूझाँ केहि न कीन्ह बौराहा । केहि कर हृदय क्रोध नहिं दाहा ॥

दो०— ग्यानी तापस सूर कबि कोबिद गुन आगार ।

केहि कै लोभ बिडंबना कीन्हि न एहि संसार ॥ ७० (क) ॥

श्री मद बक्र न कीन्ह केहि प्रभुता बधिर न काहि ।

मृगलोचनि के नैन सर को अस लाग न जाहि ॥ ७० (ख) ॥

गुन कृत सन्यपात नहिं केही । कोउ न मान मद तजेउ निबेही ॥
जोबन ज्वर केहि नहिं बलकावा । ममता केहि कर जस न नसावा ॥
मच्छर काहि कलंक न लावा । काहि न सोक समीर डोलावा ॥
चिंता साँपिनि को नहिं खाया । को जग जाहि न ब्यापी माया ॥
कीट मनोरथ दारु सरीरा । जेहि न लाग घुन को अस धीरा ॥
सुत बित लोक ईषना तीनी । केहि कै मति इन्ह कृत न मलीनी ॥
यह सब माया कर परिवारा । प्रबल अमिति को बरनै पारा ॥
सिव चतुरानन जाहि डेराहीं । अपर जीव केहि लेखे माहीं ॥

दो०— ब्यापि रहेउ संसार महुँ माया कटक प्रचंड ।

सेनापति कामादि भट दंभ कपट पाषंड ॥ ७१ (क) ॥

सो दासी रघुबीर कै समुझें मिथ्या सोपि ।

छूट न राम कृपा बिनु नाथ कहउँ पद रोपि ॥ ७१ (ख) ॥

जो माया सब जगहि नचावा । जासु चरित लखि काहुँ न पावा ॥
 सोइ प्रभु भू बिलास खगराजा । नाच नटी इव सहित समाजा ॥
 सोइ सच्चिदानंद घन रामा । अज बिग्यान रूप बल धामा ॥
 व्यापक व्याप्य अखंड अनंता । अखिल अमोघसक्ति भगवंता ॥
 अगुन अदभ्र गिरा गोतीता । सबदरसी अनवद्य अजीता ॥
 निर्मम निराकार निरमोहा । नित्य निरंजन सुख संदोहा ॥
 प्रकृति पार प्रभु सब उर बासी । ब्रह्म निरीह बिरज अबिनासी ॥
 इहाँ मोह कर कारन नाही । रबि सन्मुख तम कबहुँ कि जाहीं ॥
 दो०— भगत हेतु भगवान प्रभु राम धरेउ तनु भूप ।

किए चरित पावन परम प्राकृत नर अनुरूप ॥ ७२ (क) ॥

जथा अनेक बेष धरि नृत्य करइ नट कोइ ।

सोइ सोइ भाव देखावइ आपुन होइ न सोइ ॥ ७२ (ख) ॥

असि रघुपति लीला उरगारी । दनुज बिमोहनि जन सुखकारी ॥
 जे मति मलिन बिषय बस कामी । प्रभु पर मोह धरहिं इमि स्वामी ।
 नयन दोष जा कहँ जब होई । पीत बरन ससि कहँ कह सोई ॥
 जब जेहि दिसि भ्रम होइ खगेसा । सो कह पच्छिम उयउ दिनेसा ॥
 नौकारूढ़ चलत जग देखा । अचल मोह बस आपुहि लेखा ॥
 बालक भ्रमहिं न भ्रमहिं गृहादी । कहहिं परस्पर मिथ्याबादी ॥
 हरि बिषइक अस मोह बिहंगा । सपनेहुँ नहिं अग्यान प्रसंगा ॥
 मायाबस मतिमंद अभागी । हृदयँ जमनिका बहुबिधि लागी ॥

ते सठ हठ बस संसय करहीं । निज अग्यान राम पर धरहीं ॥

दो०— काम क्रोध मद लोभ रत गृहासक्त दुखरूप ।

ते किमि जानहिं रघुपतिहि मूढ़ परे तम कूप ॥ ७३ (क) ॥

निर्गुन रूप सुलभ अति सगुन जान नहिं कोइ ।

सुगम अगम नाना चरित सुनि मुनि मन भ्रम होइ ॥ ७३ (ख) ॥

सुनु खगेस रघुपति प्रभुताई । कहउँ जथामति कथा सुहाई ॥

जेहि बिधि मोह भयउ प्रभु मोही । सोउ सब कथा सुनावउँ तोही ॥

राम कृपा भाजन तुम्ह ताता । हरि गुन प्रीति मोहि सुखदाता ॥

ताते नहिं कछु तुम्हहिं दुरावउँ । परम रहस्य मनोहर गावउँ ॥

सुनहु राम कर सहज सुभाऊ । जन अभिमान न राखहिं काऊ ॥

संसृत मूल सूलप्रद नाना । सकल सोक दायक अभिमाना ॥

ताते करहिं कृपानिधि दूरी । सेवक पर ममता अति भूरी ॥

जिमि सिसु तन ब्रन होइ गोसाई । मातु चिराव कठिन की नाई ॥

दो०— जदपि प्रथम दुख पावइ रोवइ बाल अधीर ।

ब्याधि नास हित जननी गनति न सो सिसु पीर ॥ ७४ (क) ॥

तिमि रघुपति निज दास कर हरहिं मान हित लागि ।

तुलसिदास ऐसे प्रभुहि कस न भजहु भ्रम त्यागि ॥ ७४ (ख) ॥

राम कृपा आपनि जइताई । कहउँ खगेस सुनहु मन लाई ॥

जब जब राम मनुज तनु धरहीं । भक्त हेतु लीला बहु करहीं ॥

तब तब अवधपुरी मैं जाऊँ । बालचरित बिलोकि हरषाऊँ ॥

जन्म महोत्सव देखउँ जाई । बरष पाँच तहँ रहउँ लोभाई ॥
 इष्टदेव मम बालक रामा । सोभा बपुष कोटि सत कामा ॥
 निज प्रभु बदन निहारि निहारी । लोचन सुफल करउँ उरगारी ॥
 लघु बायस बपु धरि हरि संग्गा । देखउँ बालचरित बहु रंगा ॥
 दो० — लरिकाई जहँ जहँ फिरहिं तहँ तहँ संग उड़ाउँ ।

जूठनि परइ अजिर महँ सो उठाइ करि खाउँ ॥ ७५ (क) ॥

एक बार अतिसय सब चरित किए रघुबीर ।

सुमिरत प्रभु लीला सोइ पुलकित भयउ सरीर ॥ ७५ (ख) ॥

कहइ भसुंड सुनहु खगनायक । राम चरित सेवक सुखदायक ।
 नृप मंदिर सुंदर सब भाँती । खचित कनक मनि नाना जाती ॥
 बरनि न जाइ रुचिर अँगनाई । जहँ खेलहिं नित चारिउ भाई ॥
 बालबिनोद करत रघुराई । बिचरत अजिर जननि सुखदाई ॥
 मरकत मृदुल कलेवर स्यामा । अंग अंग प्रति छबि बहु कामा ॥
 नव राजीव अरुन मृदु चरना । पदज रुचिर नख ससि दुति हरना ॥
 ललित अंक कुलिसादिक चारी । नूपुर चारु मधुर रवकारी ॥
 चारु पुरट मनि रचित बनाई । कटि किकिनि कल मुखर सुहाई ॥
 दो० — रेखा त्रय सुंदर उदर नाभी रुचिर गँभीर ।

उर आयत भ्राजत बिबिधि बाल बिभूषन चीर ॥ ७६ ॥

अरुन पानि नख करज मनोहर । बाहु बिसाल बिभूषन सुंदर ॥
 कंध बाल केहरि दर ग्रीवा । चारु चिबुक आनन छबि सीवा ॥

कलबल बचन अधर अरुनारे । दुइ दुइ दसन बिसद बर बारे ॥
 ललित कपोल मनोहर नासा । सकल सुखद ससि कर सम हासा ॥
 नील कंज लोचन भव मोचन । भ्राजत भाल तिलक गोरोचन ॥
 बिकट भृकुटि सम श्रवन सुहाए । कुंचित कच मेचक छबि छाए ॥
 पीत झीनि झगुली तन सोही । किलकनि चितवनि भावति मोही ॥
 रूप रासि नृप अजिर बिहारी । नाचहिं निज प्रतिबिंब निहारी ॥
 मोहि सन करहिं बिबिधि बिधि क्रीड़ा । बरनत मोहि होति अति ब्रीड़ा ॥
 किलकत मोहि धरन जब धावहिं । चलउँ भागि तब पूष देखावहिं ॥
 दो०— आवत निकट हँसहिं प्रभु भाजत रुदन कराहिं ।

जाउँ समीप गहन पद फिरि फिरि चितइ पराहिं ॥ ७७ (क) ॥

प्राकृत सिसु इव लीला देखि भयउ मोहि मोह ।

कवन चरित्र करत प्रभु बिदानंद संदोह ॥ ७७ (ख) ॥

एतना मन आनत खगराया । रघुपति प्रेरित ब्यापी माया ॥
 सो माया न दुखद मोहि काहीं । आन जीव इव संसृत नाहीं ॥
 नाथ इहाँ कछु कारन आना । सुनहु सो सावधान हरिजाना ॥
 ग्यान अखंड एक सीताबर । माया बस्य जीव सचराचर ॥
 जौ सब कैं रह ग्यान एकरस । ईस्वर जीवहि भेद कहहु कस ॥
 माया बस्य जीव अभिमानी । ईस बस्य माया गुन खानी ॥
 परबस जीव स्वबस भगवंता । जीव अनेक एक श्रीकंता ॥
 मुधा भेद जद्यपि कृत माया । बिनु हरि जाइ न कोटि उपाया ॥

दो०— रामचंद्र के भजन बिनु जो चह पद निर्बान ।

ग्यानवंत अपि सो नर पसु बिनु पूँछ बिषान ॥ ७८ (क) ॥

राकापति षोड़स उअहिं तारागन समुदाइ ।

सकल गिरिन्ह दव लाइअ बिनु रबि राति न जाइ ॥ ७८ (ख) ॥

ऐसेहिं हरि बिनु भजन खगेसा । मिटइ न जीवन्ह केर कलेसा ॥

हरि सेवकहि न ब्याप अबिद्या । प्रभु प्रेरित ब्यापइ तेहि बिद्या ।

ताते नास न होइ दास कर । भेद भगति बाढ़इ बिहंगबर ॥

भ्रम तें चकित राम मोहि देखा । बिहँसे सो सृनु चरित बिसेषा ॥

तेहि कौतुक कर मरमु न काहूँ । जाना अनुज न मातु पिताहूँ ।

जानु पानि धाए मोहि धरना स्यामल गात अरुन कर चरना ॥

तब मैं भागि चलेउँ उरगारी । राम गहन कहँ भुजा पसारी ।

जिमि जिमि दूरि उड़ाउँ अकासा । तहँ भुज हरि देखउँ निज पासा ।

दो०— ब्रह्मलोक लागि गयउँ मैं चितयउँ पाछ उड़ात ।

जुग अंगुल कर बीच सब राम भुजहि मोहि तात ॥ ७९ (क) ॥

सप्ताबरन भेद करि जहाँ लगें गति मोरि ।

गयउँ तहाँ प्रभु भुज निरखि ब्याकुल भयउँ बहोरि ॥ ७९ (ख) ॥

मूदेउँ नयन त्रसित जब भयऊँ । पुनि चितवत कोसलपुर गयऊँ ।

मोहि बिलोकि राम मुसुकाहीं । बिहँसत तुरत गयउँ मुख माहीं ॥

उदर माझ सुनु अंडज राया देखेउँ बहु ब्रह्मांड निकाया ।

अति बिचित्र तहँ लोक अनेका । रचना अधिक एक ते एका ॥

कोटिन्ह चतुरानन गौरीसा । अगनित उडगन रबि रजनीसा ॥
अगनित लोकपाल जम काला । अगनित भूधर भूमि बिसाला ॥
सागर सरि सर बिपिन अपारा । नाना भाँति सृष्टि बिस्तारा ।
सुर मुनि सिद्ध नाग नर किनर । चारि प्रकार जीव सचराचर ॥
दो० — जो नहिं देखा नहिं सुना जो मनहूँ न समाइ ।

सो सब अद्भुत देखेउँ बरनि कवनि बिधि जाइ ॥ ८० (क) ॥

एक एक ब्रह्मांड महुँ रहउँ बरष सत एक ।

एहि बिधि देखत फिरउँ मैं अंड कटाह अनेक ॥ ८० (ख) ॥
लोक लोक प्रति भिन्न बिधाता । भिन्न बिष्णु सिव मनु दिसित्राता ॥
नर गंधर्व भूत बेताला । किनर निमिचर पसु खग ब्याला ।
देव दनुज गन नाना जाती । सकल जीव तहँ आनहि भाँती ।
महि सरि सागर सर गिरि नाना । सब प्रपंच तहँ आनइ आना ॥
अंडकोस प्रति प्रति निज रूपा । देखेउँ जिनस अनेक अनूपा ॥
अवधपुरी प्रति भुवन निनारी । सरजू भिन्न भिन्न नर नारी ॥
दसरथ कौसल्या सुनु ताता । बिबिध रूप भरतादिक भ्राता ॥
प्रति ब्रह्मांड राम अवतारा । देखउँ बालबिनोद अपारा ॥
दो० — भिन्न भिन्न मैं दीख सब अति बिचित्र हरिजान ।

अगनित भुवन फिरेउँ प्रभु राम न देखेउँ आन ॥ ८१ (क) ॥

सोइ सिसुपन सोइ सोभा सोइ कृपाल रघुबीर ।

भुवन भुवन देखत फिरउँ प्रेरित मोह समीर ॥ ८१ (ख) ॥

भ्रमत मोहि ब्रह्मांड अनेका । बीते मनहुँ कल्प सत एका ॥
 फिरत फिरत निज आश्रम आयउँ । तहँ पुनि रहि कछु काल गवाँयउँ ॥
 निज प्रभु जन्म अवध सुनि पायउँ । निर्भर प्रेम हरषि उठि धायउँ ॥
 देखउँ जन्म महोत्सव जाई । जेहि बिधि प्रथम कहा मैं गाई ॥
 राम उदर देखेउँ जग नाना । देखत बनइ न जाइ बखाना ॥
 तहँ पुनि देखेउँ राम सुजाना । माया पति कृपाल भगवाना ॥
 करउँ बिचार बहोरि बहोरी । मोह कलिल व्यापित मति मोरी ॥
 उभय घरी महँ मैं सब देखा । भयउँ भ्रमित मन मोह बिसेषा ॥
 दो० — देखि कृपाल बिकल मोहि बिहँसे तब रघुबीर ।

बिहँसतहीं मुख बाहेर आयउँ सुनु मतिधीर ॥ ८२ (क) ॥
 सोइ लरिकाई मो सन करन लगे पुनि राम ।

कोटि भाँति समुझावउँ मनु न लहइ बिश्राम ॥ ८२ (ख) ॥
 देखि चरित यह सो प्रभुताई । समुझत देह दसा बिसराई ॥
 धरनि परेउँ मुख आव न बाता । त्राहि त्राहि आरत जन त्राता ॥
 प्रेमाकुल प्रभु मोहि बिलोकी । निज माया प्रभुता तब रोकी ॥
 कर सरोज प्रभु मम सिर धरेऊ । दीनदयाल सकल दुख हरेऊ ॥
 कीन्ह राम मोहि बिगत बिमोहा सेवक सुखद कृपा संदोहा ॥
 प्रभुता प्रथम बिचारि बिचारी । मन महँ होइ हरष अति भारी ॥
 भगत बछलता प्रभु कै देखी । उपजी मम उर प्रीति बिसेषी ॥
 सजल नयन पुलकित कर जोरी । कीन्हिउँ बहु बिधि बिनय बहोरी ॥

दो० — सुनि सप्रेम मम बानी देखि दीन निज दास ।

बचन सुखद गंभीर मृदु बोले रमानिवास ॥ ८३ (क) ॥

काकभसुंडि मागु बर अति प्रसन्न मोहि जानि ।

अनिमादिक सिद्धि अपर रिद्धि मोच्छ सकल सुख खानि ॥ ८३ (ख) ॥

ग्यान बिबेक बिरति बिग्याना । मुनि दुर्लभ गुन जे जग नाना ॥

आजु देउँ सब संसय नार्हीं । मागु जो तोहि भाव मन माहीं ॥

सुनि प्रभु बचन अधिक अनुगोउँ । मन अनुमान करन तब लागेउँ ॥

प्रभु कह देन सकल सुख सही । भगति आपनी देन न कही ।

भगति हीन गुन सब सुख ऐसे । लवन बिना बहु बिजन जैसे ॥

भजन हीन सुख कवने काजा । अस बिचारि बोलेउँ खगराजा ॥

जौं प्रभु होइ प्रसन्न बर देहू । मो पर करहु कृपा अरु नेहू ॥

मन भावत बर मागउँ स्वामी । तुम्ह उदार उर अंतरजामी ॥

दो० — अबिरल भगति बिसुद्ध तव श्रुति पुरान जो गाव ।

जेहि खोजत जोगीस मुनि प्रभु प्रसाद कोउ पाव ॥ ८४ (क) ॥

भगत कल्पतरु प्रनत हित कृपा सिधु सुख धाम ।

सोइ निज भगति मोहि प्रभु देहु दया करि राम ॥ ८४ (ख) ॥

एवमस्तु कहिं रघुकुलनायक । बोले बचन परम सुखदायक ॥

सुनु बायस तैं सहज सयाना । काहे न मार्गसि अस बरदाना ॥

सब सुख खानि भगति तैं मागी । नहिं जग कोउ तोहि सम बड़भागी ॥

जो मुनि कोटि जतन नहिं लहहीं । जे जप जोग अनल तन दहहीं ॥

रीझेउँ देखि तोरि चतुराई । मागेहु भगति मोहि अति भाई ॥
 सुनु बिहंग प्रसाद अब मोरें । सब सुभ गुन बसिहहिं उर तोरें ॥
 भगति ग्यान बिग्यान बिरागा । जोग चरित्र रहस्य बिभागा ॥
 जानब तैं सबही कर भेदा । मम प्रसाद नहिं साधन खेदा ॥

दो०— माया संभव भ्रम सब अब न व्यापिहहिं तोहि ।

जानेसु ब्रह्म अनादि अज अगुन गुनाकर मोहि ॥ ८५ (क) ॥

मोहि भगत प्रिय संतत अस बिचारि सुनु काग ।

कार्य बचन मन मम पद करेसु अचल अनुगग ॥ ८५ (ख) ॥

अब सुनु परम बिमल मम बानी । सत्य सुगम निगमादि बखानी ॥
 निज सिद्धांत सुनावउँ तोही । सुनु मन धरु सब तजि भजु मोही ॥
 मम माया संभव संसारा । जीव चराचर बिबिधि प्रकारा ॥
 सब मम प्रिय सब मम उपजाए । सब ते अधिक मनुज मोहि भाए ॥
 तिन्ह महँ द्विज द्विज महँ श्रुतिधारी । तिन्ह महँ निगम धरम अनुसारी ॥
 तिन्ह महँ प्रिय बिरक्त पुनि ग्यानी । ग्यानिहु ते अति प्रिय बिग्यानी ॥
 तिन्ह ते पुनि मोहि प्रिय निज दासा । जेहि गति मोरि न दूसरि आसा ॥
 पुनि पुनि सत्य कहउँ तोहि पाहीं । मोहि सेवक सम प्रिय कोउ नाहीं ॥
 भगति हीन बिरंचि किन होई । सब जीवहु सम प्रिय मोहि सोई ॥
 भगतिवंत अति नीचउ प्राणी । मोहि प्रानप्रिय असि मम बानी ॥

दो०— सुचि सुसील सेवक सुमति प्रिय कहु काहि न लाग ।

श्रुति पुरान कह नीति असि सावधान सुनु काग ॥ ८६ ॥

एक पिता के बिपुल कुमारा । होहिं पृथक गुन सील अचारा ॥
 कोउ पंडित कोउ तापस ग्याता । कोउ धनवंत सूर कोउ दाता ॥
 कोउ सर्वग्य धर्मरत कोई । सब पर पितहि प्रीति सम होई ॥
 कोउ पितु भगत बचन मन कर्मा । सपनेहुँ जान न दूसर धर्मा ॥
 सो सुत प्रिय पितु प्रान समाना । जद्यपि सो सब भाँति अयाना ॥
 एहि बिधि जीव चराचर जेते । त्रिजग देव नर असुर समेते ॥
 अखिल बिस्व यह मोर उपाया । सब पर मोहि बराबरि दाया ॥
 तिन्ह महुँ जो परिहरि मद माया । भजै मोहि मन बच अरु काया ॥
 दो०— पुरुष नपुंसक नारि वा जीव चराचर कोइ ।

सब भाव भज कपट तजि मोहि परम प्रिय सोइ ॥ ८७ (क) ॥

सो०— सत्य कहउँ खग तोहि सुचि सेवक मम प्रानप्रिय ।

अस बिचारि भजु मोहि परिहरि आस भरोस सब ॥ ८७ (ख) ॥
 कबहुँ काल न ब्यापिहि तोही । सुमिरेसु भजेसु निरंतर मोही ॥
 प्रभु बचनामृत सुनि न अघाऊँ । तनु पुलकित मन अति हरषाऊँ ॥
 सो सुख जानइ मन अरु काना । नहिं रसना पहिं जाइ बखाना ॥
 प्रभु सोभा सुख जानहिं नयना । कहि किमि सकहिं तिन्हि नहिं बयना ॥
 बहु बिधि मोहि प्रबोधि सुख देई । लगे करन सिसु कौतुक तेई ॥
 सजल नयन कछु मुख करि रूखा । चितइ मातु लागी अति भूखा ॥
 देखि मातु आतुर उठि धाई । कहि मृदु बचन लिए उर लाई ॥
 गोद राखि कराव पय पाना । रघुपति चरित ललित कर गाना ॥

सो० — जेहि सुख लागि पुगिर असुभ बेष कृत सिव सुखद ।

अवधपुरी नर नारि तेहि सुख महँ संतत मगन ॥ ८८ (क) ॥

सोई सुख लवलेस जिन्ह बारक सपनेहुँ लहेउ ।

ते नहिँ गनहिँ खगेस ब्रह्मसुखहि सज्जन सुमति ॥ ८८ (ख) ॥

मैं पुनि अवध रहेउँ कछु काला । देखेउँ बालबिनोद रसाला ॥

राम प्रसाद भगति बर पायउँ । प्रभु पद बंदि निजाश्रम आयउँ ॥

तब ते मोहि न ब्यापी माया । जब ते रघुनायक अपनाया ॥

यह सब गुप्त चरित मैं गावा । हरि मायाँ जिमि मोहि नचावा ।

निज अनुभव अब कहउँ खगेसा । बिनु हरि भजन न जाहिँ कलेसा ॥

राम कृपा बिनु सुनु खगराई । जानि न जाइ राम प्रभुताई ॥

जानें बिनु न होइ परतीती । बिनु परतीति होइ नहिँ प्रीती ॥

प्रीति बिना नहिँ भगति दिढ़ाई । जिमि खगपति जल कै चिकनाई ॥

सो० — बिनु गुर होइ कि ग्यान ग्यान कि होइ बिराग बिनु ।

गावहिँ बेद पुरान सुख कि लहिअ हरि भगति बिनु ॥ ८९ (क) ॥

कोउ बिश्राम कि पाव तात सहज संतोष बिनु ।

चलै कि जल बिनु नाव कोटि जतन पचि पचि मरिअ ॥ ८९ (ख) ॥

बिनु संतोष न काम नसाहीं । काम अछत सुख सपनेहुँ नाहीं ।

राम भजन बिनु मिटहिँ कि कामा थल बिहीन तरु कबहुँ कि जामा ॥

बिनु बिग्यान कि समता आवइ । कोउ अवकास कि नभ बिनु पावइ ॥

श्रद्धा बिना धर्म नहिँ होई । बिनु महि गंध कि पावइ कोई ॥

बिनु तप तेज कि कर बिस्तारा । जल बिनु रस कि होइ संसारा ॥
 सील कि मिल बिनु बुध सेवकाई । जिमि बिनु तेज न रूप गोसाँई ॥
 निज सुख बिनु मन होइ कि थीरा । परस कि होइ बिहीन समीरा ॥
 कवनिउ सिद्धि कि बिनु बिस्वासा । बिनु हरि भजन न भव भय नासा ॥
 दो० — बिनु बिस्वास भगति नहिं तेहि बिनु द्रवहिं न राघु ।

राम कृपा बिनु सपनेहुँ जीव न लह बिश्रामु ॥ ९० (क) ॥

सो० — अस बिचारि मतिधीर तजि कुतर्क संसय सकल ।

भजहु राम रघुबीर करुनाकर सुंदर सुखद ॥ ९० (ख) ॥
 निज मति सरिस नाथ मैं गाई । प्रभु प्रताप महिमा खगराई ॥
 कहेउँ न कछु करि जुगुति बिसेषी । यह सब मैं निज नयनहि देखी ॥
 महिमा नाम रूप गुन गाथा । सकल अमित अनंत रघुनाथा ॥
 निज निज मति मुनि हरि गुन गावहिं । निगम सेष सिव पार न पावहिं ॥
 तुम्हहि आदि खग मसक प्रजंता । नभ उड़ाहिं नहिं पावहिं अंता ।
 तिमि रघुपति महिमा अवगाहा । तात कबहुँ कोउ पाव कि थाहा ॥
 राघु काम सत कोटि सुभग तन । दुर्गा कोटि अमित अरि मर्दन ॥
 सक्र कोटि सत सरिस बिलासा । नभ सत कोटि अमित अवकासा ॥
 दो० — मरुत कोटि सत विपुल बल रवि सत कोटि प्रकास ।

ससि सत कोटि सुसीतल समन सकल भव त्रास ॥ ९१ (क) ॥

काल कोटि सत सरिस अति दुस्तर दुर्ग दुर्गंत ।

धूमकेतु सत कोटि सम दुराधरष भगवंत ॥ ९१ (ख) ॥

प्रभु अगाध सत कोटि पताला । समन कोटि सत सरिस कराला ॥
 तीरथ अमित कोटि सम पावन । नाम अखिल अघ पूग नसावन ॥
 हिमगिरि कोटि अचल रघुबीरा । सिंधु कोटि सत सम गंभीरा ॥
 कामधेनु सत कोटि समाना । सकल काम दायक भगवाना ॥
 सारद कोटि अमित चतुराई बिधि सत कोटि सृष्टि निपुनाई ।
 बिष्णु कोटि सम पालन कर्ता । रुद्र कोटि सत सम संहर्ता ॥
 धनद कोटि सत सम धनवाना । माया कोटि प्रपंच निधाना ॥
 भार धरन सत कोटि अहीसा । निरवधि निरुपम प्रभु जगदीसा ।
 छं०—निरुपम न उपमा आन राम समान रामु निगम कहै ।

जिमि कोटि सत खद्योत सम रबि कहत अति लघुता लहै ॥

एहि भाँति निज निज मति बिलास मुनीस हरिहि बखानहीं ।

प्रभु भाव गाहक अति कृपाल सप्रेम सुनि सुख मानहीं ॥

दो०—रामु अमित गुन सागर थाह कि पावइ कोइ ।

संतन्ह सन जस किछु सुनेउँ तुम्हहि सुनायउँ सोइ ॥ १२ (क) ॥

सो०—भाव बस्य भगवान सुख निधान करुना भवन ।

तजि ममता मद मान भजिअ सदा सीता रवन ॥ १२ (ख) ॥

सुनि भुसुंड़ि के बचन सुहाए । हरषित खगपति पंख फुलाए ॥

नयन नीर मन अति हरषाना । श्रीरघुपति प्रताप उर आना ॥

पाछिल मोह समुझि पछिताना । ब्रह्म अनादि मनुज करि माना ॥

पुनि पुनि काग चरन सिरु नावा । जानि राम सम प्रेम बढ़ावा ॥

गुर बिनु भव निधि तरइ न कोई । जौं बिरंचि संकर सम होई ॥
संसय सर्प ग्रसेउ मोहि ताता । दुखद लहरि कुतर्क बहु ब्राता ॥
तव सरूप गारुड़ि रघुनायक । मोहि जिआयउ जन सुखदायक ॥
तव प्रसाद मम मोह नसाना । राम रहस्य अनूपम जाना ॥
दो०— ताहि प्रसंसि बिविधि बिधि सीस नाइ कर जोरि ।

बचन बिनीत सप्रेम मृदु बोलेउ गरुड़ बहोरि ॥ ९३ (क) ॥

प्रभु अपने अबिबेक ते बूझउँ स्वामी तोहि ।

कृपासिंधु सादर कहहु जानि दास निज मोहि ॥ ९३ (ख) ॥

तुम्ह सर्बग्य तग्य तम पारा । सुमति सुसील सरल आचारा ॥
ग्यान बिरति बिग्यान निवासा । रघुनायक के तुम्ह प्रिय दासा ॥
कारन कवन देह यह पाई । तात सकल मोहि कहहु बुझाई ॥
राम चरित सर सुंदर स्वामी । पायहु कहाँ कहहु नभगामी ॥
नाथ सुना मैं अस सिव पाहीं । महा प्रलयहुँ नास तव नाहीं ॥
मुधा बचन नहिं ईस्वर कहई । सोउ मोरें मन संसय अहई ॥
अग जग जीव नाग नर देवा । नाथ सकल जगु काल कलेवा ॥
अंड कटाह अमित लय कारी । कालु सदा दुरतिक्रम भारी ॥
सो०— तुम्हहि न व्यापत काल अति कराल कारन कवन ।

मोहि सो कहहु कृपाल ग्यान प्रभाव कि जोग बल ॥ ९४ (क) ॥

दो०— प्रभु तव आश्रम आएँ मोर मोह भ्रम भाग ।

कारन कवन सो नाथ सब कहहु सहित अनुराग ॥ ९४ (ख) ॥

गरुड़ गिरा सुनि हरषेउ कागा । बोलेउ उमा परम अनुरागा ॥
 धन्य धन्य तब मति उरगारी । प्रसन्न तुम्हारि मोहि अति प्यारी ॥
 सुनि तब प्रसन्न सप्रेम सुहाई । बहुत जनम कै सुधि मोहि आई ॥
 सब निज कथा कहउँ मैं गाई । तात सुनहु सादर मन लाई ॥
 जप तप मख सम दम ब्रत दाना । बिरति बिबेक जोग बिग्याना ॥
 सब कर फल रघुपति पद प्रेमा । तेहि बिनु कोउ न पावइ छेमा ॥
 एहिं तन राम भगति मैं पाई । ताते मोहि ममता अधिकाई ॥
 जेहि तैं कछु निज स्वारथ होई । तेहि पर ममता कर सब कोई ॥
 सो० — पन्नगारि असि नीति श्रुति संमत सज्जन कहहिं ।

अति नीचहु सन प्रीति करिअ जानि निज परम हित ॥ ९५ (क) ॥

पाट कीट तैं होइ तेहि तैं पाटंबर रुचिर ।

कृमि पालइ सबु कोइ परम अपावन प्रान सम ॥ ९५ (ख) ॥

स्वारथ साँच जीव कहूँ एहा । मन क्रम बचन राम पद नेहा ॥
 सोइ पावन सोइ सुभग सरीरा । जो तनु पाइ भजिअ रघुबीरा ॥
 राम बिमुख लहि बिधि सम देही । कबि कोबिद न प्रसंसहिं तेही ॥
 राम भगति एहिं तन उर जामी । ताते मोहि परम प्रिय स्वामी ॥
 तजउँ न तन निज इच्छा मरना । तन बिनु बेद भजन नहिं बरना ॥
 प्रथम मोहँ मोहि बहुत बिगोवा । राम बिमुख सुख कबहुँ न सोवा ॥
 नाना जनम कर्म पुनि नाना । किए जोग जप तप मख दाना ॥
 कवन जोनि जनमेउँ जहँ नाहीं । मैं खगेस भ्रमि भ्रमि जग माहीं ॥

देखेउँ करि सब करम गोसाईं । सुखी न भयउँ अबहिं की नाई ॥
सुधि मोहि नाथ जन्म बहु केरी । सिव प्रसाद मति मोहैं न घेरी ॥
दो०— प्रथम जन्म के चरित अब कहउँ सुनहु बिहगेस ।

सुनि प्रभु पद रति उपजड़ जातैं मिटहिं कलेस ॥ ९६ (क) ॥

पुरुष कल्प एक प्रभु जुग कलिजुग मल मूल ।

नर अरु नारि अधर्मरत सकल निगम प्रतिकूल ॥ ९६ (ख) ॥
तेहिं कलिजुग कोसलपुर जाई । जन्मत भयउँ सूद्र तनु पाई ॥
सिव सेवक मन क्रम अरु बानी । आन देव निंदक अभिमानी ॥
धन मद मत्त परम बाचाला । उग्रबुद्धि उर दंभ बिसाला ॥
जदपि रहेउँ रघुपति रजधानी । तदपि न कछु महिमा तब जानी ॥
अब जाना मैं अवध प्रभावा । निगमागम पुरान अस गावा ॥
कवनेहुँ जन्म अवध बस जोई । राम परायन सो परि होई ॥
अवध प्रभाव जान तब प्राणी । जब उर बसहिं रामु धनुषानी ॥
सो कलिकाल कठिन उरगारी । पाप परायन सब नर नारी ॥
दो०— कलिमल ग्रसे धर्म सब लुप्त भए सदग्रंथ ।

दंभिन्ह निज मति कल्पि करि प्रगट किए बहु पंथ ॥ ९७ (क) ॥

भए लोग सब मोहबस लोभ ग्रसे सुभ कर्म ।

सुनु हरिजान ग्यान निधि कहउँ कछुक कलिधर्म ॥ ९७ (ख) ॥
बरन धर्म नहिं आश्रम चारी । श्रुति बिरोध रत सब नर नारी ॥
द्विज श्रुति बेचक भूप प्रजासन । कोउ नहिं मान निगम अनुसासन ॥

मारग सोइ जा कहूँ जोइ भावा । पंडित सोइ जो गाल बजावा ॥
 मिथ्यारंभ दंभ रत जोई । ता कहूँ संत कहइ सब कोई ॥
 सोइ सयान जो परधन हारी । जो कर दंभ सो बड़ आचारी ॥
 जो कह झूठ मसखरी जाना । कलिजुग सोइ गुनवंत बखाना ॥
 निराचार जो श्रुति पथ त्यागी । कलिजुग सोइ ग्यानी सो बिरगी ॥
 जाकें नख अरु जटा बिसाला । सोइ तापस प्रसिद्ध कलिकाला ॥
 दो०— असुभ बेष भूषन धरें भच्छाभच्छ जे खाहिं ।

तेइ जोगी तेइ सिद्ध नर पूज्य ते कलिजुग माहिं ॥ ९८ (क) ॥

सो०— जे अपकारी चार तिन्ह कर गौरव मान्य तेइ ।

मन क्रम बचन लखार तेइ बकता कलिकाल महुँ ॥ ९८ (ख) ॥

नारि बिबस नर सकल गोसाईं । नाचहिं नट मर्कट की नाई ॥
 सूद्र द्विजन्ह उपदेसहिं ग्याना । मेलि जनेऊ लोहिं कुदाना ॥
 सब नर काम लोभ रत क्रोधी । देव बिप्र श्रुति संत बिरोधी ॥
 गुन मंदिर सुंदर पति त्यागी । भजहिं नारि पर पुरुष अभाग्यी ॥
 सौभागिनीं बिभूषन हीना । बिधवन्ह के सिंगार नबीना ॥
 गुर सिष बधिर अंध का लेखा । एक न सुनइ एक नहिं देखा ॥
 हरइ सिष्य धन सोक न हरई । सो गुर घोर नरक महुँ परई ॥
 मातु पिता बालकन्ह बोलावहिं । उदर भरै सोइ धर्म सिखावहिं ॥
 दो०— ब्रह्म ग्यान बिनु नारि नर कहहिं न दूसरि बात ।

कौड़ी लागि लोभ बस करहिं बिप्र गुर घात ॥ ९९ (क) ॥

बादहिं सूद्र द्विजन्ह सन हम तुम्ह ते कछु घाटि ।

जानइ ब्रह्म सो बिप्रबर आँखि देखावहिं डाटि ॥ १९ (ख) ॥

पर त्रिय लंपट कपट सयाने । मोह द्रोह ममता लपटाने ॥
तेइ अभेदबादी ग्यानी नर । देखा मैं चरित्र कलिजुग कर ॥
आपु गए अरु तिन्हहू घालहिं । जे कहूँ सत मारग प्रतिपालहिं ॥
कल्प कल्प भरि एक एक नरका । परहिं जे दूषहिं श्रुति करि तरका ॥
जे बरनाधम तेलि कुम्हारा । स्वपच किरात कोल कलवारा ॥
नारि मुई गृह संपति नासी । मूड़ मूड़ाइ होहिं संन्यासी ॥
ते बिप्रन्ह सन आपु पुजावहिं । उभय लोक निज हाथ नसावहिं ॥
बिप्र निरच्छर लोलुप कामी । निराचार सठ बृषली स्वामी ॥
सूद्र करहिं जप तप ब्रत नाना । बैठि बरासन कहहिं पुराना ॥
सब नर कल्पित करहिं अचारा । जाइ न बरनि अनीति अपारा ॥

दो० — भए बरन संकर कलि भित्रसेतु सब लोग ।

करहिं पाप पावहिं दुख भय रुज सोक बियोग ॥ १०० (क) ॥

श्रुति संमत हरि भक्ति पथ संजुत बिरति बिबेक ।

तेहिं न चलहिं नर मोह बस कल्पहिं पंथ अनेक ॥ १०० (ख) ॥

छं० — बहु दाम सँवारहिं धाम जती । बिषया हरि लीन्हि न रहि बिरती ॥

तपसी धनवंत दरिद्र गृही । कलि कौतुक तात न जात कही ॥

कुलवंति निकारहिं नारि सती । गृह आनहिं चेरि निबेरि गती ॥

सुत मानहिं मातु पिता तब लौं । अबलानन दीख नहीं जब लौं ॥

समुरारि पिआरि लगी जब तैं । रिपुस्वरूप कुटुब भए तब तैं ॥
 नृप पाप परायन धर्म नहीं । करि दंड बिडंब प्रजा नितहीं ॥
 धनवंत कुलीन मलीन अपी । द्विज चिन्ह जनेउ उधार तपी ॥
 नहि मान पुरान न बेदहि जो । हरि सेवक संत सही कलि सो ॥
 कवि बृंद उदार दुनी न सुनी । गुनदूषक ब्रात न कोपि गुनी ॥
 कलि बारहिं बार दुकाल परै । बिनु अन्न दुखी सब लोग मरै ॥

दो० — सुनु खगेस कलि कपट हठ दंभ द्वेष पाषंड ।

मान मोह मारादि मद व्यापि रहे ब्रह्मांड ॥ १०१ (क) ॥

तामस धर्म करहिं नर जप तप ब्रत मख दान ।

देव न बरषहिं धरनीं बए न जामहिं धान ॥ १०१ (ख) ॥

छं० अबला कच भूषन भूरि छुधा । धनहीन दुखी ममता बहुधा ॥

सुख चाहहिं मूढ़ न धर्म रता । मति थोरि कठोरि न कोमलता ॥

नर पीड़ित रोग न भोग कहीं । अभिमान बिगोध अकारनहीं ॥

लघु जीवन संबतु पंच दसा । कलपांत न नास गुमानु असा ॥

कलिकाल बिहाल किए मनुजा । नहिं मानत कौं अनुजा तनुजा ॥

नहिं तोष बिचार न सीतलता । सब जाति कुजाति भए मगता ॥

इरिषा परुषाच्छर लोलुपता । भरि पूरि रही समता बिगता ॥

सब लोग बियोग बिसोक हए । बरनाश्रम धर्म अचार गए ॥

दम दान दया नहिं जानपनी । जड़ता परबंचनताति धनी ॥

तनु पोषक नारि नरा मगरे । परनिदक जे जग मो बगरे ॥

दो०— सुनु ब्यालारि काल कलि मल अवगुन आगार।

गुनउ बहुत कलिजुग कर बिनु प्रयास निस्तार ॥ १०२ (क) ॥

कृतजुग त्रेताँ द्वापर पूजा मख अरु जोग।

जो भति होइ सो कलि हरि नाम ते पावहि लोग ॥ १०२ (ख) ॥

कृतजुग सब जोगी बिग्यानी । करि हरि ध्यान तरहिं भव प्रानी ॥

त्रेताँ बिबिध जग्य नर करहीं । प्रभुहि समर्पि कर्म भव तरहीं ॥

द्वापर करि रघुपति पद पूजा । नर भव तरहिं उपाय न दूजा ॥

कलिजुग केवल हरि गुन गाहा । गावत नर पावहिं भव थाहा ॥

कलिजुग जोग न जग्य न ग्याना । एक अधार राम गुन गाना ॥

सब भरोस तजि जो भज रामहि । प्रेम समेत गाव गुन ग्रामहि ॥

सोइ भव तर कछु संसय नाही । नाम प्रताप प्रगट कलि माहीं ॥

कलि कर एक पुनीत प्रताप । मानस पुन्य होहिं नहिं पापा ॥

दो०— कलिजुग सम जुग आन नहिं जाँ नर कर बिस्वास ।

गाइ राम गुन गन बिमल भव तर बिनहिं प्रयास ॥ १०३ (क) ॥

प्रगट चारि पद धर्म के कलि महुँ एक प्रधान ।

जेन केन बिधि दीन्हें दान करइ कल्याण ॥ १०३ (ख) ॥

नित जुग धर्म होहिं सब केरे । हृदयँ राम माया के प्रेरे ॥

सुद्ध सत्त्व समता बिग्याना । कृत प्रभाव प्रसन्न मन जाना ॥

सत्त्व बहुत रज कछु रति कर्मा । सब बिधि सुख त्रेता कर धर्मा ॥

बहु रज स्वल्प सत्त्व कछु तामस । द्वापर धर्म हरष भय मानस ॥

तामस बहुत रजोगुन थोरा । कलि प्रभाव बिरोध चहुँ ओरा ॥
 बुध जुग धर्म जानि मन माहीं । तजि अधर्म रति धर्म कराहीं ।
 काल धर्म नहिं ब्यापहिं ताही । रघुपति चरन प्रीति अति जाही ॥
 नट कृत बिकट कपट खगराया । नट सेवकहि न ब्यापइ माया ॥

दो०— हरि माया कृत दोष गुन बिनु हरि भजन न जाहिं ।

भजिअ राम तजि काम सब अस बिचारि मन माहिं ॥ १०४ (क) ॥

तेहिं कलिकाल बरष बहु बसेउँ अवध बिहगेस ।

परेउ दुकाल बिपति बस तब मैं गयउँ बिदेस ॥ १०४ (ख) ॥

गयउँ उजेनी सनु उरगारी । दीन मलीन दरिद्र दुखारी ॥
 गएँ काल कछु संपति पाई । तहँ पुनि करउँ संभु सेवकाई ।
 बिप्र एक बैदिक सिव पूजा करइ सदा तेहि काजु न दूजा ॥
 परम साधु परमारथ बिंदक संभु उपासक नहिं हरि निदक ॥
 तेहि सेवउँ मैं कपट समेता । द्विज दयाल अति नीति निकेला ॥
 बाहिज नम्र देखि मोहि साई । बिप्र पढ़ाव पुत्र की नाई ॥
 संभु मंत्र मोहि द्विजबर दीन्हा । सुभ उपदेस बिबिध बिधि कीन्हा ॥
 जपउँ मंत्र सिव मंदिर जाई हृदयँ दंभ अहमिति अधिकाई ।

दो०— मैं खल मल संकुल मति नीच जाति बस मोह ।

हरिजन द्विज देखैं जरउँ करउँ बिष्णु कर ब्रह्म ॥ १०५ (क) ॥

सो०— गुर नित मोहि प्रबोध दुखित देखि आचरन मम ।

मोहि उपजइ अति क्रोध दंभिहि नीति कि भावई ॥ १०५ (ख) ॥

एक बार गुर लीन्ह बोलाई । मोहि नीति बहु भाँति सिखाई ॥
 सिव सेवा कर फल सुत सोई । अबिरल भगति राम पद होई ॥
 रामहि भजहिं तात सिव धाता । नर पावँर कै केतिक बाता ॥
 जासु चरन अज सिव अनुरागी । तासु द्रोहँ सुख चहसि अभागी ॥
 हर कहँ हरि सेवक गुर कहेऊ । सुनि खगनाथ हृदय मम दहेऊ ॥
 अधम जाति मैं बिद्या पाएँ । भयउँ जथा अहि दूध पिआएँ ।
 मानी कुटिल कुभाग्य कुजाती । गुर कर द्रोह करउँ दिनु राती ॥
 अति दयाल गुर स्वल्प न क्रोधा । पुनि पुनि मोहि सिखाव सुबोधा ॥
 जेहि ते नीच बड़ाई पावा । सो प्रथमहिं हति ताहि नसावा ॥
 भूम अनल संभव सुनु भाई । तेहि बुझाव घन पदवी पाई ॥
 रज मग परी निरादर रहई । सब कर पद प्रहार नित सहई ॥
 मरुत उड़ाव प्रथम तेहि भरई । पुनि नृप नयन किरीटन्हि परई ॥
 सुनु खगपति अस समुझि प्रसंगा । बुध नहिं करहिं अधम कर संग्गा ॥
 कबि कोबिद गावहिं असि नीती । खल सन कलह न भल नहिं प्रीती ॥
 उदासीन नित रहिअ गोसाईं । खल परिहरिअ स्वान की नाई ॥
 मैं खल हृदयँ कपट कुटिलाई । गुर हित कहइ न मोहि सोहाई ॥
 दो०— एक बार हर मंदिर जपत रहेउँ सिव नाम ।

गुर आयउ अभिमान तैं उठि नहिं कीन्ह प्रनाम ॥ १०६ (क) ॥

सो दयाल नहिं कहेउ कछु उर न रोष लवलेस ।

अति अघ गुर अपमानता सहि नहिं सके महेस ॥ १०६ (ख) ॥

मंदिर भाझ भई नभबानी । रे हतभाग्य अग्य अभिमानी ॥
 जद्यपि तव गुर कैं नहिं क्रोधा । अति कृपाल चित सम्यक बोधा ॥
 तदपि साप सठ दैहउँ तोही । नीति बिरोध सोहाइ न मोही ॥
 जौं नहिं दंड करौं खल तोरा । भ्रष्ट होइ श्रुतिमारग मोरा ॥
 जे सठ गुर सन इरिषा करहीं । रौरव नरक कोटि जुग परहीं ॥
 त्रिजग जोनि पुनि धरहिं सरीरा । अयुत जन्म भरि पावहिं पीरा ॥
 बैठ रहेसि अजगर इव पापी । सर्प होहि खल मल मति व्यापी ॥
 महा बिटप कोटर महुँ जाई । रहू अधमाधम अधगति पाई ॥
 दो०— हाहाकार कीन्ह गुर दारुन सुनि सिव साप ।

कंपित मोहि बिलोकि अति उर उपजा परिताप ॥ १०७ (क) ॥

करि दंडवत सप्रेम द्विज सिव सन्मुख कर जोरि ।

बिनय करत गदगद स्वर समुझि घोर गति मोरि ॥ १०७ (ख) ॥

छं० नमामीशमीशान निर्वाणरूपं । विभुं व्यापकं ब्रह्म वेदस्वरूपं ॥
 निजं निर्गुणं निर्विकल्पं निरीहं । चिदाकाशमाकाशवासं भजेऽहं ॥
 निराकारमोकारमूलं तुरीयं । गिरा ग्यान गोतीतमीशं गिरीशं ॥
 करालं महाकाल कालं कृपालं । गुणागार संसारपारं नतोऽहं ॥
 तुषाराद्रि संकाश गौरं गभीरं । मनोभूत कोटि प्रभा श्री शरीरं ॥
 स्फुरन्मौलि कल्लोलिनी चारु गंगा । लसद्भालबालेन्दु कंठे भुजंगा ॥
 चलत्कुंडलं ध्रु सुनेत्रं विशालं । प्रसन्नाननं नीलकंठं दयालं ॥
 मृगाधीशचर्माम्बरं मुण्डमालं । प्रियं शंकरं सर्वनाथं भजामि ॥

प्रचंडं प्रकृष्टं प्रगल्भं परेशं । अखंडं अजं भानुकोटिप्रकाशं ॥
 त्रयः शूल निर्मूलनं शूलपाणिं । भजेऽहं भवानीपतिं भावगम्यं ॥
 कलातीत कल्याण कल्पान्तकारी । सदा सज्जनानन्ददाता पुरारी ॥
 चिदानन्द संदोह मोहापहारी । प्रसीद प्रसीद प्रभो मन्मथारी ॥
 न घावद् उमानाथ पादारविन्दं । भजंतीह लोके परे वा नराणां ॥
 न तावत्सुखं शान्तिं सन्तापनाशं । प्रसीद प्रभो सर्वभूताधिवासं ॥
 न जानामि योगं जपं नैव पूजां । नतोऽहं सदा सर्वदा शंभु तुभ्यं ॥
 जरा जन्म दुःखौघ तातप्यमानं । प्रभो पाहि आपन्नमापीश शंभो ॥

श्लोक—रुद्राष्टकमिदं प्रोक्तं विप्रेण हरतोषये ।

ये पठन्ति नरा भक्त्या तेषां शम्भुः प्रसीदति ॥

दो०— सुनि बिनती सर्वग्य सिव देखि बिप्र अनुरागु ।

पुनि मंदिर नभबानी भइ द्विजवर वर मागु ॥ १०८ (क) ॥

जौं प्रसन्न प्रभु मोरे पर नाथ दीन पर नेहु ।

निज पद भगति देइ प्रभु पुनि दूसर वर देहु ॥ १०८ (ख) ॥

तव माया बस जीव जड़ संतत फिरइ भुलान ।

तेहि पर क्रोध न करिअ प्रभु कृपासिंधु भगवान ॥ १०८ (ग) ॥

संकर दीनदयाल अब एहि पर होहु कृपाल ।

साण अनुग्रह होइ जेहिं नाथ थोरेही काल ॥ १०८ (घ) ॥

एहि कर होइ परम कल्याण । सोइ करहु अब कृपानिधान ॥

बिप्र गिरा सुनि परहित सानी । एवमस्तु इति भइ नभबानी ॥

जदपि कीन्ह एहिं दारुन पापा । मैं पुनि दीन्हि कोप करि सापा ॥
 तदपि तुम्हारि साधुता देखी । करिहउँ एहि पर कृपा बिसेषी ॥
 छमासील जे पर उपकारी । ते द्विज मोहि प्रिय जथा खरारी ॥
 मोर श्राप द्विज व्यर्थ न जाइहि । जन्म सहस अवस्य यह पाइहि ॥
 जनमत मरत दुसह दुख होई । एहि स्वल्पउ नहिं ब्यापिहि सोई ॥
 कवनेउँ जन्म मिटिहि नहिं ग्याना सुनहि सूद्र मम बचन प्रवाना ॥
 रघुपति पुरीं जन्म तव भयऊ । पुनि तैं मम सेवाँ मन दयऊ ॥
 पुरी प्रभाव अनुग्रह मोरें । राम भगति उपजिहि उर तोरें ॥
 सुनु मम बचन सत्य अब भाई । हरितोषन ब्रत द्विज सेवकाई ॥
 अब जनि करहि बिप्र अपमाना । जानेसु संत अनंत समाना ॥
 इंद्र कुलिस मम सूल बिसाला । कालदंड हरि चक्र कराला ।
 जो इन्ह कर मारा नहिं मरई । बिप्र द्रोह पावक सो जरई ॥
 अस बिबेक राखेहु मन माहीं । तुम्ह कहँ जग दुर्लभ कछु नाहीं ॥
 औरउ एक आसिषा मोरी । अप्रतिहत गति होइहि तोरी ॥

दो०— सुनि सिव बचन हरषि गुर एवमस्तु इति भाषि ।

मोहि प्रबोधि गयउ गृह संभु चरन उर राखि ॥ १०९ (क) ॥

प्रेरित काल बिंधि गिरि जाइ भयउँ मैं ब्याल ।

पुनि प्रयास बिनु सो तनु तजेउँ गएँ कछु काल ॥ १०९ (ख) ॥

जोइ तनु धरउँ तजउँ पुनि अनायास हरिजान ।

जिमि नूतन पट पहिरइ नर परिहरइ पुरान ॥ १०९ (ग) ॥

सिवैं राखी श्रुति नीति अरु मैं नहिं पावा क्लेश ।

एहि बिधि धोरैं बिबिधि तनु ग्यान न गयउ खगेस ॥ १०९ (घ) ॥
 प्रजग देव नर जोइ तनु धरऊँ । तहैं तहैं राम भजन अनुसरऊँ ॥
 एक सूल मोहि बिसर न काऊ । गुर कर कोमल सील सुभाऊ ॥
 नरम देह द्विज कै मैं पाई । सुर दुर्लभ पुरान श्रुति गाई ॥
 खेलउँ तहूँ बालकन्ह मीला । करउँ सकल रघुनायक लीला ॥
 प्रौढ़ भएँ मोहि पिता पढ़ावा । समझउँ सुनउँ गुनउँ नहिं भावा ॥
 मन ते सकल बासना भागी । केवल राम चरन लय लागी ॥
 कहु खगेस अस कवन अभागी । खरी सेव सुरधेनुहि त्यागी ॥
 प्रेम मगन मोहि कहू न सोहाई । हारेउ पिता पढ़ाइ पढ़ाई ॥
 भए कालबस जब पितु माता । मैं बन गयउँ भजन जनत्राता ॥
 जहँ जहँ बिपिन मुनीस्वर पावउँ । आश्रम जाइ जाइ सिरु नावउँ ॥
 बूझउँ तिन्हहि राम गुन गाहा । कहहिं सुनउँ हरषित खगनाहा ॥
 सुनत फिरउँ हरि गुन अनुबादा । अब्याहत गति संभु प्रसादा ॥
 छूटी त्रिविधि ईषना गाढ़ी । एक लालसा उर अति बाढ़ी ॥
 राम चरन बारिज जब देखौं । तब निज जन्म सफल करि लेखौं ॥
 जेहि पूँछउँ सोइ मुनि अस कहई । ईस्वर सर्व भूतमय अहई ॥
 निर्गुन मत नहिं मोहि सोहाई । सगुन ब्रह्म रति उर अधिकाई ॥
 दो०— गुर के बचन सुरति करि राम चरन मनु लाग ।

रघुपति जस गावत फिरउँ छन छन नव अनुराग ॥ ११० (क) ॥

सठ स्वपच्छ तव हृदयँ बिसाला । सपदि होहि पच्छी चंडाला
लीन्ह श्राप मैं सीस चढ़ाई । नहिं कछु भय न दीनता आई ॥
दो० — तुरत भयउँ मैं काग तब पुनि मुनि पद सिरु नाइ ।

सुमिरि राम रघुबंस मनि हरषित चलेउँ उड़ाइ ॥ ११२ (क) ॥

उमा जे राम चरन रत बिगत काम मद क्रोध ।

निज प्रभुमय देखहिं जगत केहि सन करहिं बिरोध ॥ ११२ (ख) ॥

सुनु खगेस नहिं कछु रिषि दूषन । उर प्रेरक रघुबंस बिभूषन ॥
कृपासिंधु मुनि मति करि भोरी लीन्ही प्रेम परिच्छा मोरी ॥
मन बच क्रम मोहि निज जन जाना मुनि मति पुनि फेरी भगवाना ॥
रिषि मम महत सीलता देखी राम चरन बिस्वास बिसेषी ॥
अति बिसमय पुनि पुनि पछिताई सादर मुनि मोहि लीन्ह बोलाई ॥
मम परितोष बिबिधि बिधि कीन्हा । हरषित राममंत्र तब दीन्हा ।
बालकरूप राम कर ध्याना । कहेउ मोहि मुनि कृपानिधाना ॥
सुंदर सुखद मोहि अति भावा । सो प्रथमहिं मैं तुम्हहि सुनावा ॥
मुनि मोहि कछुक काल तहँ राखा । रामचरितमानस तब भाषा ॥
सादर मोहि यह कथा सुनाई । पुनि बोले मुनि गिरा सुहाई ॥
रामचरित सर गुप्त सुहावा । संभु प्रसाद तात मैं पावा ॥
तोहि निज भगत राम कर जानी । ताते मैं सब कहेउँ बखानी ॥
राम भगति जिन्ह कें उर नाहीं । कबहुँ न तात कहिअ तिन्ह पाहीं ॥
मुनि मोहि बिबिधि भाँति समुझावा । मैं सप्रेम मुनि पद सिरु नावा ॥

निज कर कमल परसि मम सीसा । हरषित आसिष दीन्ह मुनीसा ॥
राम भगति अबिरल उर तोरें । बसिहि सदा प्रसाद अब मोरें ॥
दो० — सदा राम प्रिय होहु तुम्ह सुभ गुन भवन अमान ।

कामरूप इच्छामरन ग्यान बिराग निधान ॥ ११३ (क) ॥

जेहि आश्रम तुम्ह बसब पुनि सुमिरत श्रीभगवंत ।

ब्यापिहि तहैं न अबिद्या जोजन एक प्रजंत ॥ ११३ (ख) ॥

काल कर्म गुन दोष सुभाऊ । कछु दुख तुम्हहि न ब्यापिहि काऊ ॥
राम रहस्य ललित बिधि नाना । गुप्त प्रगट इतिहास पुराना ॥
बिनु श्रम तुम्ह जानब सब सोऊ । नित नव नेह राम पद होऊ ॥
जो इच्छा करिहहु मन माहीं । हरि प्रसाद कछु दुर्लभ नाहीं ॥
सुनि मुनि आसिष सुनु मतिधीरा । ब्रह्मगिरा भइ गगन गँभीरा ॥
एवमस्तु तव बच भुनि ग्यानी । यह मम भगत कर्म मन बानी ॥
सुनि नभगिरा हरष मोहि भयऊ । प्रेम मगन सब संसय गयऊ ॥
करि बिनती मुनि आयसु पाई । पद सरोज पुनि पुनि सिरु नाई ॥
हरष सहित एहिं आश्रम आयउँ । प्रभु प्रसाद दुर्लभ बर पायउँ ॥
इहाँ बसत मोहि सनु खग ईसा । बीते कलप सात अरु बीसा ॥
करउँ सदा रघुपति गुन गाना । सादर सुनहिं बिहंग सुजाना ॥
जब जब अवधपुरीं रघुबीरा । धरहिं भगत हित मनुज सरीरा ॥
तब तब जाइ राम पुर रहऊँ । सिसुलीला बिलोकि सुख लहऊँ ॥
पुनि उर राखि राम सिसुरूपा । निज आश्रम आवउँ खगभूपा ॥
कथा सकल मैं तुम्हहि सुनाई । काग देह जेहिं कारन पाई ॥

कहिउँ तात सब प्रसन्न तुम्हारी राम भगति महिमा अति भारी ॥

दो०— ताते यह तन मोहि प्रिय भयउ राम पद नेह ।

निज प्रभु दरसन पायउँ गए सकल संदेह ॥ ११४ (क) ॥

मासपारायण, उनतीसवाँ विश्राम

भगति पच्छ हठ करि रहेउँ दीन्हि महारिषि साय ।

मुनि दुर्लभ बर पायउँ देखहु भजन प्रताप ॥ ११४ (ख) ॥

जे असि भगति जानि परिहरहीं । केवल ग्यान हेतु श्रम करहीं ॥

ते जड़ कामधेनु गृहँ त्यागी । खोजत आकु फिरहिं पय लागी ॥

मुनु खगोस हरि भगति बिहाई । जे सुख चाहहिं आन उपाई ॥

ते सठ महामिधु बिनु तरनी । पैरि पार चाहहिं जड़ करनी ॥

सुनि भसुंड़ि के बचन भवानी । बोलेउ गरुड़ हरषि मृदु बानी ॥

तव प्रसाद प्रभु मम उर माहीं । संसय सोक मोह भ्रम नाहीं ॥

सुनेउँ पुनीत राम गुन ग्रामा । तुम्हरी कृपाँ लहेउँ बिश्रामा ॥

एक बात प्रभु पूँछउँ तोही । कहहु बुझाइ कृपानिधि मोही ॥

कहहिं संत मुनि बेद पुराना । नहिं कछु दुर्लभ ग्यान समाना ।

सोइ मुनि तुम्ह सन कहेउ गोसाईं । नहिं आदरेहु भगति की नाई ॥

ग्यानहि भगतिहि अंतर केता । सकल कहहु प्रभु कृपा निकेता ॥

सुनि उरगारि बचन सुख माना । सादर बोलेउ काग सुजाना ॥

भगतिहि ग्यानहि नहिं कछु भेदा । उभय हरहिं भव संभव खेदा ॥

नाथ मुनीस कहहिं कछु अंतर । सावधान सोउ सुनु बिहंगबर ॥

ग्यान बिराग जोग बिग्याना । ए सब पुरुष सुनहु हरिजाना ॥
पुरुष प्रताप प्रबल सब भाँती । अबला अबल सहज जड़ जाती ॥
दो०—पुरुष त्यागि सक नारिहि जो बिरक्त मति धीर ।

न तु कामी बिषयाब्धस बिमुख जो पद रघुबीर ॥ ११५ (क) ॥
सो०—सोउ मुनि ग्याननिधान भृगनयनी बिधु मुख निरखि ।

बिबस होइ हरिजान नारि बिष्णु माया प्रगट ॥ ११५ (ख) ॥
इहाँ न पच्छपात कछु राखउँ । बेद पुरान संत मत भाषउँ ॥
मोह न नारि नारि केँ रूपा । पत्रगारि यह रीति अनूपा ॥
माया भगति सुनहु तुम्ह दोऊ । नारि बर्ग जानइ सब कोऊ ॥
पुनि रघुबीरहि भगति पिआरी । माया खलु नर्तकी बिचारी ॥
भगतिहि सानुकूल रघुराया । ताते तेहि डरपति अति माया ॥
राम भगति निरुपम निरुपाधी । बसइ जामु उर सदा अबाधी ॥
तेहि बिलोकि माया सकुचाई । करि न सकइ कछु निज प्रभुताई ॥
अस बिचारि जे मुनि बिग्यानी । जाचहिं भगति सकल सुख खानी ॥
दो०—यह रहस्य रघुनाथ कर बेगि न जानइ कोइ ।

जो जानइ रघुपति कृपाँ सपनेहुँ मोह न होइ ॥ ११६ (क) ॥
औरउ ग्यान भगति कर भेद सुनहु सुप्रबीन ।

जो सुनि होइ राम पद प्रीति सदा अबिछीन ॥ ११६ (ख) ॥
सुनहु तात यह अकथ कहानी । समुझत बनइ न जाइ बखानी ॥
ईस्वर अंस जीव अबिनासी । चेतन अमल सहज सुखरासी ॥

सो मायाबस भयउ गोसाईं । बँध्यो कीर मरकट की नाई ॥
जड़ चेतनहि ग्रंथि परि गई । जदपि मृषा छूटत कठिनई ॥
तब ते जीव भयउ संसारी । छूट न ग्रंथि न होइ सुखारी ॥
श्रुति पुरान बहु कहेउ उपाई । छूट न अधिक अधिक अरुझाई ॥
जीव हृदयँ तम मोह बिसेषी ग्रंथि छूट किमि परइ न देखी ॥
अस संजोग ईस जब करई । तबहुँ कदाचित सो निरुअरई ॥
सात्त्विक श्रद्धा धेनु सुहाई । जौं हरि कृपाँ हृदयँ बस आई ॥
जप तप व्रत जम नियम अपारा । जे श्रुति कह सुभ धर्म अचारा ॥
तेइ तून हरित चरै जब गाई । भाव बच्छ सिसु पाइ पेन्हाई ॥
नोइ निवृत्ति पात्र बिस्वासा । निर्मल मन अहीर निज दासा ॥
परम धर्ममय पथ दुहि भाई । अवटै अनल अकाम बनाई ॥
तोष मरुत तब छमाँ जुड़ावै । धृति सम जावनु देइ जमावै ॥
मुदिताँ मथै बिचार मथानी । दम आधार रजु सत्य सुबानी ॥
तब मथि काढ़ि लेइ नवनीता । बिमल बिराग सुभग सुपुनीता ॥

दो० — जोग अगिनि करि प्रगट तब कर्म सुभासुभ लाइ ।

बुद्धि सिरावै ग्यान घृत ममता मल जरि जाइ ॥ ११७ (क) ॥

तब बिग्यानरूपिनी बुद्धि बिसद घृत पाइ ।

चित्त दिआ भरि धरै दृढ़ समता दिअटि बनाइ ॥ ११७ (ख) ॥

तीनि अवस्था तीनि गुन तेहि कपास तैं काढ़ि ।

तूल तुरीय सँवारि पुनि बाती करै सुगाढ़ि ॥ ११७ (ग) ॥

सो० — एहि बिधि लेसै दीप तेज रासि बिग्यानमय ।

जातहिं जासु समीप जरहिं मदादिक सलभ सब ॥ ११७ (घ) ॥
 सोहमस्मि इति बृत्ति अखंडा । दीप सिखा सोइ परम प्रचंडा ॥
 आतम अनुभव सुख सुप्रकासा । तब भव मूल भेद भ्रम नासा ॥
 प्रबल अबिद्या कर परिवारा । मोह आदि तम मिटइ अपारा ॥
 तब सोइ बुद्धि पाइ उँजआरा । उर गृहँ बैठि ग्रंथि निरुआरा ॥
 छोरन ग्रंथि पाव जौँ सोई । तब यह जीव कृतारथ होई ॥
 छोरत ग्रंथि जानि खगराया । बिघ्न अनेक करइ तब माया ॥
 रिद्धि सिद्धि प्रेरइ बहु भाई । बुद्धिहि लोभ दिखावहिं आई ॥
 कल बल छल करि जाहिं समीपा । अंचल बात बुझावहिं दीपा ॥
 होइ बुद्धि जौँ परम सयानी । तिन्ह तन चितव न अनहित जानी ॥
 जौँ तेहि बिघ्न बुद्धि नहिं बाधी । तौ बहोरि सुर करहिं उपाधी ॥
 इंद्री द्वार झरोखा नाना । तहँ तहँ सुर बैठे करि थाना ॥
 आवत देखहिं बिषय बयारी । ते हठि देहिं कपाट उघारी ॥
 जब सो प्रभंजन उर गृहँ जाई । तबहिं दीप बिग्यान बुझाई ॥
 ग्रंथि न छूटि मिटा सो प्रकासा । बुद्धि बिकल भइ बिषय बतासा ॥
 इंद्रिन्ह सुरन्ह न ग्यान सोहाई । बिषय भोग पर प्रीति सदाई ॥
 बिषय समीर बुद्धि कृत भोरी । तेहि बिधि दीप को बार बहोरी ॥
 दो० — तब फिरि जीव बिबिधि बिधि पावइ संसृति क्लेस ।

हरि माया अति दुस्तर तरि न जाइ बिहगेस ॥ ११८ (क) ॥

कहत कठिन समुझत कठिन साधत कठिन बिबेक ।

होइ घुनाच्छर न्याय जौं पुनि प्रत्यूह अनेक ॥ ११८ (ख) ॥
 ग्यान पंथ कृपान कै धारा । परत खगेस होइ नहिं बारा ॥
 जो निर्बिघ्न पंथ निर्बहई । सो कैवल्य परम पद लहई ॥
 अति दुर्लभ कैवल्य परम पद । संत पुरान निगम आगम बद ॥
 राम भजत सोइ मुकुति गोसाईं । अनइच्छित आवइ बरिआई ॥
 जिमि थल बिनु जल रहि न सकाई । कोटि भाँत कोउ करै उपाई ॥
 तथा मोच्छ सुख सुनु खगराई । रहि न सकइ हरि भगति बिहाई ॥
 अस बिचारि हरि भगत सयाने । मुक्ति निरादर भगति लुभाने ॥
 भगति करत बिनु जतन प्रयासा । संसृति मूल अबिद्या नासा ॥
 भोजन करिअ तृपति हित लागी । जिमि सो असन पचवै जठरागी ॥
 असि हरि भगति सुगम सुखदाई । को अस मूढ़ न जाहि सोहाई ॥
 दो०— सेवक सेव्य भाव बिनु भव न तरिअ उरगारि ।

भजहु राम पद पंकज अस सिद्धांत बिचारि ॥ ११९ (क) ॥

जो चेतन कहँ जइ करइ जइहि करइ चैतन्य ।

अस समर्थ रघुनायकहि भजहिं जीव ते धन्य ॥ ११९ (ख) ॥
 कहेउँ ग्यान सिद्धांत बुझाई । सुनहु भगति मनि कै प्रभुताई ॥
 राम भगति चिंतामनि सुंदर । बसइ गरुड़ जाके उर अंतर ॥
 परम प्रकास रूप दिन राती । नहिं कछु चहिअ दिआ घृत बाती ॥
 मोह दरिद्र निकट नहिं आवा । लोभ बात नहिं ताहि बुझावा ॥

प्रबल अबिद्या तम मिटि जाई । हारहिं सकल सलभ समुदाई ॥
 खल कामादि निकट नहिं जाहीं । बसइ भगति जाके उर माहीं ॥
 गरल सुधासम अरि हित होई । तेहि मनि बिनु सुख पाव न कोई ॥
 ब्यापहिं मानस रोग न भारी । जिन्ह के बस सब जीव दुखारी ॥
 राम भगति मनि उर बस जाके । दुख लवलेस न सपनेहुँ ताके ॥
 चतुर सिरोमनि तेइ जग माहीं । जे मनि लागि सुजतन कराहीं ॥
 सो मनि जदपि प्रगट जग अहई । राम कृपा बिनु नहिं कोउ लहई ॥
 सुगम उपाय पाइबे केरे । नर हतभाग्य देहिं भटभरे ॥
 पावन पर्वत बेद पुराना । राम कथा रुचिराकर नाना ॥
 मर्मी सज्जन सुमति कुदारी । ग्यान बिराग नयन उरगारी ॥
 भाव सहित खोजइ जो प्रानी । पाव भगति मनि सब सुख खानी ॥
 मोरें मन प्रभु अस बिस्वासा । राम ते अधिक राम कर दासा ॥
 राम सिंधु घन सज्जन धीरा । चंदन तरु हरि संत समीरा ।
 सब कर फल हरि भगति सुहाई । सो बिनु संत न काहूँ पाई ॥
 अस बिचारि जोइ कर सतसंगा । राम भगति तेहि सुलभ बिहंगा ॥
 दो०— ब्रह्म पयोनिधि मंदर ग्यान संत सुर आहिं ।

कथा सुधा मथि काढ़हिं भगति मधुरता जाहिं ॥ १२० (क) ॥

बिरति चर्म असि ग्यान मद लोभ मोह रिपु मारि ।

जय पाइअ सो हरि भगति देखु खगेस बिचारि ॥ १२० (ख) ॥

पुनि सप्रेम बोलेउ खगराऊ । जौ कृपाल मोहि ऊपर भाऊ ॥

नाथ मोहि निज सेवक जानी । सप्त प्रस्न मम कहहु बखानी ॥
 प्रथमहिं कहहु नाथ मतिधीरा । सब ते दुर्लभ कवन सरीरा ॥
 बड़ दुख कवन कवन सुख भारी । सोउ संछेपहिं कहहु बिचारी ।
 संत असंत मरम तुम्ह जानहु । तिन्ह कर सहज सुभाव बखानहु ॥
 कवन पुन्य श्रुति बिदित बिसाला । कहहु कवन अघ परम कराला ॥
 मानस रोग कहहु समुझाई । तुम्ह सबग्य कृपा अधिकाई ।
 तात सुनहु सादर अति प्रीती । मैं संछेप कहउँ यह नीती ॥
 नर तन सम नहिं कवनिउ देही । जीव चराचर जाचत तेही ।
 नरक स्वर्ग अपबर्ग निसेनी । ग्यान बिराग भगति सुभ देनी ।
 सो तनु धरि हरि भर्जाहिं न जे नर । होहिं बिषय रत मद मंद तर ॥
 काँच किरिच बदलैं ते लेहीं । कर ते डारि परस मनि देहीं ।
 नहिं दरिद्र सम दुख जग माहीं । संत मिलन सम सुख जग नाहीं ।
 पर उपकार बचन मन काया । संत सहज सुभाउ खगराया ॥
 संत सहहिं दुख पर हित लागी । पर दुख हेतु असंत अभागी ॥
 भूर्ज तरू सम संत कृपाला । परहित निति सह बिपति बिसाला ।
 सन इव खल पर बंधन करई । खाल कढ़ाई बिपति सहि मरई ॥
 खल बिनु स्वारथ पर अपकारी । अहि मूषक इव सुनु उरगारी ॥
 पर संपदा बिनासि नसाहीं । जिमि ससि हति हिम उपल बिलाहीं ॥
 दुष्ट उदय जग आरति हेतू । जथा प्रसिद्ध अधम ग्रह केतू ॥
 संत उदय संतत सुखकारी । बिस्व सुखद जिमि इंदु तमारी ॥
 परम धर्म श्रुति बिदित अहिंसा । पर निंदा सम अघ न गरीसा ॥

हर गुर निदक दादुर होई । जन्म सहस्र पाव तन सोई ।
 द्विज निदक बहु नरक भोग करि । जग जनमइ बायस सरीर धरि ॥
 सुर श्रुति निदक जे अभिमानी । रौरव नरक परहिं ते प्राणी ॥
 होहिं उलूक संत निदा रत । मोह निसा प्रिय ग्यान भानु गत ।
 सब कै निदा जे जड़ करहीं । ते चमगादुर होइ अवतरहीं ॥
 सुनहु तात अब मानस रोगा । जिन्ह ते दुख पावहिं सब लोगा ।
 मोह सकल व्याधिन्ह कर मूला । तिन्ह ते पुनि उपजहिं बहु सूला
 काम बात कफ लोभ अपारा । क्रोध पित्त नित छाती जारा ॥
 प्रीति करहिं जौं तीनिउ भाई । उपजइ सन्यपात दुखदाई ॥
 बिषय मनोरथ दुर्गम नाना । ते सब सूल नाम को जाना ॥
 ममता दादु कंडु इरपाई । हरष बिषाद गरह बहुताई ।
 पर सुख देखि जरनि सोइ छई । कुष्ट दुष्टता मन कुटिलई ।
 अहंकार अति दुखद डमरुआ । दंभ कपट मद मान नेहरुआ ।
 तृष्णा उदरवृद्धि अति भारी । त्रिबिधि ईषना तरुन तिजारी ॥
 जुग बिधि ज्वर मत्सर अबिवेका । कहँ लागि कहौं कुरोग अनेका ॥
 दो०— एक व्याधि बस नर मरहिं ए असाधि बहु व्याधि ।

पीड़हि सतत जीव कहुँ सो किमि लहे समाधि ॥ १२१ (क) ॥

नेम धर्म आचार तप ग्यान जग्य जप दान ।

भेषज पुनि कोटिन्ह नहिं रोग जाहिं हरिजान ॥ १२१ (ख) ॥

एहि बिधि सकल जीव जग रोगी । सोक हरष भय प्रीति बियोगी ॥

मानस रोग कछुक मैं गाए । हहिं सब के लखि बिरलेन्ह पाए ॥
 जाने ते छीजहिं कछु पापी । नास न पावहिं जन परितापी ॥
 बिषय कुपथ्य पाइ अंकुरे । मुनिहु हृदयँ का नर बापुरे ॥
 राम कृपाँ नासहिं सब रोगा । जाँ एहि भाँति बनै संजोगा ॥
 सदगुर बैद बचन बिस्वासा । संजम यह न बिषय कै आसा ॥
 रघुपति भगति सजीवन मूरी । अनूपान श्रद्धा मति पूरी ॥
 एहि बिधि भलेहिं सो रोग नसाहीं । नाहिं त जतन कोटि नहिं जाहीं ॥
 जानिअ तब मन बिरुज गोसाँई । जब उर बल बिराग आधकाई ॥
 सुमति छुधा बाढ़इ नित नई । बिषय आस दुर्बलता गई ॥
 बिमल ग्यान जल जब सो नहाई । तब रह राम भगति उर छाई ॥
 सिव अज सुक सनकादिक नारद । जे मुनि ब्रह्म बिचार बिसारद ॥
 सब कर मत खगनायक एहा । करिअ राम पद पंकज नेहा ॥
 श्रुति पुरान सब ग्रंथ कहाहीं । रघुपति भगति बिना सुख नाहीं ॥
 कमठ पीठ जामहिं बरु बारा । बंध्या सुत बरु काहुहिं मारा ॥
 फूलहिं नभ बरु बहुबिधि फूला । जीव न लह सुख हरि प्रतिकूला ॥
 तृषा जाइ बरु मृगजल पाना । बरु जामहिं सस सीस बिषाना ॥
 अंधकारु बरु रबिहिं नसावै । राम बिमुख न जीव सुख पावै ॥
 हिम ते अनल प्रगट बरु होई । बिमुख राम सुख पाव न कोई ॥
 दो० — बारि मथै घृत होइ बरु सिकता ते बरु तेल ।

बिनु हरि भजन न भव तरिअ यह सिद्धांत अपेल ॥ १२२ (क) ॥

ममकहि करइ बिरंचि प्रभु अजहि मसक ते हीन ।

अस बिचारि तजि संसय रामहि भजहि प्रबीन ॥ १२२ (ख) ॥

श्लोक - विनिश्चितं वदामि ते न अन्यथा वचांसि मे ।

हरिं नरा भजन्ति येऽतिदुस्तरं तरन्ति ते ॥ १२२ (ग) ॥

कहेउँ नाथ हरि चरित अनूपा । ब्यास समास स्वमति अनुरूपा ॥

श्रुति सिद्धांत इहइ उरगारी । राम भजिअ सब काज बिसारी ॥

प्रभु रघुपति तजि सेइअ काही । मोहि से सठ पर ममता जाही ॥

तुम्ह बिग्यानरूप नहिं मोहा । नाथ कीन्हि मो पर अति छोहा ॥

पूँछिहु राम कथा अति पावनि । सुक सनकादि संभु मन भावनि ॥

सत संगति दुर्लभ संसारा । निमिष दंड भरि एकउ बारा ॥

देखु गरुड़ निज हृदयँ बिचारी । मैं रघुबीर भजन अधिकारी ॥

सकुनाधम सब भाँति अपावन । प्रभु मोहि कीन्ह बिदित जग पावन ।

दो०— आजु धन्य मैं धन्य अति जद्यपि सब बिधि हीन ।

निज जन जानि राम मोहि संत समागम दीन ॥ १२३ (क) ॥

नाथ जथामति भाषेउँ राखेउँ नहिं कछु गोइ ।

चरित सिंधु रघुनायक थाह कि पावइ कोइ ॥ १२३ (ख) ॥

सुमिरि राम के गुन गन नाना । पुनि पुनि हरष भुसुंड़ि सुजाना ॥

महिमा निगम नेति करि गाई । अतुलित बल प्रताप प्रभुताई ॥

सिव अज पूज्य चरन रघुराई । मो पर कृपा परम मृदुलाई ॥

अस सुभाउ कहँ सुनउँ न देखउँ । केहि खगेस रघुपति सम लेखउँ ॥

साधक सिद्ध बिमुक्त उदासी । कबि कोबिद कृतग्य संन्यासी ॥
 जोगी सूर सुतापस ग्यानी । धर्म निरत पंडित बिग्यानी ॥
 तरहिं न बिनु सेएँ मम स्वामी । राम नमामि नमामि नमामी ॥
 सरन गएँ मो से अघ रासी । होहिं सुद्ध नमामि अबिनासी ॥
 दो०— जासु नाम भव भेषज हरन घोर त्रय सूल ।

सो कृपाल मोहि तो पर सदा रहउ अनुकूल ॥ १२४ (क) ॥

सुनि भुसुंडि के बचन सुभ देखि राम पद नेह ।

बोलेउ प्रेम सहित गिरा गरुड़ बिगत संदेह ॥ १२४ (ख) ॥

मैं कृतकृत्य भयउँ तव बानी । सुनि रघुबीर भगति रस सानी ॥
 राम चरन नूतन रति भई । माया जनित बिपति सब गई ॥
 मोह जलधि बोहित तुम्ह भए । मो कहँ नाथ बिबिध सुख दए ॥
 मो पहिं होइ न प्रति उपकारा । बंदउँ तव पद बारहिं बारा ॥
 पूरन काम राम अनुरागी । तुम्ह सम तात न कोउ बड़भागी ॥
 संत बिटप सरिता गिरि धरनी । पर हित हेतु सबन्ह कै करनी ॥
 संत हृदय नवनीत समाना । कहा कबिन्ह परि कहै न जाना ॥
 निज परिताप द्रवइ नवनीता । पर दुख द्रवहिं संत सुपुनीता ॥
 जीवन जन्म सुफल मम भयऊ । तव प्रसाद संसय सब गयऊ ॥
 जानेहु सदा मोहि निज किंकर पुनि पुनि उमा कहइ बिहंगबर ॥
 दो०— तासु चरन सिरु चाइ करि प्रेम सहित मतिधीर ।

गयउ गरुड़ बैकुंठ तब हृदयँ राखि रघुबीर ॥ १२५ (क) ॥

गिरिजा संत समागम सम न लाभ कछु आन ।

बिनु हरि कृपा न होइ सो गावहिं बेद पुरान ॥ १२५ (ख) ॥
 कहेउँ परम पुनीत इतिहासा । सुनत श्रवन छूटहिं भव पासा ॥
 प्रनत कल्पतरु करुना पुंजा । उपजइ प्रीति राम पद कंजा ॥
 मन क्रम बचन जनित अघ जाई । सुनहिं जे कथा श्रवन मन लाई ॥
 तीर्थाटन साधन समुदाई । जोग बिराग ग्यान निपुनाई ॥
 नाना कर्म धर्म ब्रत दाना । संजम दम जप तप मख नाना ॥
 भूत दया द्विज गुर सेवकाई । बिद्या बिनय बिबेक बड़ाई ॥
 जहँ लगि साधन बेद बखानी । सब कर फल हरि भगति भवानी ॥
 सो रघुनाथ भगति श्रुति गाई । राम कृपाँ काहूँ एक पाई ॥
 दो०—मुनि दुर्लभ हरि भगति नर पावहिं बिनहिं प्रयास ।

जे यह कथा निरंतर सुनहिं मानि बिस्वास ॥ १२६ ॥
 सोइ सर्वग्य गुनी सोइ गयाता । सोइ महि मंडित पंडित दाता ॥
 धर्म परायन सोइ कुल त्राता । राम चरन जा कर मन राता ॥
 नीति निपुन सोइ परम सयाना । श्रुति सिद्धांत नीक तेहिं जाना ॥
 सोइ कबि कोबिद सोइ रनधीरा । जो छल छाड़ि भजइ रघुबीरा ॥
 धन्य देस सो जहँ सुरसरी । धन्य नारि पतिव्रत अनुसरी ॥
 धन्य सो भूपु नीति जो करई । धन्य सो द्विज निज धर्म न टरई ॥
 सो धन धन्य प्रथम गति जाकी । धन्य पुन्य रत मति सोइ पाकी ॥
 धन्य घरी सोइ जब सतसंगा । धन्य जन्म द्विज भगति अभंगा ॥

दो०— सो कुल धन्य उमा सुनु जगत पूज्य सुपुनीत ।

श्रीरघुबीर परायन जेहि नर उपज बिनीत ॥ १२७ ॥
मति अनुरूप कथा मैं भाषी । जद्यपि प्रथम गुप्त करि राखी ॥
तव मन प्रीति देखि अधिकारि । तब मैं रघुपति कथा सुनाई ॥
यह न कहिअ सठही हठसीलहि । जो मन लाइ न सुन हरि लीलहि ॥
कहिअ न लोभिहि क्रोधिहि कामिहि । जो न भजइ सचराचर स्वामिहि ॥
द्विज द्रोहिहि न सुनाइअ कबहूँ । सुरपति सरिस होइ नृप जबहूँ ॥
राम कथा के तेइ अधिकारी । जिन्ह के सत संगति अति प्यारी ॥
गुर पद प्रीति नीति रत जेई । द्विज सेवक अधिकारी तेई ॥
ता कहँ यह बिसेष सुखदाई । जाहि प्रानप्रिय श्रीरघुराई ॥
दो०— राम चरन रति जो चह अथवा पद निर्बान ।

भाव सहित सो यह कथा करउ श्रवन पुट पान ॥ १२८ ॥
राम कथा गिरिजा मैं बरनी । कलि मल समनि मनोमल हरनी ॥
संसृति रोग सजीवन मूरी । राम कथा गावहिं श्रुति सूरी ॥
एहि महँ रुचिर सत सोपाना । रघुपति भगति केर पंथाना ॥
अति हरि कृपा जाहि पर होई । पाउँ देइ एहिं मारग सोई ॥
मन कामना सिद्धि नर पावा । जे यह कथा कपट तजि गावा ॥
कहहिं सुनहिं अनुमोदन करहीं । ते गोपद इव भवनिधि तरहीं ॥
सुनि सब कथा हृदय अति भाई । गिरिजा बोली गिरा सुहाई ॥
नाथ कृपाँ मम गत संदेहा । राम चरन उपजेउ नव नेहा ॥

दो०—मैं कृतकृत्य भइऊँ अब तव प्रसाद बिस्वेस।

उपजी राम भगति दूढ़ बीते सकल कलेस॥१२१॥
 यह सुभ संभु उमा संबादा । सुख संपादन समन बिषादा ॥
 भव भंजन गंजन संदेहा । जन रंजन सज्जन प्रिय एहा ॥
 राम उपासक जे जग माहीं । एहि सम प्रिय तिन्ह केँ कछु नाहीं ॥
 रघुपति कृपाँ जथामति गावा । मैं यह पावन चरित सुहावा ॥
 एहिं कलिकाल न साधन दूजा । जोग जग्य जप तप ब्रत पूजा ॥
 रामहि सुमिरिअ गाइअ रामहि । संतत सुनिअ राम गुन ग्रामहि ॥
 जासु पतित पावन बड़ बाना । गावहिं कबि श्रुति संत पुराना ॥
 ताहि भजहि मन तजि कुटिलाई । राम भजै गति केहिं नहिं पाई ॥

छं०—पाई न केहिं गति पतित पावन राम भजि सुनु सठ मना।

गनिका अजामिल ब्याध गीध गजादि खल तारे घना ॥
 आभीर जमन किरात खस स्वपचादि अति अघरूप जे ।
 कहि नाम बारक तेपि पावन होहिं राम नमामि ते ॥
 रघुबंस भूषन चरित यह नर कहहिं सुनिहिं जे गावहीं ।
 कलि मल मनोमल धोइ बिनु श्रम राम धाम सिधावहीं ॥
 सत पंच चौपाई मनोहर जानि जो नर उर धरै ।
 दारुन अबिद्या पंच जनित बिकार श्री रघुबर हरै ॥
 सुंदर सुजान कृपा निधान अनाथ पर कर प्रीति जो ।
 सो एक राम अकाम हित निर्बानप्रद सम आन को ॥

जाकी कृपा लवलेस ते मतिमंद तुलसीदासहूँ।
 पायो परम बिश्रामु राम समान प्रभु नाहीं कहूँ॥
 दो०— मो सम दीन न दीन हित तुम्ह समान रघुबीर।
 अस बिचारि रघुबंस मनि हरहु बिषम भव भीर॥ १३० (क)॥
 कामिहि नारि पिआरि जिमि लोभिहि प्रिय जिमि दाम।
 तिमि रघुनाथ निरंतर प्रिय लागहु मोहि राम॥ १३० (ख)॥
 श्लोक—यत्पूर्वं प्रभुणा कृतं सुकविना श्रीशम्भुना दुर्गमं
 श्रीमद्रामपदाब्जभक्तिमनिशं प्राप्त्यै तु रामायणम्।
 मत्वा तद्रघुनाथनामनिरतं स्वान्तस्तमःशान्तये
 भाषाबद्धमिदं चकार तुलसीदासस्तथा मानसम्॥ १॥
 पुण्यं पापहरं सदा शिवकरं विज्ञानभक्तिप्रदं
 मायामोहमलापहं सुविमलं प्रेमाम्बुपूरं शुभम्।
 श्रीमद्रामचरित्रमानसमिदं भक्त्यावगाहन्ति ये
 ते संसारपतङ्गघोरकिरणैर्दहन्ति नो मानवाः॥ २॥
 मासपारायण, तीसवाँ विश्राम
 नवाह्नपारायण, नवाँ विश्राम

इति श्रीमद्रामचरितमानसे सकलकलिकलुषविध्वंसने
 सप्तमः सोपानः समाप्तः।
 (उत्तरकाण्ड समाप्त)

